

Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

भजन संहिता

पहिला भाग

(भजन १-४१)

१ उ मनई सचमुच धन्य होइ जउन दुस्टन क सलाह न मानी,
अउर पापियन क संग सामिल नाहीं होत ह
अउर ओनकर संग नाहीं रहत ह
जउन परमेस्सर क बरे सम्मान नाहीं दिखावत ह ।

२ उ नीक मनई अहइ जउन यहोवा क उपदेसन स
पिरेम राखत ह ।
उ तउ दिन रात ओन उपदेसन क मनन करत ह ।
३ एहसे उ मनई उ वृच्छ जइसा मजबूत बनत ह
जेका सिंचाई क नहर क किनारे रोपा गवा ह ।
उ उ वृच्छ क नाई बाटइ, जउन छेत्र मँ फल देत
ह

अउ जेकर पत्ता कबहुँ नाहीं मुरझातेन ।
उ जउन भी करत ह सफल ही होत ह ।
४ मुला टुस्ट मनई अइसे नाहीं होतेन ।
दुस्ट मनई उ भूसा क नाई होत हीं जेनका हवा क
झोका उड़ाइ लइ जात ह ।
५ एह बरे दुस्ट मनई निआव क मुकाबला नाहीं कइ
पइहीं ।

सज्जन लोगन क सभा मँ उ पचे दोखी ठहरावा
जइहीं अउर ओन पापी लोगन क बख्सा न
जाइ ।

६ एकर कारण इ बाटइ कि यहोवा सज्जन लोगन
क अगुवाइ करत ह,
मुला दुर्जन लोग खो जाइहीं ।

७ दूसरे देसन क मनइयन काहे एँतना हुल्लइ
मचावत हीं अउर रोवत ह ?
अउर काहे बियर्थ सड्यन्तर रचत हीं ?

२ अइसे देसन क राजा अउर नेता यहोवा अउर
ओकरे चुने भएन राजा क खिलाफ
होइ बरे आपुस मँ एकजुट होइ जात हीं ।

३ उ सबइ नेता लोग कहें, “आवा परमेस्सर स
अउ उ राजा स जेका उ चुनेस ह, हम पचे
एकजुट होइ क विद्रोह करी ।

आवा ओकरे बन्धनन क हम उतारिके फेकि देइ ।”
४ मुला मोर सुआमी, सरग क राजा,
ओन लोगन प हँसत ह ।

५-६ परमेस्सर कोहान ह अउर उ ओनसे कहत ह,
“मई इ मनई क राजा बनवइ बरे चुनेउँ ह ।
उ मोर पवित्तर पहाइ सिय्योन पइ राज्ज करी
अउर इहइ ओन नेता लोगन क डेरावत ह ।”

७ अब मई यहोवा क फरमान क बारे मँ तोहका
बतावत हउँ ।
यहोवा मोसे कहे रहा, “आजु मई तोहार बाप बनत
हउँ

अउर तू आजु मोर पूत बन गवा ह ।
८ अगर तू मोसे मँगब्या, तउ इ सबइ देसन क मई
तोहका दइ देबउँ

अउ इ धरती क सबहिं जन तोहार होइ जइहीं ।
९ तोहरे लगे ओनका बर्बाद करइ क वइसे ही सकती
होइ

जइसे कउनो माटी क भाँड़ी क कउनो लोहे क
डण्डा स चूर चूर कइ देइ ।”

१० एह बरे, हे राजा लोगो, तू पचे बुद्धिमान बना ।
हे सासक लोगो, तू पचे इ पाठे क सीख ल्या ।

११ तू पचे बहोतइ भय स यहोवा क आग्या माना ।
१२ खुद क ओकर क पूत क बिस्सासपात्र देखाँवा ।
वरना उ कोहाइ जाइ अउर तू पचन्क नास कइ देइ ।
असल मँ उ पहिले ही काफी कोहाइ चुका भवा ह ।
मुला जउन परमेस्सर पइ निर्भर करत अहइँ धन्य
होब ।

दाऊद क ओह समइ क गीत जब उ आपन पूत
अबसालोम स दूर पराइ ग रहा ।

३ हे यहोवा, मोरे केतँना ही केतँना दुस्मन
अहइँ,

केतँना लोग मोरे खिलाफ टाड़ होइ ग अहइँ ।

२ केतँना ही लोगन मोर खिलाफ सड्यन्तर रचें,
उ कहत हीं, “परमेस्सर एँकर रच्छा नाहीं
करी ।”

३ मुला यहोवा, तू मोर ढाल अहा ।

जउन मोर सम्मान बा उ तू ही अहा ।

हे यहोवा, तू ही मोर मूँड ऊँच करत अहा ।

४ मई यहोवा क ऊँची अवाजे मँ पुकारबउँ ।

उ आपन पवित्तर पर्वते स मोका जवाब देइ ।

५ मई आराम करइ बरे ओलर सकत हउँ ।

*१ :१ उ मनई ... दिखावत ह उ मनई भाग्यवान ह जउन दुट्टन क सलाह पइ नाहीं चलत ह या पापियन क मारग नाहीं लेत ह या टट्टा करइ वालन क घरे मँ नाहीं रहत ह ।

मई जानत हउँ कि मई जाग जावेउँ, काहेकि यहोवा मोका बचावत अउर मोर रच्छा करत ह ।

६ चाहे हज़ारन सैनिक मोका घेर लेइहीं मुला ओन दुस्मनन स नाही डेराब ।

७ हे यहोवा, उटा !

मोरे परमेस्सर मोका बचावा ।

तू बहोत सक्तीसाली अहा ।

अगर तू मोरे दुस्मनन क मुँहना पइ प्रहार करा, तउ ओनकइ सबहिं दाँतन टूटि जाइहीं ।

५ यहोवा आपन लोगन क रच्छा कइ सकत ह ।

हे यहोवा, तोहरे मनइयन पइ तोहार आसीस रहइ ।

तार स बजइ वाले साज क संग संगीत निर्देसक बरे दाऊद क एक टु गीत ।

१ मोर उत्तम परमेस्सर,

जब भी मई तोहका गोहरावउँ तू मोका जवाब दिहा ।

मोर बिनती क सुना अउर मोहे पइ कृपा करा ।

जब कबहुँ बिपत्तियन मोका घेरेस तू मोका बचाएस ।

२ अरे लोगो, कब तलक तू पचे मोरे बारे मँ बुरे सब्द कहब्या ? तू लोग मोरे बारे मँ कहइ बरे नवा झूठ हेरत रहत अहा ।

ओन झूठन क कहइ स तू लोग परिम रखत ह ।

३ तू पचे जानत अहा कि आपन नेक लोगन क यहोवा सुनत ह ।

जब भी मई यहोवा क पुकारत हउँ, उ मोर पुकार क सुनत ह ।

४ जब भी तोहका कउनो बात क परेसानी होइ, तउ होइ सकत क तोहका किरोध आ जाइ, मुला पाप जिन कर्या ।

जब तू आपन बिच्छुना पइ जा, ओन बातन पइ बिचार करा अउ सांत होइ जा ।

५ ठीक तरह बलि क अर्पण करा

अउ यहोवा पइ भरोसा रखा ।

६ बहोत स लोग कहत हीं, “परमेस्सर क नेकी हम पचन्क क कउन देखाँ ?

हे यहोवा, आपन प्रकास स चमकत मुँहना क प्रकास हम पचन पइ चमकावा ।”

७ हे यहोवा, तू मोका बहोत खुस बनाइ दिहा ।

कटनी क समइ भरपूर फसल अउ दाखरस पाइके जब हम पचे आनन्द अउ खुसी मनाइत ह ओसे भी कहुँ जियादा खुस अब मई अहउँ ।

८ मई बिच्छुना पइ ओलरत हउँ अउर सान्ति स सोवत हउँ ।

काहेकि यहोवा, तू ही मोका सुरच्छित कइके सोवइ बरे ओलारत ह ।

बाँसुरी क बजनिया निर्देसक बरे दाऊद क गीत ।

१ हे यहोवा, मोरे सब्द क सुना अउर तू ओकर सुध ल्या जेका तोका कहइ क मई जतन करत हउँ ।

२ हे मोरे राजा, मोर परमेस्सर मोर दुहाइ पइ धियान द्या,

काहेकि मई तोहसे ही पराथना करत हउँ ।

३ हे यहोवा, हर भिसारे तोहका, मई आपन भेंटन क अर्पण करत हउँ ।

तू ही मोर सहायक अहा ।

मोर निगाह तोहे पइ लागि अहइ अउर तू ही मोर पराथना हर भिसारे सुनत अहा ।

४ तू अइसा परमेस्सर नाही जउन झूठे देवतन क नाई दुट्टता क चाहत ह ।

बद लोग तोहरे चारिहुँ कइती नाही रहइ सकतेन !

५ सेखी हाँकइ वाला लोग तोहार समन्वा नाही रुक सकतेन

जउन दुस्तता करत ह तू ओनसे नफरत करत ह ।

६ जउन झूठ बोलत हीं ओनका तू नस्ट करत ह ।

यहोवा अइसेन मनइयन स घिना करत ह, जउन दूसर लोगन क नोस्कान पहुँचावइ क सइयन्तर रचत रहत हीं ।

७ मुला हे यहोवा, तोहरी अपार करुणा स मई तोहरे मन्दिर मँ आउब ।

हे यहोवा, मोका तोहार डर अहइ मई सम्मान तोहका देत अहउँ ।

एह बरे मई तोहरे पवित्तर मन्दिर कइती निहुरिके तोहार पइलगी करब ।

८ हे यहोवा, तू मोका आपन नेकी क राह देखाँवा ।

तू आपन राह क मोरे समन्वा सोझ करा

काहेकि मई दुस्मनन स

घिरा भवा अहउँ ।

९ उ सबइ लोग फुरइ नाही बोलतेन ।

उ सबइ लवार अहइ, जउन फुरइ क तोड़त मरोड़त रहत हीं ।

ओनकर मुँह खुली कबर क नाई अहइ ।

उ सबइ अउरन स उत्तम चिकनी-चुपरी बातन करत उ पचे ओनका बस जालि मँ फँसावा चाहत हीं ।

१० हे परमेस्सर, ओनका सजा द्या ।

ओनकर आपन ही जालन मँ ओनका अरझइ द्या ।

इ सबइ लोग तोहरे खिलाफ होइ ग अहइँ,
ओनका ओनकर आपन ही बहोत स पापन क सजा
द्या ।

११ मुला जउन परमेस्सर मँ आस्था धरत रहत हीं,
उ सबइ प्रसन्न होई अउ उ सबइ सदा सदा
ही आनन्दित रहई ।

हे परमेस्सर, तू ओनकर रच्छा करा अउर ओनका
सक्ती द्या जउन लोग तोहरे नाउँ स पिरम
राखत हीं ।

१२ हे यहोवा, तू निहचय ही धर्मी क आसिस देत ह ।
आपन कृपा स तू ओन पचन्क एक टु बड़की ढाल
बनिके फुन ढक लेत ह ।

सौमिनिथ सैली क तार वाद्य क संग
निर्देसक बरे दाऊद क एक टु गीत ।

६ १ हे यहोवा, जब तू किरोध मँ होब्या तउ मोका
सजा मत द्या ।

मोका मत सुधारा जब तू बहोत कोहाइ भवा ह्वा ।

२ हे यहोवा, मोहे प दया करा ।

मइँ रोगी अउ दुर्बल अहउँ ।

मोरे बेरामियन क हर ल्या ।

मोर हाइ काँपत हीं ।

३ मोर समूचा देह थर-थर काँपत ह ।

हे यहोवा, मोर भारी दुःख तू कब तलक रखब्या ।

४ हे यहोवा, मोका फुन स बलवान करा ।

तू महा दयावान अहा, मोर रच्छा करा ।

५ मेरे भएँ लोग तोका आपन कब्रन मँ याद नाहीं
करतेन ।

मउत क देस मँ उ पचे तोहार स्तुति नाहीं करतेन ।
एह बरे मोका बचावा ।

६ हे यहोवा, सारी रात मइँ तोहका पुकारत रहत
हउँ ।

मोर बिछउना मोरे आँसुअन स भीज गवा ह ।

मोरे बिछउना स आँसू टपकत रहत हीं ।

तोहरे बरे मइँ रोवत भवा छीन होइ गवा हउँ ।

७ मोर दुस्मनन मोका बहुतेरा दुःख दिहन ।

इ मोका सोक मँ डाइके अउर बहोत दुःखी कइ
डाएन अउर अब मोर अँखियन बिलखइ स
थकी भइ हारी अउर दुर्बल अहइँ ।

८ अरे ओ दुर्जन लोगो, तू मोसे दूर हटा ।

काहेकि यहोवा मोका रोवत भवा सुनि लिहस ह ।

९ मोर बिनती यहोवा क काने तलक पहुँच चुकी
बाटइ

अउर मोरी पराथना क सुनिके यहोवा जवाब दइ
दिहस ह ।

१० मोर सबहिं दुस्मनन डर जाई अउ निरास
होइहीं ।

कछू अचानक ही घटित होइ अउर उ फुन स
अपमानित कीन्ह जाइहीं ।

दाऊद क एक भजन गीत: जेका उ यहोवा बरे
गाएस । इ गीत बिन्यामीन परिवार समूह क
कोस क पूत साऊल क बारे मँ अहइ ।

१ हे मोर यहोवा परमेस्सर, मोका तोहे प
७ भरोसा बा ओन मनइयन स तू मोर रच्छा
कर, जउन मोरे पाछे पड़ा अहइ ।

मोका तू बचाइ ल्या ।

२ अगर तू मोका नाहीं बचउल्या तउ मोर दसा उ
निरीह गोरू क नाई होइ, जेका कउनो सेर
धइ दबोच लेत ह ।

उ मोका घेराइके लइ जाइ कउनो भी मनई मोका
नाहीं बचाइ पाइ ।

३ हे मोर यहोवा परमेस्सर, कउनो पाप करइ क मइँ
दोखी नाहीं हउँ मइँ तउ कउनो भी पाप नाहीं
किहेउँ ।

४ मइँ आपन मीतन क संग बुरा नाहीं किहेउँ
अउर आपन मीत क दुस्मनन क भी मइँ मदद नाहीं
किहेउँ ।

५ मुला एक दुस्मन मोका पाछे खदेरत बाटइ उ मोर
हत्या करइ-चाहत ह ।

उ दुस्मन चाहत ह कि मोर जिन्नगी क धरती पइ
रउँद डावइ

अउर मोर आतिमा क धूरि मँ मिलाइ देइ ।

६ यहोवा उठा, अउर आपन किरोध मोर दुस्मन क
बिरुद्ध परगट करा ।

मोरे बरे निआव करा

जेकर माँग तू हमेसा करत रहा ह ।

७ हे यहोवा, मनइयन क निआउ करा ।

आपन चारिहुँ कइँती क रास्ट्र क बटोरा अउ
मनइयन क निआव करा ।

८ हे यहोवा, आपन निआव क कुर्सी पइ बइटा ।

आपन निअरे क देसन क इकट्टा करा अउर
ओनका निआव करा

यहोवा मइँ निर्दोख अहउँ, मोका निआव द्या जेका
मइँ हकदार अहउँ ।

९ दुर्जन क दण्ड द्या अउर सज्जन क मदद करा ।

हे परमेस्सर, तू उत्तिम अहा ।

तू अन्तर्जामी अहा ।

तू तउ मनइयन क हिरदइ मँ निहारि सकत अहा ।

१० जेनकर मन सच्चा अहइँ, परमेस्सर ओन
मनइयन क मदद करत ह ।

एह बरे उ मोर भी मदद करी ।
 ११ परमेस्सर उत्तिम निआवकर्ता अहइ ।
 उ कबहुँ भी आपन किरोध परगट कइ देइ ।
 १२ परमेस्सर जब कउनो निर्णय लइ लेत ह,
 तउ फिन आपन मन नाहीं फेरत ।
 १३ ओहमाँ मनइयन क सजा देइ क छमता बाटइ ।
 उ मउत क सब सामान साथे रखे बाटइ ।
 १४ कछू अइसे लोग होत हीं जउन हमेसा कुकर्मन
 क जोजना बनावत रहत हीं ।
 अइसेन ही लोग गुप्त सडचन्त्र रचत रहत हीं ।
 अउर झूठ बोलत रहत हीं ।
 १५ उ पचे दूसर लोगन क जालि माँ फाँसइ अउर
 नोस्कान पहुँचावइ क जतन करत रहत हीं ।
 मुला आपने ही जालि माँ फाँसिके उ पचे नोस्कान
 उटइहीं ।
 १६ उ पचे आपन ही कर्मे क उचित सजा पइहीं ।
 उ पचे दूसर लोगन क संग कूर रहेन ।
 मुला जइसे ओनका चाही वइसेन ही फल पइहीं ।
 १७ मइँ यहोवा क जस गावत हउँ, काहेकि उ उत्तिम
 अहइ ।
 मइँ यहोवा क सबन त ऊँच नाउँ क बड़कइ करत
 हउँ ।

गित्तीथ क संगत पइ संगीत निर्देसक
 बरे दाऊद क एक ठु पद ।

८ हे यहोवा, हमार सुआमी, तोहार नाउँ सारी
 भुइँया पइ बहोतइ अदभुत बाटइ ।
 तोहार नाउँ सरगे में हर कईती तोहका बड़कइ देत
 बाटइ ।
 २ लरिकन अउ नान्ह गदेलन क मुँहन स, तोहरी
 बड़कइ क गीत गावा जात हीं ।
 तू आपन दुस्मनन क चुप करावइ माँ अइसा करत
 ह ।
 ३ हे यहोवा, जब मोर निगाह अकासे पइ पड़त ह,
 जेका तू आपन हाथे स रच्या ह ।
 अउर जब मइँ चाँद तारन क लखत हउँ जउन
 तोहार रचना बाटइ, तउ मइँ अचम्भा स भरि
 जात हउँ ।
 ४ मनइयन तोहरे बरे काहे एँतना महत्वपूर्ण होइ
 गएन ?
 तू ओनका काहे बरे सुमिरत अहा ?
 मनई क पूत तोहरे बरे काहे महत्वपूर्ण बाटइ ?
 काहे तू ओन पइ धियान तलक देत अहा ?
 ५ मुला तोहरे बरे मनई महत्वपूर्ण अहइ !

तू मनई क देवता क प्रतिरूप बनाया ह, अउ
 ओनके मूँडे पइ महिमा अउ सम्मान क मुकुट
 धरे अहा ।
 ६ तू आपन सूस्टि क जउन कछू भी रच्या ह
 मनइयन क ओकर हकदार बनाया ह ।
 ७ मनई भेड़िन पइ, गोरू धने पइ अउ जंगल क
 सबहिँ हिंसक जन्तुअन पइ राज्ज करत ह ।
 ८ उ अकासे माँ पँछियन पइ
 अउ समुदर माँ तैरत भए जलचरन पइ राज्ज करत
 ह ।
 ९ हे यहोवा, हमार सुआमी, सारी धरती पइ तोहार
 नाउँ बहोतइ अदभुत अहइ ।

अलामौथ बैन राग पइ बनावा गवा
 दाऊद क पद: संगीत निर्देसक बरे ।

९ मइँ आपन सम्पूर्ण मन स यहोवा क स्तुति
 करत हउँ ।
 हे यहोवा, तू जउन अदभुत कर्म किहे अहा मइँ
 ओन सबन्क वर्णन करबउँ ।
 २ तू ही मोका एँतना आनन्द माँ रहइवाला बनाया
 ह ।
 हे परम परमेस्सर, मइँ तोहरे नाउँ क बड़कई क
 गीत गावत हउँ ।
 ३ जब मोर दुस्मन मोसे पलटिके मोरे खिलाफ होत
 हीं,
 तब परमेस्सर ओनकर पतन करत ह अउ उ पचे
 बिलाइ जात हीं ।
 ४ तू सच्च निआव करवइया अहा ।
 तू आपन सिंहासन पइ निआव करवइया क रूप माँ
 बिराजा ।
 तू मोरे मुकदमा क सुनवाई किह्या अउर मोर
 निआव किहा ।
 ५ हे यहोवा, तू ओन दुस्मनन क कठोर झिड़की
 दिहा अउ हे यहोवा,
 तू ओन दुस्टन क नास किहा ।
 ओनकइ नाउँ तू जिअत मनइयन क सूची स हमेसा
 हमेसा बरे मेट दिहा ।
 ६ दुस्मन नस्ट होइ गवा ह !
 हे यहोवा, तू ओनकर नगर मेट दिहा ह ।
 ओनकर भवन अब सिरिफ खण्डहर होइ गवा अहइ
 ओन बुरे मनइयन क हम पचन्क सुमरन तलक
 दिआवइ क कछू भी नाहीं बचा बाटइ ।
 ७ मुला यहोवा, तोहार सासन अविनासी अहइ ।
 यहोवा आपन राज्ज क सक्तीसाली बनाएस ।
 उ दुनिया माँ निआव लिआवइ बरे इ किहस ।

८ यहोवा धरती क सबहिं मनइयन क निस्पच्छ, होइके निआव करत ह ।

यहोवा सबहिं जातियन क बे पच्छपात क निआव करत ह ।

९ यहोवा दलित अउ सोसितन क सरण क ठउर अहइ ।

विपत्ति क समइ

उ एक सुदृढ़ किला अहइ ।

१० जउन तोहे पइ भरोसा राखत हीं, तोहार नाउँ जानत हीं ।

हे यहोवा, अगर कउनो तोहरे दुआरे पइ आइ जाइ तउ बिना मदद पाए लउटत नाहीं ।

११ अरे ओ सिष्योन क निवासी लोगो यहोवा क गीत गावा जउन सिष्योन मँ विराजत अहइ ।

सबहिं जातियन क ओन बातन क विसय मँ बतावा जउन बड़की बातन यहोवा कहेस ह ।

१२ यहोवा हत्यारन क सज्जा देत ह अउर ओनका याद रखत ह जउन ओकरे लगे मदद बरे जात ह ।

उ दीन लोगन क नाहीं भूलत जउन ओकरे लगे सहायता बरे रोवत अहइ ।

१३ यहोवा क स्तुति मइ गाएउँ ह: "हे यहोवा, मोहे पइ दाय़ा करा ।

लखा, कउने तरह मोरे सतुरु मोका दु:ख देत हीं । 'मउत क दुआर' स तू मोका बचाइ ल्या ।

१४ जेहमे यहोवा यरूसलेम क फाटक पइ मइँ तोहार स्तुति क गीत गाइ सकउँ ।

मइँ बहोतइ प्रसन्न होब काहेकि तू मोका बचाइ लिहा ।"

१५ दूसर जातियन गड़हा खोदेन जेहसे लोग ओनमाँ भहराइ जाई मुला उ पचे आपन ही खने भए गड़हन मँ खुद बिलाइ जइहीं ।

दुट्ट लोग जालि छुपाइ छुपाइके बिछ्यान, जेहसे उ पचे ओहमाँ दूसर लोगन क फाँसि लेई ।

मुला ओनमाँ ओनकर ही गोइ धँसि गएन ।

१६ यहोवा जउन निआव किहस उ ओहसे पहिचाना गवा कि जउन बुरा करम करत हीं ।

उ पचे आपन ही हाथन स कीन्ह भए करम स जाँलि मँ फँस गएन । (हिग्गायोन, सेला)

१७ उ पचे दुर्जन होत हीं, जउन परमेस्सर क बिसरत हीं ।

अइसे लोग मउत क देस जइहीं ।

१८ कबहुँ कबहुँ लागत ह जइसे परमेस्सर दुखियन क पीरा मँ बिसरि जात ह ।

इ अइसा लागत ह जइसे दीन लोग बिना आसा क अहइँ ।

मुला परमेस्सर दीन लोगन क हमेसा हमेसा बरे कबहुँ नाहीं बिसरत ।

१९ हे यहोवा, उठा अउ रास्ट्रन क निआव करा । कहुँ उ पचे इ सोच न बइठईँ उ पचे प्रबल अउ सकतीसाली बाटेन ।

२० मनइयन क पाठ सिखाइ द्या, जेहसे उ पचे जान जाई कि उ पचे बस सिरिफ मनई अहइँ ।

२१ हे यहोवा, तू एतना दूर काहे खड़ा रहत ह ?

कि संकट मँ पड़ा लोग तोहका निहारि नाहीं पउतेन ।

२ अहंकारी दुट्ट जन दुर्बल क दु:ख देत हीं । उ पचे आपन सइयन्तर क रचत रहत हीं ।

३ दुट्ट जन ओन चिजियन पइ घमण्ड करत हीं, जेनकर ओनका गहरी इच्छा अहइ अउ लालची मनई परमेस्सर क कोसत रहत हीं ।

इ तरह दुट्ट देखौवत हीं कि उ पचे यहोवा स घिना करत रहत हीं ।

४ दुट्ट लोग एतना घमण्डी होत हीं कि उ पचे परमेस्सर क पाछे नाहीं चल सकतेन ।

उ पचे खराब खराब जोजना रचत हीं ।

उ पचे अइसा करम करत हीं, जइसे परमेस्सर क कउनो अस्तित्व ही न बाटइ ।

५ दुट्ट जन सदा कुटिल करम करत हीं ।

उ पचे परमेस्सर क विवेक स पूरी व्यवस्था अउ सिच्छन पइ धियान नाहीं देतेन ।

हे परमेस्सर, तोहार सबहिं दुस्मन तोहरे उपदेसन क उपेच्छा करत हीं ।

६ उ पचे सोचत हीं, जइसेन कउनो बुरी बात ओनके संग नही घटि जाइ ।

उ पचे कहत रहत हीं, "हम पचे मउज मँ रहब अउ कबहुँ भी दण्डित नाहीं होब ।"

७ अइसेन दुट्ट क मुँह सदा साप देत रहत ह ।

उ पचे दूसर जन क निन्दा करत हीं अउर काम मँ लिआवइ क सदा ही बुरी बुरी जोजना रचत रहत हीं ।

८ अइसे लोग गुप्त ठउरन मँ लुकान रहत हीं, अउर लोगन क फँसावइ क प्रतीच्छा करत हीं ।

उ पचे लोगन क नस्कान पहुँचावइ खातिर लुकान रहत हीं अउ निरपराधी लोगन क हत्या करत हीं ।

९ दुट्ट जन सिंह क नाई होत हीं जउन ओन गोरून क धरइ क घात मँ रहत हीं ।

जेनका उ पचे खाइ जइहीं ।
 दुट्ट जन दीन लोगन पइ मार करत ही
 ओनकर बनाए भए जालि मँ बेसहारा दीन फँसि
 जात ही ।
 १० दुट्ट जन बार-बार दीनन पइ घात करत
 अउ ओनका दुःख देत ह ।
 ११ एह बरे दीन जन सोचइ लागत ही, “परमेस्सर
 हमका बिसराइ ही दिहस ।
 हमसे तउ परमेस्सर सदा-सदा बरे दूर होइ गवा
 बाटइ ।
 उन कछु भी मोरे संग घटत अहइ, ओहसे परमेस्सर
 वृष्टि फेरि लिहस ह !”
 १२ हे यहोवा, उठा अउर कछु तउ करा !
 हे परमेस्सर, ओन दुट्ट जनन क आपन हाथ
 उठाइके सजा या !
 अउर एँन दीन दुःखियन क जिन बिसरा ।
 १३ दुट्ट जन काहे परमेस्सर क खिलाफ होत ही ?
 काहेकि उ पचे सोचत ही कि परमेस्सर ओनका
 कबहुँ नाही दण्डित करी ।
 १४ हे यहोवा, तू ही अहइ जउन बुरे लोगन दुआरा
 कीन्ह भावा अत्याचार अउर बुरे कामन क
 कउनो स भी जियादा लखत ह ।
 तू एकर बारे मँ कछु कदम उठा ।
 दुःखन स घिरा लोग मदद माँगइ तोहरे लगे आवत
 ही ।
 हे यहोवा, सिरिफ तू ही अनाथ लोगन क सहायक
 अहा, एह बरे ओनकर रच्छा करा ।
 १५ हे यहोवा, दुट्ट जनन क तू नस्ट कइ या ।
 १६ तू ओनका आपन धरती स
 दकैलिके बाहेर करा !
 १७ हे यहोवा, दीन दुःखी लोग जउन चाहत हीं उ
 तू सुनि लिहा ।
 ओनकर पराथना सुना अउर ओनका पूरा करा
 जेनका उ पचे माँगत हीं ।
 १८ हे यहोवा, अनाथ गदेलन क तू रच्छा करा ।
 दुःखी लोगन क अउर जियादा दुःख जिन पावइ
 या ।
 दुट्ट लोगन क तू एँतना भयभीत कइ या कि उ
 पचे हिआँ न टिक पावइ ।
 संगीत निर्देशक बरे दाऊद क पद ।
 १ मइँ यहोवा पइ भरोसा करत हउँ !
 ११ फुन तू मोसे काहे कहत ह कि मइँ पराइके
 कहूँ जाउ ।
 तू कहत अहा मोसे कि, “पँछी क नाई आपन पहाड़े
 पइ उड़ि जा !”

२ दुट्ट जन ओन सिकारी क समान अहइँ ।
 उ पचे अँधियारे मँ लुकात हीं ।
 उ पचे धनुस क डोरी क पाछे हींचत हीं ।
 उ पचे आपन बाणन क साधत हीं अउर उ पचे
 नीक, नेक मनइयन क हिरदइ मँ सोझइ बाण
 छोड़त हीं ।
 ३ धर्मी का कइ सकहीं
 जब समाज क नीव ही तबाह कइ दीन्ह जाइ ?
 ४ यहोवा आपन विसाल पवित्रर मन्दिर मँ
 विराजा बाटइ ।
 यहोवा सरगे मँ आपन सिंहासने पइ बइठत ह ।
 यहोवा सब कछु लखत ह, जउन भी होनी होत ह ।
 यहोवा क अँखिन लोगन क सज्जनाई व दुर्जनाई
 क परखइ मँ लाग रहत हीं ।
 ५ यहोवा धर्मी अउ दुट्ट लोगन क परख करत ह,
 अउर उ ओन लोगन स घिना करत ह जउन हिंसा
 स प्रीति धरत हीं ।
 ६ उ गरम कोयलन अउ बरत भइ गन्धक क बरखा
 क तरह ओन बुरे लोगन पइ गिराई ।
 ओन बुरे लोगन क हींसा मँ बस झुरसत भइ हवा
 बही ।
 ७ मुला यहोवा, तू धर्मी अहा ।
 तोहका अच्छे जन भावत हीं ।
 अच्छे मनई यहोवा क संग रइहीं अउर ओकरे
 मुँहना क दर्सन पइहीं ।

सौमिनिथ क संगत पइ संगीत निर्देशक
 बरे दाऊद क एक टु पद ।

१२ हे यहोवा, मोका बचावा,
 काहेकि सबहिं वफ़ादार अउ दयालु जन
 चला गवा अहइँ ।
 लोग वफ़ादारी क अरथ भूलि गवा बाटइ ।
 २ लोग आपन साथी संगियन स झूठ बोलत हीं ।
 हर कउनो आपन पड़ोसियन क झूठ बोलिके
 चापलूसी करत रहत हीं ।
 ३ यहोवा ओन ओँठन क सी देइ जउन झूठ बोलत
 हीं ।
 यहोवा, ओन जिभियन क काट जउन आपन ही
 बारे मँ डींग हाँकत हीं ।
 ४ अइसे जन सोचत हीं, “हमार झूठ हमका बड़का
 मनई बनइहीं ।
 कउनो भी मनई हमरी जीभ क कारण हमका जीत
 नाहीं पाई ।”
 ५ मुला यहोवा कहत ह:
 “बुरे मनइयन दीन दुर्बलन स चिजियन चुराइ
 लिहन ह ।

उ पचे असहाय दीन जनन स ओनकर चिजियन लइ लिहन ह ।

मुला अब मई ओन हारे थके लोगन क रच्छा टाइ होइके करव ।”

६ यहोवा क वचन फुरइ अहई अउर एतना सुद्ध जइसे आगी में टेघराइ भइ सफेद चाँदी ।

उ सबइ वचन उ चाँदी क तरह सुद्ध अहई, जेका टेघराइ टेघराइ के सात दाई सुद्ध बनावा गवा अहई ।

७ हे यहोवा, बेसहारा जन क सुधि ल्या ।

ओनकइ रच्छा अब अउर सदा सर्वदा करा ।

८ सबइ दुर्जन अकइत हीं अउ बना ठना घूमत हीं ।

मुला उ पचे अइसेन होत हीं जइसे कउनो नकली आभूषण धारन करत ह ।

जउन लखइ मँ कीमती लागत हीं, मुला असलियत मँ बहोतइ सस्ता होत हीं ।

संगीत निर्देशक बरे दाऊद क एक ठु पद ।

१ हे यहोवा, तू कब तलक मोका बिसरा रहब्या ?

कब तलक तू मोका अंगीकार नाहीं करब्या ?

२ तू मोका बिसरि गया इ कब तलक मई सोचउँ ?

आपन हिरदइ मँ कब तलक इ दुःख भोगउँ ?

कब तलक मोर दुस्मन मोका जीतत रइहीं ?

३ हे यहोवा, मोर परमेस्सर, मोर सुनि ल्या !

अउर तू मोरे सवाल क जवाब द्या, मोका जवाब द्या नाहीं तउ मई मरि जावउँ ।

४ साइद मोर सतरु अइसेन हीं कहइ लागेन, “मई ओका पीट दिहउँ ।”

मोर दुस्मन खुस होइहीं कि मोर अंत होइ गवा बाटइ ।

५ हे यहोवा, मई तोहरी करुणा पइ मदद पावइ बरे भरोसा राखेउँ ।

तू मोका बचाइ लिहा अउर मोका सुखी किहा ।

६ मई यहोवा बरे खुसी क गीत गावत हउँ, काहेकि उ मोरे बरे बहोत सी अच्छी बातन किहस ह ।

संगीत निर्देशक बरे दाऊद क पद ।

१४ १ मूरख आपन मने मँ कहत बाटइँ, “परमेस्सर नाहीं अहइ ।”

मूरख लोग तउ अइसे कारज करत हीं जउन भरुस्त अउ घिन स भरा होत हीं ।

ओनमाँ स कउनो भी भला काम नाहीं करत ह ।

२ यहोवा अकासे स मनइयन क लखत ह,

कि कउनो बुद्धिमान मनई ओका मिलि जाइ ।

बुद्धिमान मनई परमेस्सर कइँती मदद पावइ बरे मुड़ि जात ह ।

३ मुला परमेस्सर स मुड़िके सबहिं दूर होइ ग अहई ।

आपुस मँ मिलिके सबहिं लोग पापी होइ ग अहई । कउनो भी मनई नीक काम

नाहीं करत अहइ ।

४ मोरे मनइयन क दुष्ट लोग नस्ट कइ दिहन ।

उ सबइ दुर्जन परमेस्सर क नाहीं जनतेन ।

दुस्टन क लगे खाइ बरे भरपूर भोजन बाटइ ।

इ सबइ लोग यहोवा क उपासना तलक भी नाहीं करतेन ।

५-६ इ सबइ दुस्ट मनई निर्धन क राय सुनइ नाहीं चाहतेन ।

अइसा काहे अहइ ? काहेकि दीन लोग तउ परमेस्सर पइ निर्भर अहई ।

मुला दुटठ लोगन पइ भय छाइ गवा अहइ ।

काहेकि परमेस्सर खरे लोगन क संग अहइ ।

७ सिय्योन पइ कउन जउन इस्राएल क बचावत ह ? उ तउ यहोवा अहइ,

जउन इस्राएल क रच्छा करत ह !

यहोवा क मनइयन क दूर लइ गवा जवा अउर ओनका दबाव डाइके बन्दी बनावा गवा ।

मुला यहोवा आपन मनइयन क वापिस छुड़ाइ लिआइ ।

तब याकूब बहोतइ खुस होइ ।

दाऊद क एक गीत ।

१५ १ हे यहोवा, तोहरे तम्बू मँ कउन समइ बिताई सकत ह ?

कउन व्यक्ति तोहरे पवित्र पर्वते पइ रहि सकत ह ?

२ सिरिफ उहइ मनई जउन खरी जिन्नगी जिअत ह, अउर जउन उत्तिम करमन क करत ह,

अउर जउन हिरदइ स फुरइ बोलत ह ।

उहइ तोहरे पर्वते पइ रह सकत ह ।

३ अइसा मनई अउरन क बारे मँ कबहुँ बुरा नाहीं बोलत ह ।

उ आपन घराने क बुराई नाहीं करत ह ।

४ उ ओन मनइयन क इज्जत नाहीं करत जउन परमेस्सर स घिना राखत हीं ।

अउर उ ओन सबहिं क सम्मान करत ह, जउन यहोवा क सेवक अहई ।

अइसा मनई अगर कउनो वचन देत ह तउ उ उ वचन क पूरा भी करत ह,

जउन उ दिहे रहा ।

५ उ मनई अगर कउनो क धन उधार देत ह
तउ ओह पइ ब्याज नाही लेत ।
उ मनई कउनो निरपराध मनई क
नस्कान पहोंचावइ बरे घूस नाही लेत ।
अगर कउनो मनई उ खरा मनई क तरह जिन्नगी
जिअत ह तउ उ मनई कबहुँ भी ठोकर नाही
खाइहीं ।

दाऊद क एक गीत ।

१६ १ हे परमेस्सर, मोर रच्छा करा, काहेकि मइँ
तोहे पइ निर्भर अहउँ ।
२ मोर यहोवा स निवेदन अहइ, “यहोवा, तू मोर
सुआमी अहा ।
मोरे लगे जउन कछू उत्तिम अहइ
उ सबइ तोहसे ही अहइ ।”
३ यहोवा आपन लोगन क धरती पइ अद्भूत काम
करत ह ।
यहोवा इ देखाँवत ह कि
उ फुरइ ओनसे पिरम करत ह ।
४ मुला जउन दूसर देवतन क पाछे ओनकर पूजा
बरे परात हीं, उ पचे दुःख उठइहीं ।
ओन मूरतियन क जउन रकत अर्पण कीन्ह गवा,
ओनकर ओन बलियन मँ मइँ हीसां नाही
लेब ।
मइँ ओन मूरतियन क नाउँ तलक नाही लेब ।
५ नाही, बस मोर हीसा यहोवा मँ अहइ ।
बस यहोवा स ही मोर अंस अउर मोर पात्र आवत
ह ।
हे यहोवा मोका सहारा द्या अउर मोर हीसा द्या ।
६ मोर हीसा बहोतइ अद्भुत अहइ ।
असल मँ मोरे लगे बहोत स सुन्नर उत्तराधिकार
अहइ ।
७ मइँ यहोवा क गुण गावत हउँ काहेकि उ मोका
गियान दिहस ।
मोरे अन्तर्मन स राति मँ सिच्छन निकरिके आवत
हीं ।
८ मइँ यहोवा क सदा ही आपन सम्मुख राखत हउँ ।
मइँ ओकर दाहिने छोरे
कबहुँ नाही छोड़ब । १
९ इहइ स मोर मन अउर मोर आतिमा बहोतइ
आनन्दित होइ
अउर मोरी देह तलक सुरच्छित रही ।
१० काहेकि, यहोवा, तू मोर प्राण कबहुँ भी मउत
क जगह मँ न तजी ।

तू आपन वफ़दार क कब्र मँ सइइ नाही देव्या ।
११ तू मोका जिन्नगी क राह देखउव्या
जउन मोका तोहार मौजूदगी मँ पूरा आनन्द देत
ह ।
तोहार दाहिन कइँती होब मोका सदा सदा ही
आनन्द देइ ।

दाऊद क पराथना गीत ।

१७ १ हे यहोवा, मोरी पराथना निआव क
खातिर सुना ।
मइँ तोहका ऊँच अवाज स गोहरावत अहउँ ।
मइँ आपन बात ईमानदारी स कहत हउँ ।
तउ कृपा कइके मोर पराथना सुना ।
२ यहोवा तू ही मोर उचित निआव करव्या
तू ही फुरइ क लख सकत अहा ।
३ मोर मन परखइ क तू ओकरे बीच गहिराई मँ
निहारि लिहा ह ।
तू मोरे संग राति भइ रहा तू मोका जाँचा,
अउ तोका मोहे मँ कउनो खोट नाही मिला ।
मइँ कउनो बुरी जोजना नाही रचेउँ रहे ।
४ तोहरे आदेसन क मानइ मँ मइँ कठिन जतन
किहेउँ
जेतँना कि कउनो मनई कइ सकत ह ।
५ मइँ तोहरी राहे पइ चलत रहत हउँ ।
मोर गोड़ तोहरे जिन्नगी क रीति स नाही डुगेन ।
६ हे परमेस्सर, मइँ हर कउनो अवसर पइ तोहका
पुकारेउँ ह अउर तू मोका जवाब दिहा ह ।
तउ अब भी तू मोर सुना ।
७ हे परमेस्सर, तू आपन विस्सासी चलन क
दिखावा
कि तू केतँना अजूबा अहा !
तू ओन लोगन क बचाया जउन ओन लोगन पइ
हमला करत ह
जउन ओन बचइ बरे तोहार सक्ती पइ निर्भर करत
ह ।
८ मोर रच्छा तू आपन आँखी क पुतली क नाई
करा ।
मोका आपन पखना क छाया क खाले तू छुपाइ
ल्या ।
९ हे यहोवा, मोर रच्छा ओन दुट्ट जनन स करा
जउन मोका नस्ट करइ क जतन करत अहइ ।
उ सबइ मोका घेरे अहइँ अउ मोका हानि
पहोंचावइ क परयत्नसील अहइँ ।

१६ :८ मइँ ... छोड़ब जहाँ मोका नाही हिलावइ जाइ सकी काहेकि उ मोर दहिने ओर बाटइ ।

१० दुट्ट लोग घमण्ड क कारण परमेस्सर क बात पइ कान नाहीं लगावत अहइँ।

इ सबइ आपन ही डींग हाँकत रहत हीं।

११ उ सबइ लोग मोरे पाछे पड़ा भवा अहइँ,

अउर अब मई ओनके बीच मँ घिर गवा हउँ।

उ पचे मोह पइ वार करइ क तय्यार टाड़ बाटेन।

१२ उ सबइ दुट्ट जन अइसे अहइँ जइसे कउनो सिंह घात मँ दूसर पसु क मारइ क बइठा होइ।

उ पचे सिंह क नाई झपटइ बरे छुपा रहत हीं।

१३ हे यहोवा, दुस्मन क खिलाफ उठा

अउर ओनका आत्मसर्मपन करइ बरे मज्रबूर करा।

आपनि तरवार उठावा अउ इ सबइ दुट्ट जनन स मोर रच्छा करा।

१४ हे यहोवा, जउन मनई सजीव अहइँ ओनका धरती स दुट्टन क आपन सक्ती स दूर करा।

हे यहोवा, बहुतेरे तोहरे लगे सरण माँगइ आवत हीं।

तू ओनका बहुतायत स भोजन द्या।

ओनकर सन्तानन क परिपूर्ण कइ द्या।

ओनके लगे आपन गदेलन क देइ क बहुतायत स धन होइ।

१५ मोर विनय निआव बरे अहइ।

तउ मई यहोवा क मुँह क दर्सन करब।

हे यहोवा, तोर दर्सन करतइ ही, मई पूरी तरह सन्तुट्ट होइ जावउँ।

यहोवा क दास दाऊद क एक पदः संगीत निर्देशक बरे। दाऊद इ पद यहोवा क बारे मँ उ अवसर पइ लिखे रहा जब यहोवा दाऊद क ओकर सबइ दुस्मन अउ साऊल स ओकर रच्छा किहे रहा।

१८ उ कहस, “यहोवा मोर सक्ती अहइ,
मई तोहसे पिरम करत हउँ।

२ “यहोवा मोर चट्टान, मोर गढ़, मोर सरणस्थल बाटइ।”

मोर परमेस्सर मोर चट्टान अहइ।

मई तोहरी सरण मँ आवा हउँ।

ओकर सक्ती मोका बचावत ह।

यहोवा ऊँचके पहाड़न पइ मोर सरणस्थल अहइ।

३ यहोवा क जउन स्तुति क जोग्य अहइ,

मई गोहराउब

अउर मई आपन दुस्मनन स बचावा जाब।

४ मोर दुस्मनन मोका मारइ क जतन किहन।

मई चारिहूँ कइँती मउत क लसुरी स घिरा अहउँ।

मोका अधर्म क बाढ़ भयभीत कइ दिहस।

५ मोरे चारिहूँ कइँती पाताल क लसुरी रहिन।

अउर मोह पइ मउत क फंदा रहेन।

६ मई घेरा भवा रहेउँ अउर यहोवा क मदद बरे गोहराएउँ।

मई आपन परमेस्सर क गोहराएउँ।

परमेस्सर पवित्तर मन्दिर मँ बिराजा।

उ मोर पुकार अनकेस अउ मदद किहस।

७ तब्बइ भुईया हल गइ अउ थराइ उठी ;

अउ पहाड़न क नेव थराइके हल उठिन

काहेकि यहोवा बहोतइ कोहान रहा।

८ परमेस्सर क नथुना स धुआँ फूटि पड़ा।

परमेस्सर क मुँह स ज्वाला फूटि पड़िन,

अउ ओहसे चिंगारियन छटक गइन।

९ यहोवा सरगे क चीरिके खाले उतरा।

खूब घना करिआ बादर ओकरे गोडे तरे रहेन।

१० उ करूब सरगदूत पइ उड़ि गवा

अउर हवा क पंख पइ सवार होइके ऊँचे आकास मँ उड़ि गवा।[‡]

११ यहोवा खुद क अँधियारे मँ छुपाइ लिहस, ओका अकासे क चँदोबा घेरे रहा।

उ गरजत बादर क खूब घना घटा-टोप मँ लुकान भवा रहा।

१२ फिन, परमेस्सर क तेज बादर फाड़िके निकरा।

बरसा अउ बिजुरियन कौधिन।

१३ यहोवा क उद्घोष नाद अकासे मँ गुँजा।

परम परमेस्सर आपन वाणी क सुनइ दिहस।

फुन अंगारे गिरेन अउ बिजुरियन कौधिन।

१४ यहोवा बाण छोड़ेस अउर दुस्मन बिखराइ गएन।

ओकर अनेक बिजुरी क बज्रन ओनका हराइ दिहन।

१५ हे यहोवा, तू गरज्या अउ मुँह स आँधी बहाया। पानी पाछे हटिके दब गवा

अउ समुदरे क पानी बगइर तले क देखाँइ लाग,

अउर धरती क नेव तलक उधरि गइ।

१६ यहोवा ऊपर अकासे स खाले उतरा अउर मोर रच्छा किहस।

मोका मोरे कस्टन स उबारि लिहस।

१७ मोर सतरु मोहसे कछुँ जियादा ताकतवर रहेन।

उ पचे मोहसे कहुँ जियादा बरिआर रहेन, अउ मोहसे दुस्मनी राखत रहेन।

‡८:१० उ करूब सरगदूर ... उड़ि गवा साब्दिक, “उ करूब पइ चढ़ेस अउर उड़ेस, हवा क पंख पइ ऊँची उड़ान भरत ह।” सव्व “हवा” क अरथ “आतिमा” भी होइ सकत ह।

तउ परमेस्सर मोर रच्छा किहस ।

१८ जब मई विपत्ति मँ रहेउँ, मोर दुस्मनन मोह पइ वार किहन

मुला तबहिं यहोवा मोका सँभारेस !

१९ यहोवा क मोहसे पिरम रहा, तउ उ मोका बचाएस

अउर मोका सुरच्छित ठउरे पइ लइ गवा ।

२० यहोवा मोका आपन अच्छाई क अनुसार इनाम देइ ।

उ मोका मोरे सुद्धता क अनुसार बदल देइ ।

२१ काहेकि मई यहोवा क आग्या क पालन किहेउँ ह !

आपन परमेस्सर यहोवा बरे मई कउनो भी बुरा काम नाहीं किहेउँ ।

२२ मई तउ यहोवा क व्यवस्था विधानन क अउ हुकुमन क हमेसा धियान मँ राखत हउँ !

२३ खुद क मई ओकरे समन्वा पवित्तर राखत हउँ अउ अबोध बना रहत हउँ ।

२४ काहेकि मई अबोध अहउँ !

एह बरे मोका मोर पुरस्कार देइ !

जइसा परमेस्सर लखत ह कि मई कउनो बुरा काम नाहीं किहेउँ, एह बरे उ मोरे बरे उत्तिम चिजियन करी ।

२५ हे यहोवा, तू वफ़ादार लोगन क संग वफ़ादार अहा

अउ खरे लोगनक संग तू आपन क खरा दिखावत ह ।

२६ हे यहोवा, तू सुद्ध लोगन क संग सुद्ध अहा, किन्तु तू दुट्ट लोगन स जियादा चालाक अहा । ॥

२७ हे यहोवा, तू नम्र जनन बरे सहाय अहा, मुला जेनमाँ अहकार भरा अहइ ओन मनइयन क तू बड़ा नाहीं बनइ देत्या ।

२८ उ तू ही अहा जउन मोर दीप बरत ह ।

हे मोरे परमेस्सर तू मोरे अंधकार क जोति मँ बदल देत अहा !

२९ हे यहोवा, तोहरी मदद स, मई फउजियन क संग पराइ सकत हउँ ।

तोहरी ही मदद स, मई दुस्मनन क चहरदीवार फाँद सकत हउँ ।

३० परमेस्सर क विधान पवित्तर अउ उत्तिम अहइ अउ यहोवा क सब्द सच स पूरा होत हीं ।

उ ओका बचावत ह जउन ओकरे भरोसे अहइँ ।

३१ यहोवा क छाँड़ि बस अउर कउन परमेस्सर बाटइ ?

सिरिफ हमरे परमेस्सर क अउर कउन चट्टान अहइ ?

३२ मोका परमेस्सर सक्ति देत ह ।

उ मोर रास्ता आसान बनावत ह ।

३३ परमेस्सर मोरे गोड़न क हिरन क नाई तेज चाल देत ह ।

उ मोका स्थिर बनावत अउर मोका चट्टानी सिखरन स गिरइ स बचावत ह ।

३४ परमेस्सर जुद्ध बरे मोरे बाँहन क प्रसिच्छित करत ह,

एह बरे मई बहोत सक्तीसाली धनुस ॥क मोड़ सकत हउँ अउ तीर छोड़ सकत हउँ ।

३५ हे परमेस्सर, आपन द्वार स मोर रच्छा करा ।

तू मोका आपन दाहिन भुजा स आपन महान सक्ती प्रदान कइके मदद द्या ।

३६ हे परमेस्सर, तू मोरे गोड़े क अउर टखना क मजबूत बनाव

ताकि मई तेज होइके बगइर लड़खड़ाहट क बढ चलउँ ।

३७ फुन आपन दुस्मनन क पाछा करउँ, अउ ओनका धइ सकउँ ।

ओनमाँ स एक क भी बच पावइ देउँ ।

३८ मई आपन दुस्मनन क हराउब ।

ओनमाँ स एक भी फुन टाड़ नाहीं होइ ।

मोर सबहिं दुस्मन मोरे गोड़वा प गिरि जइहीं ।

३९ हे परमेस्सर, तू मोका जुद्ध मँ सक्ती दिहा, अउर मोरे सब दुस्मनन क मोरे समन्वा निहुराइ दिहा ।

४० तू मोरे दुस्मनन क पीठ मोरी कइती फेरि दिहा, ताकि मई ओनका काटि डावउँ जउन मोसे जलन राखत हीं ।

४१ जब मोर दुस्मनन मदद क गोहार लगाएन, ओनका मदद देइ अगवा कउनो नाहीं आवा ।

हिआँ तलक कि उ पचे यहोवा तलक क पुकारेन, मुला यहोवा स ओनका जवाब न मिला ।

४२ मई आपन दुस्मनन क कूट कूट कइ धूरि मँ मिलइ देवउँ, जेका ब्यार उड़ाइ देत ह ।

मई ओनका कुचर दिहेउँ अउर माटी मँ मिलाइ दिहेउँ ।

४३ मोका ओनसे बचाइ ल्या जउन मोसे जुद्ध करत हीं ।

११८ :२६ किन्तु ... चालाक अहा या, तू टेढ़े लोगन पइ मूरखता परगत करब्या ।

११८ :३४ बहोत सक्तीसाली धनुस साब्दिक अरथ, "काँसे क धनुस ।"

मोका ओन जातियन क मुखिया बनाइ द्या,
जेनका मई जानत तलक नाही हउं ताकि उ पचे
मोर सेवा करिहीं।

४४ फिन उ सबइ लोग मोर सुनिहीं अउर मोरे
हुकुमन क मनिहीं,

दूसर रास्ट्रन क लोग मोसे डेरइहीं।

४५ उ पचे विदेसी लोग मोरे समन्वा निहुरिहीं
काहेकि उ पचे मोसे भयमीत होइहीं।

उ पचे भय स थरांत भए आपन छुपा ठउरन स
बाहेर निकारि अइहीं।

४६ यहोवा सजीव अहइ!

मई आपन चट्टान क जस गीत गावत हउं।

मोर महान परमेस्सर मोर रच्छा करत ह।

४७ धन्न बाटइ, मोर पटक देइवाला परमेस्सर
जउन

देस-देस क मनइयन क मोरे बस मँ कइ दिहस ह।

४८ यहोवा, तू मोका मोरे दुस्मनन स छोड़ाया ह।

तू मोर मदद किहा ताकि मई ओन लोगन क हराइ
सकउं जउन मोरे खिलाफ खड़ा भएन।

तू मोका कठोर मनइयन स बचाया ह।

४९ हे यहोवा, इहइ कारण मई देसन क बीच तोहार
स्तुति करत हउं।

इहइ कारण मई तोहरे नाउं क भजन गावत हउं।

५० यहोवा आपन राजा क मदद बहोत स जुद्धन क
जीतइ मँ करत ह।

उ आपन सच्चा पिरेम, आपन चुने भए राजा पइ
देखावत ह।

उ दाऊद अउ ओकरे संताने बरे सदा बिस्सास क
जोगग रही।

संगीत निर्देशक बरे दाऊद क एक ठु पद।

१ अकास परमेस्सर क महिमा बखानत ह,
अउ अकासमण्डल परमेस्सर क उत्तिम
सबइ रचना क देखावत ह।

२ हर नवा दिन ओकर नई कथा कहत ह,
अउ हर रात परमेस्सर क नई-नई सकित्यन क
परगट करत ह।

३ हुवाँ न कउनो भासन या सब्दन होइ।

न कउनो आवाज सुनाइ पड़त।

४ मुला ओकर “वाणी” भूमण्डल मँ बियापत ह
अउर ओकर “सब्दन” धरती क छोर तलक
पहोंचत हीं।

ओनमाँ उ सूरज बरे एक घर जइसा तय्यार किहस
ह।

५ सूरज नवखिल दुल्हा क नाई आपन सयन कच्छ,
स निकरत ह।

सूरज आपन राहे पइ अकास क पार करइ निकरि
पड़त ह,

जइसे कउनो खिलाड़ी आपन दउड़ पूरी करइ बरे
तइयार होइ।

६ अकासे क एक छोर स सूरज चल पड़त ह अउर
ओह पार पहोंचइ क, उ सारी राह दउड़त
रहत ह।

अइसी कउनो वस्तु नाही जउन आपन क ओकरी
गर्मी स छुपाइ लेइ।

यहोवा क उपदेस भी अइसेन ही होत हीं।

७ यहोवा क सिच्छन सम्पूर्ण होत हीं,

इ सबइ भक्त जनन क सकती देत हीं।

यहोवा क करार पइ भरोसा कीन्ह जाइ सकत ह।

जेनके लगे बुद्धि नाही अहइ इ ओनका सुबुद्धि
देत ह।

८ यहोवा क नेम निआव स पूरा होत हीं,

उ सबइ लोगनक खुसी स भरि देत हीं।

यहोवा क आदेस उत्तिम अहइ,

उ सबइ मनइयन क जिअइ क नई राह देखावत
हीं।

९ यहोवा क आराधना प्रकास जइसी होत ह,

इ तउ सदा सर्वदा जोति स भरी रही।

यहोवा क निआव निस्पच्छ होत हीं,

उ सबइ पूरी तरह निआव स पूरा होत हीं।

१० यहोवा क उपदेस उत्तिम सुबरन अउ कुन्दन स
भी बढिके मनोहर अहइ,

उ सबइ उत्तिम सहद स भी जियादा मधुर अहइ,
जउन सोझ सहद क छत्ता स टपक आवत ह।

११ हे यहोवा, तोहार उपदेस तोहरे सेवक क आगाह
करत हीं।

अउर जउन ओनकइ पालन करत हीं ओनका तउ
बरदान मिलत ह।

१२ हे यहोवा, आपन सबहि दोसन क कउनो नाही
लख पावत।

एह बरे तू मोका ओन पापन्स बचावा जउन
एकान्त मँ छुपिके कीन्ह जात हीं।

१३ हे यहोवा, मोका ओन पापन्क करइ स बचावा
जेनका मई करइ चाहत हउं।

ओन पापन्क मोह पइ सासन न करइ द्या।

अगर तू मोका बचावत ह तउ मई इमानदारी स
भरि भवा होइ सकत हउं

अउ बहोत सारा पापन्स मुक्त होइ सकत हउं।

१४ मोका आसा अहइ कि, मोर वचन अउ चितन
तोहका प्रसन्न करिहीं।

हे यहोवा, तू मोर चट्टान, अउर मोर
बचावइवाला अहा।

संगीत निर्देशक बरे दाऊद क एक ठु पद ।

२० १ तोहरी पुकार क यहोवा जवाब देइ,
अउर जब तू विपत्ति में ह्वा तउ याकूब क
परमेस्सर तोहरे नाउँ क बढ़ावइ ।

२ परमेस्सर आपन पवित्र ठउर स तोहार मदद
करइ ।

उ तोहका सिन्धुओन स सहारा देइ ।

३ परमेस्सर तोहरी सब भेंटन क याद राखइ,
अउर तोहरे सबइ बलिदानन क अंगीकार करइ ।

४ परमेस्सर तोहका ओन सबहिं वस्तुओन क देइ
जेनका तू फुरइ फुरइ चाह्या ।

उ तोहार सबहिं योजनन पूरी करइ ।

५ परमेस्सर जब तोहार मदद करइ हम पचे बहोतइ
खुस होब ।

अउर हम पचे परमेस्सर क बड़कई क गीत गाउब ।
यहोवा उ सबइ चीज करी जेका तू पचे मँग्या ।

६ मई अब जानत हउँ कि यहोवा मदद करत ह
आपन उ राजा क जेका उ चुनेस ।

परमेस्सर तउ आपन सरगे में बिराजा अहइ अउर
उ आपन चुने भए राजा क, जवाब दिहस

उ राजा क रच्छा करइ बरे परमेस्सर आपन
महासक्ती क प्रयोग में लिआवत ह ।

७ कछू क भरोसा आपन रथन पइ अहइ, अउर कछू
क आपन फुजियन पइ भरोसा बा

मुला हम पचे तउ आपन यहोवा परमेस्सर क
सुमिरन करत अही ।

८ मुला उ सबइ लोग हारि गएन अउर जंगल में
मार डावा गवा गएन

अउर हम लोग जीते अउ खुसी मनावइ बरे
इकट्ठा होब ।

९ अइसा कइसा भवा ? काहेकि यहोवा आपन चुने
भए राजा क रच्छा किहा

उ परमेस्सर क गोहराए रहा अउर परमेस्सर ओकर
सुनेस ।

संगीत निर्देशक बरे दाऊद क एक ठु पद ।

२१ १ हे यहोवा, तोर महिमा राजा क प्रसन्न
करत ह, जब तू ओका बचावत ह ।

उ बहोतइ आनन्दित होत ह ।

२ तू राजा क उ सबइ वस्तुओन दिहा जेका उ चाहे
रहा, राजा जउन भी पावइ क बिनती किहस ।

हे यहोवा, तू मन क चाहा भवा ओका दइ दिहा ।

३ हे यहोवा, सचमुच तू बहोत आसीस राजा क
दिह्या ।

ओकरे मूँडे पइ तू सुवर्ण क मुकुट धइ दिह्या ।

४ उ तोहसे जिन्नगी क भीख मांगेस अउर तू ओका
इ दइ दिह्या ।

परमेस्सर, तू सदा सर्वदा बरे राजा क अमर जीवन
दिह्या ।

५ तू रच्छा किहा तउ राजा क महा वैभव मिल
गवा ।

तू ओका आदर अउ प्रसंसा दिहा ।

६ हे परमेस्सर, सचमुच तू राजा क सदा सर्वदा बरे,
आसीवाँद दिहा ।

जब राजा क तोहार दर्सन मिलत ह, तउ उ बहोत
खुस होत ह ।

७ राजा क सचमुच यहोवा पइ भरोसा अहइ,
तउ परमेस्सर ओका निरास नाहीं करी ।

८ हे परमेस्सर ! तू देखाँइ द्या आपन सबहिं दुस्मनन
क कि तू खुब मजबूत अउ सक्तीसाली अहा ।

जउन तोहसे धिना करत हीं तोहार सक्ती ओनका
हराइ देइ ।

९ हे यहोवा, जब तू राजा क साथ होत अहा
तउ उ भभकत भार जइसा होइ जात ह,

जउन सब कछू भसम करत ह ।

ओकर किरोध क आगी आपन सबहिं दुस्मनन क
भसम कइ देत ह ।

१० परमेस्सर क दुस्मनन क बंस नस्ट होइ जइही,
धरती क ऊपर स उ सब मिटिहीं ।

११ अइसा काहे भवा ? काहेकि यहोवा, तोहरे
खिलाफ ओन मनइयन सड़यन्त्र रचे रहेन ।

उ पचे बुरा करइ क योजना रचे रहेन, मुला उ पचे
ओहमाँ सफल नाहीं भएन ।

१२ यहोवा जब तू ओन लोगन पइ आपन तीर स
निसाना साध्या,

तउ तू ओनका पीछे घुमाई दिहा अउर भगाइ
दिहा ।**

१३ यहोवा क अउर ओकर सक्ती क गुण गावा
आवा हम पचे गाई

अउर ओकरे गीतन क बजाई जउन ओकर गरिमा
स जुर ग अहइ ।

**२१:१२ यहोवा जब ... दिहा या, "तू ओकर उपस्थिति में दृढ़ता स खड़ा रहुब्या अउर आपन लसुरि स ओनका काँधा स काँधा मिलाइ कइ के बाँधब्या ।" हिब्रू में हिआँ समझइ में कठिन अहइ ।

प्रभात क हरिणी नाउँ क राग पइ संगीत
निर्देसक बरे दाऊद क एक ठु भजन ।

२२ हे मोरे परमेस्सर, हे मोरे परमेस्सर, तू
मोका काहे तजि दिहा ह ?

मोका बचावइ बरे तू काहे बहोतइ दूर अहा ?
मोर मदद क पुकार क सुनइ बरे तू बहोतइ दूर
अहा ।

३ हे मोरे परमेस्सर, मई तोहका दिन मँ पुकारेउँ
मुला तू जवाब नाही दिहा,
अउर मई राति भर तोहका पुकारत रहेउँ ।

३ हे परमेस्सर, तू पवित्र अहा ।

तू राजा क नाई बिराजमान अहा ।

इस्राएल क स्तुतियन तोहार सिंहासन अहइ ।

५ हमार पुरखन तोह पइ बिस्सास किहन ।

हाँ हे परमेस्सर उ पचे तोहार भरोसा रहेन ।

अउर तू ओनका बचाए रह्या ।

५ हे परमेस्सर, हमार पुरखन तोहका मदद क
गोहराएन अउर उ पचे आपन दुस्मनन स बच
निकरेन ।

उ पचे तोह पइ बिस्सास किहन अउर उ पचे निरास
नाहीं भएन ।

६ तउ का मई फुरइ कउनो कीरा हउँ,
जउन लोग मोहसे लज्जित भए बाटेन अउर
मोहसे घिना करत हीं ?

७ जउन भी मोका लखत ह मोर हँसी उड़ावत ह,
उ पचे आपन मूडँ हलावत अउ आपन ओंठ
बिरावत हीं ।

८ उ पचे मोसे कहत हीं कि, “आपन रच्छा बरे तू
यहोवा क गोहँराई सकत ह ।

उ तोहका बचाइ लेइ ।

अगर तू ओका एतना भावत ह तउ, निहचय ही उ
तोहका बचाइ लेइ ।”

९ हे परमेस्सर फुरइ तउ इ अहइ कि सिरिफ तू ही
अहा जेकरे ऊपर मई निर्भर हउँ ।

तू मोका उ दिन स संभालया ह, जब स मोर जन्म
भवा ।

तू ही अहा जेकर कारण स मई बचपन स बिस्सास
किहेउँ ।

१० ठीक उहइ दिना स जब स मई जन्म लिहेउँ ह,
तू मोर परमेस्सर रह्या ह ।

जइसे ही मई आपन महतारी क कोख स बाहेर
आए रहेउँ, मोका तोहरी देखरेख मँ रख दीन्ह
ग रहा ।

११ तउ हे, परमेस्सर ! मोका जिन बिसरि जा,

संकट निओरे बाटइ, अउर कउनो भी मनई मोर
मदद क नाही अहइ ।

१२ मई ओन लोगन स घिरा अहउँ,
जउन सकतीसाली साँड़न जइसे मोका घेरे भए
अहइ ।

१३ उ पचे ओन सिंहन जइसे अहइ, जउन कउनो
जन्तु क चीरत होई अउ दहाड़त होई
अउर ओनकर मुँह विकराल खुला भवा होई ।

१४ मोर सकती धरती पइ बिखरे जल
स लुप्त होइ गइ ।

मोर हाड़न अलगाइ ग अहइ ।

मोर साहुस खतम होइ चुका अहइ ।

१५ मोर मुँह एक पुराना टूटा भवा बर्तन क टूका क
नाई सूख गवा अहइ ।

मोर जीभ आपन ही तालु स चिपकत अहइ ।

तू मोका कबर क धूरि मँ डार दिहा ह ।

१६ दुट्ट लोग मोर चारिहुँ कइती “कुकुरन” क नाई
घेरे भए अहइ,

दुस्ट जनन क उ समूह मोका फँसाएस ह ।

उ पचे मोरे हथवन अउर गोड़न क छेद दिहेन ह ।

१७ मोका आपन हाड़ देखाइ देत ह ।

इ सबइ लोग मोका घूरत अहइ ।

इ सबइ मोका नस्कान पहोंचावइ क ताकत रखत
हीं ।

१८ उ पचे मोर कपड़ा आपुस मँ बाँटत अहइ ।

मोरे ओढ़नन बरे उ पचे पाँसा लोकावत अहइ ।

१९ हे यहोवा, तू मोका जिन तजा ।

तू मोर बल अहा, मोर मदद करा ।

अब तू देर जिन लगावा ।

२० हे यहोवा, मोर प्राण तलवार स बचाइ ल्या ।

ओन कुत्तन स तू मोर मूल्यवान जिन्नगी क रच्छा
करा ।

२१ मोका सेर क मुँह स बचाइ ल्या

अउ साँड़ क सीगंन स मोर रच्छा करा ।

२२ हे यहोवा, मई आपन भाइयन मँ तोर प्रचार
करब ।

मई तोर प्रसँसा तोहरे भक्तन क सभा क बीच
करब ।

२३ ओ यहोवा क उपासक लोगो, यहोवा क बड़कई
करा ।

इस्राएल क सन्तानन यहोवा क आदर करा ।

ओ इस्राएल क सबहि लोगो, यहोवा क भय माना
अउ आदर करा ।

२४ काहेकि यहोवा अइसे मनइयन क मदद करत
ह जउन विपत्ति मँ होत हीं ।

यहोवा ओनसे घिना नाही करत ह ।

अगर लोग मदद बरे यहोवा क पुकारइँ
तउ उ खुद क ओनसे न छिपाइ ।
२५ मई तोहका धामिक सभा मँ स्तुति बरे का भेंट
कइ सकत हउँ ।
तोहार भक्त लोगन क समन्वा मई तोहका उ देबउँ
जेका मई वादा किहेउँ ह ।
२६ दीन जन भोजन पइहीं अउर सन्तुट्ट होइहीं ।
तू लोग जउन ओका हेरत भए आवत अहा ओकर
स्तुति करा ।
मन तोहार हमेसा हमेसा आनन्द स भरि जाइँ ।
२७ तब सबहिं दूर भुइँयन क लोग यहोवा क
सुमिरइँ अउर ओकर लगे लउटि आवइँ ।
हे यहोवा, धरती क सबइ परिवार क हरेक लोग
तोहार समन्वा निहुरिहीं ।
२८ काहेकि यहोवा राजा अहइ ।
उ हर एक रास्ट्र पइ सासन करत ह ।
२९ मानव जाति घास क नाई स्थाइ नाही अहइँ
जउन कि समूचइ धरती मँ उगत ही ।
हम सबहिं आपन खइया क खाब अउर परमेस्सर
क समन्वा निहुरि दण्डवत करब । ††
हाँ मानव जाति मरत ह अउ ओनका कब्र मँ डार
दीन्ह जात ह ।
सबइ लोग जउन जीवित अहइ या नाही अहइ
परमेस्सर क समन्वा नम्रता स निहुरिके
दण्डवत करइँ ।
३० अउर भविस्स मँ हमार सन्तान यहोवा क सेवा
करिहीं ।
लोग सदा सदा ही ओकरे बारे मँ बखनिहीं ।
३१ उ सबइ लोग अइहीं अउर परमेस्सर क भलाई
क
प्रचार करिहीं जेनकर अबहि जन्म ही नाही भवा ।

दाऊद क एक पद ।

२३ † यहोवा मोर गड़रिया अहइ ।
जउन कछु भी मोका अपेच्छित होइ, सदा
मोरे लगे रही ।
२ हेरे भरे चरागाह मँ मोका सुख स उ राखत ह ।
उ मोका सांत झरनन पइ लइ जात ह ।
३ उ आपन नाउँ क निमित्त मोरी आतिमा क नई
सक्ती देत ह ।
उ मोर अगुआई करत ह कि उ फुरइ उत्तिम अहइ ।
४ मई मउत क अँधिअर घाटी स गुजरत भइ नाही
डेराब,

काहेकि यहोवा तू मोरे संग अहा ।
तोहार चरवाहे क लाठी मोका सुख देत हीं ।
५ हे यहोवा, तू मोरे दुस्मनन क समन्वा मोर खइया
बरे मेज सजाया ह ।
तू मोरे मूँडे पइ तेल उडैयाँ ह ।
मोर कटोरा भरा ह अउ छलकत बाटइ ।
६ निहचय नेकी अउ करुणा मोर बाकी जिन्नगी
तलक मोरे संग रही ।
मई यहोवा क मन्दिर मँ लम्बी समइ तलक बार-
बार जाबिउँ ।

दाऊद क एक ठु पद ।

२४ † धरती अउ ओह प क सब चिजियन
यहोवा क अहइँ ;
संसार अउ हर कउनो जउन एहमाँ रहत ही ओकर
अहइँ ।
२ यहोवा इ धरती क जल पइ रचे अहइ ।
उ एका जल क धारन पइ बनाएस ।
३ यहोवा क पहाड़े क मन्दिर मँ कउन जाइ सकत
ह ?
कउन यहोवा क पवित्तर ठउर मँ खड़ा होइ सकत
अउर आराधना कइ सकत ह ?
४ अइसा मनई जउन हाथन क साफ किहे ह,
अइसा मनई जउन पवित्तर जीवन क अगुवाइ
करत ह,
अइसा मनई जउन मोरे नाउँ क प्रयोग कइके
दूसर बरे गलत नाही किहे ह,
अउर अइसा मनई जउन झूठ न बोलेस, अउ न
ही झूठा वचन दिहेस ह ।
बस अइसेन मनई ही हुआँ आराधना कइ सकत
ही ।
५ सज्जन तउ चाहत ही यहोवा सब क भला करइ ।
उ पचे सज्जन परमेस्सर स जउन ओनकर उद्धारक
अहइ, नेक चाहत हीं ।
६ उ पचे सज्जन परमेस्सर क अनुसरण क जतन
करत हीं ।
उ पचे याकूब क परमेस्सर क लगे मदद पावइ जात
हीं ।
७ फाटकन, आपन मूँडी ऊँची करा !
सनातन दुआरन, खुलि जा !
प्रतापी राजा भितरे आई ।
८ इ प्रतापी राजा कउन अहइ ?
यहोवा ही उ राजा अहइ, उहइ सबल सैनिक अहइ,

††२२ :२९ हम ... दण्डवत करब इ ओन लोगन क ओर इसारा करत ह जउन पहाड़ क मन्दिर मँ इकट्ठा
होइके मेलबलि खात रहा अउर तब परमेस्सर क अराधना बरे निहुरिके दण्डवत करत ह । इ बयान जीवन
अउर मउत क याद रखइ बरे एक रूपक अहइ ।

यहोवा ही उ राजा अहइ, उहइ जुद्ध नायक वा ।

१ फाटकन, आपन, मूँड़ी ऊँची करा !

सनातन दुआरन, खुलि जा !

प्रतापी राजा भितरे आई ।

१० उ प्रतापी राजा कउन अहइ ? यहोवा सर्वसक्तिमान ही उ राजा अहइ ।

उ प्रतापी राजा उहइ अहइ ।

दाऊद क समर्पित ।

२५ १ हे यहोवा, मई खुद क तोहका समर्पित करत हउँ ।

२ मोरे परमेस्सर, मोर सिरिफ तोह पइ बिस्सास बाटइ ।

मोका अपमानित होइ क अनुमति जिन द्या ;

मोर दुस्मनन क मोह पइ हँसी उड़ावइ क अनुमति जिन द्या ।

३ अइसा मनई, जउन तोहमाँ बिस्सास धरत ह, उ निरास नाही होइ ।

मुला बिस्सासघाती निरास होइहीं अउर, उ पचे कबहुँ भी कछु नाही पराप्त करिहीं ।

४ हे यहोवा, मोर मदद करा कि मई तोहरी राहन क सीखउँ !

तू आपन मार्गन क मोका सिच्छा द्या ।

५ आपन सच्ची राह तू मोका देखाँवा अउर ओकर उपदेस मोका द्या ।

तू मोर परमेस्सर तू मोर उद्धारकर्ता अहा ।

मोका हर दिन तोहार भरोसा अहइ ।

६ हे यहोवा, मोह पइ आपन दाय़ा राखा

अउर उ ममता क मोह पइ परगट करा, जेका तू हरदम राखत ह ।

७ आपन जवानी मँ जउन पाप अउर कुकर्म मई किहेउँ, ओनका जिन याद राखा ।

हे यहोवा आपन निज नाउँ निमित्त, मोका आपन करुणा स सुमिर ल्या ।

८ हे यहोवा, सचमुच उत्तम अहइ,

उ पापियन क जिन्नगी क नेक राह देखाँवत ह ।

९ उ दीन लोगन क आपन राहन क सीख देत ह ।

बिना पच्छपात क उ ओनका मारग देखाँवत ह ।

१० यहोवा क राहन ओन लोगन बरे छिमा स भरी अउ सच अहइ,

जउन ओकर करार अउर कानून क अनुसरण करत ही ।

११ हे यहोवा, मई बहुतेरा पाप किहेउँ ह,

मुला तू आपन नाउ बरे मोर हर पापे क दयालुता स छिमा कइ दिहा ।

१२ जदि कउनो मनई यहोवा क अनुसरण करइ चाहइ,

तउ ओका परमेस्सर जिन्नगी क उत्तम राह देखाँइ ।

१३ उ मनई उत्तम वस्तुअन क सुख भोगी,

अउर उ मनई क सन्तानन उ धरती क जेका परमेस्सर वचन दिहे रहा स्थायी रइहीं ।

१४ यहोवा आपन भक्तन पइ आपन भेद खोलत ह । उ आपन निज भक्तन क आपन करार क सिच्छा देत ह ।

१५ मोर आँखिन मदद पावइ क यहोवा पइ सदा टिकी रहत ही ।

मोका मोरी बिपत्ति स उ सदा छोड़ावत ह ।

१६ हे यहोवा, मई पीड़ित अउ अकेल्ला अहउँ ।

मोरी कइँती मूड अउ मोह पइ दाय़ा देखाँवा ।

१७ मोरी बिपत्तियन स मोका अजाद करा ।

मोर समस्या सुलझाने क मदद करा ।

१८ हे यहोवा, मोका परखा अउर मोरी बिपत्तियन पइ निगाह डावा ।

मोका जउन पाप मई किहे हउँ, ओन सबहिं बरे छिमा करा ।

१९ लखा मोर केतना दुस्मनन अहइँ, अउ लखा उ मोहसे केतना नफ़रत करत ही ।

२० हे परमेस्सर, मोर रच्छा करा अउर मोका बचाइ ल्या ।

मई तोहार भरोसा राखत हउँ ।

तउ मोका निरास जिन करा ।

२१ हे परमेस्सर, तू सचमुच उत्तम अहा ।

मोका तोहार भरोसा अहइ, तउ मोर रच्छा करा ।

२२ हे परमेस्सर, इस्राएल क लोगन क

ओनकर सबहिं दुस्मनन स रच्छा करा ।

दाऊद क समर्पित ।

२६ १ हे यहोवा, मोर निआव करा, परमाणित करा कि मई पवित्तर जिन्नगी बिताएउँ ह ।

मई यहोवा पइ कबहुँ बिस्सास करब नाही तजे रहेउँ ।

२ हे यहोवा, मोका परखा अउर मोर जाँच करा, मोर हिरदइ मँ अउर बुद्धि क निचके स लखा ।

३ मई तोहरे पिरिम क सदा ही लखत हउँ,

मई तोहरे सत्य क सहारे जिअत रहत हउँ ।

४ मई ओन बेकार लोगन मँ स नाही अहउँ ।

५ मई बुरे लोगन क संगति स घिना करत हउँ ।

मई दुस्ट लोगन मँ सामिल नाही होत हउँ ।

६ हे यहोवा, मई निर्दोखी दिखाइ बरे आपन हथवा धोए हउँ,
 एह बरे सायद मई तोहार वेदी पइ आइ सकत हउँ ।
 ७ हे यहोवा, मई तोहरी प्रसंसा क गीत गावत हउँ,
 अउर जउन अचम्भा स भरा करम तू किह्या ह,
 ओनके बारे मँ मई गीत गावत हउँ ।
 ८ हे यहोवा, मई तोहार मनोहर मन्दिर स अउ उ तम्बू स
 जहाँ तोहार महिमा निवास करत ह पिरैम करत हउँ ।
 ९ हे यहोवा, तू मोका ओन पापियन क दले मँ जिन मिलावा,
 जब तू ओन हतियारन क प्राण लेब्या तब मोका जिन मार्या ।
 १० उ हमेसा दूसर लोगन क धोखा देइ बरे अउर रिसवत लेइ बरे तइयार रहत ह ।
 ११ लेकिन मई अटल हउँ, तउ हे परमेस्सर,
 मोहे पइ दयालु ह्या अउर मोर रच्छा करा ।
 १२ मई नेक जिन्नगी जिअत रहेउँ ।
 मई तोहरी बड़कई गीत, हे यहोवा, जब भी तोहार भक्त मण्डली साथे मिलि गइ, गावत रहेउँ ।

दाऊद क समर्पित ।

२७ हे यहोवा, तू मोरे जोति अउ मोर उद्धारकर्ता अहा ।
 मोका तउ कउनो स भी नाही डरइ चाही ।
 यहोवा मोरी जिन्नगी बरे सुरच्छित ठउर अहइ ।
 तउ मई कउनो भी मनई स नाही डरब ।
 १ होइ सकत ह, दुटठ जउन मोहे पइ चढ़ाई करई ।
 होइ सकत ह, उ पचे मोरे सरीर क नस्ट करइ क जतन करई ।
 होइ सकत ह मोर सत्रु मोका नस्ट करइ क मोह पइ आक्रमण क जतन करई ।
 ३ मुला चाहे पूरी फउज मोका घेरि लेइ, मई नाही डेराब ।
 चाहे जुद्ध छेत्र मँ मोह पइ लोग प्रहार करई, मई नाही डेराब ।
 काहेकि मई यहोवा पइ भरोसा करत हउँ ।
 ४ मई यहोवा स सिरिफ एक बर माँगइ चाहत हउँ,
 “मई आपन जिन्नगी भइ यहोवा क मन्दिर मँ बइटा रहउँ,

ताकि मई यहोवा क सुन्दरता क लखउँ,
 अउर ओकरे मन्दिर मँ धियान करउँ ।”
 ५ जब कबहुँ कउनो विपत्ति मोका घेरी, यहोवा मोर रच्छा करी ।
 उ मोका आपन तम्बू मँ छुपाइ लेइ ।
 उ मोका आपन सुरच्छित जगह पइ ऊपर उटाइ लेइ ।
 ६ मोका मोर दुस्मनन घेरि रखे अहइ ।
 मुला अब ओनका पराजित करइ मँ यहोवा मोर सहारा होइ ।
 मई ओकरे तम्बू मँ फुन भेंट चढ़ाउब ।
 जय जयकार कइके बलियन अर्पित करब ।
 मई यहोवा क स्तुति बरे भजन गाउब अउर बजाउब ।
 ७ हे यहोवा, मोर पुकार सुना, मोका जवाब द्या ।
 मोह पइ दयालु रहा ।
 ८ मोर हिरदइ कहत ह, “जा, ओकरे दर्सन बरे जा ।”
 एह बरे यहोवा मई तोहसे बात करउँ बरे तोहार समन्वा आवा हउँ ।
 ९ हे यहोवा, किरोध मँ आपन सेवक स जिन मोडया!
 एक जउन मोर मदद कइ सकत ह उ तू अहा ।
 मोका अकेल्ला जिन छोडया!
 मोका जिन त्यागा ।
 परमेस्सर जउन मोका बचाइ सकत ह उ तू अहा!
 १० मोर महतारी अउ मोर बाप मोका तजि दिहन,
 पर यहोवा मोका अंगीकार किहस अउर आपन बनाइ लिहस ।
 ११ हे यहोवा, मोरे दुस्मनन क कारण, मोका आपन मारग देखावा ।
 मोका नीक काम क सिच्छा द्या ।
 १२ मोह पइ मोर दुस्मनन हमला किहे अहइ ।
 उ पचे मोरे बरे झूठ बोलेन ह ।
 उ पचे मोका नस्कान पहाँचावइ बरे झूठ बोलेन ।
 १३ मोका भरोसा अहइ
 कि मरइ स पहिले मई फुरइ यहोवा क धरम भावना क लखउँ ।
 १४ यहोवा क मदद क बाट जोहत रहा!
 साहसी अउ सुदृढ बना रहा
 अउर यहोवा क मदद क प्रतीच्छा करत रहा ।

१२:६ :८ महिमा इ यहोवा क मन्दिर मँ मौजूदगी क प्रतीक रहा । एका अक्सर करिया बादर क संग उजियारा प्रकास क नाई क रूप मँ वणित कीन्ह ग रहा जउन कि मन्दिर मँ भरि जात रहा ।

दाऊद क समर्पित ।

२८ ^१हे यहोवा, तू मोर चट्टान अहा,
मई तोहका मदद पावइ क गोहरावत
हउँ ।

मोरा पराथनन स आपन कान जिन मूँदा,
अगर तू मोर मदद क पुकार क जवाब नाही देब्या,
तउ लोग मोका कब्र मँ मरा भवा जइसा पइहीं ।
^२हे यहोवा, आपन पवित्र तम्बू कइँती बढ़या,
मई तोहार पराथना बरे आपन हाथ उठाए
हउँ ।

जब मई तोहका पुकारउँ, तू मोर सुना ।
तू मोहे पइ आपन करुणा देखाँवा ।
^३हे यहोवा, मोका ओन बुरे मनइयन क तरह जिन
सोचा

जउन बुरा काम करत हीं ।
जउन आपन पड़ोसियन स सान्ति करत हीं,
मुला आपन हिरदइ मँ आपन पड़ोसियन क बारे मँ
कुचक्र रचत हीं ।

^४हे यहोवा, उ सबइ मनइयन दूसर लोगन क बुरा
करत हीं ।

तउ तू ओनकी संग बुरी घटना क घटावा
ओन दुर्जनन क तू वइसेन ही दण्ड द्या जइसे
ओनका देइ चाही ।

^५दुर्जन ओन उत्तम बातन क जउन यहोवा करत
ओका नाही समुझतेन ।

उ पचे परमेस्सर क उत्तम कारजन क नाही
लखतेन ।

उ पचे ओकर भलाई क नाही समुझतेन ।
उ पचे तउ सिरिफ कउनो क नास करइ क जतन
करत हीं ।

^६यहोवा क स्तुति करा !
उ मोहे पइ करुणा करइ क बिनती सुनेस ।

^७यहोवा मोर सक्ति अहइ, उ मोर ढार अहइ ।
मोका ओकर भरोसा रहा ।

उ मोर मदद किहेस ।
मई बहोतइ खुस हउँ, अउ ओकर खुसी क गीत
गावत हउँ ।

^८यहोवा आपन चुना राजा क रच्छा करत ह ।
उ ओका हर पल बचावत ह ।

यहोवा ही ओकर सक्ती अहइ ।
^९हे परमेस्सर, आपन लोगन क रच्छा करा ।

जउन तोहार अहइ ओनका आसीस द्या ।
ओनका धियान रखा अउर हमेसा ओनका लइके
चला ।

दाऊद क एक गीत ।

२९ ^१परमेस्सर क पूत लोगो, यहोवा क स्तुति
करा ।

ओकर महिमा अउ सक्ती क प्रसंसा गीत गावा ।
^२यहोवा क प्रसंसा करा अउ ओकरे नाउँ क आदर
करा ।

पवित्र ओढ़ना पहिरिके यहोवा क आराधना
करा ।

^३समुद्र क ऊपर यहोवा क वाणी खुद क गरजत
ह ।

परमेस्सर क वाणी महासागर क ऊपर मेघ क
गरजन क तरह गरजत ह ।

^४यहोवा क वाणी ओकर सक्ती क देखाँवत ह ।
ओकर ध्वनि ओकर महिमा क परगट करत ह ।

^५यहोवा क वाणी देवदार वृच्छन क तोड़के
चकनाचूर कइ देत ह ।

यहोवा लबानोन क विसाल देवदार वृच्छन क तोड़
देत ह ।

^६यहोवा लबानोन क पहाड़न क कपाँइ देत ह ।
उ नाचत भए बछ्वा क तरह देखाँइ लागत ह ।

हेमोन क पहाड़ काँप उठत ह अउर उछरत जवान
बकरी क तरह देखाँत ह ।

^७यहोवा क वाणी बिजली क कौंध स टकरात ह ।
^८यहोवा क वाणी मरुस्थल क कँपाइ देत ह ।

यहोवा क स्वर स कादेस क मरुस्थल काँप उठत
ह ।

^९यहोवा क वाणी स हिरन डेराइ जात हीं ।
यहोवा दुर्गम जंगलन क नस्ट कइ देत ह ।

मुला ओकरे मन्दिर मँ लोग ओकर प्रसंसा क गीत
गावत हीं ।

^{१०}जल प्रलय क समय यहोवा राजा रहा ।
उ सदा बरे राजा रही ।

^{११}यहोवा आपन भगतन क रच्छा सदा करी,
अउर आपन जनन क सांति क आसीस देइ ।

मन्दिर क समर्पण बरे दाऊद क एक ठु पद ।

३० ^१हे यहोवा, तू मोरी बिपत्तियन स मोर
उद्धार किहा ह ।

तू मोरे दुस्मनन क मोका हरावइ अउर मोर खिल्ली
उड़ावइ नाही दिहा ।

तउ मई तोहरे बरे आदर परगट करब ।
^२हे मोर परमेस्सर यहोवा, मई तोहसे पराथना
किहेउँ ।

तू मोका चंगा कइ दिहा ।

३ कबर स तू मोर उद्धार किहा, अउर मोका जिअइ दिहा।

मोका मुर्दन क संग मुर्दन क गड़हा मँ पड़े भए नाही रहइ पड़ा।

४ परमेस्सर क भगतन, यहोवा क स्तुति करा!

ओकरे सुभ नाउँ क प्रसंसा करा।

५ यहोवा कोहाइ गवा, तउ निर्णय भवा “भउत !”

मुला उ आपन परगट किहस अउर मोका “जिन्नगी” दिहस।

मई राति क रोवत विलापत सोएउँ।

दूसर भिन्सारे मई गावत भवा खुस रहेउँ।

६ मई अब इ कहि सकत हउँ, अउर मई जानत हउँ इ निहचय फुरइ अहइ,

“मई कबहुँ नाही हारब !”

७ हे यहोवा, जब तू मोहे पइ दयालु भया

अउ तउ मई महसूस किहेउँ कि मई अइसा सुरच्छित अहउँ जइसा पहाड़े पइ एक किला।

मुला मई डर स काँपि गएउँ

जब तू मोका अस्वीकार कइ दिहा।

८ हे परमेस्सर, मई तोहरी कइती लउटेउँ अउर बिनती किहेउँ।

मई आपन पइ दाया देखावइ क बिनती किहेउँ।

९ मई कहेउँ, “परमेस्सर का इ नीक अहइ कि मई मरि जाउँ

अउर कबर क भीतर खाले चला जाऊँ ?

मेरे भए मनई तउ माटी मँ ओलरा रहत हीं,

उ पचे तोहरे नेक क स्तुति

जउन सदा सदा बनी रहत ह नाही करतेन।

१० हे यहोवा, मोर पराथना सुना अउर मोह पइ करुणा करा!

हे यहोवा, मोर मदद करा !”

११ मई पराथना किहेउँ अउर तू मोर मदद किहा !

तू मोरे रोवइ क नाच मँ बदल दिहा मोरे सोक वस्त्र क तू उतारिके बहाइ दिहा,

अउर मोका आनन्द मँ सराबोर कइ दिहा।

१२ हे यहोवा, मई तोर सदा जसगान करब।

मई अइसा करब जेहसे कबहुँ नीरवता न बियापइ।

तोहार प्रसंसा मँ हमेसा कउनो न कउनो गावत रही।

संगीत निर्देशक क दाऊद क एक पद।

३१ हे यहोवा, मई तोहरे भरोसे हउँ,
मोका निरास जिन करा।

मोह पइ कृपालु ह्वा अउर मोर रच्छा करा।

३ हे यहोवा, मोर सुना,

अउर तू हालि आइके मोका बचाइ ल्या।

मोर चट्टान बनि जा,

मोर रच्छा करा!

३ हे परमेस्सर, तू मोर चट्टान अहा,

तउ आपन निज नाउँ बरे मोका राह देखाँवा अउर मोर अगुआई करा।

४ मोरे बरे मोर दुस्मनन जाल फइलाएन ह।

ओनके फँदा स तू मोका बचाइ ल्या, काहेकि तू मोर सुरच्छा स्थल अहा।

५ हे परमेस्सर यहोवा, मई तउ तोहे पइ भरोसा कइ सकत हउँ।

मई आपन जिन्नगी तोहरे हाथे मँ सउँपत हउँ।

मोर रच्छा करा।

६ जउन लबार देवतन क पूजत रहत हीं, ओन लोगन स मोका घिना अहइ।

मई तउ बस यहोवा मँ बिस्वास रखत हउँ।

७ हे यहोवा, तोहार करुणा मोका बहोतइ आनन्दित करत ह।

तू मोरे दुःखन क लखि लिहा

अउ तू मोर पीरा क बारे मँ जानत अहा।

८ तू मोरे दुस्मनन क मोहे पइ भारी पड़इ नाही देब्या।

तू मोका ओनके फँदन स छोड़उब्या।

९ हे यहोवा, मोह पइ अनेक संकट अहइ।

तउ मोह पइ कृपा करा।

मई एँतना बियाकुल अहउँ कि मोर आँखिन दुःखत अहइ।

मोर गटइ अउ पेट पिरात अहइ।

१० मोरी जिन्नगी क अंत दुःख मँ होत अहइ।

मोर बरिस आह भरइ मँ बीतत अहइ।

मोर सबइ बेदना मोर सक्ती क निचोड़त अहइ।

मोर बल मोर साथ छोड़त जात अहइ।

११ मोर सत्रु मोसे घिना राखत हीं।

मोर पड़ोसी मोर बैरी बना अहइ।

मोर सबहि रिस्तेदार मोका राहे मँ लखिके

मोसे डेराइ जात हीं

अउर मोसे सब कतरात हीं।

१२ मोका लोग पूरी तरह स बिसरि चुका अहइ।

मई तउ कउनो हेरान अउजार सा होइ गवा हउँ।

१३ मई ओन भयंकर बातन क सुनत हउँ जउन लोग मोरे बारे मँ करत हीं।

उ पचे सबहि लोग मोरे खिलाफ होइ ग बाटेन।

उ पचे मोका मारि डावइ क योजना रचत हीं।

१४ हे यहोवा, मोर भरोसा तोहे पइ अहइ।

तू मोर परमेस्सर अहा।

१५ मोर जिन्नगी तोहरे हाथन मँ अहइ।

मोरे दुस्मनन स मोका बचाइ ल्या ।
 ओन लोगन स मोर रच्छा करा, जउन मोरे पाछे
 पड़ा अहई ।
 १६ कृपा कइके आपन दास क अपनाइ ल्या ।
 मोह पइ दाय़ा करा अउर मोर रच्छा करा ।
 १७ हे यहोवा, मई तोहार बिनती किहेउँ ।
 एह बरे मई निरास नाही होब ।
 बुरे मनइयन तउ निरास होइ जइहीं ।
 अउर उ पचे कबूर मैं नीरव चला जइहीं ।
 १८ दुर्जन लोग डींग हाँकत हीं
 अउर सज्जन क बारे मैं झूठ बोलत हीं ।
 उ सबइ दुर्जन बहोत ही अभिमानी होत हीं ।
 मुला ओनके हाँठ जउन झूठ बोलत रहत हीं, बिना
 सब्दन क होइहीं ।
 १९ हे परमेस्सर, तू आपन भगतन बरे बहोत स
 अजूबा चीजन क छुपाइके धरे अहा ।
 तू सबन्क समन्वा अइसे मनइयन बरे जउन तोहार
 बिस्सासी अहई,
 भला काम करत अहा ।
 २० दुर्जन लोग सज्जनन क नस्कान पहोंचावइ क
 बरे जुट जात हीं ।
 उ सबइ दुर्जन लड़ाइ भड़कावइ क जतन करत हीं ।
 मुला तू सज्जनन क ओनसे छुपाइ लेत अहा,
 अउर ओनका बचाइ लेत अहा ।
 तू सज्जन लोगन क रच्छा आपन सरण मैं करत
 अहा ।
 २१ यहोवा क स्तुति करा ।
 जब नगर क दुस्मन लोग घेर लिहे रहेन, तब
 उ आपन सच्चा पिरैम अजूबी रीति स
 देखौँएस ।
 २२ मई डेरान रहेउँ, अउर मई कहे रहेउँ, “मई तउ
 अइसे जगह पइ हउँ जहाँ मोका परमेस्सर
 नाही देख सकत ह ।”
 मुला हे परमेस्सर, मई तोहार बिनती किहेउँ, अउर
 तू मोर सहायता क पुकार सुनि लिहा ।
 २३ परमेस्सर क भगतन, तोहका यहोवा स पिरैम
 करइ चाही ।
 यहोवा ओन लोगन क जउन ओकरे बरे सच्चा
 अहई, रच्छा करत ह ।
 मुला यहोवा ओनका जउन आपन ताकत क ढोल
 पीटत हीं ।
 ओनका उ वइसा ही दण्ड देत ह, जइसा दण्ड
 ओनका मिलइ चाही ।
 २४ अरे ओ मनइयो जउन यहोवा क मदद बरे
 प्रतीच्छा करत अहा,
 सुदृढ अउ हिम्मती बना !

दाऊद क एक गीत ।

३२ १ धन्न अहइ उ जेकर पाप छमा भएन ।
 धन्न अहइ उ जन
 जेकर पाप धुल गएन ।
 २ उ पचे कइसे धन्न्य अहई
 जेका यहोवा दोखी नाही समुझत ह ।
 उ जन जउन आपन गुप्त पापन क छुपावइ क
 जतन न करइ आसीसित होइहीं ।
 ३ हे परमेस्सर, मई तोहसे बार बार बिनती किहेउँ,
 मुला आपन छुपा पाप तोहका नाही बताएउँ ।
 जेतनी दाई मई तोहार बिनती किहेउँ मई तउ
 अउर जियादा दुर्बल होत चला गएउँ ।
 ४ हे परमेस्सर, तू मोर जिन्नगी दिन रात कठिन स
 जियादा कठिन बनाइ दिहा ।
 मोर ताकत अइसा झुराइ गवा अहइ जइसा गर्मी
 क मोसम क ताप झुलसाइ दिहे अहइ ।
 ५ मुला फिर मई यहोवा क समच्छ आपन सबहि
 पापन क मानइ क निहचय कइ लिहे हउँ ।
 हे यहोवा, मई तोहका आपन पाप बताइ दिहेउँ ।
 मई आपन कउनो अपराध तोहसे नाही छुपाएउँ ।
 अउर तू मोरे पापन क दोख छिमा कइ दिहा ।
 ६ एह बरे, परमेस्सर, तोहरे भगतन क तोहार
 बिनती करइ चाही ।
 हिआँ तलक कि जब विपत्ति जल प्रलय स उमड़इ
 तब भी तोहरे भगतन क तोहार बिनती करइ
 चाही ।
 ७ हे परमेस्सर, तू मोर रच्छा क ढाल अहा तू मोका
 मोरी विपत्तियन स उबारत अहा ।
 तू मोका सुरच्छा क गीत स घेरि लिहा ह ।
 तउ एह बरे मई, जइसे तू रच्छा किहा ह,
 ओनही बातन क गीत गावा करत हउँ ।
 ८ यहोवा कहत ह, “मई तोहका जइसे चलइ चाही
 सिखाउब
 अउर तोहका उ राह देखाउब ।
 मई तोहार रच्छा करब अउर मई तोहार अगुआ
 बनव ।
 ९ तउ तू धोडन या गदहन स बुद्धिहीन जिन बना ।
 ओन पसुअन क तउ मुखरी अउ लगाम स चलावा
 जात ह ।
 अगर तू ओनका लगाम या रास नाही लगउव्या,
 तउ उ सबइ पसु निअरे नाही अइहीं ।”
 १० दुर्जनन क बहोत स पीड़ा घेरिहीं ।
 मुला ओन लोगन क जेनका यहोवा पइ भरोसा
 अहइ, यहोवा क सच्चा पिरैम ढाक लेइ ।

११ सज्जन तउ यहोवा मैं सदा मगन अउ
आनन्दित रहत हीं ।

अरे ओ लोगो, तू सब पवित्तर मन क साथ आनन्द
मनउव्या ।

३३ हे सज्जन लोगो, यहोवा मैं आनन्द
मनावा !

१ सज्जनो सत मनइयो, ओकर स्तुति करा ।

२ वीणा बजावा अउर ओकर स्तुति करा ।

यहोवा बरे दस तार वाले सारंगी बजावा ।

३ अब ओकरे बरे नवा गीत गावा ।

खुसी क धुन सुन्दरता स बजावा !

४ परमेस्सर क वचन सत्य अहइ ।

जउन भी उ करत ह ओकर तू पचे भरोसा कइ सकत
ह ।

५ नेकी अउ निस्पच्छता परमेस्सर क भावत ह ।

यहोवा आपन खुद क करुणा स इ धरती क भरि
दिहस ।

६ यहोवा आदेस दिहस अउ सूस्टि फउरन पइदा
होइ गइ ।

परमेस्सर क साँस स धरती पइ हर चीज बनी ।

७ परमेस्सर सागर मैं एक ही जगहिया पइ जल
बटोरस ।

उ सागर क आपन जगह पइ रखत ह ।

८ धरती क हर मनई क यहोवा क आदर करइ अउ
डेराइ चाही ।

इ संसार मैं जउन भी मनई बसा अहइ, ओनका
चाही कि उ पचे ओसे डेराइ ।

९ काहेकि परमेस्सर क सिरिफ बात भइ कहब
अहइ, अउर उ बात तुरंत घटि जात ह ।

अगर उ कउनो क “रुकइ” क आदेस देइ, तउ उ
तुरंत थम जात ह ।

१० परमेस्सर चाहइ तउ सबहिं सुझाव बिअर्थ
करइ ।

उ कउनो भी मनई क सब कुचकरन क बिअर्थ कइ
सकत ह ।

११ मुला यहोवा क उपदेस सदा ही खरे होत हीं ।

ओकर सब जोजना पीढी दर पीढी खरी होत हीं ।

१२ धन्न अहइ उ सबइ मनई जेनकर परमेस्सर
यहोवा अहइ ।

परमेस्सर ओनका आपन ही मनई होइ क चुनेस
ह ।

१३ यहोवा सरग स खाली लखत रहत ह ।

उ सबहिं लोगन क लखत रहत ह ।

१४ उ ऊपर ऊँचे पइ बनाए भए आसन स

धरती पइ रहइवाले सब मनइयन क लखत रहत
ह ।

१५ परमेस्सर हर कउनो क मन रचेस ह ।

तउ कउनो का सोचत अहइ उ समुझत ह ।

१६ राजा क रच्छा ओकरे बड़की सकती स नाही
होत ह,

अउर कउनो सिपाही आपन निज सकती स
सुरच्छित नाही रहत ।

१७ जुद्ध मैं फुरइ अस्वबल नाही जितावत ।

सचमुच तू ओकरी सकती स नाही बचि सकत्या ।

१८ जउन लोग यहोवा क अनुसरण करत हीं,
ओनका यहोवा लखत ह अउ रखवारी करत
ह ।

जउन मनई ओकर आराधना करत हीं, ओनका
ओकर महान पिरेम बचावत ह ।

१९ परमेस्सर ओन लोगन क मउत स बचावत ह ।

उ सबइ जब भुखान होतेन तब उ ओनका सकती
देत ह ।

२० एह बरे हम यहोवा क बाट जोहब ।

उ हमार मदद अउर हमार ढाल अहइ ।

२१ परमेस्सर मोका आनन्दित करत ह ।

मोका फुरइ ओकरे पवित्तर नाउँ पइ भरोसा अहइ ।

२२ हे यहोवा, हम सचमुच तोहार आराधना करित
ह ।

तउ तू हम पइ आपन महान पिरेम देखावा ।

जब दाऊद अबीमेलेक क समन्वा पागल होइ क
देखाँवा किहस । जेहसे अबीमेलेक ओका भगाइ
देइ, इ प्रकार दाऊद ओका तजिके चला गवा ।
उहइ अवसर पइ दाऊद क एक टु पद ।

३४ मैं यहोवा क सदा धन्न कहब ।

मोरे ओठन पइ सदा ओकर स्तुति अहइ ।

२ हे नमूर लोगो ! सुना अउ खुस होइ जा ।

मोरे सेखी यहोवा क बारे मैं अहइ ।

३ मोरे संग यहोवा क गरिमा क गुणगान करा ।

आवा, हम एक साथ घोसना करी कि उ केतना
अच्छा अहइ ।

४ मैं परमेस्सर क लगे मदद माँगइ गएँ, उ मोरे
सुनेस ।

उ मोका ओन सबहिं बातन स बचाएस जेनसे मैं
डेरत हँ ।

५ गरीब लोग ओकरे कइँती मदद बरे लखत हीं ।

ओनकर फीका चेहरन खुसी स गाइ उठेन

काहेकि उ ओनका उत्तर दिहस ।

६ इ दीन जन यहोवा क मदद बरे पुकारेस,

अउर यहोवा मोरे सुनि लिहस ।

अउर उ सब विपत्तियन स मोरे रच्छा किहस ।

७ यहोवा क दूत ओकरे भगत जनन क चारिहुँ
कईती डेरा डाए रहत ह ।
अउर यहोवा क दूत ओन लोगन क रच्छा करत
ह ।
८ चखा अउर समझा कि यहोवा केतना भला
बाटइ ।
उ मनई जउन यहोवा क भरोसे अहइ फुरइ खुस
रही ।
९ यहोवा क पवित्र जन क ओकर आराधना करइ
चाही ।
यहोवा क भगतन बरे कउनो दूसर सुरच्छित ठउर
नाहीं बा ।
१० आजु जउन बरिआर अहइ दुर्बल अउ भूखा होइ
जइहीं ।
मुला जउन परमेस्सर क सरण आवत हीं उ सबइ
लोग हर उत्तम वस्तु पइहीं ।
११ हे बालको, मोर सुना,
अउर मइँ तू पचन्क सिखाउब कि यहोवा क सेवा
कइसे करइ ।
१२ अगर कउनो मनई जिन्नगी स पिरेम करत ह,
अउर बढ़िया अउ बड़की जिन्नगी क जिअइ
चाहत ह
१३ तउ उ मनई क बुरा नाही बोलइ चाही,
उ मनई क झूठ नाही बोलइ चाही ।
१४ बुरा काम जिन करा, नेक काम करत रहा ।
सान्ति क कारज करा, सान्ति क प्रयास मँ जुटा
रहा जब तलक ओका पाइ न ल्या ।
१५ यहोवा सज्जन लोगन क रच्छा करत ह ।
ओनकर पराधनन पइ उ कान देत ह ।
१६ मुला यहोवा, जउन बुरा करम करत हीं, अइसे
मनइयन क खिलाफ होत ह ।
एह बरे उ लोग मरइ क पाछे बिसरि दीन्ह जाइहीं ।
१७ यहोवा स बिनती करा, उ तोहार सुनी ।
उ तू पचन्क तोहरी सबहिं मुसीबतन स बचाइ
लेइ ।
१८ लोगन पइ मुसीबत आइ सकत हीं अउर उ पचे
अभिमानी होब तजि देत हीं ।
यहोवा ओन लोगन क निअरे रहत ह ।
जेनकर टूटा मन अहइ ओनका उ बचाइ लेइ ।
१९ होइ सकत ह सज्जन भी बिपदन मँ घिर जाइँ ।
मुला यहोवा ओन सज्जन लोगन क ओनकर हर
समस्या स रच्छा करी ।
२० यहोवा ओनकइ सब हाइन क रच्छा करी ।
ओनकर एक भी हाइ नाही टूटी ।
२१ दुटठता दुटठ लोगन बरे मउत लावत ह ।
सज्जन क विरोधी नस्ट होइ जइहीं ।

२२ यहोवा आपन हर दास क आतिमा बचावत ह ।
जउन लोग ओह पइ भरोसा रखत हीं, उ ओन
लोगन क नस्ट नाही होइ देइ ।

दाऊद क समर्पित ।

३५ हे यहोवा, मोरे मुकदमन क लड़ा ।
मोरे जुद्धन क लड़ा ।

२ हे यहोवा, कवच अउ द्वार धारण करा,
खड़ा ह्वा अउ मोर रच्छा करा ।

३ बरछी अउ भाला उटावा,
अउर जउन मोरे पाछे पड़ा अहइ ओनसे जुद्ध
करा ।

हे यहोवा, मोरी आतिमा स कहा, “मइँ तोहार
उद्धार करब ।”

४ कछू लोग मोका मारइ पाछे पड़ा अहइ ।

ओनका निरास अउ लज्जित करा ।

ओनका मोड़ द्या अउ ओनका भगाइ द्या ।

मोका नस्कान पहोंचावइ क कुचक्र जउन रचत
अहइ

ओनका असमंजस मँ डाइ द्या ।

५ तू ओनका अइसा भूसा स बनाइ द्या, जेका हवा
उड़ाइ लइ जात ह ।

ओनके संग अइसा होइ द्या कि, ओनके पाछे
यहोवा क दूत पड़इ ।

६ हे यहोवा, ओनकर राह अँधियारी अउ फिसल
जाइवाली होइ जाइ ।

यहोवा क दूत ओनकइ पाछे पड़इ ।

७ उ पचे बिना कारण मोर बरे फंदा लगाएस ह ।

उ पचे बिना कारण मोका फँसावा चाहत हीं ।

८ तउ, हे यहोवा, अइसे लोगन क ओनकर आपन
ही जालि मँ गिरइ द्या ।

ओनका आपन ही फंदन मँ पड़इ द्या ।

अउर कउनो न मालूम भवा खतरा ओन पइ पड़द
द्या ।

९ फुन तउ यहोवा मइँ तोहे मँ आनन्द मनाउब ।

यहोवा क संरच्छण मँ मइँ प्रसन्न होब ।

१० मइँ आपन पूरे मन स कहब, “हे यहोवा, तोहरे
समान कउनो नाही अहइ ।

तू सबलन स दुर्बलन क बचावत ह ।

जउन लोग सकतीवाला होत हीं,

ओनसे तू चिजियन क छोर लेत अहा अउर दीन
अउ बेसहारा लोगन क देत ह ।”

११ एक लबार साच्छी दल मोका दुःख देइ बरे
कुचक्र रचत अहइ ।

उ पचे मोह पइ अपराधन क इलजाम लगवात ह
जेकरे बरे मइँ जानत ही नाही हउँ ।

१२ मई तउ बस भलाई ही भलाई किहेउँ ह ।
मुला उ पचे मोसे बुराई करिहीं ।
हे यहोवा, मोका उ उत्तम फल द्या जउन मोका
मिलइ चाही ।
१३ ओन पइ जब दुःख पड़ा, ओनके बरे मई दुःख
भएउँ ।
मई खइया क तजिके आपन दुःख परगट किहेउँ ।
(जउन मई ओनके बरे पराथना किहेउँ, का मोका
इहइ मिलइ चाही ?)
१४ ओन लोगन बरे मई सोक वस्त्र धारण किहेउँ ।
मई ओन लोगन क संग मीत वरन भाई जइसा
बेउहार किहेउँ ।
मई उ रोवत मनई जइसा दुःखी भएउँ, जेकर
महतारी मरि गइ होइ ।
अइसे लोगन स सोक परगट करइ बरे मई करिआ
वस्त्र पहिर लिहेउँ ।
मई दुःखे मँ बूड़ेउँ अउर मूँड निहुराइके चलेउँ ।
१५ मुला जब मोसे कउनो एक चूक होइ गइ, उ
सबइ लोग मोर खिल्ली उड़ाएन ।
उ सबइ लोग फुरइ मोर मीत नाहीं रहेन ।
मई ओन लोगन क जानत तउ नाहीं ।
उ पचे मोका घेरि लिहन अउर मोह पइ प्रहार
किहन ।
१६ उ पचे मोह पइ दुर्जनता क संग मसखरी किहन
अउ उ पचे मोह पइ दाँत पीसेन ।
१७ मोर सुआमी, तू कब तलक इ सब बुरा होत
लखब्या ? इ सबइ लोग मोका नास करइ क
जतन करत अहई ।
हे यहोवा, मोर प्राण बचाइ ल्या ।
मोरी पियारी जिन्नगी क रच्छा करा ।
उ सबइ सिंह जइसा बन गवा अहई ।
१८ हे यहोवा, मई महासभा मँ तोहार स्तुति करब ।
मई बरिआर लोगन क संग रहत भए तोहार जस
बखानब ।
१९ मोर लबार सत्र हँसत नाहीं रहिहीं ।
फुरइ मोर दुस्मन आपन छुपी भइ
जोजना बरे सजा पइहीं ।
२० मोर दुस्मन सचमुच सान्ति क जोजनन क नाहीं
रचतेन ।
उ पचे इ देस क सान्ति पिरय लोगन क खिलाफत
मँ छुप हुपिके बुरा करइ क कुचकर रचत
अहई ।
२१ मोर दुस्मन मोरे बरे बुरी बातन क कहत अहई ।
उ सबइ झूठ बोलत भए कहत अहई, “अहा !
हम सबइ जानत अही तू का करत अहा !”

२२ हे यहोवा, तू सचमुच लखत अहा कि का कछू
घटत बाटइ ।
तउ तू जिन छुपा रहा,
मोका जिन तजा ।
२३ हे यहोवा, जागा !
मोका रच्छा बरे तइयार होइ जा !
मोरे परमेस्सर यहोवा मोर लड़ाई लड़ा, अउर मोर
निआउ करा ।
२४ हे मोरे परमेस्सर यहोवा, आपन बगइर पच्छ
लिहे मोर निआउ करा,
तू ओन लोगन क मोह पइ हँसइ जिन द्या ।
२५ ओन लोगन क अइसा जिन कहइ द्या,
“अहा ! हमका जउन चाही रहा ओका पाइ लीन्ह !”
हे यहोवा, ओनका जिन कहइ द्या, “हम ओका
बरबाद कइ दीन्ह !”
२६ मई आसा करत हउँ कि मोर दुस्मन निरास अउ
लज्जित होइहीं ।
उ सबइ लोग खुस रहेन जब मोरे संग बुरी बातन
घटत रहिन ।
उ सबइ सोचा करतेन कि उ सबइ मोसे स्प्रेस्ट
अहई !
तउ अइसे लोगन क लाज मँ बूड़ि जाइ द्या ।
२७ ओन लोगन क जउन मोका निर्दोष घोसित
करइ चाहत ह,
खुसी अउ आनन्दित होइ द्या ।
उ पचन क हमेसा कहइ द्या, “यहोवा महान बा !
उ आपन सेवक क अच्छाई चाहत ह ।”
२८ तउ, हे यहोवा, मई लोगन क तोहार अच्छाई
बताउब ।
हर दिन, मई तोहार स्तुति करब ।

संगीत निर्देशक बरे यहोवा
क दास दाऊद क एक पद ।

३६ १ बुरा मनई बहोत बुराई करत ह जब उ
खुद स कहत ह,
“मई परमेस्सर क आदर नाहीं करत हउँ अउ न ही
डेरात हउँ ।”
२ उ मनई खुद स झूठ बोलत ह ।
उ मनई खुद क आपन खोट नाहीं लखत ।
एह बरे उ छिमा नाहीं माँगत ।
३ ओकर वचन सिरिफ बियर्थ अउ झूठा होत हीं ।
उ विवेकवाला नाहीं होत अउर न ही अच्छा काम
सीखत ह ।
४ राति क उ बिछुउना मँ कुचकर रचत ह ।
उ जागिके कउनो भी नीक काम नाहीं करत ।
उ कुकरम क तजई नाहीं चाहत ।

५ हे यहोवा, तोहार बिस्ससनीय पिरेम अकासे स भी ऊँच बाटइ।

हे यहोवा, तोहार सच्चाई बादर स भी ऊँच बाटइ।

६ हे यहोवा, तोहार धर्मी भावना सबन त ऊँची पवंते स भी ऊँची बाटइ।

तोहार सोभा गहिर सागर स भी गहिर अहइ।

हे यहोवा, तू मनइयन अउ गोरूअन क रच्छक अहा।

७ तोहरी करुणा स जियादा मूल्यवान कछू भी नाही अहइ।

मनई अउ दूत तोहरे सरण मँ आवा अहइँ।

८ हे यहोवा, तोहरे मन्दिर क उत्तम बातन स उ सबइ नई सकती पावत हीं।

तू ओनका आपन अद्भुत नदी क पानी क पिअइ देत अहा।

९ हे यहोवा, तोहसे जिन्नगी क झरना फूटत ह !

तोहार जोति ही हमका परकास देखाँवत ह।

१० हे यहोवा, जउन तोहका सच्चाई स जानत हीं, ओनसे पिरेम करत रहा।

ओन लोगन पइ तू आपन खुद क नेकी बरसावा जउन तोहरे बरे सच्चा अहइँ।

११ हे यहोवा, तू मोका घमण्डियन क जाल मँ जिन फँसइ द्या।

दुट्ट लोग मोका कबहुँ धइ न पावइँ।

१२ ओनकर कब्रन क पाथरन पइ इ लिखि द्या :

“दुट्ट लोग हिआँ पइ गिरेन ह।

उ सबइ कुचर दीन्ह गएन।

उ पचे फिन कबहुँ खड़ा नाही होइ पइहीं।”

दाऊद क समर्पित।

३७ १ दुर्जन लोगन स जिन घबरा, जउन बुरा करत हीं अइसे मनइयन स ईस्व्या जिन राखा।

२ दुर्जन मनई घास अउ हरियर पौधन क नाई हाली पिअराइ जात हीं

अउर मरि जात हीं।

३ अगर तू यहोवा पइ भरोसा रखब्या अउर भला काम करब्या तउ तू जिअत रहब्या

अउ ओन चिजियन क भोग करब्या जउन धरती देत ह।

४ यहोवा क सेवा मँ आनन्द लेत रहा,

अउर यहोवा तोहका तोहार मन चाहा देइ।

५ यहोवा क भरोसे रहा।

ओकर बिस्सास करा।

उ वइसा करी जइसा करइ चाही।

६ दुपहरिया क सूरज जइसा,

यहोवा तोहार नेकी अउ खरेपन क चमकावइ।

७ यहोवा पइ भरोसा धरा अउ ओकरे सहारे क बाट जोहा।

तू दुट्टन क कामयाबी लखिके घबरावा जिन करा।

तू दुट्टन क दुट्ट जोजनन क कामयाब होत

लखिके जिन घबरा।

८ तू किरोध जिन करा, तू उन्मादी जिन बना।

ओतना जिन घबराइ जा कि तू बुरा काम करइ चाहा।

९ काहेकि बुरे मनइयन क तउ नास कीन्ह जाइ।

मुला उ सबइ लोग जउन यहोवा पइ भरोसा रखत हीं, उ धरती क पइहीं जेका देइ क परमेस्सर वचन दिहेस ह।

१० तनिक समइ क पाछे, कउनो दुर्जन नाही बच पाई।

हेरइ स भी तोहका कउनो दुट्ट नाही मिली।

११ नमूर लोग उ धरती पइहीं जेका परमेस्सर देइ क वचन दिहेस ह।

उ सबइ सान्ति क आनन्द लेइहीं।

१२ दुट्ट लोग सज्जनन बरे कुचाल चलत हीं।

दुट्ट जन सज्जनन क ऊपर दाँत पीसिके देखाँवत हीं कि उ पचे कोहान अहइँ।

१३ मुला हमार सुआमी ओन दुर्जनन पइ हँसत ह।

उ ओन बातन क लखत ह जउन ओन पइ पइइ क अहइ।

१४ दुर्जन तउ आपन तरवार उठावत हीं अउर धनुस साधत हीं।

उ पचे दीन लोगन, बेसहारा लोगन क मारइ चाहत हीं।

उ सबइ सच्चे लोगन, सज्जन लोगन क मारइ चाहत हीं।

१५ मुला ओनकर धनुस चूर चूर होइ जइहीं।

अउर ओनकर तरवारन ओनकर आपन ही हिरदय मँ उतरिहीं।

१६ थोड़ा स भला मनई,

दुर्जनन क भीड़ स भी उत्तम अहइँ।

१७ काहेकि दुर्जनन क तउ नस्ट कीन्ह जाइ।

मुला भले मनइयन क यहोवा धियान रखत ह।

१८ सुद्ध सज्जन लोगन क यहोवा ओनकइ जिन्नगी भइ बचावत ह।

ओनकर प्रतिफल सदा बना रही।

१९ जबहिं संकट होइ,

सज्जन बरबाद नाही होइहीं।

जब अकाल पड़ी,

सज्जन लोगन क लगे खइया क भरपूर होइ।

२० मुला बुरा मनई यहोवा क दुस्मन होत रहत हीं।

तउ ओन बुरे लोगन क नस्ट कइ दीन्ह जाइ,
ओनकर सबइ घाटी झुराइ जइहीं अउर बर
जइहीं ।

ओनका तउ पूरी तरह स मेट दीन्ह जाई ।

२१ दुट्ट तउ फउरन ही धन उधार माँग लेत ह,
अउर ओका फुन कबहुँ नाहीं चुकावत ।

मुला एक सज्जन अउरन क खुसी स देत रहत ह ।

२२ अगर कउनो सज्जन कउनो क आसीबाँद देइ,
तउ उ सबइ मनई उ धरती क जेका परमेस्सर
देइ क वचन दिहस ह, पइहीं ।

मुला अगर उ सराप देइ मनइयन क तउ उ सबइ
नास होइ जइहीं ।

२३ यहोवा, सिपाही क होसियारी स चलइ मँ मदद
करत ह ।

अउर उ ओका पतन स बचाइ लेत ह ।

२४ फउजी अगर धावत भए दुस्मन पइ प्रहार
करइ, तउ ओकरे हाथे क यहोवा सहारा देत
ह,

अउर ओका गिरइ स बचावत ह ।

२५ मई जुवक भवा रहेउँ पर अबहुँ मई बुढाइ ग
हउ ।

मई कबहुँ यहोवा क सज्जन लोगन क बेसहारा
तजत भए नाहीं लखेउँ ।

मई कबहुँ सज्जन लोगन क संतानन क भीख
माँगत नाहीं लखेउँ ।

२६ सज्जन सदा मुक्त भाव स दान देत ह ।

सज्जन लोगन क गदेलन वरदान होत ही ।

२७ अगर तू कुकरमन स आपन मुँह मोड़ ल्या,
अउर अगर तू नीक करमन क करत रहा,

तउ फिन तू सदा ही जिअत रहब्या ।

२८ यहोवा खरेपन स पिरम करत ह,

उ आपन निज मनवइयन क बेसहारा नाहीं तजत ।
यहोवा आपन निज मनवइयन क हमेसा रच्छा
करत ह,

अउर उ दुट्ट जन क नस्ट कइ देत ह ।

२९ सज्जन उ धरती क पइहीं जेका देइ क परमेस्सर
वचन दिहस ह,
उ पचे ओहमाँ सदा सदा ही रहा करिहीं ।

३० भला मनई तउ खरी सलाह देत ह ।

ओकर निआउ सब क बरे निस्पच्छ होत ह ।

३१ सज्जन क हिरदय मँ यहोवा क उपदेस रहत ही ।
उ सोझ मारग पइ चलब नाहीं तजत ।

३२ मुला दुर्जन सज्जन क दुःख पहाँचावइ क रस्ता
हेरत रहत ह, अउर दुर्जन सज्जन क मारइ
क जतन करत ही ।

३३ मुला यहोवा दुर्जनन क मुक्त नाहीं तजी ।

उ सज्जन क अपराधी नाहीं ठहरइ देइ ।

३४ यहोवा क मदद क बाट जोहत रहा ।

यहोवा क पाछे पाछे चलत रहा, दुर्जन नस्ट
होइहीं ।

यहोवा तोहका महत्वपूर्ण बनाई ।

तू उ धरती पउब्या जेका देइ क यहोवा वचन दिहस
ह ।

३५ मई दुट्ट क बरिआर लखेउँ ह ।

मई ओका मजबूत अउ तन्दुरुस्त बृच्छ क नाई
सक्तीसाली लखेउँ ।

३६ मुला उ सबइ फुन मिट गएन ।

मोरे हेरे पइ ओनकर पता तलक नाहीं मिला ।

३७ सच्चा अउ खरा बना,

काहेकि इहइ स सान्ति मिलत ह ।

३८ मुला जउन लोग व्यवस्था नेम तोड़त हीं
नस्ट कइ दीन्ह जइहीं ।

३९ यहोवा नेक मनइयन क रच्छा करत ह ।

उ आपन किला मँ रहा जब विपत्तियन आइन ।

४० यहोवा नेक लोगन क सहारा देत ह, अउर
ओनकर रच्छा करत ह ।

सज्जन यहोवा क सरण मँ आवत हीं अउर यहोवा
ओनका दुर्जनन स बचाइ लेत ह ।

दाऊद क समर्पित ।

३८ हे यहोवा, जब तू किरोध मँ रहा तउ
मोका फटकार जिन लगावा ;

जब तू परेसानी मँ रहा मोका जिन सुधारा ।

२ हे यहोवा, तू मोका चोट दिहा ह ।

तोहार बाण मोहमाँ गहिर उतरा अहइ ।

३ तू मोका सजा दिहा ह अउर मोर पूरी देह दुःखत
बाटइ,

मई पाप किहेउँ अउ तू मोका सजा दिहा ।

एह बरे मोर हाइ दुःखत अहइ ।

४ मई बुरा काम करइ क अपराधी हउँ,

अउर उ अपराध एक बड़का बोझा क नाई मोरे
काँधे पइ चढा अहइ ।

५ मई बना रहेउँ मूरख, अब मोर घाव दुर्गन्ध स
भरिके रिसत अहइ,

अउर उ सबइ सड़त अहइ ।

६ मई निहुरा अउ दबा भवा अहउँ ।

मई दिन भइ उदास रहत हउँ ।

७ बोखार स मोर गुर्दन दर्द करत ह,

अउर मोर समूचे बदन मँ बेमारी अहइ ।

८ मई बहोत दुबल अउ थका भवा हउँ ।

मई कराहत हउँ काहेकि मोर हिरदइ कस्ट झेलत
अहइ ।

१ हे यहोवा, तू मोर कराहब सुनि लिहा ।
 मोर आह तउ तोहसे छुपी नाही ।
 १० मोर हिरदइ चूर-चूर होइ गवा अहइ अउर मोर
 सकित मोका छोड़ दिहेस ह ।
 मोरी आँखिन क जोति लगभग जात रही ।
 ११ काहेकि मई रोगी हउँ,
 एह बरे मोरे मीत अउ मोर पड़ोसी मोसे मिलइ
 नाही अउतेन ।
 मोरे परिवार क लोग तउ मोरे लगे तलक नाही
 फटकतेन ।
 १२ मोर दुस्मन मोर निन्दा करत ही ।
 उ सबइ झूठ बातन अउ प्रतिवादन क फइलावत
 रहत ही ।
 मोरे ही बारे मँ उ सबइ हरदम बातचीत करत रहत
 ही ।
 १३ मुला मई बहरा बना कछू नाही अनकत हउँ ।
 मई गुँगा होइ गवा, जउन कछू नाही बोल सकत ।
 १४ मई उ मनई क तरह बना हउँ, जउन कछू नाही
 सुन सकत कि लोग ओकरे बारे मँ का कहत
 अहइ ।
 अउर मई इ तर्क नाही दइ सकत अउर सिद्ध नाही
 कइ सकत कि मोर दुस्मन अपराधी अहइ ।
 १५ तउ, हे यहोवा, मोका तू ही बचाइ सकत ह ।
 मोर परमेस्सर अउर मोर सुआमी मोरे दुस्मनन क
 तू ही फुरइ बताइ द्या ।
 १६ काहेकि मई पराथना किहेउँ, “ओनका दुर्जन स
 प्रसन्न होइ क अनुमति जिन द्या जब मई
 कउनो गलती किहेउँ ।
 ओनका आपन क बारे मँ सेखी हाँकइ क अनुमति
 जिन द्या ।”
 १७ मई जानत हउँ कि मई आपन कुकरमन बरे पापी
 हउँ ।
 मई आपन पीरा क बिसरि नाही सकत हउँ ।
 १८ हे यहोवा, मई तोहका आपन कुकरम बताइ
 दिहेउँ ।
 मई आपन पापन बरे दुःखी हउँ ।
 १९ मोर दुस्मन जिअत अउ पूरी तरह तन्दुरुस्त
 अहइ ।
 उ पचे बहोत-बहोत झूठी बातन बोलैन ह ।
 २० मोर दुस्मन मोरे संग बुरा बेउहार करत ही,
 जबकि मई ओनके बरे भला ही किहेउँ ह ।
 मई बस भला करइ क जतन करत रहेउँ,
 मुला उ सबइ लोग मोरे खिलाफ होइ ग अहइ ।
 २१ हे यहोवा, मोका जिन बिसरा ।
 मोरे परमेस्सर, मोसे तू दूर जिन रहा ।
 २२ देरी जिन करा, आवा अउर मोर सुधि ल्या ।

हे मोर परमेस्सर मोका तू बचाइ ल्या ।

संगीत निर्देशक क यदूतून बरे दाऊद क एक ठु पद ।

३९ मई कहेउँ, “जब तलक इ सबइ दुट्ट मोरे
 समन्वा रइहीं,
 तब तलक मई आपन कहनी बरे सचेत रहब ।
 मई आपन वाणी क पाप स दूर रखब ।
 अउर मई आपन मुँह क बंद कइ लेबउँ ।”
 २ तउ एह बरे मई कछू नाही कहेउँ ।
 मई भला भी नाही कहेउँ ।
 मुला मई बहोत परेसान भएउँ ।
 ३ मई बहोत गुस्सान रहेउँ ।
 इ बारे मँ मई जेतना सोचत चला गएउँ, ओतना
 ही मोर किरोध बाढ़त चला गवा ।
 तउ मई आपन मुँह तनिकउ नाही खोलेउँ ।
 ४ हे यहोवा, मोका बतावा कि मोरे संग का कछू
 घटित होइवाला अहइ ?
 मोका बतावा, मई कब तलक जिअत रहब ?
 मोका जानइ द्या फुरइ मोर जिन्नगी केतनी छोट
 अहइ ।
 ५ तू मोका जिअइ बरे बहोत कम समइ दिहा ह ।
 तोहार तुलना मँ मोर जिन्नगी बहोत अल्प अहइ ।
 एक मनई क जिन्नगी सिरिफ एक साँस अहइ ।
 कउनो भी सदा नाही जिअत ।
 ६ उ जिन्नगी जेका हम लोग जिअत ह, उ झूठी
 छाया भइ होत ह ।
 जिन्नगी क सारी भाग दौड़ निस्प्रयोजन होत ह ।
 हम पचे तउ बेकार ही चिन्ता पालित ह ।
 धन दौलत वस्तुअन क हम जोरिके धरित ह, मुला
 हम नाही जानित ओनका कउन भोगी ।
 ७ तउ, मोरे यहोवा, मई का आसा रखउँ ?
 तू ही बस मोर आसा अहा !
 ८ हे यहोवा, जउन कुकरम मई किहेउँ ह, ओनसे तू
 ही मोका बचउब्या ।
 तू मोरे संग कउनो क भी कउनो विवेकी न
 होइवाला जन क संग क नाई बेउहार नाही
 करइ देब्या ।
 ९ मई आपन मुँह नाही खोलब ।
 मई कछू भी नाही कहब ।
 यहोवा तू वइसे किह्या जइसे करइ चाही रहा ।
 १० मुला परमेस्सर, मोका सजा देव तजि देइ ।
 अगर तू मोका सजा देव नाही तज्या, तउ तू मोर
 नास करब्या ।
 ११ हे यहोवा, तू लोगन क ओनकर कुकरमन क
 सजा देत अहा, अउर इ तरह जिन्नगी क खरी
 राह लोगन क सिखावत ह ।

हमार काया पुरान अउ दुबराइ जात ह ।
अइसे उ ओढ़ना क नाई जेहमाँ कीरा लाग होइ ।
हमार जिन्नगी एक ठु नान्ह बादर जइसे लखत
बिलाइ जात ह ।

१२ हे यहोवा, मोर विनती सुना ।

मोरे ओन सव्दन क सुना जउन मई तोहसे
गोहराइके कहत हउं ।

मोरे आँसुअन क लखा ।

मई बस राहगीर हउं, तोहका संग लिए इ जिन्नगी
क राहे स गुजरत हउं ।

इ जिन्नगी क राह पइ मई आपन पुरखन क तरह
कछू समइ मात्र पइ टिका भवा हउं ।

१३ हे यहोवा, मोका अकेल्ले रहइ द्या ।

मरइ स अउ चलि जाइ स पहिले मोका फुन स
आनन्दित होइ द्या ।

संगीत निर्देशक बरे दाऊद क एक पद ।

१ यहोवा क मई पुकारेउं ।

४० उ मोर सुनेस ।

उ मोर रोदन क सुन लिहस ।

२ यहोवा मोका विनास क गड़हा स उबारेस ।

उ मोका दलदल गड़हा स उठाएस,
अउर उ मोका चट्टाने पइ बइठाएस ।

उ ही मोरे कदमन क टेकाएस ।

३ यहोवा मोरे मुँह मँ एक ठु नवा गीत बसाएस ।

परमेस्सर क एक ठु स्तुति गीत ।

बहुतेरे लोग लखिहीं जउन मोरे संग भवा ह ।

अउर फुन परमेस्सर क आराधना करिहीं ।

उ पचे यहोवा क बिस्सास करिहीं ।

४ अगर कउनो मनई यहोवा क भरोसे रहत ह, तउ
उ मनई सचमुच खुस होइ ।

अउ अगर कउनो मनई मूर्तिअन अउ झूठ देवतन
क सरण मँ नाहीं जाइ, तउ उ मनई फुरइ खुस
होइ ।

५ हमार परमेस्सर यहोवा, तू बहुतेरा अद्भुत काज
किहा ह ।

हमरे बरे तोहरे लगे अद्भुत जोजना अहई ।

कउनो मनई नाहीं जउन ओका गन सकइ ।

मई तोहरे कीन्ह काम क बारबार बखानबउं ।

६ हे यहोवा, तू मोका इ समुझाया ह:

तू फुरइ कउनो अन्नबलि अउ पसुबलि नाहीं
चाहत रह्या ।

कउनो होमबलि अउ पापबलि तोहका नाहीं
चाही ।

७ तउ मई कहेउं, “लखा मई आवत हउं!

किताबे मँ मोरे बारे मँ इहइ लिखा अहइ ।

८ हे मोरे परमेस्सर, मई उहइ करइ चाहत हउं
जउन तू चाहत ह ।

मई मनवा मँ तोहरी सिच्छन क बसाइ लिहेउं ।”

९ मई महासभा क बीच लोगन क उद्धार क खुस
खबरी कहेउं ।

हे यहोवा, तू जानत अहा कि एकरे बारे मँ कहेइ स
उरेउं नाहीं ।

१० मई तोहार उद्धार बरे चुप नाहीं रहब ।

हे यहोवा, मई तोहार बिस्सासी अउर मुक्ति बरे
खुलके बोलेउं ।

मई महासभा मँ तोहार बिस्ससनीय पिरेम

अउर दयालुता क बिना छुपाए बोलेउं ।

११ एह बरे हे यहोवा, तू आपन दायी मोहसे जिन
छुपावा ।

तू आपन करुणा अउ सच्चाई स मोर रच्छा करा ।

१२ मोका दुट्ट मनइयन घेरि लिहन,

उ पचे एतना जियादा बाटेन कि गना नाहीं
जातेन ।

मोका आपन पापन घेरि लिहे अहई,

अउर मई ओनसे बचिके पराइ नाहीं सकत हउं ।

मोर पाप मोरे मूँडे क बारे स जियादा अहई ।

मोर साहस मोहसे हेराइ चुका बाटइ ।

१३ हे यहोवा, मोरी कइँती दउड़ा अउ मोर रच्छा
करा ।

आवा, देरी जिन करा, मोका बचाइ ल्या ।

१४ उ सबइ दुट्ट मनई मोका मारइ क जतन करत
हीं ।

हे यहोवा, ओनका लज्जित करा अउ ओनका
निरास कइ द्या ।

उ सबइ मनई मोका दुःख पहोचावइ चाहत हीं ।

तू ओनका अपमानित होइके पराइ द्या ।

१५ उ सबइ दुट्ट लोग मोर मसखरी उड़ावत हीं ।

ओनका एतना सर्मिन्दा करा कि उ पचे बोल तलक
न पावई ।

१६ मुला उ सबइ मनई जउन तोहका हेरत हीं,
आनन्द मँ भरि जाई ।

उ सबइ मनई सदा इ कहत रहई, “यहोवा क गुण
गावा !”

ओन लोगन क तोहसे ही रच्छित होब नीक लागत
ह ।

१७ हे मोर सुआमी, मई तउ बस दीन, बेसहारा मनई
अहउं ।

मोर रच्छा करा,

तू मोका बचाइ ल्या ।

हे मोर परमेस्सर, अब जियादा देर जिन करा ।

संगीत निर्देशक बरे दाऊद क एक ठु गीत ।

४१ १ जउन दीन क कामयाब होने मैं मदद करत ह उ धन्य अहइ ।
यहोवा ओनका बचावत ह जब उ पचे विपत्ती मैं होत हीं ।

२ यहोवा उ मनई क रच्छा करी अउ ओकर जिन्नगी बचाइ ।

उ मनई धरती पइ बहोतइ बरदान पाई ।
परमेस्सर ओकरे दुस्मनन क जरिये ओकर नास नाही होइ देइ ।

३ जब मनई रोगी होइ अउर बिछुटना मैं पड़ा होइ,
ओका यहोवा सक्ति देइ ।

उ मनई बिछुटना मैं चाहे रोगी पड़ा होइ, मुला यहोवा ओका चंगा कइ देइ ।

४ मई कहेउँ, “यहोवा, मोहे पइ दाय़ा करा ।
मई तेरे खिलाफ पाप किहेउँ ह, मुला मोका अउर अच्छा करा ।”

५ मोर दुस्मन मोरे बरे अपसब्द कहत अहइँ,
उ पचे कहत अहइँ, “इ कब मरी अउर कब बिसराइ दीन्ह जाई ?”

६ कछू लोग मोरे लगे मिलइ बरे आवत हीं ।
उ पचे कउनो लाभदायक बात नाही बोलत हीं,
उ पचे सिरिफ कछू समाचार मोरे बरे जमा करत हीं ।

बाद मैं इ ओनका हर जगह फइलावत हीं ।

७ मोर दुस्मन छुपे छुपे मोर निन्दा करत रहत हीं ।
उ पचे मोरे खिलाफ कुचक्र रचत हीं ।

८ उ पचे कहा करत हीं, “उ कउनो बुरा करम किहेस ह,

इहइ स ओका कउनो बुरा लोग लगा ह ।
मोका आसा अहइ उ कबहुँ तन्दुरुस्त नाही होइ ।”

९ मोर परम मित्र मोरे संग खात रहा, ओह पइ मोका भरोसा रहा ।

मुला अब मोर परम मित्र भी मोरे खिलाफ होइ ग अहइ ।

१० तउ हे यहोवा, मोह पइ कृपा करा अउ मोहे पइ कृपालु ह्वा ।

मोका खड़ा करा कि मई बदला लेउँ ।

११ हे यहोवा, अगर तू मोरे दुस्मनन क बुरा नाही करइ देब्या,

तउ मई समुझब कि तू मोका अपनाइ लिहा ह ।

१२ मई निर्दोष रहेउँ अउर तू मोर मदद किहा ।

तू मोका खड़ा किहा अउर मोका तोहार सेवा करइ दिहा ।

१३ इस्राएल क परमेस्सर,
यहोवा क प्राचीन काल स लइके अन्तिम समई तलक धन्य होइ ।
आमीन, आमीन !

दूसर भाग

(भजन ४२-७२)

संगीत निर्देशक बरे कोरह परिवार क एक ठु मस्किल ।

४२ १ एक ठु पिआसा हिरन क नाई जउन धार क पानी पिअइ क इच्छुक अहइ,
वइसे ही, हे परमेस्सर, मोर प्राण तोहरे इच्छा रखत हीं ।

२ मोर प्राण जिअत परमेस्सर क पिआसा अहइ ।
मई ओहसे मिलइ बरे कब आइ सकत हउँ ?

३ राति अउ दिन मोर हर दिन क भोजन सिरिफ आँसू बाटइ ।

मोर दुस्मन कहत हीं, “तोहार परमेस्सर कहाँ बा ?”

४ तउ मोका इ सबइ बातन क सुमिरइ द्या ।

मोका आपन हिरदइ बाहेर उड़ेइ द्या ।

मोका सुमिरन अहइ मई परमेस्सर क मन्दिर मैं चलेउँ अउ भिड़िया क अगुआई करत रहेउँ ।

मोका सुमिरन अहइ उ लोगन क संग आनन्द स भरा बड़कई क गीत गाउब अउर उ उत्सव मनाउब ।

५-६ मई एँतना दुःखी काहे हउँ ?

मई एँतना बियाकुल काहे हउँ ?

“मोका परमेस्सर क सहारे क बाट जोहइ चाही ।

मोका अबहुँ ओकर स्तुति क अवसर मिली ।

उ मोका बचाई ।

हे मोरे परमेस्सर, मई बहोतइ दुःखी हउँ ।

एह बरे मई यरदन नदी क स्रोत मैं, हर्मोन पहाड़ क आधार पइ छोटा पहाड़ी मैं तोहार आराधना किहेउँ ह ।”

७ जइसे नदी क लहरन आवत अउ गरजत ह मई झरना क कोलाहल करत भए सब्द सुनत हउँ ।

वइसे ही मोका विपत्तियन बारम्बार घेरी रहिन ।
हे यहोवा, तोहार लहरन एक क बाद दूसरा आवत ह,

११ ४२:५-६ छोटा पहाड़ी या, “मिसगार क पर्वत पइ” सायद अब इ जगह योराह कहा जात ह । इ इस्राएल क उत्तर मैं बनायाह (कसीरिया फिल्लिपी) अहइ । इ पुरानी दान नगर क बगल मैं रहा ।

मोर चारिहूँ कइती घेरिके मोका दहबोच रखेन ह ।
 ५ अगर हर दिन यहोवा बिस्ससनीय पिरेम देखाइ ।
 फुन तउ राति मैं मइँ ओकर गीत गाइ पाउब ।
 मइँ आपन सजीव परमेस्सर क पराथना कइ
 सकब ।

१ मइँ आपन परमेस्सर, आपन चट्टान स बातन
 करत हउँ ।

मइँ कहा करत हउँ, "हे यहोवा, तू मोका काहे
 बिसराइ दिहा ?

ये यहोवा, तू मोका इ काहे नाहीं देखाँया कि मइँ
 आपन दुस्मनन स बचिके कइसे निकरउँ ?"

१० मोर दुस्मनन मोका मारइ क जतन किहेन ।
 उ पचे मोहे पइ आपन घिना देखाँवत हीं जब उ पचे
 कहत हीं, "तोहार परमेस्सर कहाँ अहइ ?"

११ मइँ एँतना दुःखी काहे हउँ ?

मइँ काहे एँतना बियाकुल हउँ ?

"मोका परमेस्सर क सहारे क बाट जोहइ चाही ?
 मोका अब भी ओकर स्तुति करइ क अवसर मिली ।
 उ मोका बचाइ ।"

१३ हे परमेस्सर, एक मनई अहइ जउन
 तोहार अनुसरण नाहीं करत ।

उ मनई दुटठ अहइ अउ झूठ बोलत ह ।

हे परमेस्सर, मोर मोकदमा लड़ा अउर इ निर्णय
 करा कि कउन सत्य बाटइ ।

मोका उ मनई स बचाइ ल्या ।

२ हे परमेस्सर, तू ही मोर सरणस्थल अहा !

मोका तू काहे बिसराइ दिहा ?

तू मोका इ काहे नाहीं देखाँया

कि मइँ आपन दुस्मनन स कइसे बचिके निकरउँ ?

३ हे परमेस्सर, तोहार जोति अउ सच्चाई क मोह
 पइ चमकइ द्या ।

उ मोका तोहार पवित्तर पर्वत पइ तोहार आपन
 वास-स्थान जाइ मैं अगुवाइ करइ ।

४ मइँ तउ परमेस्सर क वेदी क लगे जाब ।

परमेस्सर मइँ तोहरे पास आउब ।

उ मोका आनन्दित करत ह ।

हे परमेस्सर, हे मेरे परमेस्सर, मइँ वीणा पइ तोहार
 स्तुति करब ।

५ मइँ एँतना दुःखी काहे हउँ ?

मइँ काहे एँतना बियाकुल हउँ ?

"मोका परमेस्सर क सहारे क बाट जोहइ चाही ।

मोका अब भी ओकर स्तुति क अवसर मिली ।

उ मोका बचाई ।"

संगीत निर्देसक बरे कोरह
 परिवार क एक ठु भक्ति गीत ।

१ हे परमेस्सर, हम पचे तोहरे बारे मैं सुने
 अही ।

हमार पुरखन ओनकइ दिनन मैं जउन काम तू किहे
 रह्या ओनके बारे मैं हम पचन्क बताया ।

उ पचे पुराने जमाने मैं जउन तू किह्या ह, ओनका
 हम पचन्क बताया ।

२ हे परमेस्सर, तू इ धरती आपन महासक्ति स
 पराये लोगन्स लिहा

अउर हम का दिहा ।

ओन बिदेसी लोगन्क तू कुचर दिहा,
 अउर ओनका इ धरती तजिके देइ क दबाव डया ।

३ हमार पुरखन इ धरती आपन तरवारन क बल पइ
 नाहीं लिहे रहेन आपन भुजदण्डन क बल पइ
 बिजयी नाहीं भएन ।

इ एहू बरे भवा रहा ।

काहेकि तू हमरे पुरखन क संग रह्या ।

हे परमेस्सर, तोहार महान सक्ति हमरे पुरखन क
 रच्छा किहस ।

काहेकि तू ओनसे पिरेम करत रह्या ।

४ हे मोरे परमेस्सर, तू मोर राजा अहा ।

उ आदेस द्या जउन कि याकूब क लोगन क जीत
 मैं अगुवाइ करी ।

५ परमेस्सर, तोहरी सक्ति स हम आपन दुस्मनन
 क पीछे ढकेल दिहन ।

तोहार नाउँ स हम आपन दुस्मन क कुचरि देब ।

६ मोका आपन धनुस अउ बाणन पइ भरोसा नाहीं ।

मोर तरवार मोका बचाइ नाहीं सकत ।

७ हे परमेस्सर, तू ही हमका मिस्र स बचाया ।

तू हमरे दुस्मनन क लज्जित किहा ।

८ हर दिन हम परमेस्सर क गुण गाउब ।

हम तोहरे नाउँ क स्तुति सदा करब ।

९ मुला अब, हे यहोवा, तू हम लोगन स पीछे मुडि
 गवा ह अउ हमका नीचा कइ दिहा ह !

तू हमरे फउज मैं जुरइ स इन्कार कइ दिहा ह जब
 हम जुद्ध मैं गए रहेन !

१० तू हमका हमरे दुस्मनन क लगे छोडि दिहेस,

तउ उ पचे हमार सारा धन दौलत छीन लइ गएन ।

११ तू हमका उ भेड़ी क नाई तज्या जउन खडिया क
 तरह खाइ क होत ह ।

तू हमका रास्टरन क बीच छितराइ दिहा ।

१२ हे परमेस्सर, तू आपन लोगन क यूँ ही बेच दिहा,
 अउ ओनके मूल्य पइ भाव ताव नाहीं किहा ।

- १३ तू हमका हमरे पड़ोसियन मँ हँसी क पात्र बनाया ।
हमरे पड़ोसी हमार मसखरी करत हीं, अउर हमार मजाक बनावत हीं ।
- १४ लोग हमरी भी कथा उपहास कथा मँ कहत हीं ।
हिआँ तलक कि उ सबइ लोग जेनका आपन कउनो रास्टर नाहीं अहइ, आपन मूँड़ी हलाइके हमार मसखरी करत हीं ।
- १५ मई लज्जा मँ बूड़ा अहउँ ।
मई सारे दिन भइ निज लज्जा निहारत रहत हउँ ।
- १६ मोर दुस्मन मोका लज्जित किहेन ह ।
मोर मसखरी उड़ावत भए मोर दुस्मन, आपन बदला लेइ चाहत ह ।
- १७ हे परमेस्सर, हम तोहका बिसरावा नाहीं ।
फिन भी तू हमरे संग अइसा करत ह ।
हम जब आपन करार पइ तोहरे संग हस्ताच्छर किहे रहे, झूठ नाहीं बोले रहे ।
- १८ हे परमेस्सर, हम तउ तोहसे मुँह नाहीं मोड़ा ।
अउर न ही तोहार अनुसरण करब तजा ह ।
- १९ मुला, हे यहोवा, तू हमका इ ठउरे पइ अइसे टूस दिहा ह जहाँ सियार रहत हीं ।
तू हमका इ जगह मँ जउन मउत क तरह अँधियर अहइ मुँद दिहा ह ।
- २० का हम आपन परमेस्सर क नाउँ बिसरी ?
का हम विदेसी देवतन क अगवा निहुरी ? नाहीं ।
- २१ निहचय ही, परमेस्सर एँन बातन क जानत ह ।
उ तउ हमार गहिर रहस्य तलक जानत ह ।
- २२ हे परमेस्सर, हम तोहरे बरे रोज रोज मारा जात अही ।
हम ओन भेड़िन जइसा बना अही जउन बधइ बरे लइ जाई जात अहइँ ।
- २३ मोर सुआमी, उठ !
नीदिया मँ काहे ओलरा अहा ?
उठा ! हमका सदा बरे जिन तजा ।
- २४ हे परमेस्सर, तू हमसे काहे छुपत ह ?
का तू हमार दुःख अउर सबइ वेदना क बिसरि गवा अहा ?
- २५ हमका धुरि मँ पटक दीन्ह गवा ह ।
हम ओंधा मुह कइके धरती पइ पड़ा भवा अही ।
- २६ हे परमेस्सर, उठा अउर हमका बचाइ ल्या ।
आपन नित्य पिरैम क कारण हमार रच्छा करा ।

संगीत निर्देशक बरे “सोकन्नीम” राग क अनुसार कोरह परिवार क कलात्मक एक टु पिरैम गीत ।

४५ १ सुन्नर सब्द मोरे मनवा मँ भरि जात हीं,
जब मई राजा बरे बातन लिखत हउँ ।
मोरी जिभिया पइ सब्द अइसे आवइ लागत हीं
जइसे उ पचे कउनो कुसल लेखक क लेखनी स निकरत होई ।

२ सबइ मनइयन मँ, तू अति सुन्नर अहइ ।

तोहार मुँहे स कृपालु सब्द निकलत अहा ।

एह बरे परमेस्सर तोहका सदा-सर्वदा आसीस देइ ।

३ तू आपन तरवार क जोद्धन क कमर पइ बाँधा ।

तू महिमा वाला वस्त्र धारण करा ।

४ तू अद्भुत देखाँत अहा ।

जा, धरम अउ निआउ क जुद्ध जीत ल्या ।

अद्भुत करम क करइ बरे सक्ती स भरी दाहिनी भुजा क पूरयोग करा ।

५ तोहार तीर तइयार अहइँ ।

तू बहुतेरन क हराइ देब्या ।

तू आपन दुस्मनन पइ हुकूमत करब्या ।

६ हे परमेस्सर, ११ तोहार सिंहासन हमेसा रहब ।

तोहार साही राजदण्ड अच्छाई तोहार राज्ज क मजबूत बनावत ह ।

७ तू नेकी स पिआर अउ बुराई स घिना करत अहा ।

एह बरे सक्तीमान निआवाधीस,

तोहार परमेस्सर तोहका तोहार साधियन क ऊपर राजा चुनेस ह ।

८ तोहार ओढ़ना महकत अहइँ जइसे गंध रस, अगर अउ तेज पात स मधुर गंध आवति होइ ।

हाथी दाँत स जड़ा भवा राजमहलन स तोहका आनन्द मँ भरि देइ क मधुर संगीत क झंकार फइलति अहइँ ।

९ राजा लोगन क बिटियन अइसा सेवा किहेन जइसा कि उ राजा क बिवाह मँ दुल्हन क सेविकन अहइँ ।

तोहार महरानी ओपीर क सोना स बना मुकुट पहिरे तोहरे दाहिन कइँती विराजति अहइँ ।

१० हे राजपुत्री, मोरी बात क सुना ।

धियानदइके सुना, तबहिँ तू मोरी बात क समझबू ।

तू आपन निज लोगन अउर बाप क घराने क बिसरि जा ।

११ राजा तोहरे सुन्दरता पइ मोहित अहइ ।

११ ४५ : ६ परमेस्सर हिआँ सम्भवतः राजा क ओर इसारा करत ह, जउन आपन लोगन क निआवाधीस क रूप मँ सेवा करत ह ।

इ तोहार नवा सुआमी होइ ।
 तोहका एकर सम्मान करब अहइ ।
 १२ सूर सहर क लोग तोहरे बरे उपहार *लइ अइहीं ।
 अउर धनी मानी तोहसे मिलइ चइहीं ।
 १३ उ राजकन्या उ मूल्यवान रत्न क नाई अहइ
 जेका सुन्नर मूल्यवान सुवर्ण मँ जड़ा गवा होइ ।
 १४ ओका रमणीक वस्त्र पहिराइके लिआवा गवा
 बाटइ ।
 ओकरी सखियन क भी जउन ओकरे पाछे अहइँ
 राजा क समन्वा लावा गवा ।
 १५ उ पचे हिआँ उल्लास मँ आई अहइँ ।
 उ पचे आनन्द मँ मगन होइके राजमहल मँ प्रवेस
 करिहीं ।
 १६ राजा, तोहरे पाछे तोहार पूत सासक होइहीं ।
 तू ओनका समूचे धरती क राजा बनउब्या ।
 १७ मइँ तोहरे नाउँ क प्रचार जुग जुग तलक करब ।
 तू प्रसिद्ध होब्या, तोहरे जस क गीतन क लोग
 सदा सदा ही गावत रइहीं ।

अलामोथ क संगत पइ संगीत निर्देसक बरे
 कोरह परिवार क एक ठु पद ।

४६ १ परमेस्सर हमरे पराक्रम क भण्डार
 अहइ ।
 संकट क समइ उ हमेसा मदद बरे हुवाँ होइ ।
 २ एह बरे जब धरती काँपत ह अउर जब पर्वत
 समुद्र मँ भहराइ लागत ह,
 हमका डर नाही लागत ।
 ३ हम नाही डेराइत जब सागर उफनत अउ
 मटमैला होइ जात ह,
 अउर धरती अउ पहाड़ काँपइ लागत हीं ।
 ४ हुआँ एक ठु नदी अहइ, जउन परम परमेस्सर क
 नगरी क
 आपन धारा स खुसी स भरि देत ह ।
 ५ उ सहर मँ परमेस्सर अहइ, इहइ स ओकर कबहुँ
 पतन नाही होइ ।
 परमेस्सर ओकर मदद भोर स पहिले ही करी ।
 ६ यहोवा क गरजत ही, रास्टर डर स काँपि जइहीं ।
 ओनकर राजधानियन क पतन होइ जात ह अउ
 धरती पिघल उठत ह ।
 ७ सर्वसक्तिमान यहोवा हमरे संग अहइ ।
 याकूब क परमेस्सर हमार सरणस्थल अहइ ।
 ८ आवा ओन सक्ती स भरा कामे क लखा जेनका
 यहोवा करत ह ।

उ सबइ काम ही धरती पइ यहोवा क मसहूर करत
 हीं ।
 ९ यहोवा धरती पइ होत भए कहुँ भी जुद्ध क रोक
 सकत ह ।
 उ सबइ फउजी क धनुसन क तोड़ सकत हीं, अउ
 ओनके भालन क चकनाचूर कइ सकत ह,
 रथन क उ बारिके भसम कइ सकत ह ।
 १० परमेस्सर कहत ह, "सांत बना अउ जाना कि मइँ
 ही परमेस्सर अहउँ !
 रास्टरन क बीच मोर बड़कई होइ ।
 धरती पइ मोर महिमा फइलि जाइ !"
 ११ यहोवा सर्वसक्तिमान हम पचन्क संग बा ।
 याकूब क परमेस्सर हमार ढाल अहइ ।

संगीत निर्देसक बरे कोरह परिवार क एक ठु भजन ।

४७ १ हे सबहिं लोगो, ताली बजावा,
 अउर आनन्द मँ भरिके परमेस्सर क जय
 जयकार करा !
 २ महिमा महिम यहोवा भय अउर विस्मय स भरा
 बाटइ ।
 सारी भुइँया क उहइ महान राजा अहइ ।
 ३ उ हुकूम दिहेस कि रास्टरन हमार नियंत्रन मँ
 होब
 एह बरे हम पचन्क ओनका हराइ दिहा ह ।
 ४ हमार धरती उ हमरे बरे चुनेस ह ।
 उ याकूब बरे अद्भुत धरती चुनेस जेहसे उ पिरम
 करत ह ।
 ५ यहोवा परमेस्सर तुरही क ध्वनि
 अउर जुद्ध क नरसिंह क स्वर क संग ऊपर उठत
 ह ।
 ६ परमेस्सर क गुणगान करत भए गुण गावा ।
 हमरे राजा क बड़कई क गीत गावा ।
 अउर ओकर जस क गीत गावा ।
 ७ परमेस्सर सारी भुइँया क राजा अहइ ।
 ओकर बड़कई क गीत गावा ।
 ८ परमेस्सर आपन पवित्र सिंहासन पइ बिराजत
 ह ।
 परमेस्सर सबहिं रास्टरन पइ हुकूमत करत ह ।
 ९ रास्टरन क नेता, इबाहीम क परमेस्सर क लोगन
 क संग मिलत हीं ।
 सबहिं रास्टरन क नेता,
 परमेस्सर क अहइँ ।
 परमेस्सर ओन सबन क ऊपर अहइ ।

*४५:१२ तोहरे बरे उपहार "सूर क बिटिया, अमीर लोग तोहार लगे तोहसे मिलइ बरे उपहार लेइहीं ।" साइद दुल्हन फोनिा क राजकुमारी अहइ । उ होइ सकत ह इस्राएल क (उत्तरी बंसज) राजा अहाब स बियाह किहेस ह ।

एक ठु भजन: कोरह परिवार क एक ठु पद ।

१ यहोवा महान अहइ ।

४८ उ हमेसा मोर परमेस्सर क नगर मँ आपन पवित्र पर्वत पइ बड़कई करत अहइ ।

२ सिय्योन पर्वत असल मँ परमेस्सर क पवित्र पर्वत बाटइ ।

इ महान राजा क नगर बाटइ ।

समूचइ संसार क लोग हिआँ खुस रहत हीं काहेकि इ प्रसन्नता क सिखर पइ अहई ।[†]

३ उ सहर क महलन मँ, परमेस्सर क सरणस्थल क नाउँ स जाना जात ह ।

४ एक दाई कछू राजा आपुस मँ आइके मिलेन अउर उ पचे इ सहर पइ हमला करइ क कुचक्र रचेन ।

सबहिं एक अउटिके चढ़ाई बरे अगवा बढेन ।

५ राजा क लखिके उ सबइ सबहिं चकित भएन ।

ओनमाँ भगदइ मची अउ उ सबइ सबहिं पराइ गएन ।

६ ओनका डर दहबोच लिहस, उ सबइ डर स काँपि उठेन ।

७ प्रचण्ड पुरवइया हवा

ओनके जहाजन क चकनाचूर कइ दिहस ।

८ हाँ, हम पचे तोहार प्रबलता क कहानी सुना ह । अउर हम पचे तउ एँका सर्वसक्तिमान यहोवा क सहर मँ हमरे परमेस्सर क सहर मँ घटत भए भी लखा ।

यहोवा उ सहर क हमेसा बरे सुदृढ़ बनाएस ह ।

९ हे परमेस्सर, हम तोहरे मन्दिर मँ तोहरी पिरम स भरी करुणा पइ विचार करित ह ।

१० हे परमेस्सर, तू मसहूर अहा,

लोग धरती पइ हर कहू तोहार स्तुति करत हीं ।

हर मनई जानत ह कि तू केतना भला अहा ।

११ हे परमेस्सर, तोहरे उचित निआउ क कारण सिय्योन पर्वत खुस अहइ ।

अउर यहूदा क नगरियन आनन्द मनावत अहई ।

१२ सिय्योन क परिक्रमा करा ।

नगरी क दर्सन करा ।

तू मीनारन क लखा ।

१३ ऊँच चहरदीवारन क लखा ।

सिय्योन क महलन क सराहा,

तबहिं तू आवइवाली पीढी स एँकर बखान कइ सकब्या ।

१४ सचमुच हमार परमेस्सर सदा सदा ही परमेस्सर रही ।

उ हमका सदा ही राह देखाई ।

ओकर कबहुँ भी अंत नाही होई ।

कोरह क संतानन क संगीत निदेसक बरे एक ठु पद ।

४९ १ अलग-अलग देसन क निवासियो, इ सुना ।

धरती क वासियो इ सुना ।

२ सुना अरे दीन लोगो, अरे धनिको सुना ।

३ मई तू पचन्क गियान

अउ विवेक क बातन बतावत हउँ ।

४ मई सबइ कथा सुनेउँ ह,

मई अब उ सबइ कथा तू पचन्क आपन वीणा पइ सुनाउव ।

५ अइसा कउनो कारण नाही जउन मई कउनो भी बिनास स डेराइ जाउँ ।

अगर लोग मोका घेरई अउ फँदा फइलावई, मोका डेराइ क कउनो कारण नाही ।

६ उ सबइ लोग मूरख अहई जेनका आपन निज सक्ति

अउ आपन धन पइ भरोसा अहइ ।

७ कउनो मानव मीत ओनका छोडा नाही सकत ।

कउनो मनई परमेस्सर क रिसवत दइके बिना सज़ा क जाई देइ नाही सकत ।

८ कउनो मनई क लगे एँतना धन नाही होई कि जेहसे

उ खुद आपन निज जिन्नगी मोल लइ सकइ ।

९ कउनो मनई क लगे

एँतना धन नाही होइ सकत

कि उ आपन देह कब्र मँ सड़इ स बचाइ सकइ ।

१० लखा, बुद्धिमान जन, बुद्धिहीन जन अउ पाथर जइसा मूरख जन एक जइसे मरि जात हीं,

अउर ओनकर सारा धन दूसर लोगन क हाथे मँ चला जात ह ।

११ कब्र सदा ही बरे हर कउनो क घर बनी,

एकर कउनो अरथ नाही कि उ पचे केतनी भुइँया क सुआमी रहेन ।

१२ धनी मनई मूरख लोगन स अलग नाही होतेन । सबहिं लोग गोरूनक क तरह मर जात हीं ।

१३ मूरख लोगन बरे इहइ होत ह ।

[†]४८:२ सिय्योन पर्वत ... अहई साब्दिक, "सिय्योन पर्वत सिफोन स बहोत दूर अहइ ।" कनानी पौराणिक कथा क अनुसार, सिफोन कानियन बरे पवित्र पर्वत बाटइ अउर ओकर देवता हुवाँ निवास करत हीं ।

इ ओनकर भाग्य अहइ अउर ओकरे संतानन क
भाग्य जउन ओकरे जइसा इच्छा रखत ह ।

१४ सबहि लोग भेड़ी जइसेन बाटेन ।

कबर ओनकर बरे बाड़ा बन जाइ ।

मउत ओनके चरवाहा बनी ।

ओनकर काया छीन होइ जाइ

अउर उ पचे कबर में सड़ गल जइहीं ।

१५ मुला यहोवा मोर मूल्य चुकाई अउर मोका
कबर स बचाइ ।

काहेकि उ मोका आपन संग लेब ।

१६ धनवानन स जिन डेराअ कि उ पचे धनी अहइ ।

लोगन स ओनकर धन दौलत स भरा धरन क
लखिके जिन डेराअ ।

१७ उ सबइ लोग जब मरिहीं कछू भी संग न लइ
जाइ जइहीं ।

ओन सुन्नर वस्तुअन मँ स कछू भी न लई जाइ
पइहीं ।

१८ लोगन क चाही कि उ सबइ जब तलक जिअत
रइहीं परमेस्सर क स्तुति करइ ।

जब परमेस्सर ओनके संग भलाई करइ, तउ लोगन
क ओकर स्तुति करइ चाही ।

१९ मनइयन बरे एक अइसा समइ आइ जब उ पचे
आपन पुरखन क संग मिल जइहीं ।

फिर उ पचे कबहुँ दिन क प्रकास नाहीं लखि
पइहीं ।

२० धनी मनई मूरख लोगन स अलग नाहीं होतेन ।
सबहि लोग गोरुअन क नाईं मरत हीं ।

आसाफ क भक्ति गीतन मँ स एक ठु पद ।

१ देवतन क देवता यहोवा कहेस ह ।
२ पूरब स पच्छिम तलक धरती क सब
मनइयन क उ बोलाएस ।

३ सिय्योन स परमेस्सर क सुन्नरता प्रकासित
होत बाटइ ।

४ हमार परमेस्सर आवत अहइ, अउर उ चुप नाहीं
रही ।

ओकरे समन्वा बरत ज्वाला वा,
ओका एक ठु बड़का तूफान घेरे बाटइ ।

५ हमार परमेस्सर आकास अउ धरती क गोहराइके
आपन निजी लोगन क निआउ करइ बोलावत ह ।

६ “मोर मनवइयो, मोरे लगे बटुरा ।

मोर उपासको आवा हम आपुस मँ एक ठु करार
किहे अही ।”

७ परमेस्सर निआउ क जज अहइ

अकास ओकरी धार्मिक भावना क घोसणा करत
ह ।

१७ परमेस्सर कहत ह, “सुना मोरे भक्तो !
इस्राएल क लोगो, मई तू पचन्क खिलाफ साच्छी
देबउं ।

मई परमेस्सर हउँ, तोहार परमेस्सर ।

१८ मोका तोहरी बलियन स सिकाइत नाहीं ।

इस्राएल क लोगो, तू पचे सदा होम बलियन
मोका चढ़ावत रहा ।

तू पचे हर रोज अर्पित करा ।

१९ मई तोहरे घरे स कउनो बर्धा नाहीं लेब ।

मई तोहरे गोरू घरे स कउनो बोकरा नाहीं लेब ।

२० मोका तोहरे ओन गोरुअन क जरूरत नाहीं ।

मई ही तउ वन क सबहिं गोरुअन क सुआमी हउँ ।
हजारन पहाड़न पइ जउन गोरू विचरत हीं, ओन
सबन क मई सुआमी हउँ ।

२१ जिन चिरइयन क बसेरा सब स ऊँच पहाड़ पइ
अहइ, ओन सबन क मई जानत हउँ ।

अचलन पइ जउन सचल अहइ उ सबइ सब मोरे
ही अहइ ।

२२ मई भुखान नाहीं हउँ, अगर मई भूखा होतउँ,
तउ भी तू पचन्स मोका भोजन नाहीं माँगइ
क पड़त ।

मई जगत क सुआमी हउँ अउर ओकर भी हर चीज
जउन इ जगत मँ बाटइ ।

२३ मई बर्धा क गोस नाहीं खावा करत हउँ ।
बोकरन क खून नाहीं पिअत हउँ ।”

२४ फुरइ जउन बलि क परमेस्सर क प्रसन्न करत
ह धन्यवाद क भेंटन होइ

अउर उ प्रतिग्या क पूरा करत ह जउन तू सर्वोच्च
परमेस्सर क समन्वा किहे रह्या ।

२५ परमेस्सर कहत ह, “मोका पुकारा जब तू
मुसीबत मँ रह्या,

मई तू पचन्क खतरा स निकारब, अउर तब तू पचे
मोर मान कइ सकब्या ।”

२६ दुट्ट लोगन स परमेस्सर कहत ह,

“तू पचे मोर व्यवस्था क बातन करत अहा,
तू पचे मोरे करार क भी बातन करत अहा ।

२७ फुन जब मई तू पचन्क सुधारत हउँ, तब भला
तू पचे मोसे बैर काहे करत अहा ? ।

तू पचे ओन बातन क उपेच्छा काहे करत अहा
जेनका मई तू पचन्क बतावत हउँ ?

२८ तू पचे चोर क लखिके ओसे मिलइ बरे दौड़ जात
अहा ।

तू पचे ओनके संग बिछउना मँ कूद पड़त अहा
जउन बिभिचार करत हीं ।

२९ तू पचे बुरा वचन अउ झूठ बोलत अहा ।

३० तू पचे दूसर लोगन क हिआँ तलक कि

आपन भाइयन क निन्दा करत अहा ।

११ तू पचे बुरा करम करत अहा, अउर तू सोचत
अहा मोका चुप रहइ चाही ।

तू कछू नाही कहत अहा अउर सोचत अहा कि
मोका चुप रहइ चाही ।

लखा, मई चुप नाही रहब, तोहका स्पस्ट कइ देब ।
तोहरे ही मुँह पइ तोहार दोख बताउब ।

२२ तू लोग परमेस्सर क बिसरि गवा अहा ।

एकरे पहिले कि मई तोहका चीर डावउँ,
अच्छी तरह समुझ ल्या ।

जब वइसा होइ कउनो भी मनई तू पचन्क बचाइ
नाहीं पाई ।

२३ अगर कउनो मनई स्तुति अउ धन्यवादन क
बलि चढ़ावइ, तउ उ सचमुच मोर मान करी ।

अगर कउनो मनई आपन जिन्नगी बदल डावइ
तउ ओका मई परमेस्सर क सक्ति देखाँउब
जउन बचावत हीं ।”

संगीत निर्देसक बरे दाऊद क एक टु पद । इ पद उ
समइ क अहइ जब दाऊद क बतसेबा क संग पाप
करइ क पाछे, नातान नबी दाऊद क लगे गवा रहा ।

५१ हे परमेस्सर, आपन बिसाल पिरम स भरी
आपन करुणा स मोह पइ दाय़ा करा ।

आपन बड़ी दयालुता स
मोरे सबहिं पापन क तू मेट द्या ।

२ मोर सबइ पापन क धोइ डावा,
अउर फुन स मोका स्वच्छ बनाइ द्या ।

३ मई जानत हउँ, जउन पाप मई किहे अहउँ ।

मई आपन पापन क सदा आपन समन्वा लखत
हउँ ।

४ हे परमेस्सर, मई उहइ काम किहेउँ जेनका तू बुरा
कह्या ।

तू उहइ अहा, जेकरे खिलाफ मई पाप किहेउँ ।

मई स्वीकार करत हउँ इ सबइ बातन क,
ताकि लोग जानि जाई कि मई पापी हउँ अउर तू
निआउ स पूर्ण अहा,

अउ तोहार निर्णय निस्पच्छ होत हीं ।

५ मोर महतारी मोका दोखी मैं जनमेस,
अउर पाप मैं मोर महतारी मोका गर्भ मैं धारण
किहस ।

६ हे परमेस्सर, तू चाहत अहा, हम बिस्सासी बनी ।
अउर निर्भय बन जाउँ ।

एह बरे तू मोका सच्चा विवेक स रहस्यन क
सिच्छा द्या ।

७ मोह पइ जूफा क पौधा क प्रयोग करा अउर
मोका पापे स स्वच्छ करा ।

मोका तब तलक धोआ, जब तलक मई बर्फ स
जियादा उज्जवर न होइ जाउँ ।

८ मोका खुस बनाइ द्या ।

बताइ द्या मोका कि कइसे खुस बनउँ ? मोर उ सबइ
हइडियन जउन तू तोइया, फिन आनन्द स
भरि जाई ।

९ मोरे पापन्क जिन लखा ।

ओन सबन्क धोइ डावा ।

१० हे परमेस्सर, मोहेमाँ एक टु नवा, सुद्ध हिरदइ
बनावा ।

मोरी आतिमा क फुन सुद्ध कइ द्या ।

११ मोका आपन समन्वा स जिन दूर हटावा,
तोहार पवित्तर आतिमा क मोहसे जिन छोर ल्या ।

१२ उ उल्लास जउन तोहसे आव्त ह, मोहेमाँ भरि
जाइ ।

मोरे चित्त क अडिग अउ तइयार करा
सुरच्छित्त होइ बरे अउर तोहार हुकूम मानइ बरे ।

१३ मई पापियन क तोहार जिन्नगी विधि सिखाउब,
जेहसे उ सबइ लउटिके तोहरे लगे आवई ।

१४ हे परमेस्सर, धरती पइ क हर कउनो दोख स मोर
रच्छा करा,

मोर परमेस्सर, परमेस्सर जउन मोका बचाएस,
मोका तोहार सदाचारी क बारे मैं गावइ क अनुमति
द्या ?

१५ हे मोर सुआमी, मोका मोर मुँह खोलइ द्या कि
मई तोहार बड़कई क गीत गावउँ ।

१६ जउन बलियन तोहका नाही नीक लगतिन तउ
मोका चढ़ाउब नाही अहई ।

उ सबइ बलियन तोहका बाँछित तलक नाही
अहई ।

१७ हे परमेस्सर, मोर टुटही आतिमा ही तोहरे बरे
मोर बलि अहइ ।

हे परमेस्सर, तू एक कुचरा अउ टुटहा हिरदइ स
मुँह नाही फेरब्या ।

१८ हे परमेस्सर, सिय्योन बरे दयालु होइके, उत्तिम
बना ।

तू यरूसलेम क सहर क चहरदीवारी क बनावा ।

१९ तू उत्तिमा बलियन क

अउ सम्पूर्ण होमबलियन क आनन्द ल्या ।

लोग फुन स तोहरी वेदी पइ बर्धन क बलियन द्या ।

संगीत निर्देशक बरे उ समइ क एक ठु कलात्मक ।
जब एदमी दोएग साऊल क लगे आइके कहे
रहा, दाऊद अबीमेलेक क घरे मँ अहइ ।

५२ ? अरे ओ, बड़का मनई ! तू काहे सेखी
बघारत अहा जउन बुरे करमन क तू करत
अहा ?

तू लगातार परमेस्सर क अपमान करत अहा ।

२ तू मूरखता भरा कुचकर रचत अहा ।

तोहार जीभ वइसी ही भयानक अहइ, जइसे तेज
उस्तरा होत ह ।

काहेकि तोहार जीभ झूठ बोलत रहत ह !

३ तोहका नेकी स जियादा बदी भावत ह ।

तोहका झूठ क बोलब, फुरइ बोलइ स जियादा
भावत ह ।

४ तोहका अउ तोहरी झूठी जीभ क, लोगन क
हानि पहुँचाउब नीक लागत ह ।

५ तोहका परमेस्सर सदा बरे नस्ट कइ देइ ।

उ तोह पइ झपटी अउर तोहका धरिके घरे से बाहेर
करी ।

उ तोहका मारी अउ तोहार कउनो भी संतान नाही
रही ।

६ सज्जन लोग एँका लखिहीं

अउ परमेस्सर स डेराब अउर ओकर आदर करब
सिखिहीं ।

उ पचे तोह पइ, जउन घटा ओह पइ हँसिहीं अउर
कइहीं,

७ “लखा उ मनई क संग का भवा जउन यहोवा पइ
निर्भर नाही रहा ।

उ मनई सोचेस कि ओकर धन अउर झूठ एँकर
रच्छा करिहीं ।”

८ मुला मई परमेस्सर क मन्दिर मँ एक ठु हरिअर
जइतून क बृच्छा जइसा अहउँ ।

मोर परमेस्सर क बिस्सासी पिरेम मँ सदा-सदा बरे
भरोसा अहइ ।

९ हे परमेस्सर, मई ओन कामे क बरे जेनका तू
किह्या हमेसा स्तुति करब ।

मई तोहरे बिस्सासी मनइयन क समन्वा तोहरे
नाउँ क घोसना करब ।

महलत क राग पइ संगीत निर्देशक बरे
दाऊद क एक ठु मस्कल ।

५३ ? मूरख ही सोचत ह कि परमेस्सर नाही
होत ह ।

इ तरह क लोग विनासकारी, भ्रस्ट, कुटिल होत
हीं ।

उ पचे तउ कउनो नीक काम नाही करतेन ।

२ परमेस्सर अकासे मँ स नीचे सबइ लोगन क
लखेस ।

इ लखत ह कि का हिआँ स

कउनो बुद्धिमान मनई ओका हेरत रहत रहा ?

३ मुला सबहिँ लोग परमेस्सर स भटक गवा अहेन ।

हर मनई बुरा अहइ ।

कउनो भी मनई कउनो नीक करम नाही करत,
एक ठु भी नाही ।

४ परमेस्सर कहत ह, “निहचय ही उ सबइ दुट्ट
लोग सत्य क जानत हीं ।

उ सबइ दुट्ट लोग मोरे मनवइयन क अइसे
बरबाद करइ क तइयार अहइँ,

जइसे उ सबइ निज खइया क खाइ क तइयार रहत
हीं”

५ मुला उ सबइ दुट्ट लोग एँतना डेराइ जइहीं,

जेतना उ सबइ दुट्ट लोग पहिले कबहुँ डेरानेन
नाहीं ।

एह बरे परमेस्सर इस्राएल क ओन दुट्ट दुस्मन
लोगन क तजेस ह ।

परमेस्सर क मनवइयन ओनका हरइहीं

अउर परमेस्सर ओन दुट्टन क हड्डियन क
छितराइ देइ ।

६ कउनो एक सिव्योन पर्वत स इस्राएल क बचाइ !
जब परमेस्सर आपन लोगन क स्थिति पुनः

स्थापित करी, याकूब क लोग खुस होइहीं ।

हाँ इस्राएल बहोत खुस होइ ।

तार वाला बाजन पइ संगीत निर्देशक बरे दाऊद
क समइ क एक ठु भक्ति गीत जब जीपियन
जाइके साऊल स कहे रहा, हम सोचत अही
दाऊद हमरे लोगन क बीच छुपा अहइ ।

५४ ? हे परमेस्सर, आपन सक्ति ३क प्रयोग
करा अउर हम पचन्क क बचावा ।

आपन महान सक्ति क प्रयोग इ सिद्ध करइ बरे
करा कि हम पचन क निर्दोष अही ।

२ हे परमेस्सर, मोर पराथना सुना ।

जउन मई कहत हउँ सुना ।

३ अजनबी लोग मोरे खिलाफ उठ खड़ा भएन अउ
बरिआर लोग मोका मारइ क जतन करत
अहइँ ।

हे परमेस्सर, अइसे इ सबइ लोग तोहरे बारे मँ सोचत भी नाही।

४ लखा, मोर परमेस्सर, मोर मदद करी।

मोर सुआमी मोका सहारा देइ।

५ मोर परमेस्सर ओन लोगन क सजा देइ, जउन मोरे खिलाफ उठ खड़ा भवा अहई।

परमेस्सर मोरे बरे सच्चा सिद्ध होइ, अउर उ ओन लोगन क बरबाद कइ देइ।

६ हे परमेस्सर, हम पचे आपन इच्छा स तोहका बलियन अर्पित करब।

हे यहोवा, हम पचे तोहरे नीक नाउँ क बड़कई करब।

७ मुला, मई तोहसे इ विनय करत हउँ, कि मोका तू मोरे दुःखन स बचाइ ल्या।

तू मोका मोरे दुस्मनन क हारा भवा देखाँइ द्या।

संगीत निर्देशक बरे। तार वाले बाजन क संग। दाऊद क एक ठु मस्किल।

५५ १ हे मोर परमेस्सर, मोर पराथना सुना।

कृपा कइके तू मोहसे दूर जिन ह्या।

२ हे परमेस्सर, कृपा कइके मोर सुना अउर मोका जवाब द्या।

तू मोका आपन दुःख तोहसे कहइ द्या।

३ मोर दुस्मन मोहसे दुर्वचन बोलेन ह।

दुट्ट लोग मोह पइ चीखेन ह।

मोर दुस्मन किरोध कइके मोह पइ टूट पड़ा अहई।

उ पचे मोका नास करइ बिपत्ति ढावत अहई।

४ मोर मनवा भितरे स चूर-चूर होत बा,

अउर मोका मउत स बहोत डर लागत अहइ।

५ मई बहोत डेरान अहउँ।

मई थरथर काँपत अहउँ।

मई डेरान अहउँ।

६ ओह, अगर कबूतरे क नाई मोरे पखना होतेन,

अउर मई पखना पवतेउँ तउ दूर कउनो चैन पावइ क जगह उड़ि जातेउँ।

७ मई उड़िके दूर निर्जन जगह मँ जातेउँ।

८ मई दूर चला जाब

अउर इ बिपत्ति क आँधी स बचिके दूर भाग जाब।

९ हे मोर सुआमी, हवाँ सहर मँ मतभेद अउर हिंसा अहइ।

ओनके झूठन क रोका जउन मतभेद का कारण अहई।

१० बाहेर दिन अउर रात इ सहर ओन स घेरे अहइ, अउर अन्दर मँ हवाँ परेसानियन अउर अपराधन अहई।

११ गलियन मँ बहोत जियादा अपराध फइलत अहइ।

हर कहुँ लोग झूठ बोलिके छलत अहई।

१२ जदि इ मोर दुस्मन होत

अउर मोका नीचा देखाँवत तउ मई एँका सहि लेतेउँ।

अगर इ सबइ मोर दुस्मन होतेन,

अउर मोह पइ वार करतेन तउ मई छिप सकत रहेउँ।

१३ ओ। मोरे संगी, मोरे हमजोली, मोरे मीत, इ मगर तू अहा

अउर तू ही मोका कस्ट पहोँचावत अहा।

१४ हम आपुस मँ गुप्त बातन बाँटे रहेन।

हम परमेस्सर क मन्दिर मँ साथ-साथ उपासना कीन्ह।

१५ कास कउनो दुस्मन आपन समइ स पहिले ही मरि जाइँ।

कास ओनका जिअत ही गाड़ दीन्ह जाइ,

काहेकि उ पचे आपन घरन मँ अइसे भयानक कुचक्र रचा करत ही।

१६ मई तउ मदद बरे परमेस्सर क पुकारब।

यहोवा ओकर जवाब मोका देइ।

१७ मई तउ आपन दुःख क परमेस्सर स भिन्सारे दुपहरिया अउ राति मँ कहब।

उ मोर सुनी।

१८ मई केतनी जुद्धन मँ लड़ाई लड़ेउँ ह।

मुला परमेस्सर मोरे संग अहइ, अउर हर जुद्ध स मोका सुरच्छित लउटाइ।

१९ परमेस्सर मोर सुना अउर ओनका हराइ देब।

उ अनन्त राजा बाटइ।

मोर दुस्मन कबहुँ नाही बदलिहीं।

उ पचे परमेस्सर स नाही डरतेन, अउर न ही ओकर आदर करतेन।

२० मोर दुस्मन आपन ही मीतन पइ वार करतेन।

उ सबइ ओन बातन क नाही करतेन, जेनका करइ क उ पचे सहमत होइ ग रहेन।

२१ मोर दुस्मन फुरइ मीठा बोलत हीं, अउर सुसान्ति क बातन करत रहत हीं।

मुला असलियत मँ, उ पचे जुद्ध क कुचक्र रचत हीं।

ओनकर सब्द काट करत हीं छुरी क तरह अउ फिसलन भरा अहई जइसे तेल होत ह।

२२ आपन सबइ चिन्ता क तू यहोवा क सौँप द्या।

फुन उ तोहार रखवारी करी।

यहोवा सज्जन क कबहुँ हारइ न देइ।

२३ एहसे पहिले कि ओनकर आधी उमर बीत जाइ।

हे परमेस्सर, ओन हत्यारन क अउर ओन झूठन क कबर मँ पठवा ।
जहाँ तलक मोर अहइ, मई तउ तोह पइ भरोसा रखब ।

संगीत निर्देशक बरे सुदूर बाँझ बृच्छन क कबूतर नाउँ क धुन पइ दाऊद क उ समइ क प्रगीत जब गात सहर मँ ओका पलिस्तिन घेर लिहे रहैन ।

१ हे परमेस्सर, मोह पइ दयालु रहा, ५६ काहेकि लोग मोह पइ वार किहेन ह ।
उ पचे मोरे खिलाफ समूचइ दिन लड़त रहत रहैन ।
२ मोर दुस्मन सारा दिन मोह पइ वार करत रहैन ।
हुआँ पइ डटा भए अनगिनत जोद्धा अहइँ ।
३ समूचइ दिन, जब कबहुँ मई डेरात हउँ,
तउ मई तोह पइ भरोसा करवउँ ।
४ मई परमेस्सर क भरोसे अहउँ, तउ मई डेरान नाहीं अहउँ ।

लोग मोका नस्कान नाहीं पहोंचाइ सकतेन ।
मई परमेस्सर क बचनन बरे ओकर बड़कई करत हउँ जउन मोका दिहेस ।

५ मोर दुस्मन सदा मोरे सब्दन क तोड़त मरोड़त रहत हीं ।

मोरे खिलाफ उ पचे सदा कुचकर रचत रहत हीं ।
६ उ पचे आपुस मँ मिलिके अउर लुक छिपिके मोर हर बाते क टोह लेत रहत हीं ।

मोर प्राण हर लेइ क कउनो राह सोचत हीं ।
७ हे परमेस्सर, ओनका बचिके निकरइ जिन द्या ।
ओनके बुरे करमन क सजा ओनका द्या ।

८ तू इ जानत अहा कि मई बहीत बियाकुल अहउँ ।
तू इ जानत अहा कि मई तोहका केतना पुकारेउँ ह ?

तू निहचय ही मोरे सबइ आँसुअन क लेखा-जोखा रखे भए अहा ।

९ तउ अब मई तोहका मदद पावइ क पुकारब ।
मोरे दुस्मनन क तू हराइ द्या ।
मई इ जानत हउँ कि तू इ कइ सकत अहा ।
काहेकि तू परमेस्सर अहा ।

१० मई परमेस्सर क गुण ओकरे वचन बरे गावत हउँ ।

मई परमेस्सर क गुणन क ओकरे उ वचन बरे गावत हउँ जउन उ मोका दिहेस ह ।

११ मोका परमेस्सर पइ भरोसा अहइ एह बरे मई नाहीं डेरात हउँ ।

लोग मोर बुरा नाहीं कइ सकतेन ।
१२ हे परमेस्सर, मई जउन तोहार मन्नतन मानेउँ ह, मई ओनका पूरा करब ।

मई तोहका धन्यवादे क भेंट चढ़ाउब ।
१३ काहेकि तू मोका मउत स बचाया ह ।
तू मोका हार स बचाया ह
एह बरे मोका परमेस्सर क सेवा
हिआँ रहइवाला लोगन क समन्वा करइ चाही ।

संगीत निर्देशक बरे “नास जिन करा” नाउँ क धुन पइ उ समइ क दाऊद क एक कलात्मक जब उ साऊल स पराइके गुफा मँ जाइके लुकान रहा ।

१४ हे परमेस्सर, मोह पइ करुणा करा । ५७ मोह पइ दयालु ह्या काहेकि मोरे मनवा क आस्था तोहमाँ बाटइ ।

मई तोहरे लगे तोहार ओट पावइ क आवा हउँ ।
जब तलक संकट दूर न होइ ।
२ मई सर्वोच्च परमेस्सर क मदद बरे बुलाएउँ ।

उ मोर पूरी तरह धियान रखत ह ।
३ उ सरग स मोरे बरे मदद पठवत ह अउ मोका बचाइ लेत ह ।

जउन लोग मोका सतावा करत हीं ।
परमेस्सर आपन सच्चा पिरम अउर विस्सासी मोह पइ देखौवत ह ।

४ मोर दुस्मनन मोका चारिहुँ कइती स घेरि लिहन ह ।

मोर प्राण संकट मँ अहइँ ।
उ पचे अइसेन अहइँ, जइसे नर भच्छी सिंह अउर ओनकर तेज दाँत भालन अउ तीर स अउर ओनकर जीभ तेज तरवार क जइसी अहइ ।

५ हे परमेस्सर, तू महान अहा ।
तोहार महिमा धरती पइ छाई बाटइ, जउन अकासे स ऊँच अहइ ।

६ मोर दुस्मनन मोरे बरे जाल फइलाएन ह ।
मोका फँसावइ क उ पचे जतन करत अहइँ ।
उ पचे मोरे बरे गहिर गड़हा खोदे अहइँ,
कि मई ओहमाँ गिरि जाउँ ।

७ मुला परमेस्सर मोर रच्छा करी ।
मोर भरोसा अहइ, कि उ मोरे हिम्मत क बनाए रक्खी ।

मई ओकर जस गाथा क गावा करब ।
८ मोर मन खड़ा ह्या !
ओ सितारो अउ वीणाओ, बजब सुरू करा !

आवा, हम मिलिके भिन्सारे क जगाइ ।
९ हे मोरे सुआमी, हर कउनो बरे, मई तोहार जस गावत हउँ ।

मई तोहार जस गाथा हर रास्टर क सुनावत हउँ ।
१० हे परमेस्सर तोहार बिस्ससनीय पिरम सरगे स ऊँच अहइ ।

तोहार बिस्ससी ओतैना ऊँचा अहइ जेतैना
आकास ।

११ हे परमेस्सर तू सरगे स ऊँच अहइ,
तोहार महिमा समूचइ धरती पइ छाड़ जाइ ।

“नास जिन करा” धुन पइ संगीत
निदेसक बरे दाऊद क एक टु कलात्मक ।

५८ १ निआवधीसो, तू पचे पच्छपात रहित
नाही रह्या ।

तू लोगन क निआउ निज निर्णयन मँ निस्पच्छ,
नाही करत अहा ।

२ नाही, तू पचे तउ सिरिफ बुरी बातन ही सोचत
अहा ।

इ देस मँ तू पचे हिंसा स भरा अपराध करत अहा ।
३ उ सबइ दुट्ट लोग जइसे ही पइदा होत हीं, बुरे
कामन क करइ लग जात हीं ।

उ पचे पइदा होत ही झूठ बोलइ लग जात हीं ।
४ उ पचे उ भयानक साँप अउ नाग जइसे होत हीं,
जउन सुन नाही सकत ।

उ सबइ दुट्ट जन भी आपन कान सच्चाई स मूँद
लेत हीं ।

५ बुरे लोग वइसे ही होत हीं जइसे सँपेरन क
गीतन क

या ओनकर संगीतन क करिया नाग सुन नाही
सकत ।

६ हे यहोवा ! उ सबइ लोग अइसेन होत हीं जइसे
सिंह ।

एह बरे हे यहोवा, ओनकर दाँत तोड़ा ।
७ जइसे बहत जल लुप्त होइ जात ह, वइसेन ही
उ सबइ लोग लुप्त होइ जइहीं ।

अउर जइसे राह क उगी भइ दूब कुचर दीन्ह जात
ह, वइसेन उ सबइ भी कुचर दीन्ह जइहीं ।

८ उ सबइ घोंघा क नाई होइ जउन चलइ मँ गल
जात हीं ।

उ सबइ उ गदेली क नाई होइ जउन मरा ही
पइदा भवा, जउन दिन क प्रकास कबहुँ नाही
लखेस ।

९ उ सबइ उ बाड़े क काँटन क तरह हाली ही बरबाद
होइ,

जउन आगी पइ चढी भइ हाँड़ी गरमावइ बरे हाली
जरि जात हीं ।

१० जब सज्जन ओन लोगन क सजा पावत लखत
ह

जउन ओकरे संग बुरा किहेन ह,
उ खुस होत ह ।

उ आपन गोड़ ओन दुट्टन क खून मँ धोइ ।

११ जब अइसा होत ह, तउ लोग कहइ लागत हीं,
“सज्जनन क ओनकर फल निहचय मिलत
ह ।

फुरइ परमेस्सर जगत क निआउ कर्ता अहइ ।”

संगीत निर्देसक बरे “नास जिन करा” धुन पइ
दाऊद क उ समइ क एक टु भक्ति गीत
जब साऊल लोगन क दाऊद क घर
पइ निगरानी राखत भए ओका मारि
डावइ क जुगुत करइ बरे पटए रहा ।

५९ १ हे परमेस्सर, तू मोका मोरे दुस्मनन स
बचाइ ल्या

मोर मदद ओनसे विजयी बनवइ मँ करा जउन मोरे
खिलाफ जुद्ध करइ आवा अहइ ।

२ अइसे ओन लोगन स, तू मोका बचाइ ल्या ।

तू ओन हत्यारन स मोका बचाइ ल्या । जउन बुरे
कामन क करत रहत हीं ।

३ लखा ! बलवान लोग मोका घात लगाए अहइ ।

उ पचे मोका मारि डावइ क बाट जोहन अहइ ।

एह बरे नाही कि मइँ कउनो पाप किहेउँ ह या मोसे
कउनो अपराध बन पड़ा अहइ ।

४ उ पचे मोरे पाछे पड़ा अहइ, मुला मइँ कउनो भी
बुरा करम नाही किहेउँ ह ।

हे यहोवा, आवा ! तू खुद अपने आप लख ल्या !

५ हे परमेस्सर ! इस्राएल क परमेस्सर ! तू
सर्वसक्तिसाली अहा ।

तू उठा अउर ओन लोगन क दण्डित करा ।

ओन बिस्सासघातियन ओन दुर्जन लोगन पइ
तनिकउ भी दया जिन देखवा ।

६ उ सबइ दुर्जन साँझ क होत ही सहर मँ घुसि
आवत हीं ।

उ सबइ लोग गुराँत कूकुरन स
सहर क बीच मँ घूमत रहत हीं ।

७ तू ओनकर धमकियन अउर अपमानन क सुना ।
उ पचे अइसी करूर बातन कहा करत हीं ।

उ सबइ इ बात क चिंता तलक नाही करतेन कि
ओनकर कउन सुनत ह ।

८ हे यहोवा, तू ओनकर उपहास कइके
ओन सबहिँ लोगन क मजाक बनाइ द्या ।

९ हे परमेस्सर, तू मोर सक्ति अहा, मइँ तोहार बाट
जोहत हउं ।

हे परमेस्सर, तू ऊँचे पहाड़न पइ मोर सुरच्छा क
ठउर अहा ।

१० परमेस्सर मोहसे पिरम करत ह, अउर उ जीतइ
मँ मोर सहायक होइ ।

उ मोरे दुस्मनन क हरावइ मँ मोर मदद करी ।

११ हे परमेस्वर, बस ओनका जिन मार डावा, नाहीं तउ होइ सकत ह मोर लोग बिसरि जाइं ।

हे मोर सुआमी अउ संरच्छक, तू आपन सकती स ओनका छितराइ द्या अउर हराइ द्या ।

१२ उ सबइ बुरे लोग कोसत अउ झूठ बोलत रहत हीं ।

ओन बुरी बातन क सजा ओनका द्या, जउन उ पचे कहे अहइं ।

ओनका आपन अभिमान मँ फँसइ द्या ।

१३ तू आपन किरोध स ओनका बरबाद करा ।

ओनका पूरी तरह बरबाद करा ।

लोग तबहिं जनिहीं कि परमेस्वर, याकूब क लोगन क अउर उ सारे संसार क राजा अहइ ।

१४ फुन अगर उ सबइ लोग संझा क एहर ओहर टहरत

गुरांतन कूकुरन स सहर मँ आवइं,

१५ तउ उ सबइ खाइ क कउनो क चीज हेरत फिरिहीं,

अउर खाइ क कछू भी नाहीं पइहीं अउर न ही सोवइ क कउनो ठउर पइहीं ।

१६ मुला मइं तोहार बड़कई क गीत गाउब ।

हर भिन्सारे मइं तोहरे पिरैम मँ आनन्दित होब ।

काहेकि तू पर्वतन क ऊपर मोर सरणस्थल अहा मइं तोहरे लगे आइ सकत हउं,

जब मोका विपत्तियन घेरिहीं ।

१७ मइं आपन गीतन क तोहरी बड़कई मँ गाउब

काहेकि पर्वतन क ऊपर तू मोर सरणस्थल अहा ।

तू परमेस्वर अहा, जउन मोका पिरैम करत ह ।

संगीत निर्देसक बरे “वाचा क कुमुदिनी” धुन पइ

उ समइ क दाऊद क एक कलात्मक जब दाऊद

अरमहरैन अउ अरमसोबा स जुद्ध किहेस अउर

जब योआब लउटा अउर उ नोन क घाटी मँ

वारह हजार एदोमी फउजियन क मार डाएस ।

१८ हे परमेस्वर, तू हमका बिसराइ दिहा ।

६० तू हमका तितर-बितर कइ दिहा, तू हम पइ कोहाइ गवा ।

तू कृपा कइके वापस आवा ।

२ तू धरती कँपाया अउर ओका फारि दिहा ।

हमार जगत बिखरत अहइ

कृपा कइके ओका जोर द्या ।

३ तू आपन लोगन क बहोतइ यातना दिहा ह ।

हम दाखरस पिए लोग जइसे लइखड़ात रहेन अउर भहरात अही ।

४ मुला तू आपन बिस्सासी मानइवालन क चेताइ बरे

कि उ पचन क अब आपन दुस्मन क धनुस चलाइवालन दुआरा तितर-बितर होइ क पाछे कहाँ जमा होइ चाही ।

५ तू आपन महासक्ति क प्रयोग कइके हमका बचाइ लिहा ।

मोर पराथना क जवाब द्या अउर उ मनई क बचाइ ल्या जउन तोहका पियारा अहइ ।

६ परमेस्वर आपन मन्दिर मँ कहेस:

“मोर विजय होइ अउर मइं विजय पइ खुस होब ।

मइं इ धरती क आपन लोगन क बीच बाँटब ।

मइं सकेम अउ सुक्कोत घाटी क बाँटवारा करब ।

७ गिलाद अउ मनस्से मोर बनिहीं ।

एप्रैम मोरे मूँडे क टोप (हेलमेट) बनी ।

यहूदा मोर राजदण्ड बनी ।

८ मइं मोआब क अइसा बनाउब, जइसा कउनो मोर गोड़ धोवइ क पात्र ।

एदोम एक दास जइसा जउन मोर पनहियन उटावत ह ।

मइं पलिस्ती लोगन क हराउब अउर विजय क उदघोस करब ।”

९ कउन मोका ओकरे खिलाफ जुद्ध करइ क सुरच्छित मजबूत सहर मँ लइ जाइ ?

मोका कउन एदोम तलक लइ जाइ ?

१० हे परमेस्वर, बस तू ही इ करइ मँ मोर मदद कइ सकत ह ।

मुला तू तउ मोका बिसराइ दिहा ।

परमेस्वर हमरे साथे नाहीं जाइ अउर उ हमरी सेना क संग नाहीं जाइ ।

११ हे परमेस्वर, तू ही हमका इ संकट क भुईया स उबार सकत ह ।

मनई हमार रच्छा नाहीं कइ सकतेन ।

१२ मुला हमका परमेस्वर ही मजबूत बनाइ सकत ह ।

परमेस्वर हमार दुस्मनन क पराजित कइ सकत ह ।

तार क वाद्यन क संगीत निर्देसक

बरे दाऊद क एक ठु गीत ।

६१ हे परमेस्वर, मोर पराथना गीत सुना ।

मोर विनती सुना ।

२ जब मइं मातम स भरि ग रहेउं,

मइं तोहार मदद पावइ बरे तोहका पुकारब जहाँ कहेउं भी मइं होउं !

तू मोह पइ दयालु हवा

अउर मोका बहोत ऊँच सुरच्छित ठउरे पइ जाइ
बरे मोर अगुवाइ करा।

३ तू ही मोर सरणस्थल अहा, तू ही मोर सुदृढ गढ़
अहा।

जउन मोका मोरे दुस्मनन स बचावत ह।

४ तोहरे डेरा में, मई सदा सदा बरे बसव।

मई हुअई छिपब जहाँ तू मोका बचाइ सका।

५ हे परमेस्सर, तू मोर उ मन्नत सुन्या ह, जेका
तोहे पइ चढ़ाउब,

मुला तोहरे मनवइयन क लगे हर वस्तु ओनका
तोहसे ही मिली अहई।

६ राजा क लम्बी उमर देइ।

ओका हमेसा जिअइ द्या।

७ ओका सदा परमेस्सर क आसीबाद मैं बना रहइ
द्या।

ओकर रच्छा बिस्ससनीय पिरम अउ दयालुता स
करा।

८ मई तोहरे नाउँ क गुण सदा गाउब।

ओन बातन क करब जेनका करइ क वचन मई
दिहेउँ ह।

‘यदूतून’ राग पइ संगीत निर्देसक
बरे दाऊद क एक ठु भजन।

६२ १ मोर प्राण सान्ति स बाट जोहत अहइ
कि परमेस्सर मोर रच्छा करी।

२ परमेस्सर मोर किला अहइ, परमेस्सर मोका
बचावत ह।

ऊँच पहाइ पइ, परमेस्सर मोर सुरच्छित ठउर
अहइ।

मोका बड़की फउजियन भी हराइ नाही सकतिन।

३ तू मोह पइ कब तलक वार करत रहब्या ?

मई एक ठु निहुरी देवार क नाई होइ गवा हउँ,

अउर एक बाड़ा जइसा

जउन भहराइ वाला अहइ।

४ उ सबइ लोग मोरे नास क कुचकर रचत अहई।

मोरे बारे मैं उ सबइ झूठी बातन बनावत अहई।

लोगन क बीच मैं,

उ पचे मोर बड़कई करतेन,

मुला उ पचे मोका लुकान-छिपान कोसत हीं।

५ मोर प्राण सान्ति स परमेस्सर क बाट जोहत
अहा

काहेकि सिरिफ उ ही मोर उद्धार क आसा अहइ।

६ परमेस्सर मोर गढ़ अहइ, परमेस्सर मोका
बचावत ह।

ऊँच पर्वत मैं परमेस्सर मोर सुरच्छा स्थल अहइ।

७ महिमा अउ विजय, मोका परमेस्सर स मिलत
ह।

उ मोर सुदृढ गढ़ अहइ, परमेस्सर मोर सुरच्छा
स्थल अहइ।

८ लोगो, परमेस्सर पइ हर घड़ी भरोसा राखा।

आपन सबइ समस्या परमेस्सर स कहा।

परमेस्सर हमार सुरच्छा स्थल अहइ।

९ फुरइ लोग कउनो मदद नाही कइ सकतेन।

फुरइ तू ओनके भरोसे मदद पावइ क नाही रहि
सकत्या।

परमेस्सर क तुलना मैं

उ पचे हवा क झोंका क नाई अहई।

१० तू बल पइ भरोसा जिन रक्खा कि तू सकित क
संग चिजियन क छोर लेब्या।

जिन सोचा तू पचन्क चोरी करइ स कउनो लाभ
होइ।

अउर अगर धनवान भी होइ जाइ

तउ कबहुँ दौलत पइ भरोसा जिन करा कि उ तू
पचन्क बचाई लेइ।

११ एक ठु बात अइसी अहइ जउन परमेस्सर कहत
ह जेकरे भरोसे तू फुरइ रहि सकत अहा :

“सक्ती परमेस्सर स आवत ह!”

१२ मोरे सुआमी, तोहार पिरम सच्चा अहइ।

तू कउनो जन क ओकरे ओन कामन क प्रतिफल
या सजा देत ह, जेनका उ करत ह।

दाऊद क उ समइ क एक भजन जब उ
यहूदा क मरुभूमि मैं छुपा भवा रहा।

६३ १ हे परमेस्सर, तू मोर परमेस्सर अहा।
वइसे केतना मई तोहका चाहत हउँ।

जइसे उ पियासी छीन धरती जेह पइ जल न होइ
वइसे मोर देह अउर मन तोरे बरे पिआसा अहइ।

२ हाँ, तोहरे मन्दिर मैं तोहार दर्सन किहेउँ।

तोहार सक्ती अउर तोहार महिमा देख लिहेउँ ह।

३ मोर बिस्ससनीय पिरम जिन्नगी स उत्तिम
अहइ।

मोर होंठ तोहार बड़कई करत हीं।

४ हाँ, मई निज जीवन मैं तोहार गुण गाउब।

मई हाथ ऊपर उठाइके तोहरे नाउँ पइ तोहार
पराथना करब।

५ जइसा मोर जुवान भिजेदार भोजन स आनन्दित
होत ह,

ठीक वइसा ही मोर होंठ तोहार स्तुति गाइके खुस होइहीं ।

६ मई आधी रात मँ बिछुना पइ ओलरा भवा तोहका याद करब ।

७ फुरइ तू मोर मदद किहा ह ।

मई खुस हउँ कि तू मोका बचाया ह ।

८ मोर मनवा तोहमाँ समात ह ।

तू मोर हथवा थामे रहत ह ।

९ कछू लोग मोका मारइ क जतन करत अहई ।

मुला ओनका नस्ट कइ दीन्ह जाइ ।

उ पचे आपन कब्रन मँ समाइ जइहीं ।

१० ओनका तरवारन स मार दीन्ह जाई ।

ओनकर ल्हासन क जंगली कूकुरन खइहीं ।

११ मुला राजा तउ आपन परमेस्सर क संग खुस होइ ।

उ सबइ लोग जउन ओकरे आग्या मानइ क बचन बद्ध अहई, ओकर स्तुति करिहीं ।

काहेकि उ सबहिं झूठन क हराइ दिहस ।

संगीत निर्देसक बरे दाऊद क एक ठु भजन ।

६४ १ हे परमेस्सर, मोर सुना जइसा मई बोलउँ ।

आपन दुस्मनन क डर स मोर रच्छा करा ।

२ तू मोका मोरे दुस्मनन क गहिर सड्यंत्रन स बचाइ ल्या ।

मोका तू ओन दुट्ट लोगन स छिपाइ ल्या ।

३ मोरे बारे मँ उ पचे बहोत बुरा झूठ बोलन ह ।

ओनकर जिभिया तेज तरवार जइसी अउर ओनकर कटु सब्द बाणन जइसे अहई ।

४ उ पचे निर्दोख व्यक्ति पइ बाणन चलावइ बरे लुकाइ जात हीं ।

बिना डर स उ पचे अचानक बाण चलावत ह अउर निर्दोख व्यक्ति कबहुँ नाहीं लख सकत ह कि तीर ओकरे कइती आवत हीं ।

५ उ पचे ओका हरावइ क बुरा काम करत हीं ।

उ पचे झूठ बोलतेन अउ आपन जाल फइलावत हीं ।

अउर उ पचे इ अच्छी तरह तय किहे अहई कि ओनका कउनो नाहीं धरी पकड़ी ।

६ लोग बहोत कुटिल होइ सकत हीं ।

उ सबइ लोग का सोचत अहई ?

एँका समुझ पाउब बड़ा कठिन अहइ ।

७ मुला परमेस्सर आपन “बाण” मार सकत ह !

अउर एकरे पहिले कि ओनका पता चलइ, उ सबइ दुट्ट लोग घायल होइ जात हीं ।

८ दुट्ट जन दूसरन क संग बुरा करइ क जोजना बनावत हीं ।

मुला परमेस्सर ओनकर कुचक्रन क चउपट कइ सकत ह ।

उ ओन बुरी बातन क खुद ओनके ऊपर खुद घटाइ देत ह ।

फुन हर कउनो जउन ओनका लखत अचरजे स भरिके आपन मूँड़ी हिलावत ह ।

९ जउन परमेस्सर किहेस ह, लोग ओन बातन क लखिहीं

अउर उ पचे ओन बातन क वर्णन दूसर लोगन स करिहीं,

फुन तउ हर कउनो परमेस्सर क बारे मँ अउर जियादा जानी ।

उ पचे ओकर आदर करब अउ डेराब सिखिहीं ।

१० तउ सबइ बिस्सासी लोगन क लगे

एक साथ परमेस्सर क स्तुति करइ क कारण होइ ।

निर्देसक बरे दाऊद क एक ठु भजन ।

६५ १ हे परमेस्सर सिय्योन पर्वत पइ, हम पचे तोहका इ सान्ति पराथना भेंट किहेउँ ह अउर आपन प्रतिग्या क पूरा किहेउँ ह ।

२ मई तोहरे ओन कामन क बखान करत हउँ, जउन तू किहा ह ।

उ तू हीं बाटइ जउन पराथनन क उत्तर दिह्या ।

एह बरे हर कउनो मनई तोहार लगे मँ आवत हीं ।

३ जब हमार पाप हम पइ भारी पडत हीं, हमसे सहा नाहीं जाइ पावत,

तउ तू हमार ओन पापन्क हरिके लइ जात ह ।

४ हे परमेस्सर, जेका तू चुन्या ह

अउर आपन आँगनन मँ बसइ बरे लिआवा ह उ पचे बहोत असीसित होइहीं ।

उ पचे तोहार घर,

तोहार पवित्र मन्दिर क बहोत बढ़ियाँ चिजियन स भरि देइहीं ।

५ परमेस्सर मोर उद्धारकर्ता,

तू जउने तरह स लोगन क सम्मान दिहा ह इ बहोत नीक बाटइ ।

तू अचरज भरा काम करा,

एह बरे दूर रास्ट्रन क लोगन अउर दूर क समुद्रन तोहार लगे सुरच्छा बरे आइहीं ।

६ परमेस्सर आपन महासक्ती क प्रयोग किहस अउ पर्वत रच डाएस ।

ओकर सक्ति हम आपन चारिहुँ कइती लखत अही ।

७ परमेस्सर उफनत भवा सागर सांत किहस ।

परमेस्वर जगत क सबहिं अनगिनत लोगन क बनाएस ।

८ जउन अद्भुत बातन क परमेस्वर करत अहइ, ओनसे धरती क हर मनई डेरात अहइ ।
परमेस्वर तू ही हर कहूँ सूरज क उगावत अउ डुबावत ह ।

हर जगह लोग तोहार गुणगान करत हीं ।

१ भुइँया क सारी रखवारी तू करत ह ।
तू ही ऐंका सींचत अउ तू ही ऐंहसे बहोत सारी वस्तुअन क उपजावत अहा ।
हे परमेस्वर, नदियन क पानी स तू ही भरत अहा ।
तू ही फसलन क बढ़त करत अहा ।
१० तू जोता भए खेतन पइ बर्खा करत अहा ।
तू खेतन क जल स लबालब कइ देत ह,
अउर धरती क बर्खा स नरम बनावत ह,
अउर तू फिन पौधन क बढ़त करत ह ।
११ तू नवा बरिस क सुरूआत उत्तम फसलन स करत ह ।

तू भरपूर फसलन स गाड़ियन भर देत अहा ।
१२ बन अउ पर्वत दूब घासे स ढँकि जात हीं ।
१३ भेड़िन स चरागाहन भर गइन ।
फसलन स घाटियन भरपूर होत अहइ ।
हर कउनो गावत अउ आनन्द मँ ऊँचा पुकारत अहइ ।

निर्देसक बरे एक ठु भजन ।

६६ १ हे धरती क हर वस्तु, आनन्द क संग परमेस्वर क जय बोला ।

२ ओकर महिमामय नाउँ क स्तुति करा ।
ओकर आदर ओकर स्तुति गीतन स करा ।
३ ओकर जियादा अद्भुत कामन स परमेस्वर क बखान करा ।

हे परमेस्वर, तोहार सक्ति बहोतइ बड़ी अहइ ।
तोहार दुस्मन निहुरि जात अउ तोहसे डेरात हीं ।
४ जगत क सबहिं लोग तोहार उपासना करइँ
अउर तोहरे नाउँ क हर कउनो गुण गावइ ।
५ तू ओनका लखा जउन अचरजे स भरा काम परमेस्वर किहस ।

उ सबइ चिजियन हमका अचरजे स भरि देत हीं ।
६ परमेस्वर लाल सागर क झुरान भुइँया मँ बदल दिहस ।

अउर ओकर लोग पैदर यरदन नदी क समूचइ रास्ता खुसी स पार किहेन ।
७ परमेस्वर आपन महासक्ति स इ संसार क सासन करत ह ।

परमेस्वर हर कहूँ लोगन पइ निगाह रखत ह ।
कउनो भी मनई ओकरे खिलाफ नाहीं होइ सकत ।

८ लोगो, हमरे परमेस्वर क गुणगान तू पचे ऊँच स्वर मँ करा ।

९ परमेस्वर हमका इ जिन्नगी दिहस ह ।
उ हमार रच्छा करत ह ।

१० परमेस्वर हमार परीच्छा लिहस ह ।
परमेस्वर हमका वइसे ही परखेस, जइसे लोग चाँदी आगी मँ डाइके परखत हीं ।

११ हे परमेस्वर, तू हमका फँदा मँ फँसइ दिहा ।

तू हम पइ भारी बोझा लाद दिहा ।

१२ तू हमका दुस्मनन स गोड़े तरे रौंदवाया ।

तू हमका आग्री अउ पानी मँ घसीट्या ।
मुला तू फिन भी हमका सुरच्छित ठउर पइ लइ आया ।

१३-१४ एह बरे मइँ तोहरे मन्दिर मँ बलियन चढ़ावइ आउव ।

जब मइँ विपत्ति मँ रहेउँ, मइँ तोहार सरण माँगेउँ
अउर मइँ तोहार बहुतेरी मन्नत माँगेउँ ।
अब ओन वस्तुअन क जेनकर मइँ मन्नत माँगेउँ,
अर्पित करत हूँ ।

१५ मइँ तोहका सुदधिकरण क भेंट अर्पित करत हूँ,
अउर भेड़िन क संग सुगन्धि अर्पित करत हूँ ।
तोहका बर्धन अउ बोकरन क बलि अर्पित करत हूँ ।

१६ ओ सबहिं लोगो, परमेस्वर क आराधको !
आवा, मइँ तू पचन्क बताउब कि परमेस्वर मोरे बरे का किहस ह ।

१७-१८ मइँ ओकर बिनती किहेउँ ।

मइँ ओकर गुणगान किहेउँ ।

मोर मनवा पवित्तर रहा,
मोर सुआमी मोर बात सुनेस ।

१९ परमेस्वर मोर सुनेस ।

परमेस्वर मोर बिनती सुन लिहस ।

२० परमेस्वर क गुण गावा ।

परमेस्वर मोहसे मुँह नाहीं मोडेस ।

उ मोर पराथना क सुन लिहस ।

परमेस्वर निज करुणा मोह पइ देखाँएस ।

संगीत निर्देसक बरे तारवालन
बाजन क संग एक ठु भजन ।

६७ १ हे परमेस्वर, हम पइ करुणा करा, अउ हमका असीस द्या ।

आपन मुस्कुरात भवा चेहरा हमका दिखावा । §
 २ एह बरे समूचइ संसार तोहार रास्ता सीखइ सकी
 अउर हर कउनो मनई तोहार इ जान सकइ कि तू
 कइसा आपन लोगन क रच्छा करत ह ।
 ३ हे परमेस्सर, लोग तोहार गुण गावई ।
 सबहिं लोग तोहार बड़कई करई ।
 ४ सबहिं रास्टर आनन्द मनावई अउ आनन्द मैं
 भरा होई ।
 काहेकि तू लोगन क निआउ निस्पच्छ करत अहा ।
 अउर हर रास्टर पइ तोहार सासन अहइ ।
 ५ हे परमेस्सर, लोग तोहार गुण गावई ।
 सबहिं लोग तोहार बड़कई करई ।
 ६ हमार भुइयाँ हमका भरपूर फसल देइ ।
 परमेस्सर, हे हमरे परमेस्सर हमका असीस द्या ।
 ७ हे परमेस्सर, हमका असीस द्या
 धरती क सबहिं लोग परमेस्सर स डेराई, ओकर
 आदर करई ।

संगीत निर्देशक बरे दाऊद क एक टु भजन ।

६८ १ हे परमेस्सर, उठा, आपन दुस्मनन क
 एहर ओहर करा ।
 ओकर सबहिं दुस्मनन ओकरे लगे स पराइ जाई ।
 २ जइसे हवा स उड़ावा भवा धुआँ बिखरि जात ह,
 वइसे ही तोहार दुस्मन बिखरि जाई ।
 जइसे आगी मैं मोम टेघर जात ह,
 वइसे ही तोहरे दुस्मनन क नास होइ जाइ ।
 ३ परमेस्सर क संग सज्जन सुखी होत हीं, अउर
 सज्जन सुखद पल बितावत हीं ।
 सज्जन खुद ही आनन्द मनावत अउ खुद ही बहोत
 खुस रहत हीं ।
 ४ परमेस्सर क गीत गावा ।
 ओकरे महिमा नाउँ क गुणगान करा ।
 परमेस्सर बरे राह तइयार करा जउन आपन रथे क
 रेगिस्तान मैं हाँकत ह ।
 ओकरे समन्वा आन्दित भवा जेकर नाउँ याह
 अहइ ।
 ५ परमेस्सर अनाथन क पिता क समान अहइ अउर
 राँड मेहररून क धियान रखत ह ।
 उ आपन पवित्तर मन्दिर मैं अहइ ।
 ६ जेकर कउनो घर नाही होत, अइसे अकेले मनई
 क परमेस्सर घर देत ह ।
 आपन मनवइयन क परमेस्सर बंधन स अजाद
 करत ह ।
 उ पचे बहोत खुस रहत हीं ।

मुला जउन परमेस्सर क खिलाफ होत हीं, ओनका
 तपत भइ भुइया पइ रहइ क होइ ।
 ७ हे परमेस्सर, तू आपन मनवइयन क मिस्र स
 निकार्या,
 अउ रेगिस्तान स पैदर ही पार निकार्या ।
 ८ इस्राएल क परमेस्सर जब सिय्योन पर्वत पइ
 आवा रहा,
 तउ धरती काँप उठी रही, अउ अकास टेघरा रहा ।
 ९ हे परमेस्सर, बर्खा क तू पठए रह्या,
 अउ पुरान अउ दुर्बल पड़ी धरती क तू फुन ससक्त
 किहा ।
 १० उहइ धरती पइ तोहार गोरू वापस आइ गएन ।
 हे परमेस्सर, हुआँ क दीन लोगन क तू उत्तिम
 चिजियन दिहा ।
 ११ परमेस्सर हुकुम दिहस
 अउर बहोत लोग सुसंदेश सुनावइ गएन ।
 १२ “बरिआर राजा लोगन क फउजन एहर ओहर
 पराइ गइन ।
 जुद्ध स जउन चिजियन क फउजी लिआवत
 हीं, ओनका घरे पइ रुकी मेहररून बाँटि
 लेइही ।
 जउन लोग घरे मैं रूका बाटेन, उ सबइ उ धने क
 बाँटि लेइही ।
 १३ उ सबइ चाँदी स मढा भवा कबूतरे क पखना
 पइही ।
 उ सबइ सोना स चमकत भवा पखनन क पइही ।”
 १४ परमेस्सर जब सल्मोन पर्वत पइ दुस्मन राजा
 लोगन क बिखेर दिहस,
 तउ उ पचे अइसे छितरानेन जइसे बरफ गिरत ह ।
 १५ बासान पर्वत महान पर्वत अहइ,
 जेकर चोटियन बहोत सी बाटिन ।
 १६ बासान पर्वत, तू काहे सिय्योन पर्वत क नान्ह
 समुझत बाट्या ?
 परमेस्सर ओहसे पिरम करत ह ।
 परमेस्सर ओका हुआँ सदा रहइ बरे चुनेस ह ।
 १७ यहोवा पवित्तर पर्वत सिय्योन पइ आवत
 अहइ ।
 अउ ओकरे पाछे कई लाख रथ अहइ ।
 १८ उ ऊँचे पइ चढ़ गवा ।
 उ बंदियन क अगुआई किहस,
 उ मनइयन स हिआँ तलक कि
 आपन विरोधी लोगन स भेंट लिहस ।
 यहोवा परमेस्सर हुआँ रहइ गवा ।
 १९ यहोवा क गुण गावा ।

§६७ :१ तोहार मुस्कुरात ... दिखावा साब्दिक अरथ, “हम लोगन बरे ओकरे चेहरे पइ चमक होइ ।”

उ हर दिन हमार, हमरे संग भार उठावइ मैं मदद करत ह ।

परमेस्सर हमार रच्छा करत ह ।

२० उ हमार परमेस्सर अहइ ।

उ उहइ परमेस्सर अहइ जउन हमका बचावत ह ।
हमार यहोवा परमेस्सर मउत स हमार रच्छा करत ह ।

२१ परमेस्सर देखाँइ देइ कि आपन दुस्मनन क उ हराइ दिहस ह ।

अइसे ओन मनइयन क जउन ओकरे खिलाफ लडेन, उ सजा देइ ।

२२ मोर सुआमी कहेस, “मई बासान स दुस्मन क वापस लिआउब,

मई दुस्मन क समुदर क गहराई स वापस लाउब,

२३ ताकि तू ओनकर खून मैं विचरि सका,

तोहार कूकुरन ओनकर खून चाट जाई ।”

२४ लोग लखत हीं, परमेस्सर क विजय अभियान क अगुआइ करत भए ।

लोग मोरे पवित्तर परमेस्सर, मोरे राजा क अभियान क अगुआई करत लखत हीं ।

२५ अगवा-अगवा गवइयन क मण्डली चलत ह,
पाछे-पाछे वादक लोगन क मण्डली आवति अहइ,

अउ बीच मैं कुमारियन तम्बूरन बजावति अहइ ।

२६ परमेस्सर क बड़कई महासभा क बीच करा ।

इस्राएल क लोगो, तू यहोवा क गुण गावा ।

२७ नान्ह बिन्यामीन ओनकर अगुआई करत बाटइ ।

यहूदा क बड़का परिवार हुआँ बाटइ ।

जबूलून अउ नपताली क नेता हुआँ पइ अहइ ।

२८ हे परमेस्सर, हमका आपन सक्ति देखाँवा ।

हमका उ आपन सक्ति देखाँवा जेकर उपयोग तू हमरे बरे बीते भए जमाने मैं किहे रहा ।

२९ राजा लोग, जरूसलेम मैं तोहरे मन्दिर क बरे निज सम्पत्ति लिअइहीं ।

३० ओन “गोरूअन” स काम मनचाहा करावइ बरे आपन कुबरी क प्रयोग करा ।

ओन जातियन क “बर्धन”

अउर “गइयन” क आग्या मानइवालन बनावा ।

तू जउन रास्ट्रन क जुद्ध मैं हराया ।

अब तू ओनसे चाँदी मँगवाइ ल्या ।

३१ तू ओनसे मिस्र स धन मँगवाइ ल्या ।

हे परमेस्सर, तू आपन धन कूस स मँगवाइ ल्या ।

३२ धरती क राजा लोगो, परमेस्सर बरे गावा ।

हमरे सुआमी बरे तू जसगान गावा ।

३३ परमेस्सर बरे गावा, उ रथे पइ चढिके सनातन अकासन स निकरत ह ।

तू ओकरे सक्तीसाली स्वर क सुना ।

३४ इस्राएल क परमेस्सर,

तोहरे कउनो भी देवतन स जियादा बलवान अहइ ।

उ जउन निज मनवइयन क सुदृढ बनावत ह ।

३५ परमेस्सर आपन मन्दिर मैं अद्भुत बाटइ ।

इस्राएल क परमेस्सर भक्तन क सक्ति अउ सामर्थ देत ह ।

परमेस्सर क गुण गावा ।

“कुमुदिनी” नाउँ क धुन पइ संगीत
निर्देसक बरे दाऊद क एक टु भजन ।

६९ हे परमेस्सर, मोका मोर सब मुसीबतन स बचावा ।

मोरे मुहना तलक पानी चढि आवा अहइ ।

२ कछू भी नाहीं अहइ जउने पइ मई खड़ा होइ जाउं ।

मई दलदले क बीच खाले धँसत ही चला जात हउं ।

मई नीचे धँसत हउं ।

मई अथाह जले मैं अहउं अउर मोरे चारिहूँ कइँती लहरियन थपेड़ा मारति अहइ ।

बस, मई बूड़इ क अहउं ।

३ मदद क गोहार लगावत मई दुर्बल होत जात हउं ।

मोर गटइ मदद बरे गोहराव क कारण सुखन बाटइ ।

मई बाट जोहत हउं ।

तोहसे मदद पावइ अउ लखत-लखत मोर अँखियन दुःखति अहइ ।

४ मोर दुस्मन मोरे मूँडे क बारे स भी जियादा अहइ ।

उ सबइ मोहसे बेकार दुस्मनी रखत हीं ।

उ पचे मोरे विनास क बहोतइ जुगत करत हीं ।

मोर दुस्मन मोरे बारे मैं झूठी बातन बनावत हीं ।

उ पचे मोका झूठइ ही चोर बताएन ।

अउर ओन चिजियन क भरपाई करइ क मोका मजबूर किहन, जेनका मई चोराए नाहीं रहेउं ।

५ हे परमेस्सर, तू तउ जानत अहा कि मई कछू अनुचित नाहीं किहेउं ।

मई आपन पाप तोहसे नाहीं छुपाइ सकित ।

६ हे मोर सुआमी, हे सर्वसक्तिमान यहोवा, तू आपन मनवइयन क मोरे कारण लज्जित जिन होइ या ।

हे इसराएल क परमेस्सर, अइसे ओन लोगन क मोरे बरे असमंजस मैं मत डावा जउन तोहार उपासना करत हीं ।

७ तोहार बरे मोर मुँह लज्जा स ढाँपि गवा ।

तोहार सेवा बरे मई इ लज्जा क जन्मेउँ ह ।

८ मोरे ही भाई, मोरे संग यूँ ही बताव करत हीं ।

जइसे बताव कउनो अजनबी स करत होई ।

मोरे ही सगे भाई, मोका पराया समुझत हीं ।

९ तोहरे मन्दिर क खातिर मोर गहरी लगन ही मोका जराइ डावत अहइ ।

उ पचे जउन तोहार मसखरी करत हीं उ मोह पइ आइ पड़ी बाटइ ।

१० मई तउ गोहरावत हउँ अउर उपवास करत हउँ, एह बरे उ पचे मोर हँसी उड़ावत हीं ।

११ मई आपन सोक दर्सावइ बरे मोटवार ओढनन क पहिरत हउँ,

अउर लोग मोर मसखरी करत हीं ।

१२ उ पचे जनता क बीच सबइ चर्चा करत हीं,

अउर पियक्कड़, मोर गीत रचा करत हीं ।

१३ हे यहोवा, जहाँ तलक मोर बात बाटइ,

मोर तोहसे इ बिनती अहइ कि मई चाहत हउँ : तू मोका अपनाइ ल्या ।

हे परमेस्सर, मई चाहत हउँ कि तू मोका पिरम भरा जवाब द्या

मई जानत हउँ कि मई तोह पइ सुरच्छा क भरोसा कइ सकत हउँ ।

१४ मोका दलदले स उबार ल्या ।

मोका दलदल क बीच जिन बूड़इ द्या ।

मोका मोरे बैरी लोगन स तू बचाइ ल्या ।

तू मोका इ गहिर पानी स बचाइ ल्या ।

१५ बाढ़ क लहरन क मोका बुड़ावइ न द्या ।

गहराई क मोका लीलइ न द्या ।

कबर क मोरे ऊपर आपन मुँह बन्द न करइ द्या ।

१६ हे यहोवा, तोहार करुणा खरी अहइ ।

तू मोका आपन सम्पूर्ण पिरम स जवाब द्या ।

मोर मदद बरे आपन सम्पूर्ण कृपा क संग मोरी कइती मुँह करा ।

१७ आपन दास स जिन मुँह मोड़ा ।

मई संकटे मैं पड़ा अहउँ, मोका हाली सहारा द्या ।

१८ आवा, मोर परान बचाइ ल्या ।

तू मोका मोरे दुस्मनन स छोड़ाइ ल्या ।

१९ तू मोर निरादर जानत अहा ।

तू जानत अहा कि मोर दुस्मनन मोका लज्जित किहेन ह ।

ओनका मोरे संग तू अइसा करत लख्या ह ।

२० निन्दा मोका चकनाचूर कइ दिहस ह ।

बस निन्दा क कारण मई मरइवाला अहउँ ।

मई सहानुभूति क बाट जोहत रहेउँ,

मई दिलासा क बाट जोहत रहेउँ,

मुला मोका तउ

कउनो नाहीं मिला ।

२१ उ पचे मोका जहर दिहन, खइया क नाहीं दिहन ।

सिरका मोका दइ दिहन, दाखरस नाहीं दिहन ।

२२ ओनकर मेजन खाना स भरी अहइ उ पचे एतना बड़का मैत्री भोज करत अहइ ।

मई आसा करत हउँ कि उ सबइ भोजन ओनका बरबाद करइ ।

२३ उ सबइ आँधर होइ जाई अउर ओनकर करिहाउँ निहुरिके दुहरी होइ जाइ ।

२४ अइसा लगइ कि ओन पइ

तोहार भरपूर किरोध फूट पड़ा बा ।

२५ ओनकर घरन क तू खाली बनाइ द्या ।

हुआँ कउनो जिअत न रहइ ।

२६ ओनका सजा द्या, अउर उ सबइ दूर पराइ जाई ।

फुन ओनके लगे, ओनकर बातन क बारे मैं ओनकर दर्द अउर घाव होई ।

२७ ओनकर बुरे कर्मन क ओनका सजा द्या, जउन उ पचे किहे अहइ ।

ओनका जिन देखाँवा कि तू अउर केतना भला होइ सकत ह ।

२८ जिन्नगी क किताबे स ओनकर नाउँ मेट द्या ।

सज्जनन क नाउँ क संग तू ओनकर नाउँ उ किताबे मैं जिन लिखा ।

२९ मइ दुःखी हउँ अउ दर्द मैं हउँ ।

हे परमेस्सर, मोका उबार ल्या । मोर रच्छा करा ।

३० मई परमेस्सर क नाउँ क गुण गीतन मैं गाउब ।

मई ओकर जस धन्यवाद क गीतन स गाउब ।

३१ परमेस्सर एहसे खुस होइ जाइ ।

अइसा करब एक ठु बर्धा क बलि या पूरा गोरू क ही बलि चढ़ावइ स जियादा उत्तम अहइ ।

३२ अरे दीन लोगो, तू पचे परमेस्सर क आराधना करइ आवा अहा ।

अरे दीन लोगो ! एँन बातन क जानिके तू पचे खुस होइ जाब्या ।

३३ यहोवा, दीन लोगन अउ बेसहारा लोगन क सुना करत ह ।

यहोवा ओनका अबहुँ चाहत ह, जउन लोग बंधन मैं पड़ा अहइ ।

३४ हे सरग अउ हे धरती, हे सागर अउ एकरे बीच जउन भी समावा अहइ ।

परमेस्सर क स्तुति करा ।

३५ यहोवा सिय्योन क रच्छा करी ।

यहोवा यहूदा क नगर क फुन निर्माण करी।
उ लोग जउन इ धरती क सुआमी अहई, फिन हुआ
रइहीं।

३६ ओकरे सेवकन क संतानन उ धरती क पाई।
अउर अइसे उ सबइ लोग निवास करिहीं जेनका
ओकर नाउँ पियारा बाटइ।

संगीत निर्देशक बरे दाऊद क एक ठु गीत। इ
लोगन क याद दियावइ बरे रहा।

१ हे परमेस्सर, मोर रच्छा करा।
७० हे परमेस्सर, हाली करा, अउर मोका
सहारा द्या।

२ लोग मोका मार डावइ क जतन करत अहई।
ओनका निरास अउ बेज्जत कइ द्या।
अइसा चाहत हीं कि लोग मोर बुरा कइ डावई।
ओनकर पतन अइसा होइ जाइ
कि उ पचे सर्मिन्दा होई।

३ लोग मोर हँसी टट्टन उड़ाएन।
मई ओनकर पराजय क आसा करत हउँ अउर इ
बात क कि ओनका लज्जा महसूस होइ।

४ मोका इ आस अहइ कि अइसे उ पचे सबहिं लोग
जउन तोहार आराधन करत हीं,
उ खूब खुस होइ।
उ पचे सबहिं लोग तोहरी मदद क आसा मँ रहत
हीं

उ पचे सदा तोहार स्तुति करत रहई।
५ हे परमेस्सर, मई दीन अउ बेसहारा हउँ।
हाली करा! आवा, अउर मोका सहारा द्या।
हे परमेस्सर, तू ही बस अइसा अहा जउन मोका
बचाइ सकत अहा,
जियादा देर जिन करा।

१ हे यहोवा, मोका तोहार भरोसा अहइ,
७१ एह बरे मई कबहुँ निरास नाही होब।

२ आपन नेकी स तू मोका बचाई।
तू मोका छोड़ाइ लेब्या, मोर सुना।
मोर उद्धार करा।

३ तू मोर गढ़ बना।
सुरच्छा बरे अइसा गढ़ जेहमाँ मई दौड़ जाउँ।
मोर सुरच्छा बरे तू हुकुम द्या,
काहेकि तू ही तउ मोर चट्टान अहा:मोर
सरणस्थल अहा।

४ मोर परमेस्सर, तू मोका दुट्ट जनन स बचाइ
ल्या।

तू मोका कूरु कटिल लोगन स छोड़ाइ ल्या।
५ मोर सुआमी, तू मोर आसा अहा।
मई आपन बचपन स ही तोहरे भरोसे हउँ।

६ जब मई आपन महतारी क गरभ मँ रहेउँ, तबहिं
स तोहरे भरोसे रहेउँ।

जउने दिन स मई जन्म धारण किहेउँ, मई तोहरे
भरोसे हउँ।

मई तोहार पराथना सदा करत रहत हउँ।

७ मई दूसर लोगन बरे एक उदाहरण रहेउँ ह।

काहेकि तू मोर सक्ति क सीता रह्या ह।

८ ओन अद्भुत कामन क सदा गावत रहेउँ ह,
जेनका तू करत अहा।

९ सिरिफ इ कारण कि मई बुढ़वा होइ गवा हउँ
मोका निकारिके जिन लोकावा।

सिरिफ इ कारण कि मई दुर्बल होइ गवा हउँ मोका
निज छोड़या।

१० फुरइ, मोर दुस्मनन मोरे खिलाफ कुचक्र रच
डाए बाटेन।

फुरइ उ पचे सब बटुर ग अहई, अउर ओनकर
जोजना मोका मार डावइ क अहइ।

११ मोर दुस्मन कहत हीं, “परमेस्सर ओका तजि
दिहस ह। जा, ओका धइ ल्या।
कउनो भी मनई ओका मदद न देई।”

१२ हे परमेस्सर, तू मोका जिन बिसरा।

हे परमेस्सर, हाली करा। मोका सहारा द्या।

१३ मोरे दुस्मनन क पूरी तरह स हराइ द्या।

तू ओनकर नास कइ द्या।

मोका कस्ट देइ क उ पचे जतन करत अहई।

उ पचे लज्जा महसूस करई अउ अपमान सहई।

१४ फुन मई तोहरे ही भरोसे, सदा रहब।

अउर तोहार गुण मई जियादा अउ जियादा गाउब।

१५ सबहिं लोगन स, मई तोहार बखान करब कि तू
केतना उत्तम अहा।

उ समइ क बातन मई ओनका बताउब,
जब तू अइसे मोका एक नाही अनगिनत अवसर
पइ बचाए रह्या।

१६ हे यहोवा, मोर सुआमी।

मई तोहरी महानता क वर्णन करब।

बस सिरिफ मई तोहार अउ तोहरी ही अच्छाई क
चर्चा करब।

१७ हे परमेस्सर, तू मोका बचपन स ही सिच्छा
दिहा।

मई आजु तलक बखानत रहा हउँ, ओन अद्भुत
कामन क जेका तू करत अहा।

१८ अब मई बुढ़वा होइ गवा हउँ अउर मोर बार
सफेद होइ ग अहई।

मुला मई जानत हउँ कि तू मोका नाही तजब्या।
हर नई पीढ़ी स, मई तोहरी सक्ति क अउर तोहरी
महानता क वर्णन करब।

१९ हे परमेस्वर, तोहार धार्मिक भावना अकासन स ऊँच अहइ।
 हे परमेस्वर, तोहरे समान दूसर कउनो नाही।
 तू अजूबा अचरजभरा काम किहा ह।
 २० तू मोका बुरा समइ अउ कस्ट लखइ दिहा।
 मुला तू ही मोका ओन सब स बचाइ लिहा अउर जिअत राख्या ह।
 एकर कउनो अरथ नाही, मइ केतना ही गहिर बूड़ेउँ तू मोका मोर संकटन स उवारि लिहा।
 २१ तू अइसे काम करइ क मोका मदद द्या जउन पहिले स भी बड़ा होइ।
 मोका सुख चैन देत रहा।
 २२ वीणा क संग, मइ तोहार गुण गाउब।
 हे मोरे परमेस्वर, मइ इ गाउब कि तोह पइ भरोसा धरा जाइ सकत ह।
 मइ ओकरे बरे गीत आपन सितार पइ बजावा करब जउन इस्राएल क पवित्तर यहोवा अहइ।
 २३ मोरे प्राणन क तू रच्छा किहा ह।
 मोर मन मगन होइ अउर आपन हौठन स, मइ परसंसा क गीत गाउब।
 २४ मोर जिभिया हर घड़ी तोहार धार्मिक भावना क गीत गावा करी।
 अइसे उ सबइ लोग जउन मोका मारइ चाहत हीं, उ पचे हारि जइही अउ अपमानित कीन्ह जइही।

सुलैमान बरे।

७२ १ हे परमेस्वर, राजा क मदद करा ताकि उ भी तोहरी तरह स विवेक स भरिके निआउ करइ।
 राजपुत्र क सहायता करा ताकि उ तोहार धार्मिक भावना क जानि सकइ।
 २ राजा क सहायता करा कि तोहरे मनवइयन क उ निस्पच्छ निआउ करइ।
 सहायता करा कि उ दीन जनन क संग उचित बेउहार करइ।
 ३ पहाड़न क सबइ बरे सान्ति लिआवइ द्या।
 समूचइ भुइँया बरे सान्ति अउर निआउ लिआवइ द्या।
 ४ राजा निर्धन लोगन बरे निआउ स भरा रहइ।
 उ बेसहार लोगन क मदद करइ।
 उ सबइ लोग सजा पावइँ जउन ओनका सतावत होइँ।
 ५ मोर इ कामना अहइ कि जब तलक सूरज अकास मँ चमकत ह, अउर चन्द्रमा अकासे मँ अहइ।
 लोग राजा क डर मानइँ।

मोर आसा अहइ कि लोग ओकर डर सदा मनिहीं।
 ६ राजा क मदद, धरती प पड़इवाली बरसात बनावइ मँ करा।
 ओकर मदद करा कि खेतन मँ पड़इवाली बौछार बनइ।
 ७ जब तलक उ राजा अहइ, भलाइ फूलइ-फरइ।
 जब तलक चन्द्रमा अहइ, सान्ति बनी रहइ।
 ८ ओकर राज्ज समुद्र स समुद्र तलक अउ परात नदी स लइके सुदूर तलक फइलि जाइ।
 ९ रेगिस्ताने क लोग ओकर अगवा निहुरइँ।
 अउर ओकर सबइ दुस्मन ओकरे अगवा औधे मुँह भहरान भए धरती पइ निहुरइँ।
 १० तर्सीस क राजा अउ दूर देसन क राजा ओकरे बरे उपहार लिआवइँ।
 सेवा क राजा अउ सबा क राजा ओका उपहार देइँ।
 ११ सबइ राजा हमरे राजा क अगवा निहुरइँ।
 सबहिँ रास्टर ओकर सेवा करत रहइँ।
 १२ हमार राजा बेसहारन क सहायक अहइ।
 हमार राजा दीनन पइ अउर बेसहारा लोगन क सहारा देत ह।
 १३ दीन, बेसहारा लोग ओकरे सहारे अहइँ।
 इ राजा ओनका जिअत रखत ह।
 १४ इ राजा ओनक ओन लोगन स बचावत ह, जउन कूरु अहइँ अउर जउन ओनका दुःख देइ चाहत हीं।
 राजा बरे ओन दीनन क जीवन बहोतइ महत्वपूर्ण अहइ।
 १५ राजा लम्बी उमर क होइ।
 अउर सेवा स सोना प्राप्त करइ।
 राजा बरे सदा पराथना करत रहा,
 अउर तू हर दिन ओका असीस द्या।
 १६ खेत भरपूर फसल देइ। पहाड़ियन फसलन स ढकि जाइँ।
 इ सबइ खेत लबानोन क खेतन स उपजाऊ होइ जाइँ।
 सहर लोगन क भीड़ स भरि जाइ,
 जइसेन खेत घनी घासे स भरि जात हीं।
 १७ राजा क जस सदा बना रहइ।
 लोग ओकरे नाउँ क सुमिरन तब तलक करत रहइँ,
 जब तलक सूरज चमकत ह।
 ओकरे कारण सारी प्रजा धन्य होइ जाइ
 अउ उ पचे सबहिँ ओका असीसइँ।
 १८ यहोवा परमेस्वर क गुण गावा, जउन एस्राएल क परमेस्वर अहइ।
 उहइ परमेस्वर अइसे अचरज क कर्म कइ सकत ह।

- १९ ओकरे महिमा स भरा नाउँ क बड़कई सदा करा ।
ओकर महिमा सारी दुनिया मँ भरि जाइ ।
आमीन अउ आमीन ।
२० यिसै क पूत दाऊद क पराथनन समाप्त भइन ।

तीसर भाग

(भजन ७३-८९)

आसाफ क गीत ।

- ७३ १ इस्राएल बरे परमेस्सर नीक अहइ ।
परमेस्सर ओन लोगन बरे नीक होत ह
जेनकर हिरदइ पवित्तर अहइ ।
२ मई तउ करीब-करीब फिसल गवा रहा
अउर मई तउ करीब-करीब गिर गवा रहा ।
३ काहेकि मई लखेउँ कि पापी सफल होत अहइ
अउर सान्ति स रहत अहइ ।
तउ ओन अभिमानी लोगन स मोका जलन भइ ।
४ उ सबइ लोग तन्दुरुस्त अहइ ।
ओनके जिन्नगी मँ कउनो संघर्स नाही अहइ ।
५ ओन अहंकारी लोग दूसर लोगन क नाई
परेसानी नाही उठावत हीं ।
उ पचे दूसर क नाई तकलीफ नाही झेलत हीं ।
६ एह बरे उ पचे सदा अहंकार स भरा रहत हीं ।
अउर उ पचे हिंसा स भी भरा भवा रहत हीं ।
७ उ पचे बुरे विचारन स भरा भवा अहइ
अउर उ पचे बुरे जोजना मँ बह गवा रहेन ।
८ उ पचे लोगन क बारे चिन्ता नाही करत हीं अउर
ओनका सोसण करइ बरे बुरी जोजना बनावत
हीं ।
उ पचे घमण्ड मँ बात करत हीं ।
९ उ घमण्डी लोगन अइसे बात करत हीं जइसे उ
पचे देवता अहइ ।
उ पचे अइसे बात करत हीं जइसे उपचे धरती क
सासक हीं ।
१० एह बरे हिआँ तलक कि परमेस्सर क जन भी
ओन दुट्टन कइती मुइत अउर जइसा उ पचे
कहत हीं,
वइसा बिस्सास कइ लेत हीं ।
११ उ सबइ दुट्ट जन कहत हीं,
“हमरे ओन कामन क परमेस्सर नाही जानत
जेनका हम करत अही ।”
१२ दुट्ट जन आराम क जिन्नगी जिअत हीं
अउर उ पचे धनवान होत चला जात हीं ।
१३ तउ मोका आपन हिरदय क पवित्तर रखइ क का
लाभ अहइ !

- आपन मूँडे क निर्मल रखइ क का लाभ अहइ !
१४ हे परमेस्सर, मई सारे ही दिन दुःख भोगा करत
हुँ ।
तू हर भिन्सारे मोका दण्ड देत अहा ।
१५ हे परमेस्सर, मई इ सबइ बातन दूसरन क
बतावइ क निर्णय कइ लिहे रहेउँ ।
मुला मई जानत रहेउँ कि मई तोहार लोगन क
धोका देते रहेउँ ।
१६ एँन बातन क समुझइ क, मई जतन किहेउँ
मुला एँनका समुझब मोरे बरे बहोत कठिन रहा ।
१७ जब तलक मई परमेस्सर क मन्दिर मँ नाही गवा
तब तलक मई एका नाही समुझेउँ ।
१८ हे परमेस्सर, फुरइ तू ओन लोगन क भाग
फिसलइ वाले मार्ग मँ राख्या ह ।
तू ओन लोगन क गिरइ द्या अउर बर्बाद होइ द्या ।
१९ एकाएक ओन पइ विपत्ति अइहीं ।
उ सबइ घमण्डी लोग बरबाद होइ जात हीं ।
ओनके संग भयंकर घटना घटिहीं ।
अउर फुन ओनकर अंत होइ जात ह ।
२० हे यहोवा, उ सबइ मनई अइसे होइहीं
जइसे सपन जेका हम जागत ही बिसरि जात
अहीं ।
एँह बरे तू अइसे लोगन क
हमरे सपन क भयानक जानवर क नाई अच्छन्न कइ
द्या ।
२१ जब मोर हिरदय किरया रहा अउर मोरे दिमाग
जख्मी रहा,
२२ मई विवेकहीन रहा अउर मई समुझइ मँ
असमर्थ रहा ।
मई एक तोहार संग
एक निर्बुद्धि जनावर जइसा बेउहार किहेउँ ।
२३ तउ पइ भी मई सदा तोहार संग अहउँ ।
हे परमेस्सर, तू मोरे हाथ थामइ क मोर मदद किहा
ह ।
२४ हे परमेस्सर, तू मोका राह देखँवत, अउर मोका
सलाह देत अहा ।
आखीर मँ तू आपन महिमा क मौजूदगी मँ मोका
अगुवाई करब्या ।
२५ हे परमेस्सर, सरगे मँ बस तू ही अकेला मोर
अहा,
अउर धरती पइ मोका का चाही, जब तू मोरे साथ
अहा ?
२६ चाहे मोर मनवा टूटि जाइ अउर मोर काया
नस्त होइ जाइ ।
मुला उ चट्टान मोरे लगे बाटइ जउन मोर
सहायता करत ह ।

परमरेस्सर मोरे लगे सदा अहइ ।

२७ हे परमेस्सर, जउन लोग तोहका तजत हीं, उ पचन्क तू नास कइ देब्या ।

तू ओन लोगन क जउन तोहसे मुड़ जात हीं, बर्बाद कइ देब्या ।

२८ मुला मोरे बरे, परमेस्सर क निअरे रहब नीक अहइ ।

मई आपन सुरच्छा स्थान आपन सुआमी यहोवा क बनाएउँ ह ।

हे परमेस्सर, मई ओन सबहिं बातन क बखान करब जेनका तू किहा ह ।

आसाफ क कलात्मक ।

७४ १ हे परमेस्सर, तू हमका सदा बरे काहे बिसराइ दिहा ह ?

तू अबहिं तलक आपन निज लोगन स काहे कोहान अहा ?

२ ओन लोगन क सुमिरा जेनका तू बहोत पहिले मोल लिहे रह्या ।

तू हम लोगन क आपन लोग बनाइ बरे बचाइ लिहा ह ।

सिय्योन क पहाड़े क सुमिरा जहाँ तू रहत रहा ।

३ हे परमेस्सर, आवा अउ एँन बहोत पुरान खण्डहन स होइके चला ।

तू उ पवित्तर ठउर पइ लउटिके आवा जेका दुस्सन बरबाद कइ दिहे अहइ ।

४ दुस्सनन मन्दिर मँ सेरन क नाई दहाडेन ।

उ खुद क बिसेस चिन्ह **क एक प्रमाण क रूप मँ, कि उ पचे जुद्ध जीत गएन, स्थापित किहेन ।

५ दुस्सनन क फउजियन एक अइसे कुलहारी क नाई परगट भवा रहेन

जेका प्रयोग जलावन क लकड़ी क काटइ बरे कीन्ह गवा रहा ।

६ हे परमेस्सर, एँन दुस्सन फउजियन निज कुल्हाड़न अउ फर्सन क प्रयोग किहन, अउर तोहरे मन्दिर क नक्कासी फाड़िके लोकाएन ।

७ सबइ फउजियन तोहार पवित्तर ठउर बार दिहन ।

उ पचे तोहरे मन्दिर क धूरि मँ मिलइ दिहन

जेका तोहरे नाउँ क मान देइ बरे बनावा ग रहा ।

८ उ दुस्सन हमका पूरी तरह बरबाद करइ क टान लिहन ।

तउ उ पचे देस क हर पवित्तर ठउर क फूँक दिहन ।

९ हम लोग कउनो बिसेस चिन्ह नाही लेखे ।

हुआँ अउर कउनो नबी जिअत नाही अहइ ।

एह बरे कउनो भी नाही जानत ह कि इ परिस्थिति कब तलक जारी रही ।

१० हे परमेस्सर, इ सबइ दुस्सन कब तलक हमार हँसी उड़इही ?

का तू एँन दुस्सनन क तोहरे नाउँ क अपमान सदा सदा ही करइ देब्या ?

११ हे परमेस्सर, तू आपन सक्ति क काहे रोके रखा ह अउर तू हस्तछेप काहे नाही करत ह ।

ओन लोगन क नास करइ बरे कारवाई करा ।

१२ हे परमेस्सर, बहोत दिनन स तू ही हमार सासक रह्या ।

इ देस मँ तू हम लोगन क अनेक जुद्ध मँ विजय दिहा ।

१३ हे परमेस्सर, तू आपन महासक्ति स लाल सागर क दुइ हींसा कइ दिहा ।

तू विसाल काय क दानवन क मूड़न समुद्र मँ चूर-चूर कइ दिहा ।

१४ तू लिब्यातान क मूँड़न कुचर दिहा,

अउर ओकरे बदन क जंगली जनावरन क खाइ बरे लोकाइ दिहा ।

१५ तू नदी, झरनन रच्या, चटान फोड़िके पानी बहाया ।

तू सदा बहइ वाली नदियन क झुराइ दिहा ।

१६ हे परमेस्सर, तू दिन क सासक अहा, अउ राति क भी सासक तू ही अहा ।

तू ही चाँद अउ सूरज क बनाया ।

१७ तू समुचइ धरती पइ सब बरे चउहदी बाँधत अहा ।

तू ही गर्मी अउ सर्दी क बनाया ।

१८ हे यहोवा, इ बातन क सुमिर ल्या ।

अउर याद करा कि दुस्सन तोहार मजाक उड़ाएस ह ।

उ सबइ मूर्ख लोग तोहरे नाउँ क अपमान किहेन ह ।

१९ ओन जंगली जनावरन क आपन फारवता क जिन लेइ द्या ।

आपन दीन जनन क तू हमेसा जिन बिसरा ।

२० हम आपुस मँ जउन करार कीन्ह ह ओका याद करा,

**७४ :४ बिसेस चिन्ह इ सबइ सम्भवतः आगियन संकेत रहेन जेका लोग एक सहर स दूसर मँ संदेस पठवइ क विधि क रूप मँ जलाएन । जुद्ध मँ इ एक विधि रही जउन लोग दूसर सहरन क दिखाएन कि ओनकर सहरन क अब तलक बर्बाद नाही कीन्ह गवा रहेन ।

इ देस मैं हर कउनो अँधियारे ठउरे पइ हिंसा अहइ।

११ हे परमेस्सर, तोहरे लोगन क संग अत्याचार झेलइ क रहा,
ओनका अउर अधिक सतावा अउ दुःख दीन्ह जाइ जिन द्या।

तोहार असहाय जन, तोहार गुण गावईं।

२२ हे परमेस्सर, उठा अउर बदला ल्या।
याद करा कि ओन मूरख लोग सदा ही तोहार अपमान किहेन ह।

२३ उ सबइ बुरी बातन जिन बिसरा जेनका तोहार दुस्मनन हर रोज तोहरे बरे कहेन।

जिन बिसरा कि उ पचे तोहार खिलाफ लगातार चिचियाएन जब उ पचे तोहार खिलाफ जुद्ध करत रहेन।

“नास जिन करा” नाउँ क धुन पइ संगीत निर्देसक बरे आसाफ क भजन।

७५ १ हे परमेस्सर, हम तोहार बड़कई करत अही।

हम तोहार बड़कई करत अही काहेकि तोहार मौजूदगी निअरे अहइ।

अउर लोग तोहरे ओन अदभुत करमन क जेनका तू करत अहा, बयान करत हीं।

२ परमेस्सर कहत ह, “मईं निआउ क समइ चुन लिहेउँ,

मईं निस्पच्छ होइके निआउ करब।

३ धरती अउ धरती क हर वस्तु डगमगाइ सकत ह अउर गिरइ क तइयार होइ सकत ह,

किन्तु मईं ही ओका स्थिर राखत हउँ।

४ “कछू लोग बहोत ही धमण्डी होत हीं।

उ पचे सोचत रहत हीं कि उ पचे बहोत मजबूत अउ महत्वपूर्ण बाटेन।

मुला मईं उनसे कहत हउँ, ‘धमण्डी जिन बना !

अइसा बिउहार जिन करा कि तू बहोत मजबूत अउ महत्वपूर्ण अहइ।

५ अइसा जिन दिखावा कि तू बहोत सक्तीसाली अहइ

अउर अहंकारी जिन बना।”

६ इ फुरइ अहइ कि कउनो भी मनई

धरती पइ नीच क महान नाहीं बनाइ सकत।

७ परमेस्सर सासक ह।

परमेस्सर ँकर फैसला करत ह कि कउन मनई महान होइ।

परमेस्सर ही कउनो मनई क महत्व स भरा पद पइ बइटावत ह।

अउर कउनो क महत्वहीन पद पइ उहइ बइटावत ह।

८ परमेस्सर क पिआला मिलावटी मधु स भरा बाटइ।

परमेस्सर दण्ड क इ दाखरस क उड़ेरत ह।

अउर दुट्ट जन ओका

आखिरी बूँद तलक पिअत हीं।

९ मईं इ बातन क घोसना करब जउन परमेस्सर सदा बरे करत ह।

मईं इस्राएल क परमेस्सर क महिमा क गुण गाउब।

१० परमेस्सर कहत ह, “मईं दुट्ट लोगन क सक्ती क हटाइ देब।

किन्तु सबइ नीक लोगन क सम्मान सक्ती स कीन्ह जाइ।”

संगीत निर्देसक बरे आसाफ क एक ठु भजन, तार वादन क जरिये गवा भवा एक ठु गीत।

७६ १ यहूदा क लोग परमेस्सर क जानत हीं।
इस्राएल जानत ह कि फुरइ परमेस्सर क नाउँ बड़का अहइ।

२ परमेस्सर क मन्दिर सालेम मैं बना अहइ।

परमेस्सर क घर सिय्योन क पहाड़े पइ अहइ।

३ उ जगह पइ परमेस्सर भारत भवा बाणन, ढालन, तरवारन

अउ जुद्ध क दूसर सस्त्रन क तोड़ दिहस। (सेला)

४ हे परमेस्सर, तू प्रकास क संग चमकत ह।

तू जंगली पहाड़रन स जियादा प्रताप वाला अहइ।

५ ओन सिपाहियन सोचेन कि उ पचे बरिआर अहइं।

मुला उ पचे अब रणछेत्रन मैं मरा पड़ा अहइं।

ओनकर ल्हासन क लूट लीन्ह ग ह अउर नंगा पड़ा अहइं।

ओन बलवान सिपाहियन मैं कउनो अइसा नाहीं रहा, जउन खुद आपन क रच्छा कइ पावत।

६ याकूब क परमेस्सर ओन फउजियन पइ फटकारेस।

अउ उ फउज रथन अउर घोड़न सहित असहा मर गइ।

७ हे परमेस्सर, तू अदभुत अहा।

जब तू कोहाइ जात ह तोहरे समन्वा कउनो मनई टिक नाहीं सकत।

८ जब परमेस्सर सरग स निआउ किहस तउ सारी धरती डर स काँप गइ।

९ जब परमेस्सर निआवाधीस क रूप मैं

धरती क विनम्र लोगन क बचावइ बरे करवाई
किहस तब इ भवा ।

१० हे परमेस्सर, लोगन क उ समइ भी तोहार स्तुति
करइ चाही जब उ पचे किरोध मैं होइ ।
जब उ पचे किरोध करइ बंद कइ देई तउ उ पचे
बरिआर होइ जाई ।

११ योहवा आपन परमेस्सर क संग वाचा करा
अउर जउन वाचा किहा ओका पूरा करा ।
लोग हर कउनो ठउर स लोग परमेस्सर क भेंट
लिअइही

जउन सम्मान क जोग्य अहई ।
१२ परमेस्सर महान नेतन क डरावत ह ।
धरती क सबहिं सासक लोग ओकर रुतबा माना ।

“यदूतन” राग पइ संगीत
निर्देसक बरे आसाफ क भजन ।

१ मई मदद पावइ बरे परमेस्सर क
गोहराउब ।

मई परमेस्सर क गोहराउब अउर उ मोका सुनी ।
२ जब मई दुःख मैं रहेउं तउ मई यहोवा क सरण
मैं आवा ।

मई सारी रात तोह तलक पहोंचइ जूझा हउं ।
मई एका नाही छोड़ा अउर आराम तलक नाही
किहेउं ।

३ मई परमेस्सर क याद करत हउं किन्तु मई बेचेन
हउं ।

अउर ओका बतावा कि मई कइसा अनुभव करत
हउं ।

किन्तु फुन भी मई अइसा नाही कइ सकत हउं ।
मई बालन चाहता रहेउं, किन्तु मई बहोत उदास
रहेउं । (सेला)

४ तू मोका सोवइ नाही दिहा ।
मई उदास रहेउं, एँह बरे मई कछू नाही कह सकत
हउं ।

५ मई अतीत क बातन बरे सोचेउं ।
बहोत दिना पहिले जउन बातन घटी भइ रहिन
ओन घटनन क बारे मैं मई सोचेउं ।

६ राति मैं, मई आपन गीतन क बारे मैं सोचा करत
रहेउं ।

मई आपन आप स बातन किहेउं ।
मई समुझइ बरे जतन किहेउं ।

७ मोका इ हैरानी अहइ कि “का मोर सुआमी मोका
सदा बरे तजि दिहे अहइ ?

का उ हमका फुन नाही चाही ?

८ का परमेस्सर क पिरिम हमेसा बरे खतम होइ गवा
अहा ?

का उ मोहे स फिन कबहुँ बात नाही करी ?

९ का परमेस्सर दाया दिखावइ भूल गवा ह ?

का ओकर करुणा किरोध में बदल गइ बाटइ ?”

१० मई फुन इ सोचा करत हउं, “उ सोच जउन मोका
दर्द देत अहइ :

‘का सर्वोच्च परमेस्सर आपन निज सक्ति दिखावइ
बन्द कइ दिहस ह ?”

११ सक्ति भरा उ काम जेनका यहोवा किहस ह
ओका याद रखा ।

हाँ उ कामन जेनका तू पहिले किहा ह मोका याद
बाटइ ।

१२ मई ओन सबहिं कामन क जेनका तू किहा ह
सोचे हउं ।

जेन कामन क तू किहा मई धियान देत हउं ।

१३ हे परमेस्सर, तोहार निवास स्थान पवित्र
अहइ ।

कउनो भी अइसा महान नाही अहइ जइसा तू
अहा ।

१४ तू ही उ परमेस्सर अहा जउन अद्भुत काम
किहा ।

तू रास्टरन क आपन निज महासक्ति देखाँया ।

१५ तू आपन सक्ति क प्रयोग किहा अउर आपन
लोगन क बचाइ लिहा ।

तू याकूब अउ यूसुफ क संतानन क बचाइ लिहा ।

१६ हे परमेस्सर, सागर तोहका लखेस अउर जब उ
तोहका लखेस तउ डेराइ गवा ।

गहिर समुदर डर स थर-थर काँप उठा ।

१७ घनघोर बादरन स ओनकर पानी छूट पड़ा रहा ।

ऊँच बादरन स जोर क गर्जब लोग सुनेन ।

फुन ओन बादरन स बिजुरी क तोहार बाण नीचे
चलेन ।

१८ तोहार बिजुरी क गर्जन आंधी भरे हवा मैं फुन
गर्जेस,

तोहार बिजुरी चमचमात भवा जगत पइ चमक
उठी ।

धरती हिल गइ अउर थर-थर काँपि गइ ।

१९ हे परमेस्सर, तू गहिर समुदर मैं पैदर चल्या ।

तू चलिके ही सागर पार किहा ।

मुला तू कउनो पद चीन्हा नाही छोड़या ।

२० तू मूसा अउ हारून क उपयोग

आपन मनवइयन क अगुआई भेड़िन क झुण्ड क
नाई करइ मैं किहा ।

आसाफ क एक कलात्मक ।

१ मोर मनवइयो, तू पचे मोरे उपदेसन क
७८ सुना ।

ओन बातन पइ कान द्या जेनका मई बतावत हउँ ।
 २ मई तू पचन्क इ कथा सुनाउब ।
 मई तू पचन्क पुरान कथा सुनाउब ।
 ३ हम पचे इ कहानी सुना ह, अउर एँका अच्छी
 तरह जानित ह ।
 हम लोगन क पुरखन इ कहानी कहेन ह ।
 ४ हम लोग एँन बातन क आपन सन्तानन स नाही
 छुपाउब ।
 हम लोग एँन बातन क आपन अगवा पीढ़ी क
 बताउब ।
 हम लोग ओनसे यहोवा क सक्ति अउर ओकरे
 अद्भुत कामन क बारे मँ बताउब ।
 हम पचे ओनका ओन कामन बरे जेनका उ किहस
 ह बखान करब ।
 ५ यहोवा याकूब स वाचा किहस ।
 परमेस्सर इस्राएल क व्यवस्था क विधान दिहस,
 अउर हमारा परमेस्सर हमरे पुरखन क हुकूम दिहन ।
 उ हमरे पुरखन क व्यवस्था क विधान आपन
 संतानन क सिखावइ क किहेस ।
 ६ इ तरह अगवा पीढ़ी एँन बातन क बरे मँ जानिहीं ।
 अउर हर एक पीढ़ी मँ गदेलन पइदा होइ अउर
 बढीइ अउर फुन उ पचे इ कहानी क आपन
 गदेलन क बतइहीं ।
 ७ एँह बरे उ सबहिं लोग यहोवा पइ भरोसा
 करिहीं ।
 उ पचे ओन सक्ति स भरा कामन क नाही
 बिसरिहीं ।
 जेन्का परमेस्सर किहे रहा ।
 उ पचे धियान स रखवारी करिहीं अउर परमेस्सर
 क हुकूम क मनिहीं,
 ८ एह बरे उ पचे आपन पुरखन क नाई नाही होइ ।
 ओनकर पुरखन परमेस्सर क अनसुनी किहे रहेन
 अउर ओकर अनुसरण करइ स इन्कार किहे रहेन
 उ पचे हठी रहेन ।
 उ पचे बिस्सासी होइ क परमेस्सर क अनुसरण
 नाही किहेन ।
 ९ ओन मुडी भइ कमान की तरह जेका उ पचे लइ
 रहेन
 एप्रैम क लोग जुद्ध स पीठ दिखाइ गए ।
 १० उ पचे ओन करार क नाही मानेन जउन उ पचे
 यहोवा स किहे रहेन ।
 उ पचे उ नाही किहे जउन उ ओन लोगन क करइ
 क हुकूम दिहे रहा ।
 ११ एप्रैम क उ सबइ लोग ओन बड़की बातन क
 बिसरि गएन जेनका परमेस्सर किहे रहा ।

उ पचे ओन अद्भुत बातन क बिसरि गएन जेनका
 उ ओनका देखाँए रहा ।
 १२ परमेस्सर ओनकर पुरखन क
 मिस्र क भुइयाँ सोअन मँ निज महासक्ति
 देखाँइस ।
 १३ परमेस्सर लाल सागर क चीरिके दुइ भाग कइके
 लोगन क पार उतार दिहस ।
 उ पानी क मजबूत देवार क तरह दुइनउँ कइती
 खड़ा कइ दिहस रहा ।
 १४ परमेस्सर ओन लोगन क दिन क समइ मँ महा
 बादर स अगुवाई किहस ।
 अउर रात क समइ मँ चमकत भवा आगी स राह
 देखाँएस ।
 १५ उ चट्टान क फारेस अउर पानी तेजी स बाहर
 निकर आवा
 वइसे ही जइसे झड़ना स निकरत ह ।
 १६ परमेस्सर चट्टान स पानी क धारा
 नदी क नाई निकारे रहा ।
 १७ मुला लोग रेगिस्तान मँ सर्वोच्च परमेस्सर क
 खिलाफ
 पाप करत जारी रखे रहेन ।
 १८ फिन ओन लोग परमेस्सर क परखइ क पक्का
 इरादा किहन ।
 उ पचे बस आपन भूख मिटावइ बरे परमेस्सर स
 खइया क माँगेन ।
 १९ परमेस्सर क खिलाफ उ पचे बतियाइ लागेन, उ
 पचे कहइ लागेन,
 “का रेगिस्ताने मँ परमेस्सर हमका खाइ क दइ
 सकत ह ?
 २० लोगन ने कहा, जब परमेस्सर चट्टाने पइ चोट
 किहस तउ पानी क एक टु रेला फूटि पड़ा ।
 किन्तु का उ हमका कछू रोटी अउ गोस भी दइ
 सकत ह ?”
 २१ जब यहोवा इ सुनि लिहस जउन लोग कहे रहेन
 तउ ओकर किरोध इस्राएल क रास्ट्र
 याकूब क खिलाफ भइक गवा ।
 २२ काहेकि लोग ओह पइ भरोसा नाही रखे रहेन,
 ओनका भरोसा नाही रहा,
 कि परमेस्सर ओनका बचाइ सकत ह ।
 २३-२४ तब भी परमेस्सर ओन पइ बादर क खोल
 दिहस ।
 ओनका खाइ बरे खाले मन्ना बरसाइ दिहस ।
 इ ठीक वइसेन ही भवा जइसे कि उ अकासे क
 दुआर खोल दिहस ह
 अउर ओनसे अनाज बाहेर उड़ेर दिहस ह ।

२५ लोग उ भोजन खाएन अउर उ पचे बहोत ताकतवर होइ गएन।

परमेस्सर ओन लोगन क तृप्त करइ बरे भर पूर भोजन पटाएस।

२६ फिन परमेस्सर पूरब स तेज हवा चलाएस अउर ओन लोगन बरे बटेर क बर्खा बरसात क नाई बरसाएस।

२७ परमेस्सर क महासक्ति तैमान कइँती स एक ठु आँधी उटाएस अउर नीला अकास करिआ होइ गवा काहेकि हुवाँ अनगिनत पंछी छाड़ ग रहेन।

२८ उ सबइ पंछी क ठीक ओनकर डेरे क बीच मँ खेमन क चारिहुँ कइँती गिरा दिहे रहेन।

२९ ओनके लगे खाइ बरे भरपूर भोजन रहा। उ ओनका उहइ दिहस जउन उ पचन्क इच्छा रहेन।

३० उ पचे उ भोजन अबहुँ तलक खाइ क खतम नाही किहे रहेन जेन्का इच्छा उ पचन्क रहेन अउर गोस अबहुँ तलक ओनकर मुँह मँ ही रहेन।

३१ तउ ओन लोगन पइ परमेस्सर बहोत कोहाइ गवा अउर ओनमाँ स सबन्क नीक क मारि दिहस।

उ बरिआर जवानन क मउत दइ दिहस।

३२ फिन भी लोग पाप करत जारी राखे रहेन! उ पचे परमेस्सर क अद्भुत करमन पइ भरोसे नाही किहेन।

३३ तउ परमेस्सर ओनकर जिन्नगी क वियथाँ मँ अउर बरिसन क डर मँ खतम किहस।

३४ जब कबहुँ परमेस्सर ओनमाँ स कउनो क मारेस ओनमाँ स बाकी लोग परमेस्सर कइँती लउटि गएन।

३५ उ सबइ लोग याद किहेन कि परमेस्सर ओनकर चट्टान रहत रहा।

उ पचे याद किहेन कि परमेस्सर ओनकर मदद किहे रहा।

३६ किन्तु ओकर पाछे उ पचे अइस किहेन जइसे उ पचे ओन पइ बिस्सास करत हीं, किन्तु असल मँ उ पचे झूट बोले रहेन।

उ पचे ओकर बिस्सासी नाही रहेन।

३७ उ पचे फुरइ मनवा स यहोवा क संग नाही रहेन।

उ पचे आपन करार बरे सच्चा नाही रहेन।

३८ मुला परमेस्सर करुणा स भरा नाही रहा।

उ ओनकइ पापन बरे छिमा किहस, अउर उ ओनकर विनास नाही किहस।

परमेस्सर अनेक अवसरन पइ आपन किरोध रोकेस।

परमेस्सर आपन क बहोत किरोधी नाही होइ दिहस।

३९ परमेस्सर क याद रहा कि उ पचे सिरिफ मानव जात अहई।

लोग सिरिफ हवा जइसे अहई जउन बहिहे चली जात ह अउर कबहुँ नाही लउटत ह।

४० हाय, उ पचे सबइ मरुभूमि मँ परमेस्सर क खिलाफ विद्रोह किहेन ह।

उ पचे मरुभूमि मँ ओका बहोत दुःखी किहे रहेन।

४१ उ पचे लगातार परमेस्सर पइ सक किहेन

अउर इस्राएल क पवित्र क चोट पहुँचाएन।

४२ उ सबइ लोग परमेस्सर क सक्ती क बिसरि गएन।

उ सबइ लोग बिसरि गएन कि परमेस्सर ओनका दुस्मन स कइसे बचाए रहा।

४३ उ सबइ लोग ओन अद्भुत बातन क बिसरि गएन जउन कि उ मिस्र क सोआन मँ किहे रहा

अउर ओन चमत्कारन क बिसरि गएन जउन उ उस भुइयाँ मँ किहे रहा।

४४ उ ओनकर नदियन क रक्त मँ बदल दिहे रहा। मिस्र क लोग आपन नदी-नाला स पानी पी नाही सकत रहेन।

४५ परमेस्सर भिड़न क झुण्ड पटाए रहा जउन मिस्र क मनइयन क काटेन।

परमेस्सर ओन मेघन क पटाएस जउन ओन लोगन क भुइयाँ क नास कइ दिहन।

४६ उ ओनकर फसलन क जेकर बरे उ पचे बहोत सखत मेहनत किहे रहेन

टिड्डन अउर झिंगुरन क दइ दिहस।

४७ उ मिसिरयन क अंगूरे क बगिया ओलन स बर्बाद किहस,

अउर ओनकर गोलर क वृच्छन क पाला स बर्बाद कइ दिहस।

४८ उ ओनकर जनावरन क ओलन स मारि दिहस अउ बिजुरी गिराइके मवेशियन क बर्बाद कइ दिहस।

४९ उ मिस्री लोगन क खिलाफ आपन प्रचण्ड किरोध अउर फटकार देखाँएस, अउर ओन लोगन पइ मुसीबत लिआएस।

उ आपन विनास क दूत ओन लोगन क खिलाफ पटाएस।

५० उ किरोध परगट करइ बरे एक राह पाएस।

उ ओन लोगन क मउत स नाही बचाएस।

उ ओनकर गोरुअन क बेरामी स मरि जाइ दिहस ।
 ५१ परमेस्सर मिस्र क हर पहिलउटी पूत क मार
 डाएस ।
 हाम क घराने क हर पहिलउटी पूत क उ मार
 डाएस ।
 ५२ फिन उ इस्राएल क चरवाहा क नाई अगुवाई
 किहस ।
 उ ओन लोगन क भेड़न क झुण्ड क नाई रेगिस्तान
 स होत भए निकारेस ।
 ५३ उ आपन निज लोगन क सुरच्छा क संग लइ
 चला ।
 परमेस्सर क भगतन क कउनो स डर नाही रहा ।
 परमेस्सर ओनकर दुस्मनन क लाल सागर मँ
 डुवाएस ।
 ५४ परमेस्सर आपन मनवइयन क आपन पवित्तर
 भुइँया पइ लइ आवा ।
 उ ओनका उ पहाड़े पइ लिआवा जउन उ आपन
 सक्ति स पाएस ।
 ५५ परमेस्सर दूसर जातियन क उ भुइँया तजइ क
 मजबूर किहस ।
 परमेस्सर हर एक परिवारन क उ भुइँया मँ ओनकर
 खुदकास्त क हींसा दिहस ।
 इ तरह इस्राएल क परिवारन आपन ही घरन मँ
 बस गएन ।
 ५६ उ पचे लगातार सर्वोच्च परमेस्सर पइ सक
 किहेन अउर ओकर खिलाफ विद्रोह किहेन
 उ सबइ लोग परमेस्सर क आग्या क नाही मानेन ।
 ५७ इस्राएल क लोग परमेस्सर स भटकिके विमुख
 होइ ग रहेन ।
 उ सबइ आपन पुरखन क नाई परमेस्सर क
 अबिस्सासी रहेन ।
 उ पचे मुड़ा भवा धनुस ^{††}क जइसे होइ गवा रहेन ।
 ५८ इस्राएल क लोग ऊँच पूजा क ठउरन बनाएन
 अउर परमेस्सर क कोहाइ दिहन ।
 उ पचे मूर्तियन गढ़ेन जउन परमेस्सर क किरोधित
 बनाएन ।
 ५९ परमेस्सर इ सुनेस अउर बहोत कोहाइ गवा ।
 उ इस्राएल क पूरी तरह रद कइ दिहस ।

६० परमेस्सर सिलोह क पवित्तर तम्बू क तजि
 दिहस ।
 जहाँ उ लोगन क बीच निवास करत रहा ।
 ६१ फिन उ दूसर रास्ट्रन क, करार क संदूख क
 कब्जा करइ क दिहस ।
 दुस्मन ओकर महिमा क संकेत क लइ लिहस ।
 ६२ उ आपन ही लोगन पइ आपन किरोध परगट
 किहस ।
 उ ओनका जुद्ध मँ मार दिहस ।
 ६३ ओनकर जवान मनइयन आगी मँ जरिके नास
 होइ गएन ।
 अउर ओकर जवान कुआँरी लइकियन कबहुँ
 आपन बियाह गीत नाही सुनि पाएन ।
 ६४ याजक मार डावा गएन
 मुला ओनकर राँड मेहरारूअन ओनके बरे नाही
 रोइ सकेन ।
 ६५ आखिर मँ यहोवा उठ बइटा
 जइसे कउनो नींदे स जागिके उठी बइठत होइ ।
 या कउनो जोद्धा क नाई जउन कि दाखरस क नसा
 स होस मँ आवा होइ ।
 ६६ फुन तउ उ आपन दुस्मनन क मारिके भगाइ
 दिहस अउर ओनका हराइ दिहस ।
 उ आपन दुस्मनन क हराइ दिहस अउर सदा बरे
 ओनका अपमानित किहस ।
 ६७ मुला परमेस्सर यूसुफ क तम्बू ^{##}क रद कइ
 दिहस ।
 उ इब्राहीम परिवार क नाही चुनेस ।
 ६८ परमेस्सर यहूदा क पिरवार क चुनेस
 अउर उ सिय्योन क पहाइ क चुनेस जउन ओका
 पियारा अहइ ।
 ६९ उ ऊँचे पहाड़न नाई अउर धरती क नाई जेका
 उ सदा बरे स्थापित किहस ह
 आपन पवित्तर मन्दिर क सुरच्छित बनाएस ।
 ७० परमेस्सर दाऊद क आपन विसेस सेवक बनावइ
 मँ चुनेस ।
 दाऊद तउ भेड़िन क देखेख करत रहा, मुला
 परमेस्सर ओका उ काम स लइ आवा ।
 ७१ उ दाऊद क भेड़िन क रखवाली स लइ आवा ।

††७८:५७ मुड़ा भवा धनुस पच्छियन क सिकार बरे प्रयोग मँ लावइ जाइ वाला एक धनुस । जेका जदि सीधे फेका जाइ तउ उ सीधे ऊपर स नीचे धरती क ओर जात ह फुन अचानक हवा मँ ऊपर उठत ह अउर फिर कबहुँ फेकइ वालन कइती ही वापस लौट आवत ह । मुलार्थ एका “लोकावइ वाला धनुस” या “आखियन क धोका देइ वाला धनुस” भी कहा जात ह ।

##७८:६७ तम्बू इ सम्भवतः सीलोह क पवित्तर तम्बू अहइ, किन्तु एका अर्थ यूसुफ क परिवार होइ सकत ह जउन कि एप्रैम अउर मनस्से क परिवार समूह अहइ ।

तउ उ ओका आपन लोगन याकूब क सन्तानन,
इस्राएल ॥१॥क रखवाली क काम बरे बहाल
किहा।

७२ तउ फिन दाऊद पुरे मन स ओन लोगन क देख-
भाल किहस।

उ ओनका पूरी बुद्धिमानी स राह देखँएस।

आसाफ क एक ठु गीत।

७९ १हे परमेस्सर, विदेसी लोग तोहरे
सेवकन क संग लड़इ बरे आवा अहई।
उ मनइयन तोहरे पवित्तर मन्दिर क बर्बाद किहन,
अउ यरूसलेम क उ पचे खण्डहर बनाइ दिहन।

२ तोहरे चेलन क ल्हासन क उ पचे जंगली पंछी क
खाइ बरे डाइ दिहन।

तोहरे मनवइयन क ल्हासन क उ पचे जनावरन क
खाइ बरे डाइ दिहन।

३ ओन लोगन तोहार लोगन क रक्त पानी जइसा
यरूसलेम क चारिहुँ कइँती फइलाएन।

ओनकर ल्हासन क दफनावइ क कउनो भी नाही
बचा।

४ हमार पड़ोसी देस हमका अपमानित किहन ह।
हमरे आस पास क लोग सबहिँ हँसत हीँ, अउर
हमार मसखरी उडावत हीँ।

५ हे यहोवा कब तलक अइसा रहब्या, का तू सदा
क बरे हम पइ कोहान रहब्या ?

का तोहार किरोध आगी क तरह धधकत रही ?

६ आपन किरोध क ओन रास्ट्रन क विरोध मैं
जउन तोहका नाही पहिचानतेन मोड़ द्या
आपन किरोध क ओन रास्ट्रन क खिलाफ मोड़
द्या जउन तोहरे नाउँ क मदद बरे नाही
पुकारतेन।

७ काहेकि उ सबइ रास्ट्र याकूब क नास किहन।

उ पचे याकूब क देस क नास किहन।

८ तू हमरे पुरखन क पापन बरे कृपा कइके हमका
सजा जिन द्या।

हाली करा, तू हम पइ निज करुणा हाली देखँवा
काहेकि हम पचन्क बहोत अपमानित बाटइ।

९ मोर परमेस्सर, मोर उद्धारकर्ता, हमका सहारा
द्या।

आपन ही नाउँ क महिमा बरे हमार मदद करा।

हमका बचाइ ल्या।

निज नाउँ क महिमा क खातिर हम लोगन क पाप
क प्रायश्चित्त करा।

१० दूसर रास्ट्रन क लोगन क तू इ जिन कहइ द्या,

“ओनकर परमेस्सर कहाँ बाटइ ? का उ ओनका
सहारा नाही दइ सकत ह ?”

हे परमेस्सर, ओन लोगन क दण्ड द्या ताकि उ सजा
क हम भी लखि सकी।

ओन लोगन क तोहरे सेवकन क मारइ क सजा
द्या।

११ जेलि मैं बंद भए लोगन क कराहब कृपा कइके
सुना।

हे परमेस्सर, तू निज महासक्ती प्रयोग मैं
लिआवा अउर ओन लोगन क बचाइ ल्या
जेनका मरइ बरे ही चुना गवा ह।

१२ हे यहोवा हमरे आस-पास क रास्ट्रन क सात
गुना सजा द्या

काहेकि उ पचे तोहका अपमानित किहेन ह।

१३ हम तउ तोहार लोग अही, हम तोहरे झुण्ड भेड़ी
अही जेका तू पालत ह।

हम तोहार गुनगान सदा करब।

हे परमेस्सर हम सदा तोहार महिमा क बारे मैं
बताउब।

करार क कुमुदिनी धुन पइ संगीत निर्देसक
बरे आसाफ क एक ठु स्तुति गीत।

८० १हे इस्राएल क चरवाहा, तू हमार सुनि
ल्या।

तू जउन यूसुफ क लोगन क अगुवाई करत ह।

तू जउन राजा क तरह करूब सरगदूत पइ विराजत
अहा।

तू आपन आप क परगट करा।

२ एप्रेम, बिन्यामीन अउ मनस्से क सामने तू
आपन महिमा देखावा,

अउर आपन सक्ति स हमका बचाइ ल्या।

३ हे परमेस्सर, हमका आपन बरे पुनः स्थापित कइ
ल्या।

तू हम लोगन पइ कृपा करा ताकि हम लोग बच
सकी।

४ हे सर्वसक्तिमान परमेस्सर यहोवा, कब तलक तू
कोहान रहब्या

अउर कब तलक तू हमरी परायना क रद्द करब्या।

५ आपन मनवइयन क तू बस खाइ क आँसू दिहा
ह।

तू आपन मनवइयन क पिअइ बरे आँसुअन स
लबालब पिआला दिहा।

६ तू हम लोगन क कूछ अइसा बिसय बनइ दिहा
जउने पइ हमार पड़ोसियन झगड़त हीं।

हमार दुस्मन हम लोगन क मसखरी उड़ावत हीं ।
 ७ हे परमेस्सर तू हम लोगन क आपन बरे
 पुनःस्थापित कइ ल्या ।
 तू हम लोगन पइ कृपा करा ताकि हम बच सकी ।
 ८ पुराने जमाना में, तू हमका एक टु बहोत
 महत्वपूर्ण पउधा सा समुझया ।
 तू आपन दाखलता मिस्र स बाहेर लिआया ।
 तू दूसर लोगन क इ धरती तजि देइ क मजबूर
 किहा
 अउर हिआँ तू आपन खुद क दाखलता रोप दिहा ।
 ९ तू दाखलता रोपइ क धरती तइयार किहा,
 ओकरी जड़न क पक्की करइ बरे तू सहारा
 दिहा
 अउर फिन हाली ही दाखलता धरती पइ हर कइँती
 फइल गइ ।
 १० इ आपन छाया स पहाड़न क ढाँपि लिहा
 हिआँ तलक कि ओकर पात बड़का देवदार वृच्छ
 क भी ढाँकि लिहस ।
 ११ एँकर दाखलता भूमध्य सागर तलक फइलि
 गइन ।
 एँकर जड़ परात नदी तलक फइला गइ ।
 १२ हे परमेस्सर, तू उ सबइ देवार काहे गिराइ दिहा,
 जउन तोहरी दाखलता क रच्छा करत रही ।
 अब उ हर कउनो जउन हुवाँ स गुजरत ह, हुवाँ स
 अंगूर क तोड़ लेत हीं ।
 १३ बनैला सुअरन आवत हीं, अउर तोहार दाखलता
 क रौंदन भए गुजर जात हीं ।
 जंगली जनावर आवत हीं, अउर ओकर पातिन चर
 जात हीं ।
 १४ हे सर्वसक्तीमान परमेस्सर, वापिस आवा ।
 फुन स आपन दाखलता पइ सरगे स खाले लखा,
 अउर एकर रच्छा करा ।
 १५ हे परमेस्सर, आपन उ जड़ क लखा, जेका तू खूद
 आपन हाथे स रोपे रह्या ।
 इ नान्ह पौधन क लखा जेका तू बढ़ाया ह ।
 १६ तोहार दाखलता गोबर क उपलन जइसा आगी
 में जरावा गवा ।
 तोहरे डाँट फटकारन क कारण एकर लता नास होइ
 गवा ।
 १७ हे परमेस्सर, तू आपन हाथ उ मनई पइ धरा
 जउन तोहरे दाहिन कइँती अहइ ।
 उ मनई १११ पइ आपन हथवा धरा जेका तू खुद
 पाल्या ।
 १८ तउ मई तोहका नाहीं तजब ।

तू हम पचन क नवा जिन्नगी द्या ताकि हम लोग
 तोहार आराधना करइ सकब ।
 ११ सर्वसक्तीमान यहोवा परमेस्सर, तू आपन बरे
 पुनःस्थापित कइ ल्या ।
 तू हम लोगन पइ कृपा करा ताकि हम पचे जी
 सकी ।

संगीत निर्देशक बरे आसाफ क एक टु गीत
 गित्तीथ वाद्य यंत्र क संग गावा भवा ।

८१ १ परमेस्सर जउन हमार सक्ति अहइ ओकरे
 बरे आनन्द क गीत गावा ।
 याकूब क परमेस्सर क जय जयकार करा ।
 २ संगीत सुरू करा ।
 तम्बूरा बजावा ।
 वीणा सारंगी स मधुर धुन निकारा ।
 ३ नवा चंदा क समय में तू पचे नरसिंहा फूँका ।
 पूर्णमासी क अवसर पइ तू पचे हम लोगन क
 त्यौहार क दिन में नरसिंहा फूँका ।
 ४ इस्राएल क लोगन क बरे अइसा ही नेम अहइ ।
 इ आदेस परमेस्सर याकूब क दिहस ह ।
 ५ परमेस्सर यूसुफ क संग एक करार तब किहे रहा
 जब उ मिस्र गवा रहा
 जहाँ उ उ रास्टर क भाखा नाहीं जानेस रहेन ।
 ६ परमेस्सर कहत ह, “तोहरे काँधे क बोझा मई लइ
 लिहेउँ ह ।
 ओकर हाथन में मजदूर क टोपा में स छुरावा
 गवा ।
 ७ जब तू मुसीबत में रह्या तू मदद क गोहार
 लगाया अउर मई तोहका बचाएउँ ।
 मई तूफानी बदरन में छुपा रहेउँ अउर मई तू
 पचन्क जवाब दिहेउँ ।
 मई तू पचन्क मरिबा क जल क लगे परखेउँ ।”
 ८ “अरे मोर मनइयो, तू पचे मोर बात सुना ।
 अउर मई तू पचन्क चेताउनी देब ।
 इस्राएल, तू मोका सुन्या ।
 ९ तू कउनो कउनो बिदेसी देवता क पूजा जिन
 करा ।
 कउनो बिदेसी लोगन क देवता क समन्वा आपन
 मुँडि जिन झुकावा ।
 १० मई, यहोवा तोहार परमेस्सर हउँ ।
 मई उहइ परमेस्सर हउँ
 जउन तू पचन्क मिस्र स बाहेर लिआए रहेउँ ।
 तू आपन मुँहना खोला, मई ओका भर देब ।
 ११ “मुला मोर मनइयन मोर नाहीं सुनेन ।

इस्राएल मोर आग्या नाही मानेस ।

१२ एह बरे मई ओनका ओकरे हठी जिद् पइ छोर दिहेउँ ।

इस्राएली लोग उहइ चिजियन क किहेन जेका उ उत्तम समझेन ।

१३ भला होत इस्राएल क लोग मोर बात सुन लेतेन,

अउर उ लोग वइसी ही जिन्नगी जिअतेन जइसा मई ओहसे चाहत रहेउँ ।

१४ तब मई इस्राएल क दुस्मनन क हाली हराइ देतेउँ ।

अउर मई ओन लोगन क सजा देतेउँ जउन इस्राएल क दुःख देतेन ।

१५ तब यहोवा क दुस्मन डर स थर-थर काँपत हीं । अउर उ पचे सदा सर्वदा सजा पइहीं ।

१६ परमेस्सर आपन चेलन क उत्तम गोहूँ देइ । चट्टान ओनका सम्पूर्ण तृप्त होइ तलक सहद देव ।”

आसाफ क एक ठु गीत ।

८२ १ परमेस्सर देवन क सभा *क बीच निआवाधीस क रूप मैं विराजत ह । सरगदूत क बीच उ निआव करत ह ।

२ परमेस्सर कहत ह, “कब तलक तू लोग अनिआव स भरा निआव करब्या ?

कब तलक तू लोग दुराचारी लोगन क खास सामर्थ दिखावा ?

३ “अनाथन अउ कमजोर लोगन क रच्छा करा । जेनका संग उचित बेउहार नाही कीन्ह गवा ह ।

अउर दीन लोगन क अधिकारन क रच्छा करा ।

४ गरीब अउ बेसहारा लोगन क बचावा ।

दुस्टन क चंगुल स ओनका बचाइ ल्या ।

५ “इस्राएली नाही जानते कि का कछू घटत बा

एब बरे उ पचे नाही समझतेन ।

उ पचे नाही जानतेन

कि बदी करने वाला का करत रहेन ।”

६ मई कहेउँ,

“तू देवतन अहा ।

तू सर्वोच्च परमेस्सर क पूत अहा ।

७ फिर भी तू मानव जाति क नाई मरब्या ।

तू पचे वइसेन मरब्या जइसे दूसर नेतन मरि जात हीं ।”

८ हे परमेस्सर, खड़ा ह्या ! धरती पइ निआव लइ आवा,

काहेकि तू सारे ही देसन पइ नियन्त्रन रखत ह ।

आसाफ क एक ठु भजन ।

८३ १ हे परमेस्सर, तू मौन जिन रहा ! चुपचाप जिन रहा ।

हे सर्वसक्तिमान परमेस्सर, कृपा कइके सान्त जिन रहा ।

२ हे परमेस्सर, तोहार दुस्मन तोहरे विरोध मैं सड्यंत्र रचत बाटेन ।

जउन तोहसे घिना करत हीं अहंकारी बन जात हीं ।

३ उ पचे तोहरे मनवइयन क खिलाफ सड्यंत्र रचत बाटेन ।

तोहार दुस्मन ओन लोगन क खिलाफ जउन तोहका पिआरा अहइँ सबइ योजना बनावत अहइँ ।

४ उ सबइ दुस्मन कहत अहइँ, “आवा, हम ओन लोगन क पूरी तरह मेट डाइ ।

तब कउनो भी मनई इस्राएल क नाउँ सुमिरन नाही करी ।”

५ काहेकि इ सबहिं रास्ट्रन इकट्ठा होइके तोहरे विरोध मैं योजना बनावत हीं ।

उ पचे तोहार खिलाफ एक ठ समझौता किहेन ।

६-७ उ पचे इ सामिल परिवारन एदोमी, इस्माएली, मोआबी अउर हाजिरा क संतानन क पूतन, गबाली अउर, अम्मोनी, अमालेकी अउर पलिस्ती,

अउर सूर क लोगन क परिवारन क इ सबइ लोग हम लोगन क खिलाफ जुद्ध करइ बरे एक जुट होइ गएन ।

८ हिआँ तलक कि अस्सूरी भी ओन लोगन स मिल गएन ।

उ पचे लूत क संतानन क बहोत बलवान बनाएन ।

९ हे परमेस्सर तू दुस्मनन क वइसेन हरावा जइसेन तू मिद्यानी लोगन क,

सिसरा क, यार्बान क, किसोन नदी क लगे याबीन क हराया ।

१० उ पचे एन्दोर मैं नास भएन ।

*८२ :१ देवन क सभा दूसर रास्ट्रन सिच्छा दिहेन कि एल (परमेस्सर) अउर दूसर देवतन एक साथ जमा भवा इ निर्णय लेइ बरे कि भुइयाँ पइ क लोगन क संग का कीन्ह जाइ । किन्तु बहोत बार राजन अउर नेतन भी “देवतन” कहवावत रहेन । एह बरे इ भजन साइद कि इस्राएल क नेतन बरे एक ठु चेतवनी अहइ ।

†८२ :६ देवतन या “निआवाधीसन” अहइ ।

ओनकर ल्हासन धरती पइ पड़ी सड़त रहिन ।
 ११ दुस्मनन क सेनापतियन क वइसेन हरावा
 जइसेन तू ओरबे अउ जायेब क संग किहे
 रह्या ।
 ओकरे सेनापतियन क वइसेन हरावा जइसेन तू
 जेबह अउ सलमुन्ना क संग किहा ।
 १२ हे परमेस्सर, उ सबइ लोग हम पचन क धरती
 तजइ क दबावइ चाहत रहेन ।
 १३ मोर परमेस्सर ओनका तू उखड़ा भवा पौधा सा
 बनावा जेका आँधी उड़ाइ लइ जात ह ।
 ओन लोगन क अइसेन बिखराइ द्या जइसे भूसा
 क आँधी बिखराइ देत ह ।
 १४ दुस्मन क अइसेन बर्बाद करा जइसे वन क
 आगी बृच्छन क बर्बाद करत ह,
 अउर जइसेन जंगली आगी पहाड़न क बार डावत
 ह ।
 १५ एह बरे ओनका आँधी क नाई पाछा करा अउर
 ओनका कँपावा
 अउ फूँकिके उड़ा द्या जइसे कि आँधी करत ह ।
 १६ हे यहोवा उ सबइ क लज्जा स भरि द्या
 कि लोग तोहरे बारे मैं जानइ बरे तोहका तलास
 करइ ।
 १७ हे यहोवा, ओन लोगन क भयभीत कइ द्या अउ
 ओन लोगन क हमेसा अपमानित करा,
 ताकि उ तिरस्कार मैं मरि जाइँ ।
 १८ तउ उ पचे जनिहीं कि तू यहोवा अहा !
 अउर तू ही अकेल्ला सर्वोच्च परमेस्सर अहइ
 जउन सारे संसार पइ सासन करत अहा ।

गित्थि क वाद्य यंत्र क संग संगीत निर्देसक
 बरे कोरह क पूरन बरे भजन गीत ।

८४ १ सर्वसक्तिमान यहोवा, फुरइ तोहार
 पवित्र मन्दिर केर्तेना मनोहर अहइ ।
 २ मोर इच्छा अहइ कि मइँ यहोवा क मन्दिर क
 आंगन मैं रहेउँ ।
 मइँ तोहार आवइ क बाट जोहत भए थक गवा
 हउँ ।
 मोर पूरा सरीर जिअत यहोवा क संग होइ बरे
 रावत ह ।
 ३ सर्वसक्तिमान यहोवा, मोर राजा, मोर परमेस्सर,
 गौरइया अउ सूपाबेनी तलक क आपन झोंझ होत
 हीं ।
 इ सबइ पंछी तोहरी बेदी क लगे झोंझ बनावत
 हीं
 अउर ओनहीं घोसलन मैं ओनकइ बच्चे होत हीं ।

४ जउन लोग तोहरे मन्दिर मैं रहत हीं, बहोत खुस
 रहत हीं ।
 उ पचे तउ सदा ही तोहार गुन गावत हीं ।
 ५ उ सबइ लोग आपन हिरदइ मैं गीतन क संग
 जउन तोहरे मन्दिर मैं आवत हीं,
 बहोतइ आनन्दित अहइँ ।
 ६ उ सबइ खुस लोग बाका घाटि
 जेका परमेस्सर झरना क तरह बनाएस ह
 गुजरत हीं गर्मी क गिरत भइ बर्खा क बूँदन जल
 क सरोवर बनावत हीं ।
 ७ लोग आपन परमेस्सर स मिलइ बरे सहर स सहर
 होत भए
 इ रास्ता पइ सिय्योन पहाड़ पइ जात हीं ।
 ८ फउजन क परमेस्सर यहोवा, मोर पराथना सुना ।
 याकूब क परमेस्सर तू मोर सुनि ल्या ।
 ९ परमेस्सर, हमरे संरच्छक क रच्छा करा ।
 आपन अभिसिक्त भए राजा पइ दयालु ह्या
 १० हे परमेस्सर, कहुँ अउर हजार दिन ठहरइ स
 तोहरे मन्दिर मैं एक दिन ठहरब उत्तिम अहइ ।
 दुट्ट लोग क बीच बसइ स,
 आपन परमेस्सर क मन्दिर क दुआरे क लगे खड़ा
 रइहउँ इहइ उत्तिम बाटइ ।
 ११ यहोवा हम लोगन क सूर्य अउर द्वार अहइ ।
 यहोवा महिमा अउ सम्मान देइ ।
 उ जउन खरी जिन्नगी गुजारत ह
 ओका उ हर एक नीक चीज देत ह ।
 १२ हे सर्वसक्तिमान यहोवा,
 जउन लोग तोहरे भरोसे अहइँ उ पचे फुरइ बहोत
 खुस अहइँ ।

संगीत निर्देसक बरे कोरह
 क पूतन बरे एक ठु भजन ।

८५ १ हे यहोवा, तू आपन देस पइ कृपालु
 भवा ।
 तू विदेस भुइँया मैं स याकूब क सन्तानन वापिस
 लिआवा ।
 २ हे यहोवा, तू आपन लोगन क पापन्क छिमा
 करा ।
 तू ओनकर सबइ पाप मेट द्या । (सेला)
 ३ हे यहोवा, कोहाइ जाब क तजि द्या ।
 अउर तू आपन गुस्सा क लइ लिहा ।
 ४ परमेस्सर, हमार मुक्तिदाता, कृपा कइके हम
 पचन पइ कोहाइ जाब तजि द्या
 अउर हम लोगन क फुन हमार भुइँयाँ पइ वापिस
 लइ आवा ।
 ५ का तू हमेसा हमेसा कोहान रहव्या ?

का तू सदा आपन कोहान जारी रखब्या ?

६ कृपा कइके हमका फुन जिआइ द्या
ताकि तोहार लोग तोहसे फुन स खुस होइ सकइँ ।

७ हे यहोवा, तू हमका आपन बिस्सासनीय पिरम
देखावा ।

हमार रच्छा करा ।

८ जउन परमेस्सर कहत ह, मई ओह पइ कान
दिहेउँ ।

उ अपने लोगन अउर अपने बिस्सासी चेलों से
सान्ति क वाचा करत ह

उ नाही चाहत ह कि उ पचे बेवकूफी क राहे पइ
लउटि जाई ।

९ फुरइ, ओकर उद्धार ओन लोगन क निचके बाटइ
जउन ओहसे डेरात ह,

एह बरे ओकर महिमा तोहार देस मँ निवास करी ।

१० पिरम अउर सच्चाई एक साथ मिलव ।

धर्मता अउ सान्ति एक दूसर क चुम्मा क संग
स्वागत करिहीं ।

११ सच्चाई धरती स अंकुरित होइहीं,

अउर धार्मिकता अकास स बसिहीं ।

१२ यहोवा बहोत स उत्तम वस्तुअन क देइहीं ।

अउर हमार धरती प्रचुर मात्रा मँ फसल
उपजिहीं ।

१३ परमेस्सर क अगवा अगवा नेकी चली,

अउर उ ओकरे बरे राह बनाई ।

दाऊद क पराथना ।

८६ १ मई एक दीन, असहाय मनई अहउँ ।

हे यहोवा, तू कृपा कइके मोर सुनि ल्या,
अउर तू मोर बिनती क जवाब द्या ।

२ मई तोहार भगत हउँ, कृपा कइके मोर रच्छा
करा ।

मई तोहार सेवक अहउँ अउर तू मोर परमेस्सर
अहा ।

मई तोह पइ भरोसा किहेउँ, कृपा कइके मोका
बचावा ।

३ मोर सुआमी, मोह पइ दाय़ा करा ।

मई सारा दिन तोहार बिनती करत रहत हउँ ।

४ हे मोर यहोवा, मई आपन जिन्नगी तोहार हाथन
मँ देत हउँ ।

हे मोर सुआमी, मोका, आपन सेवक क सुखी
बनावा ।

५ हे सुआमी, तू नीक अउ छिमाकर्ता अहा ।

तू आपन मनवइयन स बहोत पिरम करत अहा,
जउन सहारा पावइ क तोहका गोहरावत ही ।

६ हे यहोवा, मोर बिनती सुनि ल्या ।

कृपा कइके तू आपन कान क मोर पराथना पइ
दाया बरे द्या ।

७ हे यहोवा, आपन संकट क घरी मँ मई तोहार
बिनती करत हउँ ।

मई जानत हउँ तू मोका जवाब देब्या ।

८ हे सुआमी, तोहरे जइसा कउनो देवता नाही
अहइ ।

जइसेन काम तू किहा ह वइसा काम कउनो भी
नाही कइ सकत ।

९ हे सुआमी, तू ही सब लोगन क रच्छा ह ।

उ पचे आइही अउर तोहार आराधना करिहीं ।

उ पचे सबहिं तोहरे नाउँ क आदर करिहीं ।

१० हे परमेस्सर, तू महान अहा ।

तू अजूबा करम करत अहा ।

तू अकेल्ले ही परमेस्सर अहा ।

११ हे यहोवा, मोका आपन राहन क सिच्छा द्या,

तउ मई तोहरे सच्चाइ क अनुसार रहेबउँ ।

कृपा कइके मोर मदद करा,

तउ मई पूरे हिरदय स तोहार उपासना करबउँ ।

१२ हे मोर सुआमी परमेस्सर, मई सम्पूर्ण हिरदय स
तोहार गुण गावत हउँ ।

मई तोहरे नाउँ क आदर सदा सदा ही करबउँ ।

१३ काहेकि तू मोका बहोत जिआदा पिरम किहा ह ।

तू मोका मउत क गहड़ा खाइ स बचाया ह ।

१४ परमेस्सर, अहंकारी लोग मोह पइ वार करत
अहइँ ।

कर लोगन क समूह मोका मार डावइ चाहत
अहइँ ।

अउर उ सबइ मनई तोहार आदर नाही करत
अहइँ ।

१५ हे सुआमी, तू दयालु अउ कृपा स भरा परमेस्सर
अहा ।

तू धीरज स भरा, बिस्सासी अउ पिरम स भरा
अहा ।

१६ हे परमेस्सर, देखावा कि तू मोर सुनत ह अउर
मोह पइ कृपालु रहत ह ।

मई तोहार सेवक हउँ, तू मोका सक्ति द्या ।

मई तोहार सेवक हउँ, मोका बचावा !

१७ हे यहोवा, कछू अइसा करा जेहसे इ साबित
होइ कि तू मोर सहायता करब्या ।

तब मोर दुस्मन एका जानिहीं अउ निरास होइ
जइहीं ।

तउ इ परगट होइ तू उहइ अहा जउन मोर मदद
किह्या अउर मोका आराम दिह्या ।

कोरह परिवार क एक ठु भजन ।

८७ १ परमेस्सर यरूसलेम क पवित्रर
पहाड़ियन पइ आपन मन्दिर बनाएस ।

२ यहोवा इस्राएल मँ कउनो भी दूसर सहर स
जियादा सिय्योन क दुआर क पसंद करत ही ।

३ हे परमेस्सर क नगर, तोहरे बारे मँ लोग अजूबा
बातन कहत ही ।

४ मइँ सिय्योन ओन लोगन क सूची बनाउब जउन
मोका जानत ह,

एहमाँ ओन लोगन भी सामिल अहइँ जउन मिस्र,
बाबुल, पलिस्ती, सोर अउ इथोपिया मँ भी
रहत ही ।

५ उ हरेक जन क जउन

सिय्योन मँ पइदा भएन जानत ह ।

सर्वोच्च परमेस्सर इ सहर क स्थापना किहेस ह ।

६ यहोवा आपन रास्ट्रन क सूची राखत ह ।

उ जानत ह कि कउन सिय्योन मँ पइदा भवा ह ।
सेला

७ ओकर मनवइयन बहोत खुसी स गावत अउर
नाचत ही ।

उ पचे कहा करत ही, “सबहिँ उत्तिम चिजियन
यरूसलेम स आइन ।”

संगीत निर्देसक बरे । कोरह परिवारन
एज्रा-बंसी हेमान क एक ठु कलात्मक ।
“माहलाथ लआन्नोथ” राग पइ ।

८८ १ हे परमेस्सर यहोवा, तू मोर उद्धारकर्ता
अहा ।

मइँ तोहार रात-दिन विनती करत रहत हउँ ।

२ कृपा कइके मोर पराथना पइ धियान द्या ।

मोह पइ दायी कइके मोर पराथना सुना ।

३ मइँ आपन दुर्दसा स तंग होइ गवा हँउ ।

बस मइँ हाली ही मरि जाब ।

४ लोग मोरे संग मुर्दा जइसा बेउहार करइ लागेन
ह ।

उ मनई क तरह जउन जिअत रहइ बरे बहोत
कमजोर अहइँ ।

५ मोका मुर्दा लोगन क बीच मँ रखा गवा ह ।

मइँ कबर क मुर्दन जइसा हँउ

जेका तू बिसर जाब्या ।

अउर जेका तोहरे उपस्थिति स हटाई दीन्ह गवा
अहइ ।

६ हे यहोवा, तू मोका कबर क सबसे गहरी खाई मँ
डाइ दिहा ह ।

तू मोका घोर अंधेरी जगह मँ रख दिहा ह ।

७ हे परमेस्सर, तोहका मोह पइ किरोध रहा,
एह बरे तू मोका आपन किरोध क तरंगन स बर्बाद
किहा ह ।

८ तू मोका मोरे मीत लोगन स अलगाइ दिहा ।

एह बरे उ पचे मोसे अलग रहइ क जतन करत
अहइँ,

काहेकि तू मोका अइसा मनई बनाए अहा जेका
कउनो भी छुअइ नाही चाहत ह ।

मइँ आपन घरे क ही भीतरे बंदी बनि गवा हउँ
अउर मइँ बाहेर जाइ नाही सकत हउँ ।

९ विपदा क कारण मोर आँखिन मँ पीड़ा अहइँ ।

हे यहोवा, मइँ तोहसे निरन्तर पराथना करत हउँ
अउर तोहार समर्थन मँ मइँ आपन हाथ उठावत
हउँ ।

१० हे यहोवा, का तू मृतक लोगन बरे अचरज भरा
काम करब्या ?

का इ सम्भव अहइ कि एक मरा भवा आतिमा
तोहार उपासना करी ? (सेला)

११ जउन मरा भए अहइँ उ पचे आपन कबर मँ स
ओकरे कइँती तोहरे पिरम क बारे मँ बताइ
सकतेन ।

मरे भए लोगन मृत्युलोक स ओकरे कइँती तोहरी
बिस्वास क नाही बताइ सकतेन ।

१२ मरे भए लोग अँधियारे मँ सोवत हीँ उ पचे ओन
अदभुत बातन क जेनका तू करत अहा, नाही
लखि सकतेन ।

उ पचे छोड़ा भवा भुइँया मँ तोहार कीन्ह भवा
धार्मिकता क बारे मँ नाही बताइ सकतेन ।

१३ मुला मइँ मदद बरे तोहका गोहराएउँ ह, हे
यहोवा ।

हर भिन्सारे मइँ तोहार समन्वा पराथना करत
हउँ ।

१४ हे यहोवा, तू मोका काहे तजि दिहा ह ?

तू मोर सुनइ स काहे मना करत अहा ?

१५ बचपन स ही मइँ सतावा गवा हउँ

अउर मउत क धमकी दीन्ह गवा हउँ, मइँ असहाय
हउँ ।

१६ तोहार गुस्सा मोका ढाँपि लिहे अहइ

अउर तोहार आतंक मोका मार डावत ह ।

१७ उ मोका बाढ़ क पानी क समान चारिहुँ कइँती
स घेरिके राखेस ह ।

उ मोका पूरी तरह स ढाँपिके राखेस ह ।

१८ हे यहोवा, तू मोरे मीत अउ पिरय मनइयन
क मोका छोड़िके चला जाइ क मजबूर कइ
दिहा ।

मोरे संग सिरिफ केवल अँधियारा ही रहत ह ।

एज्रा-वंसी एथान क एक ठु मस्किल।

६९

१ मई हमेसा यहोवा क पिरिम क गीतन क गाउव।

मई ओकरी हमेसा ओकरी बिस्सासी क गीत गावत रहव।

२ हे यहोवा, मोका सचमुच बिस्सास अहइ, तोहार पिरिम अमर अहइ।

तोहार बिस्सास लम्बी अकास क नाई अहइ।

३ यहोवा परमेस्सर कहत ह, “मई आपन चुने भए राजा क संग एक ठु करार किहेउँ ह।

आपन सेवक दाऊद क मई वचन दिहेउँ ह:

४ “दाऊद तोहरे बंस क मई हमेसा बरे अमर बनाउव।

तोहरे राज्ज सदा सदा बरे बनाइ रखवेउँ।”

५ हे यहोवा, तोहरे ओन अद्भुत करमन क अकास स्तुति करत हीं।

सरगदतन क सभा तोहरी ईमानदारी क गीत गावत हीं।

६ सरगे मँ कउनो मनई यहोवा क तुलना नाहीं कइ सकत।

कउनो भी देवता यहोवा क समान नाहीं।

७ पवित्तर सरगदतन क सभा मँ परमेस्सर अत्यंत सम्मानित बाटइ।

उ सबइ जउन ओकर चारिहुँ कइँती अहइ, क जरूर डरइ चाही अउर ओकर आदर करइ चाही।

८ सर्वसक्तिमान परमेस्सर यहोवा, तोहस जियादा कउनो सक्तिसाली नाहीं अहइ।

अउर यहोवा तू हमेसा भरोसेमन्द अहा।

९ तू गरजत समुदर पइ सासन करत अहा।

तू ओकर उमंगित तंगन क सांत करत अहा।

१० हे परमेस्सर, तू ही अहा जउन राहाब क हराए रह्या अउर ओका जुद्ध मँ मार डाए रह्या।

तू आपन महासक्ति स आपन दुस्मन बिखराइ दिह्या।

११ सरग अउ धरती तोहार अहइ।

उ तू ही अहा जउन इस संसार क बनाय अउर संसार मँ क हर वस्तु रच्या।

१२ तू ही सब कछू उत्तर दक्खिन रच्या ह।

ताबोर अउ हर्मोन पर्वत तोहार गुन गावत हीं।

१३ तू सक्तिसाली अहा।

तोहार सक्ति महान अहइ।

तोहार सक्ति क सम्मान कीन्ह जात हीं।

१४ तोहार राज्ज धार्मिकता अउ निआउ पइ टिका बाटइ।

पिरिम अउ बिस्सासी तोहरे सेवा करत अहइ।

१५ जउन तोहमाँ खुस अहइँ उ धन्न अहइँ।

उ पचे तोहरी समर्थन क प्रकास मँ जिअत रहत हीं।

१६ तोहार नाउँ ओनका सदा खुस करत ह

अउर तोहार धार्मिकता क कारण उ सम्मान पावत ह।

१७ तू ओनकर सक्ति क अद्भुत स्रोत अहा।

उ तोहार समर्थन क कारण तोहसे सक्ति पावत ह।

१८ काहेकि हमार रच्छा यहोवा स सम्बंधित अहइ।

हम लोगन क राजा इस्राएल क पवित्तर क कइँती स अहइ।

१९ एक बार दर्सन मँ तू आपन सच्चे मनइयन स कहे रहा,

“मई ओनका मदद दिहे हउँ जउन मज्जबूत अहइ, मई लोगन क बीच मँ स नउ जवान मनई क प्रतिष्ठित किहेउँ।

२० मई आपन सेवक दाऊद क पाइ लिहेउँ,

अउर मई ओकर ताजपोसी किहेउँ ह अउ ओकरे अभिसेक आपन तेल स किहेउँ ह।

२१ मई आपन दाहिने हाथे स दाऊद क सहारा दिहेउँ,

अउर मई ओका आपन सक्ति स बलवान बनाएउँ।

२२ कउनो दुस्मन चुने भए राजा क धोखा नाहीं देइ सकतेन।

दुट्ट जन ओहे पइ अत्याचार नाहीं कइ सकतेन।

२३ मई ओकरे दुस्मनन क समाप्त कइ दिहेउँ।

जउन लोग चुने भए राजा स बैर राखत रहेन, मई ओनका हराइ दिहेउँ।

२४ मई हमेसा आपन चुने भए राजा स पिरिम राखव अउर ओका समर्थन देव।

उ मोहे पइ निर्भर रहिके मोर सकती स भरि जाइ।

२५ मई आपन चुने भए राजा क महासागर क नियंत्रक तइनात करव।

उ नदियन पइ हुकुमत करी।

२६ उ मोहसे कही, ‘तू मोर पिता अहा।

तू मोर परमेस्सर, मोर चट्टान अउ मोर उद्धारकर्ता अहा।’

२७ मई ओका आपन पहिलौटा पूत बनाउव।

८१:१० राहाब अजगर या सागरे क दैत्य अहइ। लोग सोचत अहीं कि राहाब सागरे पइ नियंत्रन रखत ह। अक्सर राहाब परमेस्सर क दुस्मन क या कउनो बुरा काम करइ क प्रतीक रहा।

उ सबइ राजन पइ प्रमुख होइ ।
 २८ मई सदा ओका आपन पिरम दिखावत हउँ ।
 मोर करार ओकरे संग दूढ़ता स स्थापित होइ ।
 २९ मई इ बंस क अमर बनाउव ।
 ओकर सासन हुआँ तब तलक टिका रही जब तलक
 कटनी क समई रही ।
 ३० अगर ओकर संतानन मोर कानून अउर आदेस
 क पालन तजि दिहन ह,
 अउर अगर उ लोग मोरे उपदेसन क मानव तजि
 दिहन ह ।
 ३१ अगर मोर अभिसिक्त राजा क संतानन मोरे
 कानून क पालन नाहीं किहन
 अउर अगर मोरे आदेसन क न मानेन ।
 ३२ तउ मई ओकर विदरोह बरे ओका दण्ड देइ बरे
 अधर्म चिजियन क न होइ देव,
 अउर मई ओकरे आग्याभंग करइ बरे मनइयन क
 दण्ड क रूप मँ देव ।
 ३३ मुला मई ओन लोगन क परिवार स आपन पिरम
 क नाहीं हटाउव ।
 मई सदा ही ओनके बरे बिस्सासी रहब ।
 ३४ जउन करार मोर दाऊद क संग अहइ, मई
 ओका नाहीं तोड़ब ।
 मई आपन वाचा क नाहीं बदलब ।
 ३५ मई आपन पवित्तरता प्रतिग्या लेब,
 अउर मई ओहे स आपन वाचा क नाहीं तोड़ब ।
 ३६ दाऊद क बंस हुवाँ सदा बना रही ।
 जब तलक हुवाँ सूरज रही तब तलक ओकर
 सिंहासन भी रही ।
 ३७ उ सदा हुवाँ रहब ।
 निहचय ही जब तलक आकासे मँ चन्द्रमा साच्छी
 रही तब तलक लगातार रही ।" (सेला)
 ३८ मुला अब, तू ओकर अपमान किहा ह अउर
 ओका तजि दिहा ह ।
 तू आपन अभिसिक्त राजा पइ कोहाइ गवा ह ।
 ३९ तू आपन सेवक क कीन्ह भवा करार क रइ कइ
 दिहा ।
 तू ओकरे मुकुट धूरि मँ लोकाइ दिहा ।
 ४० तू राजा क नगर क देवारन बर्बाद कइ दिहा,
 तू ओकरे सब किला क तहस नहस कइ दिहा ।
 ४१ राजा क पड़ोसी ओह पइ हँसत अहइ, अउर उ
 सबइ लोग जउन पास स गुजरत हीं,
 ओनकर चिजियन क चोराइ लइ जात हीं ।
 ४२ तू राजा क दुस्मनन क खुस किहा ।
 तू ओकरे दुस्मनन क जुद्ध मँ जिताइ दिहा ।
 ४३ तू ओकरे तरवार क जुद्ध मँ असफल किहा ।
 तू आपन राजा क जुद्ध जीतइ मँ मदद नाहीं किहा ।

४४ तू ओकरे खास स्थान क समाप्त कइ दिहा ह,
 अउर तू ओकर पवित्तर सिंहासन क तू धरती पइ
 पटक दिहा ।
 ४५ तू ओकरे जवानी क दिनन क
 घटा दिहा ह ।
 ४६ हे यहोवा, इ कब तलक रही ?
 का सदा-सदा हमार मदद नाहीं करब्या ?
 का तू सदा सदा बरे आपन किरोध आगी क नाई
 धधकत भए रखब्या ?
 ४७ याद करा मोर जिन्नगी केतनी अल्पकालीन
 अहइ ।
 तू ही हमका नान्ह जिन्नगी जिअइ अउर फुन मरि
 जाइ क रच्या ह ।
 ४८ अइसा कउनो मनई नाहीं जउर सदा जिई अउर
 कबहुँ नाहीं मरी ।
 कबर स कउनो मनई बच नाहीं पाई । (सेला)
 ४९ हे सुआमी, उ पिरम कहाँ अहइ जउन तू अतीत
 मँ देखाँए रह्या
 अउर तू आपन बिस्सास क दाऊद क वचन दिह्या ।
 ५० हे सुआमी, कया कइके याद करइ क जतन करा,
 कि लोगन तोहरे सेवक क कइसे अपमानित
 किहन ।
 ५१ मई आपन हिरदय मँ बहोत सारे रास्टरन क
 अपमान क सहन किहे हउँ ।
 केकरे बारे मँ तोहार दुस्मन मजाक उड़ाएन, हे
 यहोवा ? तोहरे चुने भए राजा क उ पचे
 अपमानित किहेन ह ।
 ५२ यहोवा, क हमेसा ही स्तुति होइ ।
 आमीन आमीन !

चउथा भाग

(भजन १०-१०६)

परमेस्सर क भक्त मूसा क पराथना ।

१ हे सुआमी, तू अनादि काल स हमार घर
 (सुरच्छा स्थल) रहा बाटइ ।
 २ हे परमेस्सर, तू पर्वतन क पइदा होइ स पहिले
 मौजूद रह्या ।
 तू धरती अउर संसार क रचई स पहिले मौजूद
 रह्या ।
 सुरू स अन्त तलक रह्या, तू सदा ही परमेस्सर
 रहब्या ।
 ३ तू ही इ जगत मँ लोगन क लिआवत ह ।
 फुन स तू ही ओनका धूरी मँ बदल देत ह ।
 ४ तोहरे बरे हजार बरिस बीते भए काल्हि जइसेन
 या राति क एक ठ पहर बीत गवा बाटइ ।

५ तू मोर जिन्नगी क सपना क झरना क आसीस दिहा ।

अउर हम पचे बहोत भिसार ही चला जात अही ।

६ जउन भिसारे उगत ह

अउर उ साँझ क सूखिके मुरझाइ जात ह ।

७ हे परमेस्सर, जब तू कोहाइ जात ह हम पचे बर्बाद होइ जात अही ।

हम तोहरे कोप स धबरान अही ।

८ तू हमरे सब पापन क जानत अहा ।

तू हमार हर छिपा भवा पाप क लखा करत अहा ।

९ जब तू किरोधित होत ह, हमार सबइ दिनन लुप्त होइ जात हीं

अउर हमार बरिसन फुसफुसाहट क नाई खतम होइ जात हीं ।

१० हम पचे सत्तर बरिस तलक जिअत रहि सकित ह,

अगर हम पचे सक्तिसाली अही तउ अस्सी बरिस जी सकी ।

हमार जिन्नगी कठिन परिस्रम अउ पीरा स भरी अहइ ।

एकाएक हमार जिन्नगी खतम होइ जात ह अउर हम पचे उड़िके चला जाइत ह ।

११ तोहरे किरोध क सकित क

अउर तोहार भय योग्य गुस्सा क कउन जानत ह ।

१२ तू हमका सिखाइ द्या कि हम पचे फुरइ इ जानी कि हमार जिन्नगी केतनी कम अहइ ।

ताकि हम पचे बुद्धिमान बनि सकी ।

१३ हे यहोवा, तू सदा हमरे लगे लउटि आवा ।

हम केतना दिन प्रतीच्छा करी ? आपन सेवकन पइ दाय़ा करा ।

१४ हर रोज भिसारे हम पचन क आपन सच्चा पिरम स भरि दया ।

ताकि हम लोग आपन जिन्नगी क हर एक दिन आनन्दित होइ खुसी मनाइ ।

१५ तू हम पचन क वइसा ही आनन्दित होइ द्या जइसा तू पहिले हमका पीरा दिहा रहा ।

१६ तोहरे दासन क ओन अद्भुत बातन क लखइ द्या जेनका तू ओनके बरे कइ सकत ह,

अउ आपन सन्तानन क आपन महिमा देखाँवा ।

१७ परमेस्सर, हमार सुआमी, हम पचन पइ कृपालु ह्वा ।

हम लोगन क उ कार्य दिखावा जेका हम लोगन क करइ चाही

अउर हम लोगन क कार्य क कामयाब बनावा ।

११ उ जउन कउनो सर्वोच्च परमेस्सर क सरण मँ रहत ह,

तउ उ सर्वसक्तिमान परमेस्सर क सुरच्छा मँ रहत ह ।

२ मइँ यहोवा स कहत हउँ, “तू मोर सुरच्छा स्थल अहा मोर गढ़ ।

हे परमेस्सर, मइँ तोहरे भरोसे हउँ ।”

३ यहोवा तोहका सबहिं छिपे भए खतरा स बचाइ । उ तोहका सब खउफनाक विपत्तियन स बचाइ ।

४ तू परमेस्सर क सरण मँ सरच्छण पावइ बरे जाइ सकत ह ।

उ तोहार अइसे रच्छा करी जइसे एक ठु पंछी आपन पखना फइलाइके आपन बचचन क रच्छा करत ह ।

परमेस्सर क बिस्सास एक बिसाल ढाल क नाई अहइ जउन चारिहुँ कइँती स रच्छा करत ह ।

५ राति मँ तोहका कउनो क भय नाहीं होइ,

अउ दुस्मन क बाणन स तू दिन मँ डेराब्या नाहीं ।

६ तोहका अँधियारे मँ आवइवालन रोगन

अउ उ खउफनाक रोग स जउन दुपहर मँ आवत हीं डर नाहीं होइ ।

७ तू हजार दुस्मनन क हराइ देब्या ।

तोहार खुद दाहिना हाथ दस हजार दुस्मनन क हराइ ।

अउर तोहार दुस्मन तोहका छुइ तलक नाहीं पइहीं ।

८ जरा लखा, अउर तोहका देखाँइ देइ कि

उ पचे कुटिल मनई सजा पाइ चुका अहइँ ।

९ काहेकि तू यहोवा क भरोसे अहा ।

तू परम परमेस्सर क आपन सरणस्थल बनाया ह ।

१० तोहरे संग कउनो भी बुरी बात नाहीं घटी ।

कउनो भी रोग तोहरे घर क नजदीक नाहीं आइ ।

११ काहेकि परमेस्सर आपन सरगदूतन क तू जहाँ भी जाब्या हुआँ तोहार रच्छा करइ बरे नियुक्त करी ।

१२ ओकर सरगदूतन तोहका आपन हाथन पइ ऊपर उठइहीं,

ताकि तोहार गोइ चट्टान स न टकराइ ।

१३ तू कोबरा अउर नाग पइ बगैर कउनो नोस्कान क चलब्या ;

तू सेर अउर अजगर क कुचरब्या ।

१४ यहोवा कहत ह, “मइँ आपन सेवकन क रच्छा करब जउन मोहसे पिरम करत ह ।

मइँ ओनँ व्यक्ति क पालन-पोसन करब जउन मोर उपासना करत ह ।”

१५ उ सहारा पावइ बरे मोका गोहरइहीं, मइँ ओनकर जवाब देब ।

उ पचे जब कस्ट मँ होइहीं मइँ ओनके संग रहब ।

मई ओनकर बचाव करब अउर ओनका आदर देब ।
 १६ मई आपन व्यक्तितयन क एक लम्बी उमिर क
 आसीस देब ।
 अउर मई ओका ओकर आपन बचान क सक्ति
 दिखाउब ।

सबित क दिन बरे एक ठु स्तुति गीत ।

१ यहोवा क महिमा क स्तुति करइ नीक
 अहइ ।

हे सर्वोच्च परमेस्सर, तोहरे नाउँ क गुणगान बरे
 नीक अहइ ।

२ मोर मैं तोहरे पिरेम क गीत गाउब
 अउ राति मैं तोहरे बिस्सास क गीत गाउब नीक
 अहइ,

३ हे यहोवा तोहरे बरे दस तार वाद्य यंत्रन,
 सारंगियन

अउ वीणन पइ संगीत बजाउब नीक बाटइ ।

४ हे यहोवा, तू फुरइ हमका आपन कीन्ह कामन स
 आनन्दित करत ह ।

हम आनन्द स भरिके ओन गीतन क गाइत ह,
 जउन काम तू किहा ह ।

५ हे यहोवा, तू महान कारज किहा ह ।
 तोहार सोच-बिचार हमरे बरे समुझि पावइ आसान
 नाही अहइ ।

६ लोग मूरख गोरुअन क जइसे अहइ ।
 मूरख जइसे तोहार सोच-बिचार क नाही समुझ
 पाइत ।

७ दुट्ट जन घास क नाई पनपत ही ।
 उ पचन्क दुआरा कीन्ह भवा सबइ बेकार अबही
 फलत-फूलत ही,

किन्तु सदा-सदा बरे खतम होइ जइहीं ।

८ मुला हे यहोवा, अनन्त काल तलक तोहार आदर
 रही ।

९ हे यहोवा, तोहार दुस्मनन बर्बाद कइ दीन्ह
 जइहीं ।

उ सबहिं मनई जउन बुरा काम करत हीं, तितर-
 बितर कइ दीन्ह जइहीं ।

१० मुला तू मोका जंगली बर्धा क नाई मजबूत
 बनाया ह ।

हम बरियार भेड़ा स बन जाब जेकर करें सींग होत
 हीं तू मोह पइ खास तेल उड़ेयाँ ह जउन
 ठंडापन देत ह ।

११ मई लखेउँ ह कि मोर दुस्मन मोका लखत हीं ;
 मई सुनेउँ ह कि दुट्ट लोग मोह पइ हमला करइ
 बरे तइयार बाटेन ।

१२ नीक मनइयन लवानोन क बड़वार देवदार वृच्छ
 क तरह अहइ

जउन यहोवा क मन्दिर मैं रोपा ग अहइ ।

१३ नीक मनइयन वादत भए ताइ क वृच्छ क नाई
 अहइ,

जउन हमार परमेस्सर क मन्दिर क आँगन मैं
 फलदार होत अहइ ।

१४ उ पचे जब तलक बुढ़वा होइहीं तब तलक उ पचे
 फल देत रइहीं ।

उ पचे हरे भरे मोटा वृच्छ जइसे होइहीं ।

१५ उ पचे हर कउनो क इ देखाँवइ बरे हुआँ अहइ
 कि यहोवा बिस्सास योग्य अहइ ।

उ मोर चट्टान अहइ ।

ओहमाँ कछू बुराइ नाही बाटइ ।

१६ यहोवा सासन करत ह !

१७ उ महिमा अउर सक्ति क पहिर लिहस
 ताकि धरती स्थिर रहइ

अउर गिरे नाही ।

१८ हे परमेस्सर, तोहार साम्राज्य अनादि काल स
 टिका भवा अहइ ।

तू सदा जिअत अहा ।

१९ हे यहोवा, नदियन क गर्जन बहोत तीव्र बा ।

ओनकर लहरन क

नस्ट करइया अहइ ।

२० समुद्र क पछारा खात भइ लहरन गरजत हीं,
 अउर उ सबइ सक्तिसाली अहइ ।

मुला ऊपर वाला यहोवा जियादा सक्तिसाली
 अहइ ।

२१ हे यहोवा, तोहार कानून बहोत स्थिर अहइ ।

तोहार पवित्तर मन्दिर लम्बी समई तलक खड़ा
 रही ।

२२ यहोवा तू परमेस्सर अहा जउन कि
 निआव लिआवत ह ।

निआव क परमेस्सर आपन क परगट करा ।

२३ उठा, हे धरती क निआउकर्ता ।

तू घमण्डी लोगन क उचित सजा देत ह ।

२४ हे यहोवा, दुट्ट जन कब तलक मजा मारत
 रइहीं ?

केतना देरी तलक ?

२५ उ सबइ दुट्ट-जन कब तलक आपन बुरे कामन
 क बारे मैं

डीगं हाँकत अउर सेखी बघारत रइहीं ?

२६ हे यहोवा, उ सबइ लोग तोहार लोगन क
 मुसीबत मैं डालेन ह ।

उ पचे तोहरे आपन लोगन क सतावा करत हीं ।

६ उ पचे राँड अउरतन अउर ओन मेहमानन क
जउन ओनके देस मँ ठहरा अहई, मारत हीं ।
उ पचे ओन अनाथ गदेलन क कतल करत हीं ।
७ उ पचे कहत हीं, यहोवा ओनकर बुरा करम करत
भए नाही लखि सकत ।
अउर कहत हीं, 'इस्राएल क परमेस्सर ओन
बातन क नाही समुझत जउन घटति अहई ।'
८ ओ बुद्धिहीन लोग,
तू कब आपन पाठ सिखब्या ?
अरे मूरख लोगो,
जतन करा अउर समुझ्या ।
९ परमेस्सर हमार कान बनाएस ह,
तउ निहचय ही उ सुन सकिही ।
परमेस्सर हमार आँखिन बनाएस ह,
तउ निहचय ही देख सकत ही ।
१० उ रास्टरन क सम्मान करत हीं, तउ निहचय ही
उ तोहार निआव कइ सकत ह ।
उ ओन लोगन क ओन सबहिं बातन क सिच्छा देइ
जउन ओनका करइ चाही ।
११ तउ जउन बातन क लोग सोचत अहई यहोवा
जानत अहइ ।
उ इ जानत अहइ कि ओकर जोजनन हवा क झोका
अहई ।
१२ तू लोग धन्न अहा जेका तू सम्मान देत ह, हे
यहोवा ।
तू ओन लोगन क आपन कानून सिखावत ह ।
१३ तू ओनका ओकरे विपत्तियन मँ सांत होइके
सहायक करत ह,
जब तलक दुट्ट लोग कब्र मँ नाही दफनाइ दीन्ह
जइहीं ।
१४ यहोवा आपन लोगन क कबहुँ नाही तजी ।
उ बिना सहारे ओका रहइ नाही देइ ।
१५ निआउ लउटब अउर इमानदारी लिआइ ।
फुन लोग खरा बनिहीं ।
१६ मोका दुट्टन क खिलाफ जुद्ध करइ मँ कउनो
मनई सहारा नाही दिहस ।
कुकर्मियन क खिलाफ जुद्ध करइ मँ कउनो मोर संग
नाहीं दिहस ।
१७ यहोवा मोर सहायक नाही होत,
तउ मोर जिन्नगी मउत क दुआरा सांत होइ
जाइतेन ।
१८ जब मई गिरइ क रहेउँ,
तोहार पिरम मोका उठाएस, हे यहोवा ।
१९ जब मई बहोतइ चिंतित अउ बियाकुल रहेउँ,
तोहार सुख मोका आनन्दित किहस ।

२० हे परमेस्सर, तू कुटिल निआउ क मदद नाही
करत्या,
जउन परीसानी पइदा करइ बरे नेमन क घेर लेत
ह ।
२१ उ पचे नीक लोगन पइ हमला करत ह
अउर निर्दोख व्यक्ति क कसूरवार कहत ह ।
२२ मुला यहोवा मोर सुरच्छा क ठउर बाटइ ।
परमेस्सर मोर चट्टान अउर मोर सरण क ठउर
अहइ ।
२३ परमेस्सर ओनका ओकरे बुरा करमन बरे सजा
देइ ।
उ ओका ओकरे पाप क कारण खतम कइ देइ ।
हमार परमेस्सर यहोवा ओनका नस्ट कइ देइ ।
१५ आवा हम यहोवा क गुण गाई ।
आवा हम पचे उ चट्टान क जय जयकार
करी जउन हमार रच्छा करत ह ।
२ आवा हम यहोवा क धन्यवाद बरे गीत गाई ।
आवा हम ओकर बड़कई क गीत आनन्द क संग
गाई ।
३ काहेकि यहोवा महान परमेस्सर अहइ ।
उ महान राजा सबहिं दूसर "देवतन" पइ सासन
करत ह ।
४ गहिर सबइ गुफा अउ ऊँच पहाइ यहोवा क
अहई ।
५ सागर ओकर वा, उ ओका बनाएस ह ।
परमेस्सर खुद आपन हाथन स झुरान धरती क
बनाएस ह ।
६ आवा, हम ओका पइलगी करी अउर ओकर
उपासना करी ।
आवा हम परमेस्सर क गुण गाई जउन हमका
बनाएस ह ।
७ उ हमार परमेस्सर
अउर हम पचन ओकर बगल मँ भेड़ अही ।
कम स कम जदि तू आजु ओकर आवाज क पालन
करब्या ।
८ यहोवा कहत ह, "तू मोका सुनई स वइसा
इनकार जिन करा जइसा मरीबा मँ तोहार
पुरखन किहे रहेन,
अउ वइसा जिन करा जइसा उ पचे मस्सा मँ रहइ
क दिन मँ किहे रहेन ।
९ तोहार पुरखन मोका परखे रहेन ।
उ पचे मोका परखेन, पर तब उ पचे लखेन कि मई
का कइ सकत हउँ ।
१० मई ओन लोगन क चालीस बरिस तलक सहन
किहे रहेउँ ।

मई इ अच्छी तरह जानत रहेउँ कि उ पीढ़ी
इमान्दार नाही अहइ।

ओन लोगन मोर सिच्छा क नाही सीखेन।

११ तउ मई कोहाइ गएउँ अउर मई प्रण किहेउँ कि
उ पचे मोर भुईया मँ आइववाले समई मँ प्रवेस
नाहीं कइ पइहीं।”

१६ १ यहोवा बरे एक ठु गीत गावा।

हे समस्त ब्रह्माण्ड यहोवा बरे गीत
गावा।

२ यहोवा बरे गावा, ओकरे नाउँ क धन्न कहा।

हर दिन इ ओकरे उद्धार क बारे मँ सुसमाचार क
सुनावा।

३ दूसर रास्ट्रन क बतावा कि यहोवा फुरइ
अद्भुत बाटइ।

सब कतहूँ क लोगन मँ ओन अद्भुत बातन क
जेनका उ करत ह बखान करा।

४ यहोवा महान बा अउर बड़कई क जोग बा।

उ कउनो “देवतन” स जियादा सुरद्वालु बा।

५ दूसर रास्ट्रन क सबहिं “देवतन” सिरिफ
मूर्तियन अहइँ,

मुला यहोवा अकासन क रचेस।

६ ओकरे समन्वा सुन्दर महिमा दमकत बा।

परमेस्सर क पवित्तर मन्दिर सामरथ अउ
सुरन्दरता अहइँ।

७ हे वंसो, अउर रास्ट्रो,

यहोवा बरे महिमा अउर बड़कई क गीत गावा।

८ यहोवा क नाउँ क गुणगान करा।

आपन भेटन उठावा अउ मन्दिर मँ जा।

९ यहोवा क ओकर भव्य, मन्दिर मँ उपासना करा।

अरे ओ धरती क मनइयो, यहोवा क उपासना
करा।

१० रास्ट्रन क जानइ द्या कि यहोवा राजा अहइ।

निहचय ही उ उहइ अहइ जउन जगत क स्थिर
अउर अखण्ड बनाएस ह।

यहोवा मनइयन पइ निआउ स सासन करी।

११ अरे अकास, खुस ह्वा, हे धरती, आनन्द मनावा।

हे सागर, अउर ओहमाँ क सबइ चिजियन क
आनन्द स ललकारा।

१२ अरे ओ खेतो अउर ओहमाँ उगइवाली हर वस्तु
आनन्द स भरपूर होइ जा।

हे जंगल क वृच्छो गावा अउर आनन्द मनावा।

१३ आनन्द स भरपूर होइ जा

काहेकि यहोवा आवत अहइ।

यहोवा जगत क सासन करइ आवत अहइ,

उ खरेपन स निआउ करी।

१७ १ यहोवा सासन करत ह, धरती क खुस
रहइ द्या ;

दूर क देसन क प्रसन्न होइ द्या।

२ यहोवा क करिया गहिर बादर घेरे भए अहइँ।

नेकी अउ निआउ ओकरे राज्ज क मजबूत किहे
अहइँ।

३ यहोवा क समन्वा आगी चला करत ह,
अउर उ ओकरे आपन दुस्मनन क नास करत ह।

४ ओकर बिजुरी संसार क प्रकासित करत ह।

लोग ओका लखत ही अउर डेरान रहत ही।

५ यहोवा क समन्वा पहाइ अइसे पिघल जात ही,
जइसे मोम पिघल जात ह।

उ समूचइ धरती क सुआमी अहइ।

६ अकास ओकरी नेकी क बखान करत हीं।

हर कउनो परमेस्सर क महिमा लखि लेइ।

७ सबइ लोग जउन मूरतियन क पूजा करत हीं

अउर ओकरे बियर्थ बातन बरे डींग हाँकत हीं,

लजाइ जाइहीं।

सबइ देवतन ओकरे समन्वा निहुरिही।

८ हे सिय्योन, सुना अउ खुस ह्वा।

हे यहूदा क सहरन, खुस ह्वा,

तोहार निआउ क कारण, हे यहोवा।

९ हे सर्वोच्च यहोवा, फुरइ तू ही धरती पइ सासन
करत ह।

तू दूसर “देवतन” स जियादा उत्तम अहा।

१० जउन लोग यहोवा स पिरिम रखत हीं, उ पचे
पाप स घिना करत हीं।

एह बरे उ आपन लोगन क रच्छा करत ह।

उ ओन लोगन क दुट्ट लोगन स बचावत ह जउन
ओकरे बिस्सासी अहइँ।

११ धर्मी लोगन पइ जोति छितराएस ह

अउ इमानदार-जन बरे आनन्द फइलाएस ह।

१२ हे धर्मी लोगो, परमेस्सर मँ खुस रहा।

ओकरे पवित्तर नाउँ क धन्यवाद द्या।

एक ठु स्तुति गीत।

१८ १ यहोवा बरे एक नवा गीत गावा,
काहेकि उ नई अउ अद्भुत बातन क
किहस ह।

ओकर पवित्तर दाहिन भुजा

ओकरे बरे फुन बिजय बनाई।

२ यहोवा रास्ट्रन क समन्वा आपन रच्छा क
सक्ती क परगट किहेस ह।

उ ओनका आपन बिजय देखाएस ह।

३ उ इस्राएल पइ आपन पिरिम अउर बिस्सास क
स्मरण किहस ह।

दूर रास्ट्रन क लोग हमरे परमेस्सर क
रच्छासक्ती निहारेन ।

४ हे धरती क हर मनई, चिचियाइके स्तुति कइके
यहोवा क सुआगत करा ।

फूट पड़ा ! चिचियावा ! गावा !

५ वीणन क संग यहोवा बरे गावा ।

मधुर स्वर स वीणा बजाइके, ओकर महिमा क
स्तुति करा ।

६ वीणाओ, यहोवा क गुण गावा ।

हे बिगुल के मधुर संगीत ओकर गुण गावा, ओकर
महिमा क स्तुति करा ।

७ बाँसुरी बजावा अउर नरसिंगन क फूँका ।

आनन्द स यहोवा, हमरे राजा क जय जयकार
करा ।

८ हे सागर अउ धरती,

अउ ओनमाँ क सबइ चिजियन ऊँच सुर मँ गावा ।

९ इ यहोवा क समन्वा होइ, काहेकि उ संसार क
निआव करइ बरे जात ह ।

उ संसार क धार्मिकता स अउर ओकरे लोगन क
इमानदारी स निआव करी ।

तू यहोवा क समन्वा गावा, काहेकि उ जगत क
सासन करइ जात अहइ,

उ जगत क निआउ नेकी अउ सच्चाई स करी ।

१ यहोवा सासन करत ह ।

१० तउ हे रास्ट्रन, भय स काँप उठा ।

उ करूब दूतन ऊँपर आपन सिंहासन पइ
विराजमान अहा ।

तउ हे संसार भय स काँपि उठा ।

२ यहोवा सिध्योन मँ महान अहइ ।

सारे रास्ट्रन क उहइ राजा अहइ ।

३ सर्वहि लोगन क तोहरे महान

अउर भय योग्य नाउँ क गुण गावइ द्या ।

परमेस्सर पवित्तर बा ।

४ सक्तिसाली राजा क निआउ भावत ह ।

तू ही अहा जउन नेकी क स्थापना किहा ह ।

तू ही अहा जउन इस्राएल बरे निआव अउर
खरापन क स्थापना किहा ह ।

५ यहोवा हमरे परमेस्सर क गुणगान करा ।

अउर ओकरे चउकी चरण निहुरिके दण्डवत करा ।
उ पवित्तर अहइ ।

६ मूसा अउ हारून यहोवा क याजकन रहेन ।

समूएल ओन मँ स एक रहा जउन ओकरे नाउँ
लेइवाला रहा ।

उ सबइ ओकर पराथना किहेन ।

अउर उ ओनका जवाब दिहस ।

७ उ बादर क खम्भा मँ स बातन किहेस ।

उ पचे ओकरे आदेसन क मानेन ।

परमेस्सर ओनका कानूनन क हुकुमन दिहेस ।

८ हे यहोवा हमार परमेस्सर, तू ओनकर पराथना क
जवाब दिहा ।

तू ओनका इ देखाया कि छमा करइवाला परमेस्सर
अहा,

अउर तू लोगन क ओनकर बुरा कर्मन बरे सजा देत
अहा ।

९ हमार परमेस्सर यहोवा बरे एक ठु गीत गावा ।

ओकरे पवित्तर पहाड़े कइँती निहुरिके ओकर
उपासना करा ।

फुरइ यहोवा हमार परमेस्सर पवित्तर अहइ ।

धन्यवाद क एक ठु गीत ।

१०० १ हे धरती, तू यहोवा बरे गावा ।

२ आनन्द स रहा जब तू यहोवा क सेवा
करा ।

खुसी क गीतन क संग यहोवा क समन्वा आवा ।

३ तू जान ल्या कि यहोवा ही परमेस्सर अहइ ।

उ हमका बनएस ह अउ हम ओकर भगत अही ।

हम ओकर भेड़ अही ।

४ धन्यवाद क गीत संग लिए यहोवा क नगर मँ
आवा,

गुणगान क गीत संग लिए यहोवा क मन्दिर मँ
आवा ।

ओकर आदर करा अउर ओकर नाउँ क धन्य करा ।

५ यहोवा उत्तम अहइ ।

ओकर पिरेम सदा सदा ही अहइ ।

हम ओह पइ सदा सर्वदा बरे भरोसा कइ सकित ह ।

दाऊद क एक ठु गीत ।

१०१ १ मइँ पिरेम अउ खरेपन क गीत गाउब ।
यहोवा मइँ तोहरे बरे गाउब ।

२ मइँ पूरी सावधानी स सुद्ध जिन्नगी बिताउब ।

मइँ आपन घर मँ सुद्ध जिन्नगी जिअब ।

हे यहोवा तू मोरे लगे कब अउब्या ?

३ मइँ कउनो भी बियर्थ मूरति समन्वा नाहीँ राखब ।
जब लोग तोहार खिलाफ विद्रोह करत हीँ तउ

मइँ इ स घिना करत हउँ ।

मइँ कबहुँ भी एकर हिस्सा नाहीँ बनब ।

४ मइँ इमानदार रहब ।

मइँ बुरा काम स कबहुँ सम्बंध नाहीँ राखब ।

५ अगर कउनो मनई छिप छिपके आपन पड़ोसी
बरे चुगली कहइ,
मई ओनका रोकब ।
मई डींग हाँकइवाला
अउर महत्वाकाँच्छी व्यक्तियन क सहन नाही
करब ।
६ मई आपन संग काम करई बरे विस्सासी लोगन
क दूढ़ता हउँ ।
सिरिफ ओन लोग मोर सेवक होइ सकत हीं
जउन इमानदारी स जिन्नगी जिअत हीं ।
७ मई आपन घरे मँ अइसे लोगन क रहइ नाही देब
जउन झूठ बोलत हीं ।
मई झूठ लोगन क आपन लगे भी फटकइ नाही
देब ।
८ मई ओन दुट्टन क सदा ही नस्ट करब, जउन इ
देस मँ रहत हीं ।
मई ओन दुट्ट लोगन क मजबूर करब, कि उ पचे
यहोवा क नगर क तजि देई ।

एक पीड़ित मनई क उ समय क पराथना जब उ
आपन क टूटा भवा महसूस करत ह
अउर आपन वेदना अउ कस्टे क
यहोवा स कहि डाकइ चाहत ह ।

१०२

१ हे यहोवा, मोर पराथना क सुना ।
मोर पराथना क तोहे तलक आवइ द्या ।
२ जब मई विपत्ति मँ रहेउँ मोका नज़र अंदाज़ जिन
करा ।
जब मई तोहार पराथना करेउँ तउ तू मोर सुना मोर
पराथना क हाली जवाब द्या ।
३ मोर जिन्नगी वइसे बीती रही जइसे उड़त भवा
धुआँ ।
मोर सक्ति अइसे अहइ जइसे धीरे धीरे बुझत
आग ।
४ मोर सक्ति छीन होइ चुकी अहइ ।
मई वइसा ही अहउँ जइसा झुरान मुरझान घास ।
आपन सबइ वेदना मँ मोका भूख नाही लागत ।
५ दुःख क कारण,
मई सिरिफ चमड़ा अउर हड्डियन होइ गवा
अहउँ ।
६ मई अकेला अहउँ जइसे कउनो एकान्त निर्जन
जगह मँ उल्लू रहत होइ ।
मई अकेला अहउँ जइसे कउनो पुरान खण्डहर मँ
उल्लू रहत होइ ।
७ मई जाग कइ पूरी रात पहरा करत हउँ ।
मई उ अकेले पंछी जइसा होइ गवा हउँ, जउन
छूते पइ बइटा भवा होइ ।

८ मोर सतूरु सदा मोका बेइज्जत करत हीं,
अउर लोग मोर नाम लइके मोर हँसी उड़ावत हीं ।
९ दुःख मोर खइया होइ गवा अहइ ।
आँसू नीचे लुढ़किके मोर पिअइया बन जात ह ।
१० काहेकि यहोवा तू मोसे रूठ गवा अहा ।
तू ही मोका ऊपर उठाए रह्या, अउर तू ही मोका
बहाइ दिहा ।
११ मोर जिन्नगी क लगभग अंत होइ चुका अहइ ।
वइसे ही जइसे साँझ क लम्बी छाया हेराइ जात
हीं ।
मई वइसा ही अहउँ जइसे झुरान अउ मुरझान
घास ।
१२ मुला हे यहोवा, तू तउ सदा ही अमर रहब्या ।
तोहार नाउँ सदा अउ सदा ही बना रही ।
१३ तोहार उत्थान होइ अउ तू सिय्योन क चइन
देब्या ।
उ समइ आवत अहइ, जब तू सिय्योन पइ कृपालु
होब्या ।
१४ तोहार सेवकन सिय्योन क पाथरन स पिरेम
करत हीं ।
उ पचे ओकरे धूरि स भी पिरेम करत हीं ।
१५ रास्टरन यहोवा क नाउँ क आराधना करिहीं ।
हे यहोवा, धरती क सबहि राजा तोहार आदर
करिहीं ।
१६ जब यहोवा फुन स सिय्योन क बनाई ।
तउ उ आपन पूरी महिमा मँ परगट होइ ।
१७ जउन लोगन जिअत अहइ, उ ओनकर पराथना
सुनीहीं ।
उ ओनकर पराथनन क नज़र अंदाज़ नाही करी ।
१८ ओन बातन क लिखा ताकि भविस्स क पीढ़ी
पढ़इ ।
ताकि जउन लोग अवइ वाला समइ मँ पइदा
होइहीं यहोवा क स्तुति करिहीं ।
१९ यहोवा आपन ऊँच पवित्तर ठउर स खाले
निहारी
यहोवा सरण स खाले धरती पइ निहारी ।
२० उ कैदी लोगन क पराथना सुनी ।
उ ओन मनइयन क मुक्त करी जेनका राजा स
मउत दीन्ह गइ रही ।
२१ फुन सिय्योन मँ लोग यहोवा क बखान करिहीं ।
यरूसलेम मँ लोग यहोवा क गुण गइहीं ।
२२ अइसा तब होइ जब यहोवा लोगन क फिन
बटोरी,
अइसा तब होइ जब राजज यहोवा क सेवा करिहीं ।
२३ मोर सक्ती मोका बिसराइ दिहस ह ।
यहोवा मोर जिन्नगी घटाइ दिहस ह ।

२५ एह बरे मई कहेउँ, "मोर प्राण छोटी उमर मँ
जिन ल्या।
हे परमेस्सर, तू सदा अउ सर्वदा अमर रहब्या!
२५ पुराने जमाने मँ तू संसार रच्या ह।
तू खुद अपने हाथन स आकास रच्या।
२६ इ जगत अउ आकास नस्ट होइ जइहीं, मुला तू
ही सदा जिअत रहब्या।
उ सबइ ओदनन क नाई फट जइहीं।
ओदनन क नाई ही तू ओनका बदलब्या।
उ पचे सबहि बदल दीन्ह जइहीं।
२७ हे परमेस्सर, मुला तू कबहुँ नाहीं बदलत्या ;
तू सदा बरे अमर रहब्या।
२८ आज हम तोहार दास अही।
हमार संतान भविस्स मँ हिअँइ रइहीं
अउर ओनकर संतानन हिअँइ तोहार उपासना
करिहीं।"

दाऊद क एक ठु गीत।

१०३ १ हे मोर आतिमा, यहोवा क स्तुति करा।
हे मोर अंग-प्रत्यंग ओकरे पवित्तर
नाउँ क बड़कई करा।
२ हे मोर आतिमा, यहोवा क स्तुति करा
अउर ओकरे सबइ कृपालु कामन क जिन बिसरा।
३ उ तोहार पापन क छमा करत ह।
उ तोहार सबइ बेरामियन स तोहका चंगा करत ह।
४ उ तोहार प्राण क कब्र स बचावत ह,
अउर उ तोहका पिरम अउ करुणा स सज्रवत ह।
५ परमेस्सर हमका भरपूर उत्तिम वस्तुअन देत ह।
उ हमका फुन उकाब क नाई
जवान करत ह।
६ यहोवा खरा कामन करत ह।
परमेस्सर ओन लोगन क निआउ देत ह, जउने पइ
दूसर लोग अत्याचार किहन ह।
७ उ मूसा क आपन मारग सिखाएस।
उ इस्राएलियन क आपन कार्यन बताएस।
८ यहोवा करुणा स भरा अउर दयालु अहइ।
परमेस्सर सहनसील अउ पिरम स भरा अहइ।
९ यहोवा सदा ही आलोचना नाहीं करत।
अउर ठीक इहइ तहर उ सदा हम पइ कोहान नाहीं
रहत ह।
१० उ हम लोगन क संग हमार कीन्ह गवा पाप क
अनुसार बेउहार नाहीं करत ह,
अउर उ हमका वइसा सजा नाहीं देत जेका हम
हकदार अहइँ।
११ आपन बिस्सासी पइ परमेस्सर क पिरम वइसे
महान अहइ

जइसे धरती पइ अहइ ऊँचा उठा भवा अकास।
१२ उ हमरे पापन क हम से एँतना ही दूर हटाएस
जेतना पूरब क दूरी पच्छिम स अहइ।
१३ उ ओहे पइ जउन ओहसे डेरात ह वइसे ही
दयालु अहइ,
जइसे बाप आपन गदेलन पइ दाया करत ह।
१४ परमेस्सर हमार सब कछू जानत ह।
परमेस्सर जानत ह कि हम माटी स बना अही।
१५ परमेस्सर जानत ह कि मानव जिन्नगी नान्ह स
अहइ।
उ जानत ह हमार जिन्नगी घास जइसी अहइ।
परमेस्सर जानत ह कि हम लोगन क जिन्नगी
बनफूल जइसा अल्प अहइ।
१६ उ फूल जल्दी ही उगत ह।
फिन गरम हवा चलत ह अउर उ फूल मुरझात ह।
अउर फुन हाली ही तू लख नाहीं पउत्या कि उ
फूल कइसे ठउर पइ उगत बाटइ।
१७ मुला यहोवा क पिरम सदा बना रहत ह।
परमेस्सर सदा सदा ही आपन भगतन स पिरम
करत ह।
परमेस्सर क दया ओकरे गदेलन स गदेलन तलक
बनी रहत ह।
१८ उ अइसन पइ दयालु अहइ, जउन ओकरी करार
पइ चलत हीं।
उ अइसन पइ दयालु अहइ जउन ओकरे आदेसन
क पालन करत हीं।
१९ परमेस्सर क सिंहासन सरगे मँ बना अहइ।
हर चीज पइ ओकर हुकूमत अहइ।
२० हे सरगदूतो, यहोवा क स्तुति करा।
हे सक्तिसाली सरगदूतन जउन ओकरे वचन क
सुनत ह
अउर ओकर पालन करत, ओकर गुण गवा।
२१ हे सबइ ओकर दुस्मनो, यहोवा क स्तुति करा।
तू जउन ओकर सेवा करत ह
अउर उहइ करत ह जउन उ चाहत ह, ओकर गुण
गवा।
२२ हे समूचइ जगत, यहोवा क स्तुति करा
जउन हर जगह पइ सासन करत ह।
हे मोर आतिमा, यहोवा क बड़कई करा
१०४ १ हे मोर आतिमा, यहोवा क स्तुति
करा।
हे यहोवा, हे मोरे परमेस्सर, तू अति महान अहा।
तू महिमा अउ आदर क ओदना पहिरे अहा।
२ जइसे कउनो मनई चोगा पहिरत ही वइसा ही उ
प्रकास क पहिरत हीं।
पर्दा क नाई उ आकासे क फइलावत ह।

३ उ ओनके ऊपर आपन निवास स्थान बनाएस ।
 उ गहिर बादर क प्रयोग आपन रथ बनावइ मँ
 करत ह ।
 उ पवन क पखना पइ चढिके अकास पार करत ह ।
 ४ उ निज सरगदूतन क पवन क नाई बनावत ह ।
 उ निज सेवक क पवन क नाई बनाएस ।
 ५ इ उहइ अहइ जउन धरती क ओकरी नैव पइ
 निर्माण किहस ।
 इ कबहुँ न गिरी ।
 ६ उ जल क चादर स धरती क ढकेस ।
 जल पहाड़न क ढाँकि लिहस ।
 ७ तू आदेस दिहा अउर जल दूर हट गवा ।
 तू जल पइ गरज्या, अउर जल दूर भागा ।
 ८ पहाड़न स खाले घाटियन मँ ओन सबइ ठउरन
 पइ
 जेका तू ओकरे बरे तइयार किहे रहा या जल बहा ।
 ९ तू समुदर क चउहदी बाँध दिहा
 अउर फुन जल कबहुँ धरती क ढाँकइ नाही जाई ।
 १० उ पानी क पठवत ह
 जउन कि झरनन स पहाड़ियन क बीच मँ घाटियन
 मँ बहत ह ।
 ११ सबहिँ जंगली पसुअन क सबइ धारा पानी देत
 हीं,
 जेनमाँ जंगली गदहा तलक आइके पिआस
 बुझावत हीं ।
 १२ जंगल क परिन्दा तलावन क किनारे रहइ बरे
 आवत हीं ।
 अउ निचके टाइ भए वृच्छन क डालियन पइ
 गावत हीं
 १३ तू पहाड़न क ऊपर बर्खा पठया ह
 अउर ओन चिजियन ओनका दिहा जेका तू बनाया
 जउन ओनका चाही ।
 १४ परमेस्सर, पसुअन क खाइ बरे घास उपजाया,
 हम सर्म करित ह अउर उ हमका पौधा देत ह ।
 इ सबइ पौधन उ भोजन अहइँ जेका हम धरती स
 पाइत ह ।
 १५ परमेस्सर, हमका दाखरस देत ह, जउन हमका
 खुस करत ह ।
 हमार चाम नरम रखइ क तू हमका तेल देत ह ।
 हमका पुट्ट करइ क उ हमका खइया क देत ह ।
 १६ परमेस्सर लबानोन क जउन देवदारू क बिसाल
 वृच्छ लगाएस ह ।

ओन बिसाल वृच्छ खातिर ओनकर बढवार बरे
 बहोत पानी रहत ह ।
 १७ पंछी ओन वृच्छन पइ आपन घोसला बनावत
 हीं ।
 देवदार क वृच्छन पइ सारस क बसेरा अहइ ।
 १८ बनैले पहाड़ी बोकनरन क घर ऊँच पहाड़ मँ बना
 अहइँ ।
 बीच्छियन खुद क बड़की चट्टान क आइ मँ
 छुपावत अहइँ ।
 १९ तू मौसम क पता लगावइ बरे चाँद क रच्या ह ।
 सूरज सदा जानत ह कि ओका कहाँ बूढ़ब अहइ ।
 २० तू अधियारा बनाया जेहसे रात होइ
 ताकि जंगल क बनैला पसु एहर-ओहर घूमि
 सकिहीं ।
 २१ उ पचे झपटत सेर जब दहाड़त हीं तब अइसा
 लगत ह जइसे उ पचे यहोवा क पुकारत होइँ,
 जेका माँगइ स उ ओनका अहार देत ।
 २२ अउर पउ फाटइ पइ जीवजन्तु वापिस घरन क
 लउटत अउ आराम करत हीं ।
 २३ फिन लोग आपन काम करइ क बाहेर निकरत
 हीं ।
 साँझ तलक उ पचे काम मँ लगा रहत हीं ।
 २४ हे यहोवा, तू अचरज भरा बहुतेरा काम किहा ।
 धरती तोहरी वस्तुअन स भरी पड़ी अहइ ।
 तू जउन कछू करत अहा, ओहमा आपन विवेक
 देखाँत ह ।
 २५ इ समुदर क लखा, इ केतना बिसाल अहइ !
 हुआँ बहुतेरी जीव-जन्तु अहइ जेका गना नाही
 जाइ सकिहीं ।
 ओहमाँ कछू बिसाल अहइँ अउर कछू नान्ह ।
 २६ समुदर क ऊपर जलपोत तैरत हीं,
 अउर लिब्याथान जेका तू बनाएस ह
 समुदर मँ खेल-खेलत ह ।
 २७ यहोवा, इ सब कछू तोहरे आसरे पइ अहइ ।
 हे परमेस्सर, ओन सबहीं जीवन क खाना तू ठीक
 समइ पइ देत अहा ।
 २८ हे परमेस्सर, तू ही अहा जउन सबइ जीव-
 जन्तुअन क खाना जेका उ पचे खात हीं,
 उपलब्ध करावत अहा ।
 २९ फुन जब तू ओनसे मुँह मोड़ लेत अहा तब उ
 पचे डेराइ जात हीं ।
 ओनकर साँस रुकि जात हीं ।
 उ पचे दुबल होइ जात हीं अउर मर जात हीं ।

१०४ :२६ लिब्याथाम इ साइद एक ठु बिसाल समुन्दरी दैत्य रहा । कछू लोगन क विचार अहइ कि इ एक मगरमच्छ अहइ । दूसर लोगन क विचार अहइ कि इ एक समुदर उँफरेट ह । कछू लोग कहत हीं कि इ जादूगर क मदद स सूर्य ग्रहण पइदा करत ह ।

अउर ओनकर देह फुन धूरि मँ बदलि जात हीं ।
 ३० जब तू आपन आतिमा भेज्या ह, उ ओहसे
 जीवित होइ जात ह अउर
 धरती पइ जिन्नगी क संग फुन नवा कइ दीन्ह
 जात ह ।
 ३१ यहोवा क महिमा सदा-सदा बनी रहइ ।
 यहोवा आपन रचना स सदा आनन्द मँ रहइ ।
 ३२ यहोवा क दृष्टि स इ धरती काँप उठी ।
 पहाड़न स धुआँ उठइ लग जाइ ।
 ३३ मई जिन्नगी भइ यहोवा बरे गाउब ।
 मई जब तलक जिअत हउँ यहोवा क गुण गावत
 रहब ।
 ३४ मोर सोच-बिचार ओका खुस करी ।
 मई यहोवा क संग खुस अहउँ ।
 ३५ धरती स पाप क लोप होइ जाइ ।
 दुट्ट लोग सदा बरे मिटि जाइ ।
 हे मोर आतिमा,
 यहोवा क स्तुति करा ।

१०५ यहोवा क धन्यवाद करा, ओकरे नाउँ
 क पुकारा ।

रास्टरन क ओकरे अद्भुत कारजन क बारे मँ
 बतावा ।
 २ यहोवा बरे तू गावा, तू ओकर बड़कई क गीत
 गावा ।
 ओन सबहि अचरज स भरी बातन कर वर्णन करा
 जेनका उ करत ह ।
 ३ यहोवा क पवित्तर नाउँ पइ गर्व करा ।
 ओ सबहि लोगो जउन यहोवा क उपासक अहा,
 तू पचे खुस होइ जा ।
 ४ सामरथ पावइ क तू यहोवा क लगे जा ।
 सहारा पावइ क तू ओकरे लगे जा ।
 ५ ओन अद्भुत बातन क सुमिरा जेनका यहोवा
 करत ह ।
 ओकरे अचरज कर्म अउर ओकर विवेक स भरा
 फइसला क याद राखा ।
 ६ तू परमेस्सर क सेवक इब्राहीम क संतान अहा ।
 तू याकूब क संतान अहा, उ मनई जेका परमेस्सर
 चुने रहा ।
 ७ यहोवा ही हमार परमेस्सर अहइ ।
 सारे संसार पइ यहोवा क सासन अहइ ।
 ८ उ आपन करार क सदा याद रखत ह ।
 उ आपन आदेसन क हजार पीढ़ियन तलक याद
 रखत ह ।

१ इब्राहीम क संग परमेस्सर करार बाँधे रहा ।
 परमेस्सर इसहाक क वचन दिहे रहा ।
 १० उ याकूब क आपन करार क कानून क रूप मँ दिहे
 रहा ।
 परमेस्सर इस्राएल क संग करार किहस ।
 इ सदा सदा ही बना रही ।
 ११ परमेस्सर कहे रहा, “मई कनान क भुईया क
 तोहका आपन सम्पत्ति क रूप देब ।”
 १२ जब इब्राहीम क परिवार छोटा रहा,
 अउर उ पचे हुवाँ महज ही बिदेसी रहेन ।
 १३ उ पचे एक रास्टर स दूसर रास्टर मँ,
 एक राज्ज स दूसर राज्ज मँ धूमत रहेन ।
 १४ मुला परमेस्सर उ घराने क दूसर लोगन स
 नस्कान नाहीं पहाँचइ दिहस ।
 परमेस्सर राजा लोगन क सावधान किहस कि उ
 पचे ओका हानि न पहाँचावइ ।
 १५ उ ओनका चेताउनी दिहे रहेन, “मोर
 अभिसिक्त भवा क **तू नस्कान जिन
 पहाँचावा ।
 तू मोर कउनो नबियन क बुरा जिन करा ।”
 १६ परमेस्सर उ देस मँ अकाल पटएस ।
 अउर लोगन क लगे खाइ क खूब भोजन नाहीं
 रहा ।
 १७ मुला यहोवा एक मनई क ओनके लगे जेकर
 नाउँ यूसुफ रहा, ओनका अगवा मिस्र तलक
 पटएस ।
 यूसुफ क एक ठु दास क नाई बेचा ग रहा ।
 १८ उ पचे यूसुफ क गोड़ मँ जंजीर डालेन, अउर उ
 ओका विनम्र बनाएस ।
 उ पचे ओकरी गटइ मँ एक लोहे क कड़ा डाइ
 दिहन ।
 १९ यूसुफ क कैद मँ रखा गवा रहा जब तलक उ
 पचे बातन जउन उ कहे रहा फुरइ घटि नाहीं
 गइन ।
 यहोवा सुसन्देस स प्रमाणित कइ दिहस कि
 यूसुफ नीक रहा ।
 २० मिस्र क राजा, आग्या दिहन कि यूसुफ क
 बंधनन स अजाद कइ दीन्ह जाइ ।
 उ रास्टर क एक नेता ओका कैद स आजाद कइ
 दिहस ।
 २१ यूसुफ क आपन घर बार क अधिकारी बनाइ
 दिहन ।
 यूसुफ राज्ज मँ हर बात क धियान रखइ लाग ।

**१०५ : १५ अभिसिक्त भवा क इ साइद कि राजन, राजकुमारन, या नबियन क ओर इसारा करत ह
 जेनका तेल स अभिसिक्त कीन्ह गा रहेन इ दिखावइ बरे कि उ पचन्क परमेस्सर क जरिए चुना गवा
 रहेन ।

२२ यूसुफ आपन राजकुमार क वइसा ही निर्देस देत
रहा जइसा उ चाहेन।
यूसुफ राजा क सलाहकारन क सिच्छा दिहे रहा।
२३ जब इस्राएल मिस्र गवा,
याकूब हाम क देस ^{११}मँ रहइ लाग।
२४ याकूब क सन्तानन बहोत स होइ गएन।
उ पचे मिस्र क लोगन स जियादा बलवान बन
गएन।
२५ एह बरे मिस्री लोग याकूब क घराना स घिना
करइ लागेन।
मिस्र क लोग आपन दासन क खिलाफ कुचक्र
रचइ लागेन।
२६ एह बरे यहोवा निज सेवक मूसा
अउर हारून जेका उ चुने रहा, पठएस।
२७ उ हाम क भुइँया मँ अचरज
अउ अद्भुत करम किहेस।
२८ परमेस्सर गहिरा अँधियारा पठए रहा,
मुला मिसिरयन ओकर नाही सुनेन।
२९ तउ फुन परमेस्सर पानी क खून मँ बदल दिहस,
अउर ओनकर सबइ मछरियन मरि गइन।
३० बाद मँ, मिस्री लोगन क भुइँया मेघन स भरि
गवा।
हिआँ तलक कि मेघन राजा क सयन कच्छ तलक
भरि गएन।
३१ यहोवा आदेस दिहा,
अउर माखियन अउ पिस्सू आएन
अउर उ सबइ हर कतहँ फइल गएन।
३२ परमेस्सर बर्खा क ओलन मँ बदलि दिहस।
मिसिरयन क देस मँ हर कतहँ आगी अउ बिजुरी
गिरइ लाग।
३३ परमेस्सर मिसिरयन क अंगूरे क बिया अउ
अंजीर क बृच्छ बर्बाद कइ दिहस।
परमेस्सर ओनकर देस क हर बृच्छ क तहस नहस
कइ दिहस।
३४ परमेस्सर हुकुम दिहस अउर टिड्डी दल आइ
गएन।
टिड्डी आइ गइन अउर ओनकर गनती अनगिनत
रहीं।
३५ टिड्डी दल अउ टिड्डीयन उ देस क सबहिं
पौधन चट कइ गएन।
उ सबइ धरती पइ जउन भी फसलन ठाइ रहिन,
सबहिं क खाइ डिएन।

३६ फिन परमेस्सर मिसिरयन क पहिलउटी सन्तान
क मार डिएस।
परमेस्सर ओनकर सब स बड़कन पूतन क मारेस।
३७ बाद मँ परमेस्सर निज सेवकन क मिस्र स
बाहेर निकारेस।
उ पचे आपन संग सोना अउ चाँदी लइ आएन।
परमेस्सर क कउनो भी सेवक नाही लइखइन।
३८ ओन लोगन क जात भए लखिके मिस्र आनन्द
मँ रहा,
काहेकि उ पचे ओनसे डेराइ ग रहेन।
३९ परमेस्सर ओनके ऊपर कमरी जइसा एक बादर
फइलाएस।
उ राति मँ उजियारा देइ क बरे आगी क खम्भा क
काम मँ लिआएस।
४० लोग खाइ क माँग किहन अउ परमेस्सर ओनके
खातिर बटेरन क लइ आवा।
परमेस्सर अकास स ओनका भरपूर खइया क
दिहस।
४१ परमेस्सर चट्टान क फाडेस अउर जल उछरत
भवा बाहेर फूटि पड़ा।
उ रेगिस्ताने क बीच एक ठु नदी बहइ लाग।
४२ उ आपन पवित्तर वचन सुमिरेस
जउन उ आपन दास इब्राहीम क संग किहे रहा।
४३ परमेस्सर आपन खास क मिस्र स बाहेर
निकारि लिआवा।
लोग खुसी क गीत गावत भए अउर खुसियन
मनावत भए बाहेर आइ गएन।
४४ फिन परमेस्सर निज भगतन क उ देस दिहस
जहाँ अउर लोग रहत रहेन।
परमेस्सर क भगतन उ सबइ चिजियन क पाइ
लिहन जेनके बरे अउर लोग मेहनत किहे
रहेन।
४५ परमेस्सर अइसा एह बरे किहस ताकि लोग
ओकर व्यवस्था मानइँ।
परमेस्सर अइसा एह बरे किहस ताकि उ पचे
ओकरी सिच्छा पइ चलइँ।
यहोवा क गुण गावा।
१ यहोवा क बड़कई करा।
१०६ यहोवा क धन्यवाद करा काहेकि उ
उत्तिम अहइ।
परमेस्सर क पियेम सदा ही रहत ह।
२ फुरइ यहोवा केतना महान अहइ, एकर बखान
कउनो मनई कइ नाही सकत।

^{११}१०५:२३ हाम क देस मिस्र क सामिल कइ क उत्तर-पूर्व आफ्रीकी देसन क दूसर नाउँ, हाम नोह क
पूत रह।

परमेस्वर क पूरी बड़कई कउनो नाहीं कइ सकत ।
 ३ जउन लोग परमेस्वर क आदेस क पालन करत
 हीं, उ पचे धन्न अहइ ।
 उ पचे हमेसा उत्तम करम करत हीं ।
 ४ यहोवा, जब तू आपन भगतन पइ कृपा करा
 मोका याद करा ।
 मोर भी उद्वार करइ बरे याद करा ।
 ५ यहोवा, मोका भी ओन भली बातन मैं हींसा
 बटावइ द्या
 जेनका तू आपन लोगन बरे करत अहा ।
 तू आपन रास्ट्रन क संग मोका भी खुस होइ द्या ।
 तोह पइ तोहार लोगन क संग मोका भी गर्व करइ
 द्या ।
 ६ हम पचे वइसेन ही पाप किहेन ह जइसे हमार
 पुरखन किहेन ह ।
 हम गलत किहेन ।
 हम बुरा काम किहे अही ।
 ७ हे यहोवा, मिस्र मैं हमार पुरखन तोहार अचरज
 कर्मन स कछ्छू भी नाहीं सीखेन ।
 उ पचे तोहरे पिरम क
 अउर तोहार करुणा क याद नाहीं रखेन ।
 हमार पुरखन हुआँ लाल सागर क किनारे तोहरे
 खिलाफ भएन ।
 ८ मुला परमेस्वर निज नाउँ क कारण ओनका
 बचाए रहा ।
 उ आपन सक्ति क परगट किहेस ।
 ९ परमेस्वर हुकुम दिहस अउर लाल सागर झुरान
 होइ गवा ।
 उ ओनका उ गहिर समुदर स अइसा निकांर चला
 जइसे कउनो रेगिस्तान होइ ।
 १० परमेस्वर हमरे पुरखन क ओनकर दुस्मनन स
 बचाएस ।
 उ ओनका आपन दुस्मनन स आजाद किहस ।
 ११ अउर फिन ओनकर दुस्मनन क उहइ सागर क
 बीच ढाँपिके बोर दिहस ।
 ओनकर एक दुस्मन बचिके निकर नाहीं पाएस ।
 १२ तब हमार पुरखन परमेस्वर क वचन पइ
 बिस्वास किहन ।
 उ पचे ओकर गुण गाएन ।
 १३ मुला हमार पुरखन ओन बातन क हाली बिसरि
 गाएन जउन परमेस्वर किहे रहा ।
 उ पचे परमेस्वर क सम्मति पइ कान नाहीं दिहन ।
 १४ उ पचे दूसर चिजियन क कामना किहेन ।
 रेगिस्तान मैं उ पचे परमेस्वर क परखेन ।
 १५ मुला हमार पुरखन जउन कछ्छू भी माँगेन
 परमेस्वर ओनका दिहस

मुला परमेस्वर ओनका एक महामारी भी दइ
 दिहस ।
 १६ लोग मूसा स डाह रखइ लागेन
 अउर हारून स उ पचे डाह रखइ लागेन जउन
 यहोवा क पवित्र याजक रहा ।
 १७ एह बरे धरती फट गई अउ दातान क निगल
 गवा ।
 अउर उ अबिराम क समूह क निगल लिहस ।
 १८ फिन आगी ओन
 दुट्ट लोगन क बारि दिहस ।
 १९ ओ लोग होख क पहाड़े पइ एक टु सोना क
 बछ्छवा बनाएन ।
 उ पचे उ मूरति क पूजा करइ लागेन ।
 २० उ पचे आपन महिमावान परमेस्वर क
 एक घास खाइवाला बछ्छवा क प्रतिमा स बदल
 डालेन ।
 २१ हमार पुरखन परमेस्वर क बिसरि गाएन जउन
 ओनका मुक्ति दियाए रहा ।
 उ पचे परमेस्वर क बिसरि गाएन जउन मिस्र मैं
 अचरज भरा करम किहे रहा ।
 २२ परमेस्वर हाम क देस मैं अचरज भरा करम किहे
 रहा ।
 परमेस्वर लाल सागर क लगे भय विस्मय भरा
 काम किहे रहा ।
 २३ परमेस्वर ओन लोगन क नस्ट करइ चाहत
 रहा ।
 मुला परमेस्वर क चुना भवा सेवक मूसा,
 परमेस्वर क समन्वा ओन लोगन क नास करइ स
 बचाइ बरे बीच मैं आइ गाएन ।
 २४ तब ओन लोग उ अद्भुत देस कनान मैं जाइ स
 मना कइ दिहन ।
 उ पचे ओकरे वाचा क बिस्वास नाहीं किहेस ।
 २५ आपन तम्बुअन मैं उ पचे सिकाइत करत रहेन ।
 हमार पुरखन परमेस्वर क बात मानइ स नकारेन ।
 २६ तउ परमेस्वर किरिया खाएस
 कि उ पचे रेगिस्तान मैं मरि जइहीं ।
 २७ परमेस्वर किरिया खाएस कि ओनकर सन्तानन
 क दूसर लोगन क हरावइ देइ ।
 परमेस्वर कसम खाएस कि उ हमरे पुरखन क देसन
 मैं छितराइ ।
 २८ बाद मैं परमेस्वर क लोग “बाल-पिऑर” मैं
 “बाल” क पूजइ करइ सुरू कइ दिहेन ।
 उ पचे उ माँस खाइ लागेन जेका निर्जीव देवतन
 पइ चढ़ावा ग रहा ।
 २९ यहोवा ओन लोगन क करमन पइ बहोत कोहाइ
 गवा ।

अउर उ ओन लोगन क खिलाफ महामारी
लिआएन ।

३० मुला पीनहास बिनती किहस

अउ परमेस्सर उ बियधि क रोकेस

३१ परमेस्सर इ काम क ओकरे बरे आवइवालन

पीद्वियन बरे बहोत उत्तिम करम समझेस ।

३२ लोग मरिबा मैं यहोवा क किरोध भड़काएन,
अउर ओकरे कारण मूसा स बुरा काम कराएन ।

३३ उ सबइ लोग मूसा क बहोत उदास किहन ।
तउ मूसा बिना ही बिचारे बोल उठा ।

३४ तउ उ कनान क रास्टर क नस्ट नाही किहस,
हाँलाकि यहोवा ओनका इ करइ बरे कहे रहा ।

३५ इस्राएल क लोग दूसर लोगन स हिल मिल
गाएन,

अउर उ पचे भी वइसेन काम करइ लागेन जइसे
दूसर लोग करत रहेन ।

३६ उ सबइ दूसर लोग परमेस्सर क जनन बरे फंदा
बन गाएन ।

परमेस्सर क लोग ओन देवन क पूजइ लागेन
जेनकर उ पचे दूसर लोग पूजा करत रहेन ।

३७ हिआँ तलक कि परमेस्सर क जन आपन ही
गदेलन क हत्या करइ लागेन ।

अउर उ पचे ओन गदेलन क ओन दानवन क
प्रतिमा पइ अर्पित करइ लागेन ।

३८ परमेस्सर क लोग निर्दोष गदेलन क हत्या
किहन ।

उ पचे आपन ही गदेलन क मारि डाएन अउर
ओनका कनान क देवन क अर्पित किहेन ।

उ पचे खून स धरती क दूसित किहेन ।

३९ उ पचे आपन कामन स असुद्ध भएन

अउर आपन कार्यन दुआरा अबिस्सासी बन गए
रहेन ।

४० परमेस्सर आपन ओन लोगन पइ कोहाइ गवा ।
परमेस्सर ओनसे तंग आइ चुका रहा ।

४१ तब परमेस्सर आपन ओन लोगन क दूसर
जातियन क दइ दिहस ।

परमेस्सर ओन पइ ओनकर दुस्मनन क हुकूमत
करवावइ दिहस ।

४२ ओनकर दुस्मनन ओन पइ अत्याचार किहन
अउ ओनकर जिअब बहोत कठिन कइ दिहन ।

४३ परमेस्सर आपन लोगन क बहोत बार बचाएस ।
मुला उ पचे ओनका स मुँह मोड़ लिहन ।

अउर उ पचे अइसी बातन करइ लागेन जेनका उ
पचे करइ चाहत रहेन ।

एह बरे उ पचे आपन पाप क कारण हराइ दीन्ह
गवा रहेन ।

४४ मुला जब कबहूँ परमेस्सर क जनन पइ विपद
पड़ी उ पचे सदा ही मदद पावइ क परमेस्सर
क गोहराएन ।

परमेस्सर हर दाई ओनकर सबइ पराथना क
सुनेस ।

४५ परमेस्सर सदा आपन करार क याद राखेस ।

परमेस्सर आपन महा पिरम स ओनका सदा ही
सुख चैन दिहस ।

४६ परमेस्सर ओन लोगन बरे

दूसर कैदियन क समन्वा दयालुता दिखाएस ।

४७ यहोवा हमार परमेस्सर, हमार रच्छा किहस ।

परमेस्सर ओन दूसर देसन स हमका एकट्ठा कइके
लइ आवा,

ताकि हम ओकरे पवित्तर नाउँ क गुणगान कइ
सकी ;

तकि हम ओकर बड़कई क गीत गाइ सकी ।

४८ इस्राएल क परमेस्सर यहोवा क धन्य कहा ।

परमेस्सर सदा ही जिन्दा रहत आवा ह ।

उ सदा ही जिन्दा रही ।

अउर सबइ जन बोलइँ, “आमीन ।”

यहोवा क गुण गावा ।

पाँचवा भाग

(भजन १०७-१५०)

१ यहोवा क धन्यवाद द्या, काहेकि उ
उत्तिम अहइ ।

ओकर पिरम हमेसा रहत ह ।

२ हर कउनो अइसा मनई जेका यहोवा बचाएस ह,
एँन रास्टरन क कहा ।

हर कउनो अइसा मनई जेका यहोवा आपन
दुस्मनन स छोड़ाएस ओकर गुण गावा ।

३ यहोवा आपन लोगन क बहोत स अलग-अलग
देसन स बटोरेस ह ।

उ ओनका पूरब अउ पच्छिम स, अउर उत्तर अउ
दक्खिन स जुटाएस ह ।

४ कछू लोग अइसे रेगिस्तान मँ खोइ गए रहेन
जहाँ कउनो लोग नाही ।

उ सबइ लोग अइसेन एक ठु नगर क खोज मँ
रहेन ।

मुला ओनका कउनो अइसा नगर नाही मिला ।

५ उ सबइ लोग भुखान अउ पियासा रहेन

अउर उ पचे दुर्बल होत जात रहेन ।

६ उ पचे संकट मँ रहेन, तउ उ पचे मदद पावइ क
यहोवा क गोहराएन ।

उ ओन सबइ क आपन संकटन स बचाइ लिहस ।

७ यहोवा ओनका सोझइ उ सहरन मँ लइ गवा
जहाँ उ पचे बसि सकिहीं ।
८ यहोवा क ओकरे विस्सस्नीय पिरम बरे
अउर ओन अद्भुत करमन बरे धन्यवाद द्या
जेनका उ सबइ लोगन बरे करत ह ।
९ पियासी व्यक्ति परमेस्सर क सन्तुट्ठी बरे
अउर उत्तम वस्तु अन स भूखी व्यक्ति क पेट भरत
ह ।
१० कछू लोगन क कारावासन मँ राखेन, जहाँ बहोत
अधियारा रहा ।
उ पचे कस्ट झेलन, अउ जंजीर मँ बांध दीन्ह
गएन ।
११ काहेकि उ पचे परमेस्सर क वचन क खिलाफ
बिद्रोह किहेन
अउर सर्वोच्च परमेस्सर क सलाह क सुनइ स
नकारे रहेन ।
१२ उ ओनका कठिनाइयन देइके
उ पचन्क दिमाग क विनमूर बनाइ दिहेस ।
उ पचे टोकरन खाएन अउर उ पचे भहराइ पडेन,
अउर ओनका सहारा देइ क कउनो भी नाहीं मिला ।
१३ उ पचे संकट मँ रहेन, तउ उ पचे मदद पावइ क
यहोवा क गोहराएन ।
उ ओन सबइ क आपन संकटन स बचाइ लिहस ।
१४ परमेस्सर ओनका ओनकर अधियारे जेलन स
उवार लिहस ।
परमेस्सर उ सबइ जंजीरन, अउर बंधन क काटेस
जेनसे ओनका बाँधा गवा रहा ।
१५ यहोवा क ओकरे विस्सस्नीय पिरम बरे
अउर ओन अद्भुत करमन बरे धन्यवाद द्या
जेनका उ सबइ लोगन बरे करत ह ।
१६ परमेस्सर हमार दुस्मनन क हरावइ मँ हमका
मदद देत ह ।
ओनकर काँसे क दुआरन क परमेस्सर तोड़ गिराइ
सकत ह ।
परमेस्सर ओनकर दुआरन पइ लगी भइ लोहा क
आगल क छिन्न-भिन्न कइ सकत ह ।
१७ कछू मूरख लोग आपन अपराधन
अउ पापन क कारण पीरा झेलेन ह ।
१८ ओन लोग खइया क इच्छा तजि दिहेन
अउर उ पचे मरे भए स होइ गएन ।
१९ उ पचे संकट मँ रहेन, तउ उ पचे मदद पावइ क
यहोवा क गोहराएन ।
उ ओन सबइ क आपन संकटन स बचाइ लिहस ।
२० परमेस्सर आदेस दिहस अउर लोगन क चँगा
किहस ।
इ तरह उ पचन्क बर्बाद होइ स वच गएन ।

२१ यहोवा क ओकरे विस्सस्नीय पिरम बरे
अउर ओन अद्भुत करमन बरे धन्यवाद द्या
जेनका उ सबइ लोगन बरे करत ह ।
२२ ओनका यहोवा क धन्यवाद देइ बरे बलि अर्पित
करइ द्या,
उ जउन किहे अहइ ओन बातन क आनन्द क संग
बखाना ।
२३ कछू लोग आपन काम करइ
आपन नइयन स समुद्र पार कइ गएन ।
२४ ओन लोगन अइसी बातन क लखेन ह जेनका
यहोवा कइ सकत ह ।
उ पचे ओन अद्भुत बातन क लखेन ह जेनका
यहोवा सागर पइ किहे रहा ।
२५ परमेस्सर आदेस दिहस, फिन एक तेज हवा
चलइ लाग ।
बड़की स बड़की लहरन आकार लेइ लागिन ।
२६ लहरन एतना ऊपर उठिन
जेतना अकास होइ
तूफान एतना भयानक रहा कि लोग डेराइ गएन ।
२७ लोग लइखड़ात रहेन, भहरान जात रहेन
जइसे नसा मँ धुत होइ ।
खेवैया ओनकर बुद्धि जइसे बियर्थ होइ गइ होइ ।
२८ उ पचे संकट मँ रहेन, तउ उ पचे मदद पावइ क
यहोवा क गोहराएन ।
उ ओन सबइ क आपन संकटन स बचाइ लिहस ।
२९ परमेस्सर तूफान क रोकेस
अउर लहरन सान्त होइ गइन ।
३० खेवैया खुस रहेन कि सागर सांत भवा होइ
गवा ।
परमेस्सर ओनका अहइ सुरच्छित ठउरे पइ लइ
गवा जहाँ उ पचे जाइ चाहत रहेन ।
३१ यहोवा क ओकरे विस्सस्नीय पिरम बरे अउर
ओन अद्भुत करमन बरे धन्यवाद द्या
जेनका उ सबइ लोगन बरे करत ह ।
३२ महान सभा क बीच ओनका ऊँच होइ द्या ।
नेतन मिलन मँ ओकर बड़कई करइ द्या ।
३३ उ नदियन क रेगिस्ताने मँ बदल दिहस ।
भुइया सुखाइ बरे उ झरनन क प्रवाह क रोकेस ।
३४ परमेस्सर उपजाऊ भुइया क बेकार क रेही
भुइया मँ बदल दिहस ।
काहेकि हुआँ बसे दुट्ट लोग बुरे करम किहे रहेन ।
३५ अउर परमेस्सर मरुभूमि क झीलन क धरती मँ
बदलेस ।
उ झुरान धरती स जल क स्रोत बहाइ दिहस ।
३६ परमेस्सर भूखे लोगन क उ अच्छी धरती पइ
लइ गवा ।

अउर ओन लोग आपन रहइ बरे हुआँ एक ठु सहर बसाएन ।

३७ फिन ओन लोग आपन खेतन मँ बीजन क रोप दिहन ।

अउर अंगूर क बगिया लगाएन, अउर उ पचे एक उत्तम फसिल पाइ लिहन ।

३८ परमेस्सर ओन लोगन क आसीबाँद दिहस ।

ओनकर परिवार फलइ-फूलइ लोगन ।

ओनके लगे बहोत सारे पसु भएन ।

३९ भयानक महामारी अउर संकट क कारण

ओनकर परिवार नान्ह अउर कमजोर होइ गएन ।

४० परमेस्सर ओनकर प्रमुखन क कुचरि दिहस अउर बेज्जत किहे रहा ।

उ ओनका दिसाहीन रेगिस्ताने मँ भटकइ दिहस ।

४१ मुला परमेस्सर तबहिँ ओन दीन लोगन क ओनकर बिनती स बचाइके निकारि लिहस ।

अब तउ ओनकर घरानन बड़वार अहइँ, ओतना बड़वार जेतना भेड़िन क झुण्ड ।

४२ इमानदार मनइयन एका देखत हीँ अउर आनन्दित होत हीँ,

किन्तु दुट्ट लोग एका लखत हीँ आपन मुँह बंद रखत हीँ ।

४३ एक विवेकी मनई ओन बातन क धियान देत ह ।

अउर जउन कउनो मनई बुद्धिमान अहइ, यहोवा के सच्चा पिरम क बारे मँ जान जाइहीँ ।

वाद्य यंत्र दुआर बजा भवा दाऊद क एक ठु गीत ।

१०८ १ हे परमेस्सर, मई आपन हिरदय क तइयार कहेउँ ह ।

मई गाउब अउर

उमंग क संगीत बजाउब ।

२ मोर आतिमा, जगा !

वीणाओ अउर सारंगियो, जगा ।

आवा हम भोर क जगाइ !

३ हे मोर सुआमी, मई तोहरे बड़कइ क रास्ट्रन क समन्वा गाउब ।

मई विभिन्न लोगन क बीच तोहार स्तुति करब ।

४ हे परमेस्सर, तोहार पिरम ओतँना ऊँच अहइ जेतँना अकास ।

तोहार बिस्सास ओतँना ऊँच अहइ जेतँना बादरन ।

५ हे परमेस्सर, तोहार सम्मान अकासन क ऊपर होइ,

तोहार महिमा क सारा जगत क ढाँपि लेइ द्या ।

६ आपन भगत लोगन क बचावइ बरे इ करा ।

मोर बिनती क जवाब द्या, अउर हमका बचावइ क आपन महासक्ति क प्रयोग करा ।

७ परमेस्सर आपन मन्दिर स बोला ।

उ कहेस, “मई खुसी स चिचियाब ।

मई आपन लोगन क सोकेम प्रदान करब,

अउर सुक्कोत क घाटी ओनकर होइ ।

८ गिलाद अउ मनस्से मोर अहइँ ।

एप्रैम मोर सिरवाण अहइ

अउर यहूदा मोर राजदण्ड अहइ ।

९ मोआब मोर गोइ पखारइ क पात्र बनी ।

एदोम उ दास होइ जउन मोर पादूका लइके चली,

मई पलिस्तिनन क हराइ क पाछे, विजय-उल्लास स चिचियाब ।”

१० मोका दुस्मन क दुर्ग मँ कउन लइ जाइ ?

एदोम क हरावइ कउन मोर मदद करी !

११ हे परमेस्सर, का इ फुरइ नाहीँ बाटइ कि तू हमका तजि दिहा ह ?

अउर का तू हमरी सेना क संग नाहीँ रहब्या ?

१२ हे परमेस्सर, कृपा कइके, हमरे दुस्मन क हरावइ मँ हमार मदद करा ।

मनइयन तउ हमका बचाइ नाहीँ सकतेन ।

१३ हम महान कारज कइ सकित ह सिरिफ जब परमेस्सर हमार साथ होइ ।

सिरिफ परमेस्सर हमरे दुस्मनन क हराइ सकत ह ।

संगीत निदेसक बरे दाऊद क एक ठु स्तुति गीत ।

१०९ १ हे परमेस्सर, जब मई तोहरे आगे पराथना करउँ

तउ चुप नाहीँ रह्या ।

२ लोग मोरे बारे मँ बुरी बातन अउ झूठ बोलत ह ।

उ पचे मोरे बारे मँ उ सबइ कहत अहइँ जउन फुरइ नाहीँ बाटइ ।

३ लोग मोरे बारे मँ घिना स बोलत अहइँ ।

उ पचे मोर खिलाफ बिना कारण हमला करत हीँ ।

४ मई ओनका पिरम किहेउँ, फिर भी उ पचे मोहसे दुस्मनी करत हीँ ।

जद्यपि मई पराथना मँ वफ़ादार हउँ ।

५ मई ओन मनइयन क संग भला किहे रहेउँ ।

मुला उ पचे मोरे बरे बुरा करत अहइँ ।

मई ओनसे पिरम किहेउँ,

मुला उ पचे मोसे बइर रखत अहइँ ।

६ ओकरे खिलाफ एक ठु दुट्ट मनई क नियुक्त करा,

अउर कउनो दोख लगवइया ओका दोख लगावइ बरे ओकरे बगल मँ खड़ा करा ।

७ ओनमाँ दोख पावइ द्या जब उ अदालत मँ
निआउ पइहीं,
ओकर पराथना क ओकरे पाप क सबूत होइ द्या ।
८ मोर दुस्मन क हाली मरि जाइ द्या ।
ओकरे क जगह कउनो दूसर क लेइ द्या ।
९ मोरे दुस्मनन क सन्तानन क अनाथ कइ द्या
अउर ओकरी पत्नी क तू रौंइ कइ द्या ।
१० ओनका आवारा अउर भिखारी होइ द्या,
अउर ओनका आसुर्य क खोज तब तलक करइ द्या
जब तलक कि ओकर आपन घर बर्बाद न होइ
जाइ ।
११ मोरे दुस्मन कर्जदार लोगन क जउन कछू मोर
दुस्मन क लगे होइ लइ जाइ द्या ।
अजनबियन क ओकर मेहनत क कमाइ क लूटिके
जाइ द्या ।
१२ कउनो मनई क मोरे दुस्मन पइ कउनो दाया न
देखाँवइ ।
अउर ओकरे अनाथ गदेलन पइ कउनो भी मनई
दाया नाहीं देखाँवइ ।
१३ मोर दुस्मन क सन्तानन बर्बाद कइ द्या ।
आवइवाली पीढ़ी स ओकर नाउँ मिटइ द्या ।
१४ मोरे दुस्मन क पुरखन क पापन क परमेस्सर सदा
ही याद राखइ ।
ओकरे महतारी क पापन न मेटाइ ।
१५ यहोवा सदा ही ओन पापन क याद रखी ।
अउर उ लोगन बरे मोरे दुस्मन क बिसरइ क कारण
होइ ।
१६ काहेकि दुट्ट लोगन कउनो भी अच्छा करम
कबहुँ नाहीं किहेन
अउर उ लोगन क बिना आसा क मउत मँ धकेल
दिहा ।
उ दीन लोगन असहाय लोगन क जिअब कठिन
बनाइ दिहा ।
१७ ओन दुट्ट लोगन क सरापब भावत रहा ।
तउ अहइ सराप ओह पइ लउटिके गिर जाइ ।
उ बुरा मनई असीस कबहुँ नाहीं दिहस कि लोगन
बरे कउनो अच्छी बात घटइ ।
तउ ओकरे संग कउनो भी भली बात मत होइ द्या ।
१८ सराप ओकरे बरे ओढनन क नाई होइ ।
सराप ओकरे सरीर मँ पानी क नाई भरि जाइ ।
अउर सराप ओकरे हड्डियन मँ
चर्बी क नाई रहइ ।
१९ उ दुट्ट मनई बरे सराप क ओढना बनी द्या ।

सराप क ओकरे बरे हमेसा बरे कमर बन्द बनइ द्या ।
२० यहोवा मोहे पइ दोख लगावइवालन क अउर
ओन लोगन क जउन मोरे खिलाफ बुरा
जोजना बनावत ह क,
उ सबइ चिजियन क भुगतान क रूप मँ देइ द्या ।
२१ किन्तु हे यहोवा, तू मोर सुआमी अहा ।
तउ मोरे संग अइसा बेउहार करा जेहसे तोहरे नाउँ
क जस बाढ़इ ।
तोहार करुणा महान अहइ, तउ मोर रच्छा करा ।
२२ काहेकि मइँ बस एक गरीब अउर असहाय
व्यक्ति अहउँ ।
मइँ फुरइ दुःखी अहउँ ।
२३ मोका अइसा लागत बाटइ जइसे मोर जिन्नगी
साँझ क समइ क लम्बी छाया क तरह बीति
चुकी बाटइ ।
मोका अइसा लागत रहा मइँ महसूस करत हउँ
कि मइँ किरवा क नाई हउँ जउन मोका हिराइ
दिहेस ह ।
२४ उपवास क कारण मोर घुटना दुर्बल होइ ग
अहइ ।
मोर वजन घटत ही जात अहइ, अउर मइँ झुरान
जात अहउँ ।
२५ बुरे लोग मोका अपमानित करत हीं ।
उ पचे मोका घूरत अउ आपन मूँड़ी मटकावत हीं ।
२६ यहोवा मोर परमेस्सर, मोका सहारा द्या ।
आपन बिस्ससनीय पिरम देखाँवा अउर मोका
बचाइ ल्या ।
२७ फुन उ पचे लोग जान जइहीं कि तू ही मोका
बचाया ह ।
ओनका पता चल जाइ कि उ तोहार सक्ति रही
जउन मोका सहारा दिहस ।
२८ यद्यपि दुट्ट लोग मोका सराप देत ह, हे यहोवा
तू मोका आसीर्बाद दे ।
यद्यपि उ पचे मोह पइ वार करत हीं, ओनका
अपमानित होइ द्या ।
किन्तु तोहार सेवक क खुस होइ द्या ।
२९ मोर विरोधियन क अपमान स ढाँपि लेइ द्या ।
ओनका लज्जा स घेरी लेइ द्या ।
३० मइँ यहोवा क बहोत अधिक धन्यवाद देत हउँ ।
बहोत लोगन क समन्वा ओकर गुण गावत हउँ ।
३१ काहेकि यहोवा असहाय लोगन क साथ देत ह ।
उ ओनका लोगन स बचावत ह, जउन ओन पइ
निआव करत ह ।

दाऊद क वाद्य यंत्र क संग एक ठु गीत ।

११०

१ यहोवा मोर सुआमी स कहेस,
“तू मोर दाहिन कईती तब तलक बैठि
जा, जब तलक कि मई तोहरे दुस्मनन क
तोहरे गोड़न क चौकी न बनाइ देउँ।”

२ यहोवा तोहार राज्ज क अधिकार सिन्धुयोन स
स्थापित करी ।

तू आपन दुस्मनन पइ सासन करी ।

३ तोहरे पराक्रम क दिन

तोहरी प्रजा क लोग स्वेच्छा बलि बनिहीं ।

तोहार जवान पवित्तर होइ स

सुसोभित भिन्सारे क गर्भ स जन्मी ओसे क नाई
तोहरे लगे अहइँ ।

४ यहोवा एक वचन दिहस,

अउर उ आपन मन नाहीं बदली ।

“तू हमेसा बरे याजक अहा,

जइसा मेल्लीसेदेक क समूह क याजक रहा ।”

५ मोर सुआमी, तोहार मदद बरे तोहार निचके खड़ा
रहत ह ।

ओकरे गुम्सा दिखावइ क दिन उ दूसर राजा लोगन
क हराइ दिहे रहा ।

६ परमेस्सर रास्ट्रन क निआउ करी ।

परमेस्सर उ महान धरती प नेता लोगन क हराइ
दिहस ।

ओनकर मरी देहन स धरती भरि गइ रही ।

७ राहे क झरना स पानी पिए क पाछे, ही

राजा आपन मूँड़ि उठाई अउर फुरइ बलवान होइ ।

१ यहोवा क गुण गावा ।

१११ यहोवा क आपन सम्पूर्ण मने स अइसी उ
सभा में धन्यवाद करत हउँ

जहाँ सज्जन मिला करत ही ।

२ यहोवा महान करम करत ह ।

लोगन जउन ओन चिजियन क महत्व जानत हीं
ओनका खोजत हीं ।

३ यहोवा फुरइ इ महिमामय अउर अचरजे स भरा
काम करत हीं ।

ओकरा खरापन सदा-सदा बना रहत ह ।

४ परमेस्सर अद्भुत करम करत ह ताकि हम याद
राखी

कि यहोवा करुणा स भरा अउर दाय़ा स भरा
बाटइ ।

५ उ आपन भगतन क भोजन देत ह ।

उ हमेसा आपन करार क याद राखत ह ।

६ उ आपन लोगन क ओन भुँइया देइके

जउन दूसर रास्ट्रन अहइ महान कारज देखाएस
ह ।

७ परमेस्सर जउन कछू करत ह उ बिस्सास योग्य
अउर फुरइ बाटइ ।

ओकर सबहि आग्यन नियावपूर्वक अहइँ ।

८ परमेस्सर क आग्यन सदा ही बना रइहीं ।

परमेस्सर क ओन आदेसन क देइ क प्रयोजन
फुरइ अउ निस्पच्छु रहेन ।

९ उ आपन लोगन क मुक्त करत ह ।

उ ओनसे एक करार किहेस ह जउन सदा-सदा
रहइ ।

परमेस्सर क नाउँ अचरजे स भरा अउर पवित्तर
अहइ ।

१० विवेक भय अउर यहोवा क आदर स उपजत ह ।
उ पचे लोग बुदधिमान होत हीं जउन यहोवा क
आदर करत हीं ।

यहोवा क स्तुति सदा-सदा गाई जात रही ।

१ यहोवा क बड़कई करा ।

११२ अइसा मनई जउन यहोवा स डेरात ह
अउर ओकर आदर करत ह उ बहोत सफल
होइ ।

परमेस्सर क आदेस अइसे लोग क भावत हीं ।

२ धरती पइ अइसे मनई क संतानन मज़बूत
होइहीं ।

अच्छे मनई क संतानन आसीबाँद पाइहीं ।

३ अइसे मनई क परिवार बहोत धनवान होइ ।

ओकर नीक करम सदा सदा बनी रही ।

४ सच्चे लोगन बरे परमेस्सर अइसा होत ह जइसे
अँधियारा में चमकत प्रकास होइ ।

उ सच्चा अहइ, अउर करुणा स भरा बाटइ अउर
दाया स भरा बा ।

५ इ मनई बरे नीक बाटइ कि उ दयालु अउर उदार
होइ ।

मनई क इ उत्तिम अहइ कि उ आपन वादा मैं खरा
रहइ ।

६ अइसा मनई क पतन कबहुँ नाहीं होइ ।

एक सच्चा मनई क सदा याद कीन्ह जाइ ।

७ सज्जन व्यक्ति बुरी खबरन स नाहीं डेरात ।

अइसा मनई यहोवा क भरोसे अहइ अउर
आस्वस्त रहत ह ।

८ अइसा मनई आस्वस्त रहत ह उ ससान नाहीं
रहत ।

उ आपन दुस्मनन क हराइ देइ ।

९ अइसा मनई दीन जनन क मुक्त दान देत ह ।

ओकर नीक करम जेका उ दीन लोगन बरे दिखावत
ह उ सदा सदा बना रइहीं ।

उ बहोत सम्मानित कीन्ह जाइ ।

१० कुटिल लोग ओका लखिहीं अउर कुपित होइहीं ।

उ पचे किरोध मँ आपन दाँतन क पिसिहीं अउर
फुन लुप्त होइ जइहीं ।

दुट्ट लोग ओका कबहुँ नाहीं पइहीं जेका उ सब
स जियादा पावइ चाहत हीं ।

११३ १ यहोवा क स्तुति करा,
हे यहोवा क सेवकन, ओकर स्तुति करा ।
यहोवा क नाउँ क बड़कई करा ।

२ यहोवा क नाउँ अबहुँ
अउर सदा सदा बरे आसीसित होइ ।

३ मोर इ कामना अहइ, यहोवा क नाउँ क गुण पूरब
स जहाँ सूरज उगत ह,
पच्छिउँ तलक उ ठउरे मँ जहाँ सूरज बूड़त ह गावा
जाइ ।

४ यहोवा सबहिं रास्ट्रन स महान अहइ ।
ओकर महिमा अकासे तलक उठति ह ।

५ यहोवा हमरे परमेस्सर क नाई कउनो भी मनई
नाहीं अहइ

जउन ऊँचाइ पइ विराजमान अहइ ।

६ भले ही उ सबइ बातन क जउन धरती अउर
आकासे पइ घटत ह,
लखइ बरे उ नीचे झुकिके निगाह ड़ावइ ह ।

७ परमेस्सर गरीब मनइयन क धूरि स उठावत ह ।
उ ओनका क गन्दगी स निकारत ह ।

८ परमेस्सर ओनका महत्वपूर्ण बनावत ह ।
परमेस्सर ओन लोगन क महत्वपूर्ण मुखिया
बनावत ह ।

९ कउनो मेहरारू बे औलाद होइ सकत ह, किन्तु
परमेस्सर ओका बच्चा स आसीसित करी,
अउर ओका खुस करी ।

यहोवा क गुणगान करा ।

११४ १ जब याकूब क घराना
बिदेसियन क रास्ट्र मिस्र क तजेस ।

२ उ समइ यहूदा परमेस्सर क खास मनई बना,
इस्राएल ओकर राज्ज बन गवा ।

३ लाल सागर एँका लखेस, उ पराइ गवा ।
यरदन नदी उलटिके बह चली ।

४ पर्वत मेमनन क नाई नाच गएन ।
पहाड़ी भेड़न क नाई नाचि गइन ।

५ हे लाल सागर, तू काहे पराइ गया ?
हे यरदन नदी, तू काहे उलटी बहिउ ?

६ हे पहाड़ो, काहे तू पचे भेड़न क नाई नाच्या ?
हे पहाड़ियो, तू पचे काहे मेमनन जइसी नाचिउ ?

७ हे धरती, यहोवा याकूब क परमेस्सर,
सुआमी क समन्वा कौप ।

८ परमेस्सर ही चट्टानन क चीरिके जल क बाहेर
बहाएस ।

परमेस्सर पक्की चट्टान स जल क झरना बहाए
रहा ।

११५ १ यहोवा, हमका कउनो गौरव ग्रहण
नाहीं करइ चाही ।

गौरव तउ तोहार अहइ ।

तोहार पिरम अउ निस्टा क कारण गौरव तोहार
अहइ ।

२ रास्ट्रन काहे कहइ,
“ओकर परमेस्सर कहाँ अहइ ?”

३ मोर परमेस्सर सरगे मँ अहइ ।

उ उहइ करत ह जउन कछू उ चाहत ह ।

४ ओन जातियन क “देवता” बस सिरिफ पुतला
अहइ जउन सोना चाँदी क बना अहइ ।

उ सबइ बस सिरिफ पुतलन अहइ जेनका कउनो
मनई बनाएस ह ।

५ ओन पुतलन क मुँह अहइ, मुला उ सबइ बोल
नाहीं पउतेन ।

ओनकर आँखिन अहइ, पर उ सबइ लखि नाहीं
पउतेन ।

६ ओनके कान अहइ, मुला उ सबइ सुन नाहीं
सकतेन ।

ओनके लगे नाक अहइ, मुला उ सबइ सूँघ नाहीं
पउतेन ।

७ ओनके हाथ अहइ, मुला उ पचे कउनो चीज क
छुइ नाहीं सकतेन ।

ओनके गोड़ अहइ, मुला उ पचे चल नाहीं
सकतेन ।

उ पचे आपन गटइ स कउनो आवाज़ नाहीं
निकारइ सकतेन ।

८ जउन मनई इ सबइ पुतलन बनावत हीं, अउर
ओनमाँ बिस्सास धरत हीं

बिल्कुल इ सबइ मूरतियन जइसे बन जइहीं ।

९ ओ इस्राएल क लोगो, यहोवा मँ भरोसा रखा ।
यहोवा इस्राएल क मदद देत ह अउर ओकर
रच्छा करत ह ।

१० ओ हारून क घराने, यहोवा मँ भरोसा रखा ।

हारून क घराने क यहोवा सहारा देत ह, अउ
ओकर रच्छा करत ह ।

११ हे यहोवा क सबइ मनवइयो, ओनमाँ भरोसा
रखा ।

उ सहारा देत ह अउर आपन लोगन क रच्छा करत
ह ।

१२ यहोवा हमका याद राखत ह ।

यहोवा हमका वरदान देइ,

यहोवा इस्राएल क आसीसित करी ।
 यहोवा हारून क परिवार क आसीसित करी ।
 १३ उ ओन लोगन क आसीसित करी जउन ओहसे
 डेरत ह,
 छोट्टा स लइके बरा तलक ।
 १४ मोका आसा अहइ यहोवा तोहार बढोतरी करी
 अउर मोका आसा अहइ,
 उ तोहार संतानन क भी जियादा स जियादा देइ ।
 १५ यहोवा जउन सरग अउ धरती क बनाएस ह,
 तोहका आसीस देइ ।
 १६ सरग यहोवा क अहइ ।
 मुला उ धरती क मानव जाति क दिहेस ह ।
 १७ मरे भए लोग यहोवा क गुण नाही गउतेन ।
 कबर मँ पड़े भए लोग यहोवा क गुणगान नाही
 करतेन ।

१८ मुला हम अबहुँ यहोवा क स्तुति करति ह,
 अउर हम ओकर स्तुति सदा-सदा करब !

१ मई यहोवा स पिरिम करत हउँ जब उ
 ११६ मोर पराथनन क सुनत ह
 अउर एकर जवाब देत ह ।

२ मई ओका पिरिम करत हउँ काहेकि उ मोर सुनत
 ह ।
 मई आपन सारी जिन्नगी ओका मदद बरे बुलावत
 हउँ ।

३ मई लगभग मरि चुका रहेउँ ।
 मोरी चारिहुँ कइँती मउत क रस्सा बँधि चुका
 रहेन ।

कबर मोका लीलत रही ।
 मई डेरान रहेउँ अउर मई चितित रहेउँ ।
 ४ तब मई यहोवा क ओकर मदद लेइ बरे
 गोहराएउँ,
 मई कहेउँ, “यहोवा, मेहरबानी कइक मोका बचाइ
 ल्या ।”

५ यहोवा खरा अहइ अउर दया स पूर्ण अहइ ।
 परमेस्सर करुणा स पूर्ण अहइ ।

६ यहोवा असहाय लोगन क देख-रेख करत ह ।
 मई परेसानी मँ रहेउँ अउर यहोवा मोका बचाएस ।

७ हे मोर प्राण, फुन स आराम करा ।
 काहेकि यहोवा तोहार देख-रेख करत ह ।

८ हे परमेस्सर, तू मोर प्राण मउत स बचाया ।
 मोर आँसुअन क तू रोक्या
 अउर गिरइ स तू मोका थाम लिहा ।

९ जीवित लोगन क धरती मँ
 मई यहोवा क सेवा करत हउँ ।

१० मई लगातार बिस्सास बनाए राखेउँ हिआँ तलक
 कि जब मई कहि दिहे रहेउँ,

“मई बहोत पीड़ा मँ होइ गवा रहेउँ ।”
 ११ मई हिआँ तलक बिस्सास संभाले राखेउँ जब कि
 मई डेरान रहेउँ अउर मई कहेउँ,

“सबहिँ लोग झूठा अहइ ।”
 १२ मई भला यहोवा क ओन नीक कामन क बदले
 मँ का अपित कइ सकत हउँ

जउन उ मोर बरे किहेस ?
 १३ मई ओका पेय भेंट देब
 काहेकि उ मोका बचाएस ह ।

मई यहोवा पइ आसिरत रहब ।
 १४ मई यहोवा क लोगन क समन्वा आपन वचन
 क पूरा करब

जउन मई ओहसे किहे रहेउँ ।
 १५ हिआँ तलक कि कउनो एक मउत भी ओन
 लोगन क जउन यहोवा बरे अपराध किहेन
 ह,

ओकरे बरे बहोत महत्वपूर्ण अहइ ।
 १६ हे यहोवा मई तोहार एक
 मेहरारु नउकर क सन्तान हउँ ।

हे यहोवा, तू ही मोका मोरे बंधन स अजाद किहा ।
 १७ मई तोहका एक धन्यवाद बलि अपित करब ।
 मई यहोवा क नाउँ स गोहराउब ।

१८ मई यहोवा क लोगन क समन्वा आपन वचन क
 पूरा किहेउँ ह
 जउन मई ओहसे किहे रहेउँ ।

१९ मई यहोवा क मन्दिर क आंगन मँ जाब
 जउन यरूसलेम मँ अहइ ।
 यहोवा क क स्तुति करब ।

१ सभूचइ रास्ट्रन यहोवा क नाउँ क
 ११७ बड़कई करा ।
 हे लोगो, यहोवा क गुण गावा ।

२ काहेकि उ हम पइ बहोत पिरिम दिखावत ह ।
 ओकर बिस्सास सदा-सदा बरे रही ।
 यहोवा क बड़कई करा ।

१ मई यहोवा क धन्यवाद देत हउँ,
 ११८ काहेकि उ नीक अहइ ।
 ओकर पिरिम सदा ही रहत ह ।

२ इस्राएल इ कहइ द्या,
 “ओकर बिस्ससनीय पिरिम सदा ही रहत ह ।”

३ याजक अइसा कहत हीँ,
 “ओकर बिस्ससनीय पिरिम सदा अटल रहत ह ।”

४ तू लोग जउन यहोवा क उपासना करत अहा,
 कहा करत अहा,
 “ओकर बिस्ससनीय पिरिम सदा ही अटल रहत
 ह ।”

५ मई परेसानी मैं रहेउँ, एह बरे मई मदद बरे
यहोवा क पुकारेउँ।

उ मोका जवाब दिहस अउर यहोवा मोका अजाद
किहस।

६ यहोवा मोरे कइँती अहइ, मई कबहुँ नाहीं डेराब।
लोग मोका कउनो हानि नाहीं पहाँचावइ सकतेन।

७ यहोवा मोर सहायक अहइ।

मई आपन दुस्मनन क हारा देखब।

८ मनइयन पइ भरोसा रखइ स

यहोवा पइ भरोसा राखब उत्तिम अहइ।

९ इ हमेसा उत्तिम अहइ कि पहिले आपन यहोवा
पइ भरोसा करा

तउ आपन मुखियन पइ।

१० मई आपन दुस्मनन दुआरा घेरि लिहे गवा रहेउँ।
यहोवा क सक्ति स मई आपन बैरी लोगन क हराइ
दिहेउँ।

११ बहोत सारा दुस्मनन मोका चारिहउँ कइँती स
घेरि लिहन ह।

मई आपन दुस्मन क यहोवा क सक्ति स हराएउँ।

१२ दुस्मनन मोका मधु माखियन क झुण्ड क नाई
घेरि लिहन।

मुला, उ सबइ हाली बरत भइ झाड़ी क नाई बर्बाद
भएन।

यहोवा क सक्ति स मई ओका हराएउँ ह।

१३ मोर दुस्मनन मोह पइ वार किहन अउ मोका
लगभग बर्बाद कइ दिहन

मुला यहोवा मोका सहारा दिहस।

१४ यहोवा मोर सक्ति अउर मोर विजय गीत
अहइ।

अउर उ रच्छक बनि गवा ह।

१५ सज्जनन क घर मैं जउन विजय पर्व मनत अहइ
तू ओका सुन सकत ह।

देखा, यहोवा आपन महासक्ति फुन देखाएस ह।

१६ यहोवा क भुजन विजय मैं उठी भइ अहइ।

देखा यहोवा आपन महासक्ति फुन स देखाएस।

१७ मई जिअत रहब, मई मरब नाहीं,

अउर जउन करम यहोवा किहस ह, मई ओन
लोगन क गनती फुन स करब।

१८ यहोवा मोका दण्ड दिहस,

मुला उ मोका मरइ नाहीं दिहस।

१९ सच्चाई क दुआरन क खोला,

ताकि मई भीतर आइ पाउँ अउर यहोवा क
आराधना करउँ।

२० यहोवा क मौजूदगी मैं जाइ क दुआर हिआँ
अहइ।

बस सिरिफ धर्मी लोग ही ओन दुआरन स होइके
जाइ सकत ही।

२१ हे यहोवा, मोर पराथना क जवाब देइ बरे
अउर मोका रच्छा करइ बरे तोहका धन्यवाद देत
अहउँ।

२२ जउन पाथार क राज मिस्त्रियन नकार दिहे
रहेन

उहइ पाथर क प्रयोग कोना क पाथर क रूप मैं
कीन्ह गवा।

२३ यहोवा इ घटना क होइ दिहस।

अउर हम सबइ एहमाँ अदभूत महसूस कीन्ह।

२४ इ उहइ दिना अहइ जेका यहोवा बनाएस ह।

आवा हम खुसी क अनुभव करी अउर आजु
आनन्दित होइ जाइ।

२५ लोग कहेन, “हे यहोवा, हम पचन क बचाव
करा,

हे यहोवा हमार रच्छा करा।

२६ उ मनई धन्न होइ जउन यहोवा क नाउँ मैं
आवत अहइ।”

“मई यहोवा क घर मैं तोहार स्तुति करित हउँ।

२७ यहोवा परमेस्सर अहइ।

उ आपन प्रकास स हम पचन क छाया दिहेस ह।
वेदी क कोनन पइ भेंट क मेमना क बाँधा।”

२८ हे यहोवा, तू हमार परमेस्सर अहा, अउर मई
तोहार धन्यवाद करत हउँ।

मई तोहार गुण गावत हउँ, हे मोर परमेस्सर।

२९ यहोवा क बड़कई करा काहेकि उ उत्तिम अहइ।

ओकर सच्ची करुणा सदा-सदा बनी रहत ह।

आलेफ

१ जउन लोग इमानदारी स जीवन
जिअत ही, उ सबइ कामयाब रहत ही।
अइसे लोग यहोवा क सिच्छा पइ चलत ही।

२ लोग जउन यहोवा क करार पइ चलत ही, उ पचे
कामयाब रहत ही।

आपन समूचइ मन स उ पचे यहोवा क मानइ बरे
खोजत ही।

३ उ पचे लोग बुरा काम नाहीं करतेन।

उ पचे यहोवा क आग्या क मानत ही।

४ हे यहोवा, तू आपन उपदेस इ बरे दिहा ह,

हम पचे ओका धियान स पालन कइ सकी।

५ हे यहोवा, मई सदा तोहरे कानून क

नियमित रूप स पालन करेउँ,

६ तब जब मई तोहर सबइ आग्यन क पढ़ब

मई कबहुँ भी नाहीं लजाब।

७ मई तोहार स्तुति पूरी मन स करब

जेतना जियादा मई तोहरे फइसलन क बारे मँ
सिखेउँ ह ।

८ हे यहोवा, मई तोहरे कानूनन क पालन करब ।
तउ कृपा कइके मोका पूरी तरह स जिन बिसरा ।

वैथ

१ एक जवान मनई तोहरे निर्देसन पइ चलइ कइ
कइसे आपन जीवन पवित्तर रख पावइ ?

१० मई, आपन पूर्ण मन स यहोवा क सेवा क जतन
करत हउँ ।

कृपा कइके तोहरे आग्यन क मानइ मँ मोका जिन
गल्ती करइ द्या ।

११ मई धियान पूर्वक तोहार वचन याद किहेउँ ह ।
काहेकि मई तोहरे खिलाफ फुन स पाप न करइ
चाहत हउँ ।

१२ हे यहोवा, मई तोहार स्तुति किहेउँ ह ।

कृपा कइके मोका तोहार कानून क सिखावा ।

१३ मई तोहार सबहिं फइसलन क बारे मँ बताउब ।

१४ तोहरे करार क निर्देसन क पालन करब
मोका दूसर कउनो धन स जियादा भावत अहइ ।

१५ मई तोहरे उपदेसन पइ विचार किहेउँ ह,
अउर मई तोहरे सिद्धान्तन पइ चलत हउँ ।

१६ मई तोहरे नियमन मँ आनन्द लेत हउँ ।

मई तोहरे बचनन क नाही भूलब ।

गिमेल

१७ आपन सेवक, मोर बरे अच्छा करा
ताकि मई जी सकेउँ अउर तोहरे वचन पइ चलि
सकेउँ ।

१८ हे यहोवा, मोर आँखी खोला तउ होइ सकत ह
कि मई एका लखि सकत हउँ ।

अउर तोहरी अद्भुत बातन पढ़ सकेउँ जेका तू
किहा ह ।

१९ मई इ धरती पइ एक अनजाना परदेसी हउँ ।

हे यहोवा, आपन सिच्छन क
मोसे जिन छिपावा ।

२० मोर हमेसा तोहरे जरिए पइ बना भवा फइसलन
क

अध्ययन क अभिलासा रखत हउँ ।

२१ हे यहोवा, तू अहंकारी जन क फटकारत ह ।

ओन अहंकारी लोगन पइ बुरी बातन घटित
होइहीं ।

उ सबइ तोहरे आदेसन स मुरि गवा अहइँ ।

२२ लज्जा अउर अपमान क मोसे हटाइ द्या ।

मई तोहरी करार क पालन किहेउँ ह ।

२३ हिआँ तलक कि नेता लोगन भी मोरे बरे बुरी
बातन किहेन ह ।

मुला मई तउ तोहार सेवक अहउँ ।

मई तोहरे विधियन क समुझत हउँ ।

२४ तोहार करार मोर सर्वोत्तम मीत अहइ ।

इ मोका नीक सलाह दिया करत ह ।

दालथ

२५ मई हाली दालथ मरि जाब ।

हे यहोवा, तू आदेस द्या अउर मोका जिअइ द्या ।

२६ मई तोहका आपन जिन्नगी क बारे मँ बताएउँ
ह, तू मोका जवाब दिहा ह

अबइ तू मोका आपन बिधान बतावा ।

२७ हे यहोवा, मोर सहायता करा ताकि मई समुझ
सकेउँ कि तोहार उपदेसन क पालन कइसे
कीन्ह जाई सकी ।

मोका ओन अद्भुत कर्मन क चिंतन करइ द्या
जेनका तू किहा ह ।

२८ मई दुःखी अउर थका हउँ ।

वचन क मुताबिक मोका तू फुन स मजबूत बनाइ
द्या ।

२९ हे यहोवा, मोका कउनो परेसानी क जीवन जिन
जिअइ द्या ।

तोहार कानून क मोका दयालुता स सिखावा ।

३० मई तोहार करार क मानइ बरे चुने रहेउँ ।

मई आपन आप क तोहार विवेकी फइसलन क
अध्ययन अउर पालन करइ क बचन बद्ध
किहेउँ ह ।

३१ तोहार करार क संग मई लगनशील अहउँ ।

हे यहोवा, मोका असफल जिन होइ द्या ।

३२ मई तोहरे आग्यन क पालन उत्सुकता स किह्या
ह
जब तू मोर समुझदारी क बढ़ाया ह ।

हे

३३ हे यहोवा, तू मोका आपन व्यवस्था सिखावा
तब मई धियानपूर्वक ओनकर अनुसरण करब ।

३४ ओनका समुझइँ मँ मोर मदद करा ।

अउर मई तोहरी सिच्छन क पालन करब ।

मई पूरी मन स ओनकर पालन करब ।

३५ मोका आपन आग्यन क राहे पइ चलावा ।

मई ओन पइ प्रसन्न हउँ ।

३६ मोर मदद करा कि मई तोहरे करार क मनन
करउँ,

बजाय ओकरे कि कइसे धन हासिल करेउँ ।

३७ मोका बियर्थ चिजियन पइ धियान जिन देइ द्या ।

तोहार राहे मँ रहइ बरे मोर मदद करा ।
 ३८ मई तोहार सेवक अहउँ ।
 तउ ओन बातन क करा जेनकर वचन तू दिहा ह
 ताकि मई तोहार सम्मान कइ सकउँ ।
 ३९ मोका उ अपमान स मुक्त करा जेसा मई डेरात
 हउँ ।
 तोहार फइसलन हमेसा नीक होत हीं ।
 ४० मई तोहरे उपदेसन क अभिलासी हउँ ।
 मोर भला करा अउर मोका जिअइ या ।

वाव

४१ हे यहोवा, तू सच्चा निज पिरिम मोह पइ परगट
 करा ।
 मोर रच्छा वइसे ही करा जइसे तू वचन दिहा ।
 ४२ तब मोरे लगे ओन लोगन बरे एक जवाब होइ
 जउन मोर अपमान करत हीं ।
 काहेकि मई तोहार वचन पइ भरोसा रखत हउँ ।
 ४३ तोहार सच्ची सिच्छा क बोलइ मँ सदा मोरे
 मदद करा ।
 मई तोहरे बुद्धिमान फइसलन पइ निर्भर अहउँ ।
 ४४ हे यहोवा, मई तोहरी सिच्छन क पालन सदा
 अउ सदा बरे करब ।
 ४५ तउ मई सुरच्छित जिन्नगी जिअब ।
 मई तोहरी व्यवस्था क पालइ क कठिन जतन
 करत हउँ ।
 ४६ मई यहोवा क करार क चर्चा राजा लोगन क
 संग करब
 अउर उ पचे उत्साह मँ होइके सुनिहीं मोहसे
 लजाइहीं नाहीं ।
 ४७ हे यहोवा, मोका तोहरी सबइ आग्यन क मनन
 जेहसे मई पिरिम करत हउँ भावत ह ।
 ४८ मई तोहरी आग्यन कइती जेहसे मई पिरिम
 करत हउँ हाथ फइलाउब,
 अउर मई तोहार कानून पइ बिचार करत हउँ ।

जैन

४९ हे यहोवा, कृपा कइके आपन वचन क याद
 रखा, जउन तू मोहसे किह्या ह ।
 उहइ बचन मोका आसा देत ह ।
 ५० जब मई झेलत रहेउँ, तू मोका चइन दिहा ।
 तोहार वचन मोका जीवन देत ह ।
 ५१ लोग जउन खुद क मोहसे उत्तम सोचत हीं,
 निरन्तर मोर अपमान करत अहइ ।
 मुला हे यहोवा मई तोहार सिच्छन पइ चलब
 नाहीं तजेउँ ।

५२ मई तोहरे ओन फइसलन क याद करत हउँ
 जेका तू बहोत पहिले दिहा ह,
 अउर मई मोका चइन देत अहइ ।
 ५३ जब मई अइसे दुट्ट लोगन क लखत हउँ,
 जउन तोहरी सिच्छन पइ चलब तजेन ह, तउ मई
 बहोत कोहाइ जात हउँ ।
 ५४ तोहार सबइ कानून मोर बरे आनन्दित भजन
 होत
 जहाँ कहिउँ भी मई रहत हउँ ।
 ५५ हे यहोवा, राति मँ मई तोहरे नाउँ क धियान
 अउर तोहरी नेमन क पालन करत हउँ ।
 ५६ इ मोर अभ्यास होत रहत ह ।
 मई होसियारी स तोहरे उपदेसन क मानत हउँ ।

खेथ

५७ हे यहोवा, तू मोर अंग अहइ, एह बरे मई तोहार
 आग्यन क पालन करब ।
 ५८ हे यहोवा, मई पूरी मन स तोहार खोज किहेउँ
 ह,
 जइसा बचन तू दिहा मोह पइ दयालु ह्वा ।
 ५९ मई आपन राहे पइ बहोत धियान दिहेउँ ह,
 ताकि मई तोहरी करार क मुताबिक चल सकउँ ।
 ६० मई बिना देरी किहे
 तोहरे आग्यन पइ चलइ क इच्छुक अहउँ ।
 ६१ दुट्टन आपन फन्दन मोका फंसाइ लिहेन ह ।
 मई तोहरी सिच्छन क कबहुँ नाहीं बिसरेउँ ।
 ६२ तोहरे सच्चा फइसलन क तोहका धन्यवाद देइ
 बरे
 मई आधी रात क बीच जगत हउँ ।
 ६३ जउन कउनो मनई तोहसे डेरात ह तउ मई
 ओकर मीत अहउँ ।
 अगर कउनो मनई तोहरे उपदेसन पइ चलत ह,
 मई ओकर मीत अहउँ ।
 ६४ हे यहोवा, इ समूचइ धरती तोहरी बिस्ससनीय
 पिरिम स भरी भइ बा ।
 मोका तू मोका अपने विधान क सिच्छा या ।

टेथ

६५ हे यहोवा, तू आपन दास बरे अच्छा काम किहे
 अहा ।
 तू ठीक वइसा ही किहा जइसा तू करइ क वचन
 दिहा रह्या ।
 ६६ हे यहोवा, मोका सही बुद्धि अउ गियान या
 कि मई तोहार आदेसन पइ बिस्सास करेउँ ।
 ६७ पीड़ित होइ स पहिले मूरखता स मई बुरे करम
 किहे रहेउँ ।

मुला अब, मई धियानपूर्वक तोहरे आग्यन क पालन करत हउँ।

६८ तू अच्छा अहइ, अउर अच्छा काम करत अहा।

मोका आपन कानून क सिच्छा द्या।

६९ घमण्डी लोग मोरे बरे बहोत सारा झूठी बात बोलत हीं।

किन्तु यहोवा मई आपन पूर्ण वचन बद्धता स तोहरे उपदेसन क पालन करब।

७० उ लोगन क दिमाग तोहार उपदेसन क नाही समुझ सकतेन।

मुला, मई तोहरी उपदेसन क अध्ययन कइके बहोत खुसी पावत हउँ।

७१ हिआँ तलक कि कस्ट भी मोर बरे बढ़िया बनि गवा रहा।

उहइ तरह मई तोहरी कानून क सीख लिहेउँ।

७२ तोहरी सीखन मोरे बरे भली होत अहइ।

तोहार सीखन हज्जारन सोना अउ चाँदी क टूकन स उत्तिम अहइ।

योध

७३ हे यहोवा, तू मोका बनाया ह मोर स्थापना आपन निज हाथन स किह्या ह।

आपन आग्यन क पढ़इ समुझ मँ तू मोर मदद करा।

७४ हे यहोवा, तोहार भगत मोका लखत हीं, अउर उ पचे खुस अहइँ,

काहेकि मई तोहार बातन पइ भरोसा रखत हउँ।

७५ हे यहोवा, मई इ जानत हउँ कि तोहार फइसला हमेसा नीक अउ खरा होत हीं।

एह बरे इ मोरे बरे उचित रहा कि तू मोका कस्ट दिहा ह।

७६ अब, आपन सच्चे पिरेम स मोका आराम द्या।

मोका आराम द्या जइसा तू आपन सेवक स किह्या ह।

७७ मोह पइ कृपा करा तइ मई जी सकेउँ।

फुरइ मई तोहार उपदेसन मँ आनन्दित अहउँ।

७८ ओन लोगन क जउन सोचा करत हीं कि उ पचे मोसे उत्तिम बाटेन, ओनका लजाइ द्या।

काहेकि उ पचे मोरे बारे मँ झूठी बातन कहेन ह।

हे यहोवा, मई तोहरे उपदेसन क बिचार किहेउँ ह।

७९ आपन भगतन क मोरे लगे लउटि आवइ द्या।

अइसे ओन लोगन क मोरे लगे लउटि आवइ द्या, जेनका तोहरी करार क जानकारी अहइ।

८० मोरे हिरदय क हमेसा तोहार कानून क मानइ द्या,

ताकि मई कबहुँ लज्जित न होबेउँ।

काफ़

८१ मई तोहार इन्तज़ार करइ मँ कमज़ोर होइ गवा हउँ कि तू मोका बचउब्या।

मुला यहोवा, मोका तोहार वचन पइ भरोसा बा।

८२ जउन बातन क तू वचन दिहे रह्या, मई ओनकर बाट जोहत रहत हउँ।

मुला मोर ऑखिन दुर्बल होइ गइ अहउँ। तू मोका कब आराम देब्या ?

८३ हिआँ तलक जब मई कचड़ा क धुआँ पइ क दाखरस क झुरान मसक जइसा हउँ,

बूढ़ा अउर झुरीदार तबहुँ भी तोहरे कानून क न भूलब।

८४ मई कब तलक जिअब ?

हे यहोवा, कब सज़ा देब्या तू अइसे ओन लोगन क जउन मोहका सतावत हीं ?

८५ कछू अहंकारी लोग आपन फंदन स मोह पइ वार किहे रहेन।

इ तोहरी सीखन क खिलाफ अहइ।

८६ हे यहोवा, सब लोग तोहरी आग्यन क भरोसे कइ सकत हीं।

उ पचे मोका बिना कउनो कारण सतावत रहत हीं। मोर मदद करा।

८७ ओन सबइ लोग धरती स करीब करीब मोका बर्बाद कइ दिहन ह।

तउ प भी मई तोहरे उपदेसन क नाही तजेउँ।

८८ हे यहोवा, आपन बिस्सासी पिरेम क मोह पइ परगट करा।

अउर मोका जिन्नगी द्या।

तउ मई तोहार करार क पालन कइ सकेउँ।

लामेध

८९ हे यहोवा, तोहरे वचन सरग मँ, उ सबइ सदा रहत हीं।

९० तू हमेसा हमेसा बरे बिस्सासी अहा।

तू ही धरती ओकरे जगह पइ रच्या अउर इ हमेसा स हिआँ रहत रह्या।

९१ तोहरे फइसलन क कारण ही अब तलक सबहि वस्तु मौजूद अहइ।

काहेकि सबहिं चिजियन तोहार सेवक अहइ।

९२ अगर तोहार सीखन मीत जइसी नाही होतिन, तउ मोर संकट मोका बर्बाद कइ डउतेन।

९३ हे यहोवा, तोहरे आदेसन क मई कबहुँ नाही बिसरब।

काहेकि उ सबइ ही मोका जिअत राखत हीं।

१४ हे यहोवा, मई तउ तोहार अहउँ, मोर रच्छा करा ।
 काहेकि तोहरे उपदेसन पइ चलइ क मई कठिन जतन करत हउँ ।
 १५ दुट्ट जन मोका विनास करइ क इन्तजार करत हीं,
 मुला मई तोहार करार क समुझइ बरे ओहे पइ विचार करत हउँ ।
 १६ सब कछु क सीमा अहइ,
 किन्तु तोहरी आग्यन आपन छेत्र मँ असीमित अहई ।

मेम

१७ मई तोहरी उपदेसन स बहोत जिआदा पिरेम करत हउँ ।
 हर घड़ी मई ओनकर ही बारे मँ सोचत हउँ ।
 १८ तोहार आदेसन मोका मोर दुस्मनन स जियादा बुद्धिमान बनाएन ।
 तोहार कानून क वजह स उ सदा मोरे संग रहत ह ।
 १९ मई आपन सबइ सिच्छकन स जियादा बुद्धिमान हउँ,
 काहेकि मई तोहरी करार क अध्ययन किया करत हउँ ।
 २० मई बुजुर्ग प्रमुखन स जियादा समुझत हउँ ।
 काहेकि मई तोहरे आदेसन क मानत हउँ ।
 २१ मई तोहार आदेसन क पालन करइ बरे हर बुरे काम स बचा हउँ ।
 २२ हे यहोवा, तू मोर सिच्छक अहा ।
 एह बरे मई तोहरे फइसलन स नाहीं मुरेउँ ह ।
 २३ तोहार वचन मोर मुह मँ मधु स भी जियादा मीठा अहई ।
 २४ तोहार उपदेसन क मई सावधान पूर्वक अध्ययन करत हउँ,
 एह बरे मई झूठापन स घिना करत हउँ ।

नून

२५ हे यहोवा, तोहार सिच्छन मोका बुद्धिमान बनावत हीं ।
 तउ झूठी सिच्छन स मई घिना किया करत हउँ ।
 २६ तोहार फइसलन बहोत नीक अहई ।
 मई ओनका पालन करइ क प्रतिग्या किहेउँ, एह बरे मई पालन करब ।
 २७ हे यहोवा, बहोत समइ तलक मई विपदन झेलेउँ ह,
 कृपा कइके मोका वइसी जिन्नगी द्या जइसा तू देइ क वादा किहा ह ।

२८ हे यहोवा, मोरी बिनती क तू अंगीकार करा जउन मई तोहका भेंट करत हउँ,
 अउर मोका आपन फइसलन क सिच्छा द्या ।
 २९ होइ सकत ह कि मई हर दिन आपन जीवन जोखिम मँ डालत हउँ,
 किन्तु मई तोहार उपदेसन क कबहुँ नाहीं विसरत हउँ ।
 ३० दुट्ट जन मोका फँसावइ क जतन करत हीं,
 मुला मई तोहरे उपदेसन नाहीं मुरेउँ ह ।
 ३१ तोहार करार सदा बरे मोर खजाना अहइ ।
 इ मोका बहोत खुस किया करत ह ।
 ३२ मई सदा तोहर विधान पइ चलइ क बहोत कठोर जतन करब ।

सामेख

३३ हे यहोवा, मोका अइसे ओन लोगन स घिना अहइ, जउन पूरी तरह स तोहरे बरे सच्चा नाहीं अहई ।
 मोका तउ तोहार सिच्छन भावत हीं ।
 ३४ तू मोर ढाल अउर रच्छक अहा ।
 मई तोहार वचन पइ भरोसा किहेउँ ह ।
 ३५ दुट्ट लोगन क मोहसे दूर करा,
 ताकि मई आपन परमेस्सर क आग्यन क पालन कइ सकेउँ ।
 ३६ हे यहोवा, मोका अइसे ही सहारा द्या जइसे तू वचन दिहा, ताकि मई जी सकेउँ ।
 मोका तोहेमाँ बिस्सास अहइ, मोका निरास जिन करा ।
 ३७ हे यहोवा, मोका सहारा द्या कि मोर उद्धार होइ ।
 मई सदा तोहरे आदेसन क पाठ किया करब ।
 ३८ हे यहोवा, तू हर अइसे मनई स बिमुख होइ जात ह, जउन तोहार नेम तोड़त हीं ।
 काहेकि उ पचे छल क बियर्थ राहन क पालन करत हीं ।
 ३९ हे यहोवा, तू इ धरती स सबहिं दुट्ट लोगन क अइसा हटावा, जइसेन उ पचे बेकार पदार्थ होइ,
 मई तोहरी करार स सदा पिरेम करब ।
 ४० हे यहोवा, मई तोहसे डेरान हउँ, मई डेरान अहउँ,
 अउर तोहरे विधान क आदर करत हउँ ।

ऐन

४१ मई उ सबइ बातन किहेउँ ह जउन नीक अउर खरा अहई ।

हे यहोवा, तू मोका अइसेन ओन लोगन क जिन सौपा जउन मोका हानि पहुँचावइ चाहत हीं।

१२२ मोका वचन द्या कि तू मोरे बरे अच्छा करब्या। मई तोहार दास अहउँ।

हे यहोवा, अहंकारी लोगन क मोह पइ अत्याचार जिन करइ द्या।

१२३ हे यहोवा, तू आपन अच्छाई स मोका वचन दिहे रह्या कि तू मोर मदद करब्या।

मुला मोर आँखी तोहार राह निहारत भए थकी गइन।

१२४ तू आपन बिस्ससनीय पिरेम मोह पइ परगट करा।

मई तोहार दास हउँ।

तू मोका आपन विधान क सिच्छा द्या।

१२५ मई तोहार सेवक हउँ।

आपन विवेक स मोका आसीस द्या तउ मई तोहार करार क समुझ सकेउँ।

१२६ कार्यवाही करा, हे यहोवा, काहेकि ओन लोग तोहरे कानून क नाफरमानी करत हीं।

१२७ हे यहोवा, उत्तिम सुवर्ण स भी जियादा मोका तोहार आदेस भावत हीं।

१२८ तोहरे सब उपदेसन क बहोत सावधानी स मई पालन करत हउँ।

मई सबइ झूठे रास्तन स घिना करत हउँ।

पे

१२९ हे यहोवा, तोहार करार अद्भुत बा।

एह बरे मई ओकर अनुसरण करत हउँ।

१३० तोहार वचन क व्याख्या प्रकास लावत ह।

तोहार सिच्छन बुद्धिहीन लोगन क समुझ देत ह।

१३१ हे यहोवा, मई तोहरे आदेसन क पालन करइ इच्छुक हउँ।

मई दौडवालन क नाई हाँफब।

१३२ हे परमेस्सर, मोरी कइती निगाह करा अउर मोह पइ दयालु ह्या।

तू ओन लोगन बरे वइसा ही करा जउन ओकरे बरे नीक अहइ जउन तोहार नाउँ स पिरेम किया करत हीं।

१३३ हे यहोवा, मोका ओन लोगन स बचाइ ल्या जउन मोका दुःख देत हीं

अउर मई तोहरे आदेसन क पालन करब।

१३४ हे यहोवा मोका ओन आदेसन स बचाइ ल्या जउन मोका दुःख देत हीं।

अउर मई तोहरे आदेसन क पालन करब।

१३५ हे यहोवा, आपन सेवक पइ दया दिखावा अउर आपन विधान तू मोका सिखावा।

१३६ रोवत रोवत आँसुअन क एक नदी मई बहाइ चुका हउँ।

काहेकि लोग तोहरी सिच्छन क पालन नाही करत अहई।

सादे

१३७ हे यहोवा, तू सच्चा अहा

अउर तोहार फइसला खरा अहई।

१३८ उ सबइ चिजियन उत्तिम अहई जउन तू हमका करार मँ दिहा।

हम पूरी तरह स तोहरे विधान क भरोसे रहि सकित ह।

१३९ तोहरे बरे मोर धुन मोका बर्बाद करत ह।

मई बहोत बेचैन हउँ, काहेकि मोर दुस्मन लोग तोहरे वचन क बिसराइ दिहन।

१४० हे यहोवा, तोहार वचन प्रमाणित अउर फुरइ अउर सच्चा बाटइ,

अउर मई तोहार सेवक एहसे पिरेम करत हउँ।

१४१ मई एक महत्वहीन हउँ अउर लोग मोर आदर नाही करत बाटेन।

मुला मई तोहरे उपदेसन क बिसरत नाही अहउँ।

१४२ हे यहोवा, तोहार अच्छाई अनन्त अहइ।

तोहरे सिच्छन क भरोसे रहा जाइ सकत ह।

१४३ संकट अउर परेसानी मोका घेरि लिहेस ह।

मुला, मई तोहार उपदेसन क नाही बिसारे रहेउँ।

१४४ तोहार करार हमेसा नीक बाटइ।

एका समुझइ मँ मोर सहायता करा ताकि मई जी सकउँ।

कोफ़

१४५ सम्पूर्ण मन स यहोवा मई तोहका गोहरावत हउँ, मोका जवाब द्या।

मई तोहरे आदेसन क पालन करत हउँ।

१४६ हे यहोवा, मोर तोहसे बिनती बाटइ।

मोका बचाइ ल्या।

मई तोहरी करार क पालन करब।

१४७ यहोवा, मई तोहरी पराथना करइ क भोर क तइके उठा करत हउँ।

मोका ओन बातन पइ भरोसा अहइ, जेनका तू कहत ह।

१४८ पूरी रात मई तोहरे वचन पइ

बिचार करइ बरे बइठा रहत हउँ।

१४९ हे यहोवा, तू आपन पूरे पिरेम स मोह पइ कान
द्या,
तू वइसा ही करा जेका तू ठीक कहत ह, अउर मोर
जिन्नगी बनाए राखा।
१५० लोग मोरे विरूद्ध कुचकर रचत अहई अउर
मोर कईती आवत हीं।
अइसे इ सबइ लोग तोहरी सिच्छन पइ चला
नाहीं करतेन।
१५१ मुला तू मोरे लगे अहा।
तोहरे सबइ आग्यन पइ बिस्सास कीन्ह जाइ
सकत ह।
१५२ बहोत दिनन पहिले ही तोहार करार दुआरा मई
सीख लिहे रहेउं
कि ओकर नींव सदा बरे डाली गइ अहइ।

रेस

१५३ हे यहोवा, मोर यातना क लखा अउर मोका
बचाइ ल्या,
मई तोहरे उपदेसन क बिसरा नाहीं अहउं।
१५४ हे यहोवा, मोरे मुकददमा बरे बहस करा अउर
मोका छुरावा।
कृपा कइके मोका तोहार वाचा क अनुसार जिअइ
द्या।
१५५ दुट्ट बिजयी नाहीं होइहीं।
काहेकि उ पचे तोहरे विधान पइ नाहीं चलत
अहई।
१५६ हे यहोवा, तू बहोत दयालु अहा।
आपन नीक सासन क अनुसार मोका फुन स
जिन्नगी द्या।
१५७ मोर बहोत स सत्रु अहई जउन मोका हानि
पहोँचावइ बरे जतन करतेन;
मुला मई तोहरी करार क अनुसरण नाहीं तजेउं।
१५८ मई ओन बिस्सासघातियन क लखत हउं।
उ पचे तोहरे बचन क पालन नाहीं करतेन।
मई ओनका तजि दिहेउं ह।
१५९ लखा, मई तोहार उपदेसन स पिरेम करत हउं।
हे यहोवा, कृपा कइके मोका तोहरे दयालु पिरेम स
जिअइ द्या।
१६० सुरू स ही तोहार सबहिं वचन बिस्सास क
जोगग रहेन ह।
अउर तोहार खरा फइसलन सदा बरे रहिहीं।

सीन

१६१ सक्तिसाली नेता मोह पइ बियर्थ ही वार करत
हीं,

मुला मई डेरात हउं अउर बस तोहरे वचन क मई
आदर करत हउं।
१६२ तोहार बचन मोका वइसेन आनन्दित करत हीं,
जइसा एक जोद्धा आनन्दित होत ह, जेका अबहुँ
अबहुँ कउनो जुद्ध क लूट क माल मिल गवा
होइ।
१६३ मई झूठ क नकारत हउं। मई ओहसे घिना करत
हउं।
किन्तु, मई तोहरी सिच्छन स पिरेम करत हउं।
१६४ मई दिन मँ सात दाई तोहरे उत्तम फइसला
बरे
तोहार स्तुति करत हउं।
१६५ उ पचे लोगन बहोत सान्ति पइहीं, जउन
तोहार सिच्छन स पिरेम करत हीं।
ओका कछु भी गिराइ नाहीं पाई।
१६६ हे यहोवा, मई तोहरी प्रतीच्छा मँ हउं कि तू
मोर रच्छा करा।
मई तोहरे आग्यन क पूरा किहेउं ह।
१६७ मई तोहरी करार पइ चलत रहत हउं।
हे यहोवा, मोका तोहरे विधान स गहन पिरेम
अहइ।
१६८ मई तोहरी करार क अउ तोहरे उपदेसन क
पालन किहेउं ह।
तू सब कछु जानत ह जउन मई किहेउं ह।

ताव

१६९ हे यहोवा, मदद बरे लगावा गवा मोर उँच
गोहार तोहे तलक पहोँचइ
मोका बुद्धिमान बनावा जइसा तू वचन दिहा ह।
१७० हे यहोवा, मोर बिनती सुना।
तू जइसा वचन दिहा मोर उद्धार करा।
१७१ मई बड़कई क गुण गावत हउं।
काहेकि तू मोका आपन कानून सिखाया ह।
१७२ मोका तू आपन गीत गावइ द्या।
काहेकि तोहार सबइ आग्यन सच्चा अहई।
१७३ तू मोरे लगे आवा, अउर मोका सहारा द्या
काहेकि मई तोहरे आदेसन पइ चलब चुन लिहेउं
ह।
१७४ हे यहोवा, मई इ चाहत हउं कि तू मोर उद्धार
करा,
तोहार सिच्छन मोका खुस करत हीं।
१७५ मोका जिअइ द्या तउ मई तोहार स्तुति कइ
सकेउं।
तोहार आदेस स मोका मदद मिलइ द्या।
१७६ एक ठु खोइ भइ भेइ क तरह,
मई आपन रास्ता भटक गएउं ह।

आपन सेवक, मोका तलास करा,
अउर मई तोहरे आगयन क बिसरा नाही हउँ।

मन्दिर क आरोहण गीत।

१२० मई संकटे मँ पड़ा रहेउँ,
सहारा पावइ बरे मई यहोवा क
गोहराएउँ

अउर उ मोका बचाइ लिहस।

२ हे यहोवा, मोका तू अइसे लोगन स बचावा
जउन मोर खिलाफ झूठ बोलेन ह।

३ अरे ओ झूठो, का तू उ जानत अहा
कि परमेस्सर तोहका कइसे सजा देइ ?

४ तू पचन्क दण्ड देइ बरे परमेस्सर जोद्धा क
नोकांदा र तीर

अउ धधकत भए अंगारन क काम मँ लाइ।

५ झूठो, तोहरे निचके रहब अइसा अहइ जइसे कि
मेसेक मँ रहब।

इ रहब अइसा अहइ माना कि कउनो केवार क
तम्बू मँ रहब बा।

६ जउन सान्ति क दुस्मन अहइ,
अइसे लोगन क संग बहोत लम्बी समई तलक रहा
हउँ।

७ मई इ कहे रहेउँ मोका सान्ति चाही।

मुला उ पचे जुद्ध चाहत ही।

मन्दिर क आरोहण गीत।

१२१ मई ऊपर ऊँच पहाड़न क कइँती
लखत हउँ।

मुला फुरइ मई कहाँ स पावइ ?

२ मोका तउ सहारा यहोवा स मिली
जउन सरग अउ धरती क बनावइवाला अहइ।

३ परमेस्सर तोहका गिरइ नाही देइ।

तोहर बचवइया कबहुँ भी नाही सोइ।

४ इस्राएल क उद्धारकर्ता कबहुँ न ही ओघात ही
अउर न ही सोवत अहइँ।

५ यहोवा तोहार रच्छक अहइ।

उ तोहका आसुर्य देइ बरे तोहार बगल मँ अहइ।

६ दिन क समइ सूरज तोहका हानि नाही पहाँचाइ
सकत।

राति मँ चाँद तोहार नोस्कान नाही कइ सकत।

७ यहोवा तोहार रच्छा हर संकट स करी।

यहोवा तोहरी आतिमा क रच्छा करी।

८ यहोवा उ सबइ पइ धियान रखी जउन कछू तू
करब्या।

जहाँ कहुँ भी तू जाब्या अउ आउब्या, अबहुँ अउ
सदा सर्वदा उ तोहार रच्छा करी।

दाऊद क एक टु आरोहण गीत।

१२२ जब लोग मोसे कहेन,
“आवा, यहोवा क मन्दिर मँ चली तब
मई बहोत खुस भएउँ।”

२ हिआँ हम यरूसलेम क दुआरन पइ खड़ा अही।

३ यरूसलेम नगर एक टु

संगठित नगर नाई बनि गवा ह।

४ उ उ जगहिया बा जहाँ उ परिवार समूह जात
रहेन, जउन यहोवा क परिवार समूह अहइ,

काहेकि इ इस्राएल क लोग दुआरा यहोवा क
धन्यवाद देइ क नेम अहइ।

५ इ उहइ जगहिया बा जहाँ दाऊद क परिवार क
राजा लोगन आपन सिंहासन कायम किहेन।

उ पचे आपन सिंहासन लोगन क निआउ करइ बरे
कायम किहेन।

६ तू यरूसलेम मँ सान्ति हेतु बिनती करा।

“अइसे लोग जउन तोहसे पिरिम राखत हीं हुआँ
रच्छा मँ रहा।

७ तोहरे परकोटन क भितरे सान्ति फइल जाइ,
तोहरे बिसाल भवनन मँ सुरच्छा बनी रहइ।”

८ मई पराथना करत हउँ आपन भाइयन अउ
साधियन बरे

कि हुवाँ सान्ति क बास होइ।

९ यहोवा हमरे परमेस्सर क मन्दिर क भले बरे,

मई पराथना करत हउँ कि इ नगर मँ भली बातन
घटित होई।

आरोहण गीत।

१२३ हे परमेस्सर, मई आँखी उठाइके
तोहार पराथना करत हउँ।

तू सरग मँ राजा क रूप मँ बिराजत अहा।

२ दास लोग आपन सुआमियन क ऊपर ओन
चिजियन बरे आसरे पइ रहा करत हीं, जेकर
ओनका जरूरत अहइ।

दासियन आपन सुआमिनियन क ऊपर आसरे पइ
रहा करत हीं।

इहइ तरह हमका यहोवा हमरे परमेस्सर तब तलक
लखत हउँ

जब तलक उ हम पइ दाया देखवइ।

३ हे यहोवा, हम लोगन पइ कृपालु ह्वा।

हम लोगन पइ दयालु ह्वा काहेकि बहोत लम्बी
समइ स हम लोगन क अपमान होत अहइ।

४ घमण्डी लोग बहोत दिनन स

हम लोगन क अपमानित कइ चुका अहइँ।

दाऊद क एक मन्दिर क आरोहण गीत ।

- १२४** १ अगर यहोवा हमरे संग नाहीं होतेन
तउ इस्राएल क कहइ द्या,
२ अगर यहोवा हमरे संग नाहीं होत,
जब हमार बिरोधी हम लोगन पइ हमला किहे
रहेन ?
३ तब हमार दुस्मन हमका जिअत ही निगल गए
होतेन
जब उ पचे गुस्सा भए रहेन ।
४ तब हमार सत्‌रुअन क फउजन
बाढ़ क तरह हमका बहावत भइ
उ नदी क जइसी होइ जातिन जउन हमका बोरत
रही होइ ।
५ तब उ सबइ घमण्डी लोग उ पानी जइसे होइ
जातेन
जउन हमका बोरत भवा हमरे मुँहना तलक बाढ़त
आवति होइ ।
६ यहोवा क गुण गावा ।
उ हमरे दुस्मनन क हमका धरइ नाहीं दिहस अउर
न ही मारइ दिहस ।
७ हम पचे जालि मँ फँसा भवा उ पँछी जइसा रहेन
जउन फुनि बचि निकरा होइ ।
जालि फाटि फुट गवा अउर हम बचिके निकरे ।
८ यहोवा जउन सरग अउ धरती क बनाएस ह ।
हमार मदद किहेस ।

आरोहण गीत ।

- १२५** १ जउन लोग यहोवा क भरोसे रहत
हीं, उ पचे सिय्योन क पहाड़ जइसे
होइहीं ।
ओनका कबहुँ कउनो डुगाइ नाहीं पाई ।
उ पचे सदा ही अटल रइहीं ।
२ यहोवा आपन लोगन क वइसे ही आपन आसुर्य
मँ लिहस ह, जइसे यरूसलेम चारिहुँ कइँती
पहाड़न स घिरा बाटइ ।
यहोवा सदा-सर्वदा आपन लोगन क रच्छा करी ।
३ बुरे लोग भले लोगन क धरती क ऊपर राज्ज
नाहीं कइ सकिहीं,
अगर बुरे लोग अइसा करइ लग जाई तउ होइ
सकत ह सज्जन लोग भी बुरा काम करइ
लागइ ।
४ हे यहोवा, भले लोगन क संग भला करा,
जेनकर मन बेकसूर अहइ ।
५ मुला यहोवा ओन लोगन क सजा देइ

जउन दुट्ट मनई क संग ओनका मानइ तजि
दिहस ह ।

हुवाँ इस्राएल मँ सान्ति रहइ द्या ।

आरोहण गीत ।

- १२६** १ जब यहोवा सिय्योन क लोगन क कैद
स वापिस लिआइ
तउ इ कउनो सपना क नाई होइ ।
२ तब हम पचे हँसत रहत होब अउ खुसी क गीत
गावत रहत होब ।
तब दूसर रास्टर क लोग कहत रहत रहब,
“यहोवा ओकरे बरे महान कार्य किहस ह ।”
३ यहोवा हम लोगन बरे एक अद्भुत करम किहे
होतेन,
तउ हम पचे बहोत खुस होतेन ।
४ हे यहोवा, हमका रेगिस्तान मँ बहत रहे
जलधारन क नाई,
कैद स वापिस लिआवा ।
५ जउन कउनो रोवत भए बिआ बोवत ह,
मुला उ कटनी क समइ खुसी क गीत गाउब ।
६ जउन कउनो आँसुअन क संग बिआ लइके जात
ह,
उ पचे जब फसल लिआवत हीं तउ आनन्दित होत
हीं ।

सुलैमान क मन्दिर क आरोहण गीत ।

- १२७** १ अगर घर क निर्माता खुद यहोवा
नाहीं अहइ,
तउ घरे क बनावइ वाला बेकार समइ गँवावत ह ।
अगर सहर क रखवाला खुद यहोवा नाहीं अहइ,
तउ रखवारे बेकार समइ गँवावत हीं ।
२ अगर भिन्सारे जागिके तू देर राति तलक काम
करा ।
एह बरे कि तू सबन्क बस खइया बरे कमाइ क
अहइ,
तउ तू पचे बेकार समइ गँवावत ह ।
परमेस्सर आपन भगतन क ओनके सोवत तलक मँ
धियान रखत ह ।
३ गदेलन यहोवा क उपहार अहउँ ।
गदेलन क जनम माता बरे ओकर उपहार अहइ ।
४ जवान मनई क पूत
जोद्धा क हाथन मँ बाण क नाई होत हीं ।
५ जउन मनई बाण रूपी पूतन स तरकस क भरत
ह
उ बहोत खुस होइ ।
उ मनई कबहुँ हारी नाहीं ।

ओकर पूत आपन दुस्मनन स सार्वजनिक
जगहियन पइ ओकर रच्छा करिहीं।

आरोहण गीत।

१२८ १ जउन कउनो यहोवा क सम्मान करत
हीं धन्न अहई।

उ पचे ओकरे राहन पइ चलत हीं।

२ तू पचे जेनके बरे काम किहा ह, ओन चिजियन क
तू आनन्द लेब्या।

ओन अइसी वस्तुअन क कउनो भी मनई तू सबन्स
नाहीं छोरी।

तू पचे खुस रहब्या अउर तोहरे संग भली बातन
घटिहीं।

३ घरे पइ तोहार घरवाली अंगूरे क बेल क नाई
फलवती होइ।

मेज क चारिहुँ कइती तोहार संतानन अइसी
होइहीं, जइसे जइतून क उ सबइ वृच्छ
जेनका तू रोप्या ह।

४ जउन मनई यहोवा क सम्मान करत हीं उ वइसा
ही धन्न अहई।

५ यहोवा सिय्योन स तोहका आसीस दइ।

जीवन भर यरूसलेम मँ तोहका वरदानन क
आनन्द मिलइ।

६ तू आपन नाती पोतन क लखइ बरे जिअत रहा।
इ मोर कामना अहइ।

इस्राएल मँ सान्ति रहइ।

मन्दिर क आरोहण गीत।

१२९ १ पूरी जिन्नगी भइ मोर अनेक दुस्मन
रहेन ह।

इस्राएल क धोसना करइ द्या

२ पूरी जिन्नगी भइ मोर अनेक दुस्मन रहेन ह।

बहोत सारे दुस्मन मोह पइ हमला किहन।

मुला उ पचे हमका हराइ नाहीं पाएन।

३ उ पचे मोका तब तलक पीटेन जब तलक मोरी
पिठिया पइ गहिर घाव नाहीं बनेन।

मोरे बड़का बड़का अउर गहिर घाव होइ गएन।

४ मुला यहोवा उ किहेस जउन नीक रहा अउर
रस्सा काट दिहस।

उ मोका ओन दुट्ट लोगन स अजाद किहस।

५ ओन सबइ क जउन सिय्योन स घिना करत ह
हारइ द्या,

उ पचन क खदेइइ द्या।

६ उ सबइ लोग अइसे रहेन, जइसे कउनो घरे क
छत पइ क घास

जउन उगइ स पहिले ही मुरझाइ जात ह।

७ उ घसिया स कउनो मजदूर आपन मूठी तलक
नाहीं भरि पावत

अउर इ गठरी पुलंदा बनाइ बरे भी प्रयाप्त नाहीं
होइ।

८ अइसे ओन दुट्ट जनन क लगे स जउन लोग
गुजरत हीं।

उ पचे नाहीं कइहीं, “यहोवा तोहार भला करइ।”

उ पचे नाहीं कइहीं, “हम तू पचन्क यहोवा क नाउँ
पइ आसीस देत अही।”

आरोहण गीत।

१३० १ हे यहोवा, मई गहिर कस्ट मँ हउँ
तउ सहारा पावइ क मई तोहका
गोहरावत हउँ।

२ मोर सुआमी, तू मोर सुनि ल्या।

मोर मदद क गोहार पइ कान द्या।

३ हे यहोवा, अगर तू लोगन क ओनकर सबहिं
पापन्क सचमुच सजा द्या

तउ फुन कउनो भी बच नाहीं पाइ।

४ मुला तू, यहोवा, आपन लोगन क छिमा करा ;

तउ उ लोग तोहार सम्मान करिहीं।

५ मई यहोवा क बाट जोहत अहउँ कि उ मोका
मदद देइ।

मोर आतिमा ओकरी प्रतीच्छा मँ अहइ।

यहोवा जउन कहत ह ओह पइ मोर भरोसा अहइ।

६ मई आपन सुआमी क बाट जोहत हउँ।

मई उ रच्छक जउन उसा क अवाई क प्रतीच्छा
मँ लगा रहत ह स जियादा उत्सुकता स
ओकर प्रतीच्छा किहस।

७ इस्राएल, यहोवा पइ बिस्वास करा।

काहेकि सिरिफ उ ही बिस्ससनीय पिरेम देत ह।

उ हमरी बार बार रच्छा किया करत ह।

८ उ इस्राएल क ओनके सारे पापन स बचाइ।

आरोहण गीत।

१३१ १ हे यहोवा, मई घमण्डी या अभिमानी
नाहीं हउँ।

मई महत्वपूर्ण होइ क जतन नाहीं करत हउँ।

मई उ काम करइ क जतन नाहीं करत हउँ।

जउन मोरे बरे बहोत अदभुत अहई।

२ बदले मँ, मई आपन आतिमा क सान्त अउ चुप
कइ दिहे हउँ।

मोर आतिमा आपन महतारी क बाँहे मँ

एक संतुट्ट गदेली क नाई अहइ।

३ इस्राएल, यहोवा पइ भरोसा रखा।

ओकर भरोसा रखा।

अउर अब सदा सदा ही ओकर भरोसा रखा ।

मन्दिर क आरोहण गीत ।

१३२

१ हे यहोवा, जइसे दाऊद यातना भोगे रहा, ओका याद करा ।

२ मुला दाऊद यहोवा स एक सपथ लिहेस ।
दाऊद याकूब क सक्तिसाली परमेस्सर क एक मन्त माने रहा ।

३ दाऊद कहे रहा : “मई आपन घरे मँ तब तलक न जाब,

आपन बिछुटना पइ न ही ओलरब, न ही सोउब ।

४ मई आपन आँखिन क नाही सोवइ देव ।

अउर आपन पलकन क बन्द नाही होइ देव ।

५ एहमाँ स मई कउनो बात भी नाही करब जब तलक मई यहोवा बरे एक घर न प्राप्त कइ लेउँ ।

मई याकूब क सक्तिसाली परमेस्सर बरे एक ठु मन्दिर पाइ क रहब ।”

६ एपूराता मँ हम दाऊद क वचन क बारे मँ सुनेउँ ।
हमका किरियथ योरीम क वन मँ करार क सन्दूख मिली रही ।

७ आवा, पवित्तर तम्बू मँ चला ।

आवा, ओकरे सिंहासन क समन्वा आराधना करी ।

८ हे यहोवा, आपन आराम क जगह स उठा,
अउ करार क सन्दूख संग होआ जहाँ तू सक्ति क संग सासन करत ह ।

९ हे यहोवा, तोहार याजक धरम क भावना क धारण किया करी ।

तोहर बिस्सासी भगतन बहोत खुस रही ।

१० तू आपन चुने भए राजा क आपन सेवक दाऊद क भले बरे

जिन अस्वीकार करा ।

११ यहोवा दाऊद क एक वचन दिहेस ह जेका उ कबहुँ नाही तोड़िही ।

उ वचन दिहेस ह कि दाऊद क बंस स राजा अइहीं ।

१२ यहोवा कहे रहा, “अगर तोहार संतानन मोर करार पइ अउर मई ओनका जउन सिच्छन सिखाइन ओन पइ चलिहीं

तउ फुन तोहरे परिवार क कउनो न कउनो सदा ही राजा रही ।”

१३ आपन मन्दिर क जगह बरे यहोवा सिय्योन क चुने रहा ।

इ उ जगह अहइ जेका उ आपन भवन बरे चाहत रहा ।

१४ यहोवा कहे रहा, “इ मोर जगह सदा-सदा बरे होइ ।

मई एका आपन जगह पइ रहइ बरे चुनेउँ ह ।”

१५ भरपूर भोजन स मई इ सहर क आसीबाद देव,
हिआँ तलक कि गरीब लोगन क लगे खाइ क भरपूर होइ ।

१६ ओकरे याजकन क उद्धार क मई ओढ़ना पहिराउब ।

मोर भगत बहोत खुस होइहीं ।

१७ इ जगह पइ मई हिआँ दाऊद क परिवार क सुदृढ करब ।

मई आपन चुने भए राजा क एक दीपक स्थापित करब ।

१८ मई दाऊद क दुस्मनन क लज्जा स ढाँपि देव ।

अउर दाऊद क राज्ज क चमकाउब ।

दाऊद क आरोहण गीत ।

१३३

१ इ फुरइ नीक अउ सुखदायी अहइ जब भाइयन आपुस मँ मिलिजुलिके रहइ ।

२ इ वइसे महकउआ तेल जइसा होत ह जेका हारून क मूँड़ी पइ उड़ेरा गवा रहा ।

इ, उ तेल जइसा होत ह जउन हारून क दाढ़ी क पइ बहत होइ ।

इ, उ तेल जइसा होत ह जउन हारून क खास ओढ़नन पइ बहत रहा ।

३ इ उ कोमल बर्खा क बूँदन क समान अहइ जउन हेर्मान क पहाड़ी स आवति ही अउ सिय्योन क पहाड़ पइ गिरत ही,

काहेकि हुवई यहोवा आपन अनन्तकालीन जिन्नगी क आसीस दिहे रहा ।

आरोहण क गीत ।

१३४

१ यहोवा क बड़कई करा, ओकरे सब सेवको,

जउन सारी राति मन्दिर मँ सेवा किह्या ।

२ हे सेवको, पवित्तर ठउर मँ आपन हाथन उठावा अउर यहोवा क बड़कई करा ।

३ यहोवा तोहका सिय्योन स आसीस देइ ।

यहोवा सरग अउ धरती रचेस ह ।

१३५

१ यहोवा क बड़कई करा ।

हे यहोवा क सेवको,

यहोवा क नाउँ क बड़कई करा ।

२ तू लोग मन्दिर मँ खड़ा अहा ।

यहोवा क नाउँ क बड़कई करा ।

तू लोग मन्दिर क आँगन मँ खड़ा ह्वा ।

ओकरे नाउँ क बड़कई करा ।

३ यहोवा क बड़कई करा काहेकि उ खरा अहइ ।

ओकरे नाउँ क गुण गावा काहेकि उ आन्नदायक अहइ ।

४ यहोवा याकूब क चुने रहा ।

इस्राएल परमेस्सर क अहइ ।

५ मई जानत हउँ, यहोवा महान अहइ ।

हमार सुआमी दूसर देवन स महान अहइ ।

६ यहोवा जउन कछू चाहत ह सरग मँ, अउर धरती पइ,

समुदर मँ या गहिर महासागरन मँ, करत ह ।

७ यहोवा धरती पइ सब कहूँ बादरन क रचत ह ।

उ बिजुरी अउ बर्खा क रचत ह ।

उ हवा क ओकर जगह स निकारत ह ।

८ परमेस्सर मिस्र मँ मनइयन अउ गोरुअन क सबहिँ पहिलउटी बच्चन क नास कइ दिहस ।

९ यहोवा मिस्र मँ बहोत स अद्भुत अउर अचरज भरे कामन किहस ।

उ फिरौन अउ ओकरे सब अधिकारियन क खिलाफ अद्भुत बातन क दिखाएस ।

१० परमेस्सर बहोत स देसन क हराएस ।

परमेस्सर बलवान राजा लोगन क मारेस ।

११ यहोवा एमोरियन क राजा सीहोन क हराइ दिहस ।

उ बासान क राजा ओग क हराएस ।

उ कनान क सारी राज्जन क हराएस ।

१२ यहोवा ओनका ओनकर धरती क अधिकार क रूप मँ दिहस, उ इस्राएल क स्थाई रूप स लेइ बरे दिहस ।

१३ हे यहोवा, तू सदा बरे प्रसिद्ध होब्या ।

हे यहोवा, लोग तोहका सदा सर्वदा याद करत रइहीं ।

१४ काहेकि यहोवा आपन लोगन बरे निआव लावत ह

अउर उ आपन सेवकन प तरस खात ह ।

१५ दूसर रास्ट्रन क लोग बस सोना अउर चाँदी क देवता बनावत रहेन ।

ओनकर देवता मात्र लोगन क जरिये बनाए भए पुतलन रहेन ।

१६ पुतलन क मुँइ अहइ, पर बोल नाहीं सकतेन ।

पुतलन क आँखी अहइ, पर लखि नाहीं सकतेन ।

१७ पुतलन क कान अहइ, पर ओनका सुनाई नाहीं देत ।

पुतलन क नाक अहइ, पर उ पचे साँस नाहीं लेइ सकतेन ।

१८ उ सबइ लोग जउन एँन पुतलन क बनाएन, ओन पुतलन क समान होइ जइहीं ।

काहेकि उ सबइ लोग ओन पइ बिस्वास किहेन ह ।

१९ इस्राएल क संतानन, यहोवा क बड़कई करा ।
हारून क संतानन, यहोवा क बड़कई करा ।

२० हे लेवी क संतानन, यहोवा क बड़कई करा ।

तू जउन यहोवा क सम्मान दिहा, यहोवा क बड़कई करा ।

२१ यहोवा यरूसलेम मँ बास करत ह,
सिय्योन स ओकर स्तुति होइ ।

१३६ यहोवा क बड़कई करा, काहेकि उ उत्तिम अहइ ।

ओकर बिस्ससनीय पिरम सदा ही बना रहत ह ।

२ देवतन क परमेस्सर क बड़कई करा ।

ओकर बिस्ससनीय पिरम सदा बना रहत ह ।

३ पर्भुअन क पर्भु क बड़कई करा ।

ओकर बिस्ससनीय पिरम सदा बना रहत ह ।

४ परमेस्सर क गुण गावा ।

बस उहइ एक अहइ, जउन बहोत अद्भुत करम करत ह ।

ओकर बिस्ससनीय पिरम सदा बना रहत ह ।

५ ओकर बड़कई करा, जउन आपन बुद्धि स आकास क रचेस ह ।

ओकर बिस्ससनीय पिरम सदा बना रहत ह ।

६ परमेस्सर सागर क बीच मँ झुरान धरती क कायम किहस ।

ओकर बिस्ससनीय पिरम सदा बना रहत ह ।

७ परमेस्सर महान ज्योतियन क रचेस ।

ओकर बिस्ससनीय पिरम सदा बना रहत ह ।

८ परमेस्सर सूरज क दिन पइ हुकूमत करइ बरे बनाएस ।

ओकर बिस्ससनीय पिरम सदा बना रहत ह ।

९ परमेस्सर चाँद तारन क बनाएस कि उ पचे रात पइ हुकूमत करइ ।

ओकर बिस्ससनीय पिरम सदा बना रहत ह ।

१० उ मिस्र मँ पहिलउटी मनइयन अउर जनावरन क मारेस ।

ओकर बिस्ससनीय पिरम सदा बना रहत ह ।

११ परमेस्सर इस्राएल क मिस्र स बाहेर लइ आवा ।

ओकर बिस्ससनीय पिरम सदा बना रहत ह ।

१२ परमेस्सर आपन सामरथ अउ आपन महासक्ती क परगट किहेस ।

ओकर बिस्ससनीय पिरम सदा ही बना रहत ह ।

१३ परमेस्सर लाल सागर क दुइ हींसा मँ फाड़ेस ।

ओकर बिस्ससनीय पिरम सदा ही बना रहत ह ।

१४ परमेस्सर इस्राएल क सागर क बीच स पार उतारेस ।

ओकर बिस्ससनीय पिरम सदा ही बना रहत ह ।

१५ परमेस्वर फिरौन अउ ओकर फउज क लाल सागर मँ बोरि दिहस ।
 ओकर बिस्ससनीय पिरम सदा ही बना रहत ह ।
 १६ परमेस्वर आपन निज भगतन क रेगिस्तान मँ राह देखाँएस ।
 ओकरे बिस्ससनीय पिरम सदा ही बना रहत ह ।
 १७ परमेस्वर बलवान राजा क हराएस ।
 ओकर बिस्ससनीय पिरम सदा ही बना रहत ह ।
 १८ उ सदृढ़ राजा लोगन क मारेस ।
 ओकर बिस्ससनीय पिरम सदा ही बना रहत ह ।
 १९ परमेस्वर एमोरियन क राजा सीहोन क मारेस ।
 ओकर बिस्ससनीय पिरम सदा ही बना रहत ह ।
 २० परमेस्वर बासान क राजा ओग क मारेस ।
 ओकर बिस्ससनीय पिरम सदा ही बना रहत ह ।
 २१ उ आपन भुइँया क मीरास क रूप मँ दइ दिहस ।
 ओकर बिस्ससनीय पिरम सदा ही बना रहत ह ।
 २२ उ उ भुइँया क आपन सेवक इस्राएल क अधिकार क रूप मँ दिहस ।
 ओकर बिस्ससनीय पिरम सदा ही बना रहत ह ।
 २३ उ हमका याद राखेस, जब हम लोगन क हरा दीन्ह गवा रहेन ।
 ओकर बिस्ससनीय पिरम सदा ही बना रहत ह ।
 २४ उ हमका हमरे दुस्मनन स मुक्त किहेस ।
 ओकर बिस्ससनीय पिरम सदा ही बना रहत ह ।
 २५ परमेस्वर हर एक क खइया क देत ह ।
 ओकर बिस्ससनीय पिरम सदा ही बना रहत ह ।
 २६ सरग क परमेस्वर क गुण गावा ।
 ओकर बिस्ससनीय पिरम सदा ही बना रहत ह ।
१३७ १ बाबुल क नदियन क किनारे बइठिके हम सिय्योन क याद कइके रोइ पड़ेन ।
 २ हम लगिचे क बेंत क झाड़ियन पइ आपन सबइ वीणा टाँगेन ।
 ३ बाबुल मँ जउन लोग हमका बन्दी बनाए रहेन, उ पचे हम से गावइ क कहेन ।
 अत्याचारियन हम से खुसी क गीत गावइ क कहेन ।
 उ पचे कहेन, “हमरे बरे सिय्योन क गीत गावा ।”
 ४ मुला हम यहोवा क गीतन क कउनो दूसर देस मँ कइसे गाइ सकित ह ।
 ५ हे यरूसलेम, अगर मइँ तोहका बिसरउँ, तउ मइँ बिसरि जाउँ कि कइसा गीत गाइ जात ह ।
 ६ हे यरूसलेम, अगर मइँ तोहका याद न रखेउँ, अगर मइँ बड़ा खुसी क जइसा बेउहार न करेउँ, तउ मइँ कउनो गीत गावइ मँ असमर्थ रहेउँ ।

७ हे यहोवा, याद करा एदोमियन उ दिना जउन किहे रहेन ।
 जब यरूसलेम हार ग रहा, उ पचे चीखिके बोले रहेन, एँका चीर डावा अउर नेंव तलक एका बर्बाद करा ।
 ८ हे बाबुल, तोहका उजार दीन्ह जाइ ।
 उ मनई क धन्य कहा जउन तोहका उ सजा देइ जउन तोहका मिलइ चाही ।
 उ मनई क धन्य कहा जउन तोहका उ मुसीबत देइ जइसा तू हमका मुसीबत दिहे रहा ।
 ९ उ मनई क धन्य कहा जउन तोहरे गदेलन क चट्टान पइ झपटिके पछार देइ ।

दाऊद क एक ठु पद ।

१३८ १ हे परमेस्वर, मइँ आपन पूर्ण मन स तोहार गीत गावत हूँ ।
 मइँ सबहिं देवन क समन्वा मइँ तोहार पद गाउव ।
 २ हे परमेस्वर, मइँ तोहरे पवित्तर मन्दिर कइँती दण्डवत करव ।
 मइँ तोहरे नाउँ क बड़कई करव,
 काहेकि तोहार बिस्ससनीय पिरम सच्चा अउर पिआरा अहइ,
 अउर काहेकि तू आपन वचन क आपन महान सक्ति स किहा ह ।
 ३ हे यहोवा, जब मइँ मदद पावइ बरे तोहार पराथना करेउँ तउ मीका जवाब द्या ।
 तू मीका बल देइके मोर साहस बढ़ाया ।
 ४ हे यहोवा, धरती क सबहिं राजा तोहार अच्छाई क गुण गावइँ ।
 जब उ पचे तोहार वचन क सुनिहीं ।
 ५ उ पचे यहोवा क स्तुति करइँ,
 काहेकि यहोवा क महिमा महान अहइ ।
 ६ काहेकि यहोवा महान अहइ,
 मुला उ अबहुँ तलक विन्रम मनई क धियान रखत ह ।
 उ घमण्डी लोगन क कामन क पता दूर स ही जानत हीं ।
 ७ हे यहोवा, अगर मइँ संकट मँ पड़उँ तउ मीका जीवित रहइ द्या ।
 अगर मोर दुस्मन मोह पइ किरोध करइँ तउ ओनसे मीका बचावा ।
 ८ यहोवा उ सबइ बातन क करी जेनका उ मीका वचन दिहेस ह ।
 हे यहोवा, तोहार बिस्ससनीय पिरम सदा ही बना रहत ह ।

हे यहोवा, तू हमका रच्या ह।
तउ तू हमका जिन बिसरा।

संगीत निर्देशक बरे वाद्य यंत्र क
संग दाऊद क एक ठु गीत।

१३१

१ हे यहोवा, तू मोका जाँच्या ह।

मोरे बारे में तू सब कछू जानत अहा।

२ तू जानत अहा कि मई कब बइठत अउ कब खड़ा
होत हउँ।

तू दूर रहत भए मोरे मन क बात जानत अहा।

३ हे यहोवा, तू जानत ह कि मई कहाँ जात अउ
कहाँ ओलरत हउँ।

तू बहोत अच्छी तरह जानत ह जउन कछू मई
करत हउँ।

४ हे यहोवा, एहसे पहिले क सब्द मोरे मुख स
निकलइ

तोहका पता होत ह कि मई का कहइ चाहत हउँ।

५ हे यहोवा, तू मोरे चारिहुँ कइती मौजूद अहा।

मोरे समन्वा भी अउर पाछा भी, तू आपन निज
हाथ मोरे ऊपर हौले स रखत अहा।

६ मोका अचरज अहइ ओन बातन पइ जेनका तू
जानत अहा।

जेनका मोरे बरे समुझब बहोत कहिन अहइ।

७ हर जगह जहाँ भी मई जात हउँ हुआँ तोर
आत्मा होत ह।

हे यहोवा, मई तोहसे बचिके कहँ नाही जाइ
सकत।

८ हे यहोवा, अगर मई आकासे पइ जाब हुआँ पइ
भी तू ही अहा।

अगर मई मउत क देस पाताल मँ जाब हुआँ पइ
तू ही अहा।

९ अगर मई पूरब मँ जहाँ स सूरज निकरत ह,

अगर मई समुद्र क पीछे रहब,

१० हुआँ तलक भी तोहार दायँ हाथ पहाँचत ह।

तू मोका आपन हाथ स धइके अगुवाइ करत ह।

११ होइ सकत ह मई सोचउँ कि तोहसे छुपा अहउँ
अउर कहइ लागूँ,

“दिन रात मँ बदल गवा ह।

निहचय ही अँधियारा मोका ढाँपि लेइ।”

१२ मुला यहोवा अँधेरा भी तोहरे बरे अँधेरा नाही
अहइ।

हिआँ तलक कि तोहरे बरे रात भी दिन जइसी ही
उजरी अहइ,

काहेकि दुइनउँ अँधेरा अउर उजियारा तोहार
समान अहइ।

१३ तू मोर देह क अन्दरुनी भाग क बनाया ह।

तू मोका आपन महतारी क कोख मँ ही रचे रहा।

१४ हे यहोवा, मई तोहका ओन सबहिँ अचरज भरे
काम बरे धन्यवाद देत हउँ जउन रास्ते स तू
मोका बनाया ह,

अउर मई सचमुच जानत हउँ कि तू जउन कछू
करत अहा उ अचरजे स पूर्ण अहइ।

१५ जब मई आपन महतारी क कोख मँ रहा

अउर मोरे देह गुप्त रूप मँ रूपधारण करत रहेन
तबहिँ तू मोर हाइन क लख्या।

१६ तू मोरी देह क मोरी महतारी क गर्भ मँ बनत
भए लख्या।

अउर मोर सरीर क सबइ हीसा जउन दिन ब दिन
बनत रहा, उ सबइ क बनइ स पहिले तोहार
किताब मँ लिखा भवा रहेन।

१७ तोहार विचारन मोरे बरे बहोत कीमती अहइँ।
उ गिनती मँ बहोत जियादा अहइँ।

१८ तू जउन कछू जानत अहा, ओन सब क अगर
मई गन सकउँ, तउ उ सबइ सबहिँ धरती क
रेत क कणन स भी जियादा होइहीं।

जद्यपि अगर मई लगातार जगा रहेउँ, तउ भी मई
ओनकर बरे तोहरे साथ गना जाब।

१९ हे परमेस्सर, दुर्जन क नस्ट करा।

तू हत्यारन, मोसे दूर रहा।

२० उ पचे बुरे लोग तोहरे बरे बुरी बातन कहत हीं।
तोहार दुस्मन झूठ स तोहार नाउँ लेत ह।

२१ हे यहोवा, मोका ओन लोगन स घिना अहइ
जउन तोहसे घिना करत हीं।

मई ओन लोगन स घिना करत हउँ जउन तोहार
खिलाफ बिद्रोह करत ह।

२२ मोका ओनसे पूरी तरह घिना अहइ।

तोहार दुस्मन मोर भी दुस्मन अहइँ।

२३ हे परमेस्सर, मोका जाँच्या अउर मोर मन जान
ल्या।

मोका परख्या अउर मोर चिन्तन क जान ल्या।

२४ मोह पइ निगाह करा अउर लखा कि मोर लच्छ
बुरे नाही अहइँ।

तू मोका उ पथ पइ लइ चला जउन अनन्तकाल स
परगट अहइ।

संगीत निर्देशक बरे दाऊद क एक ठु स्तुति।

१४० हे यहोवा, दुट्ट लोगन स मोका
बचावा।

क र लोगन स मोर रच्छा करा।

२ उ सबइ लोग नोस्कान पहाँचावइ कुचक्र रचत
वाटेन।

उ सबइ लोग सदा ही लइ जात हीं।

३ ओन लोगन क जिभियन अइसन तेज वाटइ
जइसे साँप ।

ओन लोगन क सब्दन साँप क बिख क नाई अहइ ।
(सेला)

४ हे यहोवा, तू दुट्ट लोगन स मोर रच्छा करा ।

कूरर लोग स मोर रच्छा करा ।

उ सबइ मोर पाछे, मोका खाले मँ लोकइ बारे
अहई ।

५ ओन घमण्डी लोग मोरे बारे फँदा ड्राएन ।

मोका फँसावइ क उ पचे जाली फइलाएन ह ।

उ पचे मोर राहे मँ फँदा लगाएन ।

६ किन्तु मई यहोवा क स्वीकार किहेउँ, तू मोर
परमेस्सर अहा ।

हे यहोवा, मोर पराथना सुना ।

७ हे यहोवा मोर सुआमी, तू मोर मजबूत
उद्धारकर्ता अहा ।

तू मोर मूँडे क टोप जइसा अहा ।

जउन मोर मूँड क जुद्ध मँ बचावत ह ।

८ हे यहोवा, दुट्ट लोगन क इच्छा क पूरी न होइ
द्या ।

ओनकर कउनो जोजना क सफल जिन होइ द्या,
वरना उ पचे घमण्डी होइ जाइहीं ।

९ मोरे दुस्मनन जउन मोका घेरि लिहेस बुरा
जोजनन बनावत ह ।

ओनकर बुरा जोजनन ओनही क मुँडन पइ गिरइ
द्या ।

१० ओनके मूँडे पइ दहकत अंगारन क उडेर द्या ।

मोरे दुस्मनन क आगी मँ झोंकि द्या ।

ओनका गड़हन (कब्रन) मँ लोकाइ द्या ।

उ पचे ओहसे कबहुँ बाहेर न निकरि पावई ।

११ ओन कूरर बोलइवालन क इ धरती मँ स्थापित
जिन होइ द्या ।

उ हिंसक लोगन क संग बुरी बातन बार-बार घटइ
द्या ।

१२ मई जानत हउँ यहोवा कंगालन क निआउ
खराइ स करी ।

परमेस्सर असहायन क सहायता करी ।

१३ हे यहोवा, सच्चे लोग तोहरे नाउँ क स्तुति
करिहीं ।

इमानदार लोग तोहार समन्वा बास करिहीं ।

वाद्य यंत्र क दुआरा बजा

भवा दाऊद क एक ठु गीत ।

१४१ हे यहोवा, मई तोहका मदद पावइ बारे
गोहरावत हउँ ।

जब मई गोहराएउँ तब तू मोर सुनि ल्या ।

मोका मदद हाली करा ।

२ मोर बिनती तोहार समन्वा बरत धूप क उपहार
क तरह होइ ।

मोर बिनती तोहार बारे दीन्ह गइ साँझ क बलि
जइसी होइ ।

३ हे यहोवा, मोरी वाणी पइ मोर काबू होइ ।

आपन वाणी पइ मई धियान रख सकउँ, एहमाँ मोर
सहायक ह्या ।

४ मोका बुरी बात जिन करइ द्या ।

मोका रोके रहा बुरे लोगन क संगति स ओनकर
सरस भोजन स अउर बुरे कामन स ।

मोका सामिल जिन होइ द्या अइसे ओन कामन मँ
जेनका करइ मँ बुरे लोग रख लेत हीं ।

५ सज्जन लोगन क मोर सुधार करइ द्या ।

इ दयालुता क काम क नाई होइ ।

तोहार भगतन क मोर बुराई क निकारइ द्या ।

इ मोर मुँडे बारे अभिसेक क तेल क नाई होइ ।

मुला मोर पराथना दुट्ट लोगन क कुकर्मन क
खिलाफ अहइ ।

६ ओनकर राजा लोगन क सजा पावइ द्या

अउर तब लोग जान जइहीं कि मई सच कहे रहेउँ ।

७ लोग खेत क खोदके जोता करत हीं अउर माटी
क एहर-ओहर छितराइ देत हीं ।

ओन दुट्ट लोगन क हाइन भी इहइ तरह कबरन
क चारिहूँ तरफ एहर-ओहर छितरइहीं ।

८ हे यहोवा, मोर सुआमी, सहारा पावइ क मोर
निगाह तोहे पइ लगी अहइ ।

मोका तोहार भरोसा अहइ ।

कृपा कइके मोका जिन मरइ द्या ।

९ मोका दुट्टन क फँदन मँ जिन पइइ द्या ।

ओन दुट्टन क जरिये मोका जिन पँसाइ द्या ।

१० उ सबइ दुट्ट खुद आपन फँदन मँ फँसि जाई

जब मई बचिके निकर जाउँ बगैर नोस्कान उटाए
भए ।

दाऊद क एक कला गीत ।

१४२ मई मदद बारे यहोवा क गोहराएउँ ।
मई यहोवा क समन्वा पराथना किहेउँ
ह ।

२ मई यहोवा क समन्वा आपन दुःख रोउब ।

मई यहोवा स आपन कठिनाइयन कहब ।

३ मोर दुस्मनन मोरे बारे जाल बिछाएन ह ।

मई आसा छोरइ बारे तइयार अहउँ ।

मुला यहोवा जानत अहइ कि मोरे संग का घटत
अहइ ।

४ मोर चारिहूँ कइती नज़र करा अउ लखा,

कउनो मीत कहूँ भी देखौत नाही अहइ ।
हिआँ बचइ क कउनो जगह नाही बा ।
कउनो मनई मोका बचावइ क जतन नाही करत
अहइ ।

५ एह बरे मई यहोवा क मदद बरे गोहराएउँ ह ।
मई कहेउँ, "हे यहोवा, तू मोर सरणस्थल अहा ।
तू ही अकेल्ले मोर जिन्नगी मँ एक स्रोत अहइ ।"

६ हे यहोवा, मोर पराथना क जवाब दया,
काहेकि मोर बहोत दुर्दसा होइ गवा ह ।
तू मोका ओन लोगन स बचाइ ल्या जउन मोर
पाछा करत ह

काहेकि उ पचे मोहे स जियादा मजबूत अहइ ।
७ मोका सहारा द्या कि इ कैद स पराइ जाउँ
अउर तोहार नाउँ क स्तुति कइ सकेउँ ।
सच्चे लोगन मोर चारिहुँ कइँती इकट्टा होइहीं ।
उ पचे आपस मँ मिलिहीं अउर तोहार गुणगान
करिहीं काहेकि तू मोर रच्छा किहा ह ।

वाद्य यंत्र क दुआरा बजा
भवा दाऊद क एक ठु गीत ।

१४३ हे यहोवा, मोर पराथना सुना ।
मोर विनती सुना अउर फुन एकर
जवाब द्या ।

मोका जवाब दया, काहेकि तू फुरइ भला अउ खरा
अहा ।

२ आपन दास मोह पइ निआव जिन करा,
इ कारण कि कउनो भी जिअत मनई तोहरे समन्वा
निदोख नाही ठहर सकत ।

३ मोर दुस्मन मोरे पाछे पड़ा अहइँ ।
उ मोर जिन्नगी चकनाचूर कइके धूरि मँ मिलाएन ।
उ पचे मोका बहोत दिन क मुरदे क समान
आँधिअर कबर मँ ढकेलत अहइ ।

४ मई निरास होत हउँ ।
मोर साहस छूटत अहइ ।
५ मुला मोका उ सबइ बातन याद अहइँ,
जउन बहोत पहिले घटी रहिन ।
मई ओन अद्भुत कामन क बारे मँ सोचा करत हउँ
जेनका तू किहे रह्या ।

६ हे यहोवा, मई आपन हाथ उठाइके तोहार विनती
करत हउँ ।

मई तोहरी मदद क बाट जोहत हउँ जइसे झुरान
धरती बर्खा क बाट जोहत ह । (सेला)

७ हे यहोवा, मोका हाली जवाब द्या ।
मई कमजोर होत रहत हउँ ।
मोका नजर अन्दाज़ जिन करा ।

मोका ओन लोगन क जइसा जिन होइ द्या, जउन
कबर मँ ओलरा होइँ ।

८ हे यहोवा, मोर क फूटत ही मोका आपन
बिस्ससनीय पिरैम देखाँवा ।

मई तोहरे भरोसे हउँ ।
उ सबइ बातन मँ मोर अगुवाइ जेनका मोका करइ
चाही,

काहेकि मई मदद बरे तोहका लखत हउँ ।
९ हे यहोवा, मोरे दुस्मनन स रच्छा पावइ बरे मई
तोहरी सरण मँ आवत हउँ ।

तू मोका बचाइ ल्या ।
१० सिच्छा द्या, तू मोहसे का करवावइ चाहत
अहा ?

काहेकि तू मोर परमेस्सर अहा ।
तोहार नीक आतिमा क जमीन क तल क ऊपर मोर
अगुवाइ करइ द्या ।

११ हे यहोवा, मोका तोहार नाउँ बरे
जिअत रहइ द्या ।
मोका मुसीबत स बाहर निकारा
काहेकि तू नीक अहा ।

१२ हे यहोवा, मोह पइ आपन बिस्ससनीय पिरैम
परगट करा ।

अउर मोर सत्तरुअन क नस्ट करा
जउन मोका मारइ क जतन करत हीं ।
काहेकि मई तोहार सेवक हउँ ।

दाऊद क गीत ।

१४४ हे यहोवा मोर चट्टान अहइ ।
यहोवा क धन्य कहा ।

यहोवा मोका लड़ाई बरे प्रसिच्छण देत अहइ ।
यहोवा मोका जुद्ध बरे प्रसिच्छण देत अहइ ।

२ यहोवा मोसे पिरैम रखत ह ।
उ मोर किला अहइ ।

उ पर्वत क ऊपर, मोर ऊँच सुरच्छा क सरण अहइ ।
उ मोका बचावत ह ।

उ मोर ढाल अहइ ।
मई ओकरे भरोसे हउँ ।

उ मोरे लोगन पइ राज्ज करइ मँ मोर मदद करत
ह ।

३ हे यहोवा, मानव जाति तोहरे बरे काहे महत्वपूर्ण
बना अहइँ ?

तू मानव जाति पइ काहे धियान देत अहा ?
४ मनई क जिन्नगी एक फूँक क तरह होत ह ।
मनई क जिन्नगी ढलत भइ छाया क तरह होत
ह ।

५ अकासे क चीरके खाले उतरि आवा ।

पहाड़न क छुड़ ल्या ताकि ओनसे धुआँ उठइ
लाग ।

६ हे यहोवा, बिजुरियन पठइ या अउर मोरे
दुस्मनन क कहूँ दूर भगाइ या ।

आपन बाणन क चलोवा अउर ओनका मजबूर करा
कि उ पचे कहूँ पराई जाई ।

७ अकासे स मदद पठवा अउर मोका मुक्त करा
अउ मोका बचाइ ल्या ।

एन, दुस्मनन क सागर मँ मोका जिन बूड़इ या ।
मोका एँन बिदेसियन स बचाइ ल्या ।

८ इ सबइ दुस्मन लवार अहई ।
उ पचे धोखेबाज अहई ।

९ हे यहोवा, मई नवा गीत गाउव तोहरे ओन
अद्भुत कर्मन क तू जेनका करत ह ।

मई तोहार जस दस तार वाली वीणा पइ गाउव ।

१० तू राजा लोगन क मदद ओनकर जुद्धन जीतइ
मँ करत ह ।

तू आपन सेवक दाऊद क ओकरे दुस्मनन क
तरवारन स मुक्त किहा ह ।

११ मोका एँन परदेसियन स मुक्त करा अउ मोका
बचाइ ल्या ।

इ सबइ दुस्मन लवार अहई ।

उ पचे धोखेबाज अहई ।

१२ हमार पूतन जवान होइके बिसाल वृच्छन जइसे
मजबूत होई ।

हमार बिटियन महल क सुन्नर सजावटी कोने क
पाथर जइसी होई ।

१३ तोहार गोदाम

फसलन स भरपूर होई ।

हमार भेड़िन चरागाहन मँ

हजारन-हजारन मेमनन जनमत रहई ।

१४ हमार बर्धन बहोत स पइदावार ढोइहीं ।

हम पइ कउनो दुस्मन हमलान न करी ।

हम मँ स कउनो कबहूँ जुद्ध मँ नाही जाई ।

हमार गलियन मँ चिचियाहट नाही होई ।

१५ जउन लोगन बरे इ बातन नीक अहई उ धन्य
अहई ।

जउन लोगन परमेस्सर यहोवा अहइ उ धन्य
अहई ।

दाऊद क एक ठु स्तुति गीत ।

१४५ हे मोरे परमेस्सर, हे मोरे राजा, मई
तोहार गुण गावत हूँ ।

मई सदा-सदा तोहरे नाउँ क धन्य कहत हूँ ।

२ मई हर दिन तोहका सराहत हूँ ।

मई तोहरे नाउँ क सदा-सदा बड़कई करत हूँ ।

३ यहोवा महान अहइ ।

ओकर बहोत स्तुति होइ चाही ।

मई उ सबइ चिजियन क पता नाही लगाइ सकव
जउन उ करत ह ।

४ पीढ़ी दर पीढ़ क ओन बातन क गरिमा क बखानइ
या जेनका तू सदा-सर्वदा करत ह ।

अउर ओनका तोहार सक्तिसाली करमन क
घोसणा करइ या ।

५ तोहरे महिमामय प्रताप सुन्नर अहइ ।

मई तोहरे अचरज भरे करमन क बखानव ।

६ लोगन क ओन अचरज भरा सक्ती क बारे मँ
कहइ या जेनका तू करत ह ।

मई ओन महान करमन क बखानव जेनका तू करत
ह ।

७ लोगन क उ बहोत सारी नीक बातन क बारे मँ
कहइ या जउन तू किहा ह ।

उ पचे तोहार सच्चाई क बारे मँ कहिहीं ।

८ यहोवा दयालु अहइ अउर करुणा स पूर्ण अहइ,
उ धीरज अउ पिरम स पूर्ण अहइ ।

९ यहोवा सब क बारे भला अहइ ।

उ जउन सबइ कछु रचेस ह ओकरे प्रति करुणा
प्रगट करत ह ।

१० हे यहोवा, ओनका जेका तू रच्या ह तोहार
बड़कई करइ या ।

तोहका तोहार भगत धन्य कहत हीं ।

११ उ सबइ लोग तोहरे महिमा स भरा राज्ज क
बखान करत रहत हीं ।

ओनका तोहरी सक्त क बारे मँ कहइ या ।

१२ ताकि सबइ मानव जाति ओकरे सक्तिसाली
करमन बारे मँ

अउर ओकरे राज्ज क महिमामय प्रताप क बारे
मँ जानई ।

१३ हे यहोवा, तोहार राज्ज सदा सदा बना रही ।

तू सर्वदा राज्ज करब्या ।

१४ यहोवा गिरे भए लोगन क उठावत ह ।

यहोवा ओन लोगन क उठावत ह जउन बोझन क
ढोवत ह ।

१५ सबहिं प्राणी तोहरी कइँती खाना पावइ बरे
लखत हीं ।

तू ओनका ठीक समइ पइ खइया क देत रहत ह ।

१६ तू आपन मूठी खोलत ह,

अउर तू सबहिं प्राणियन क ओकरे जरूरत क
चिजियन स संतुट्ट करत अहा ।

१७ जउन कछु यहोवा करत ह उ नीक बाटइ ।

यहोवा जउन भी करत ओहमाँ निज बिस्ससनीय
पिरम प्रकट करत ह ।

१८ यहोवा हमेसा ओन लोगन क निचके रहत ह
जउन इमानदारी क संग यहोवा स मदद क बिनती
करत ह ।

१९ यहोवा क भगत जउन ओहमे चाहत हीं, उ ओन
वातन क करत ह ।

यहोवा आपन भगतन क सुनत ह ।

उ ओनकर पराथनन क जवाब देत ह अउर ओनकर
रच्छा करत ह ।

२० यहोवा ओन सबइ क जउन ओह स पिरेम करत
ह, क रच्छा करत ह ।

किन्तु उ हर टुट्ट क नस्ट करत ह ।

२१ मइ यहोवा क गुण गाउब ।

हर कउनो ओकर पवित्तर नाउँ क सदा अउ सर्वदा
स्तुति करइ द्या ।

१ यहोवा क गुणगान करा ।

२ मइ आपन जिन्नगी भइ यहोवा क गुण गाउब ।

मइ जब तलक जिअब आपन परमेस्सर बरे संगीत
बजावत रहब ।

३ आपन प्रमुखन क भरोसे जिन रहा ।

मदद पावइ बरे मनई क भरोसे जिन रहा, काहेकि
तोहका मनई बचाइ नाही सकत ह ।

४ लोग मर जात हीं अउर दफनाइ दीन्ह जात हीं ।
फुन ओनकर मदद देइ क सबहिं जोजना यूँ ही
चली जात हीं ।

५ ओनका धन्य होइ जउन याकूब क परमेस्सर क
आपन सहायक क रूप में राखेस ह ।

ओनका धन्य होइ जउन यहोवा आपन परमेस्सर
क भरोसे रहा करत हीं ।

६ उ सरग अउ धरती क बनाएस ह ।

उ सागर अउर ओहमाँ क हर चिजियन क बनाएस
ह ।

उ हमेसा विस्सासी रही ।

७ उ सताया भवा लोगन क संग उचित बेउहार
करत ह ।

उ भुखान लोगन क भोजन देत ह ।

यहोवा बन्दी लोगन क छोड़ाइ दिया करत ह ।

८ यहोवा आँधर क आँखियन क खोलि दिहेस ।

यहोवा ओन लोगन क सहारा देत ह जउन ठोकर
खाएन हीं ।

यहोवा सच्चे लोगन स पिरेम करत ह ।

९ यहोवा हमरे देस में रहइवालन बिदेसियन क
रच्छा करत ह ।

यहोवा अनाथन अउ राँड मेहरून क धियान
रखत ह ।

किन्तु दुर्जनन क मकसदन क विफल करत ह

१० यहोवा सदा राजा क रूप में सासन करत रहइ ।
हे सिय्योन तोहार परमेस्सर पीढ़ी दर पीढ़ी राज
करत रहइ ।

यहोवा क गुणगान करा ।

१ यहोवा क बड़कई करा काहेकि उ
१४७ नोक अहइ ।

हमरे परमेस्सर क स्तुति क गीत गावा,
काहेकि इ नोक अहइ अउ ओकरे बरे सुखदायी
अहइ ।

२ उ यहोवा अहइ जउन यरूसलेम क बनाएस ह ।
उ उहइ जउन ओन लोगन क एक संग जमा किहेस

ह जेनका इस्राएल स तितर-बितर कीन्ह
गावा रहा ।

३ परमेस्सर ओनकर टूटे मनवा क चंगा करत रहत
अउर ओनकर धावन पइ पट्टी बाँधत रहा ।

४ परमेस्सर तारन क गनत ह
अउर हर एक तारा क नाउँ जानत ह ।

५ हमार सुआमी बहोत महान अउर सक्तीसाली
अहइ ।

ओकरे गियान क सीमा न अहइ ।

६ यहोवा दीन लोग क सहारा देत ह ।
उ दुट्ट लोगन क खाले मैं हींच लेत ह ।

७ गाइके यहोवा क धन्यवाद द्या ।

हमरे परमेस्सर क गुणगान वीणा क संग करा ।

८ उ बादरन स अकासे क ढाँपत ह ।

उ धरती पइ बर्खा करावत ह ।

उ पहाड़न पइ हरी घास क उगावत ह ।

९ उ गोरूनन क अउर नान्ह कउनन क
जउन ओकरे मदद बरे गोहरावत हीं, चारा देत ह ।

१० ओका जुद्ध क घोड़न

अउर सक्तीसाली सैनिक नाही भावत हीं ।

११ यहोवा ओन लोगन स प्रसन्न होत ह, जउन
ओकर सम्मान करत हीं ।

यहोवा प्रसन्न अहइ, अइसे ओन लोगन स
जेनकर आस्था ओकरे सच्चे पिरेम में अहइ ।

१२ हे यरूसलेम, यहोवा क गुण गावा ।

सिय्योन, आपन परमेस्सर क बड़कई करा ।

१३ हे यरूसलेम, तोहरे फाटकन क परमेस्सर सुदृढ़
बनावत ह ।

तोहरे नगर क लोगन क परमेस्सर असीस देत ह ।

१४ परमेस्सर तोहार देस क सान्ति स आसीस देत
ह,

एह बरे तोहरे लगे खाइ बरे अनाज क ढेर अहइ ।

१५ परमेस्सर धरती क आदेस देत ह

अउर ओकर आदेस क फउरन पालन होत ह ।

- १६ परमेस्वर धरती पड़ तब तलक पाला गिरावत जब तलक धरातल वइसा सफेद नाही होइ जात जइसा उज्जर ऊन होत ह ।
उ बर्फ क छोटा टूकन क हवा क संग धूरि क नाई उड़त ह ।
- १७ परमेस्वर ओलन क अइसा बनावत ह मानो पाथरन अकासे स गिरत हीं ।
कउनो मनई उ ठिठुरन क नाही सह सकत ह जउन ओकरे दुआरा भेजा जात ह ।
- १८ फुन परमेस्वर दूसर आग्या देत ह, अउर गरम हवा फुन बहइ लग जात ह ।
बर्फ टेघरइ लागत अउर जल बहइ लग जात ह ।
- १९ परमेस्वर आपन आदेस याकूब क दिहे रहा ।
परमेस्वर इस्राएल क निज विधि क विधान अउ नेमन क दिहस ।
- २० यहोवा कउनो दूसर रास्ट्र क बरे अइसा नाही किहस ।
परमेस्वर आपन नेमन क, कउनो दूसर जाति क नाही सिखाएस ।
यहोवा क जस गावा ।
- १ यहोवा क बड़कई करा ।
१४८ ओकर बड़कई सरग स करा ।
२ हे सबहिं सरगदूतो, यहोवा क जस गावा ।
ग्रहो अउ नछुतरो ओकर गुण गान करा ।
३ सूरज अउ चाँद, तू पचे यहोवा क गुण गावा ।
अकासे क तारो अउ जोतियो, ओकर बड़कई करा ।
४ यहोवा क बड़कई सबन त ऊँच पर्वत मँ करा !
हे जल अकासे क ऊपर, ओकर बड़कई करा ।
५ यहोवा क नाउँ क बड़कई करा ।
काहेकि उ आदेस दिहस, अउर सब कछू रचे रहा ।
६ उ एँन सबन्क बनाएस एह बरे उ सबइ सदा-सदा बना रहइँ ।
उ अपरिवर्तनसील कानून बनाएस ।
७ ओ धरती पड़ क हर वस्तु, यहोवा क गुण गावा ।
ओ बिसाल जन्तुओ अउ सबइ महासागरो, ओकर गुण गावा ।
८ आगी अउ ओलन, बरफ अउ कुहासा, तूफानी पवन जउन ओकर वचन क पूरा किहेन, ओकर गुण गावा ।
९ पर्वतन अउ सबइ पहाड़न, फलदार वृच्छ अउ देवदार क वृच्छ, ओकरे गुण गावा ।
१० बनेर पसुअन अउ सब पालतु मवेसी, रेंगइवाले जीव अउ पंछियन, ओकर गुण गावा ।
११ धरती क सबहिं राजा लोग अउ सबइ रास्ट्रन,

- प्रमुखन अउ धरती पड़ क सबहिं निआवाधीसन, ओकर स्तुति करा ।
- १२ नव जवान मनसेधू अउ नव जवान मेहरारू, ओकर स्तुति करा ।
परमेस्वर बूढ़े लोगन अउ गदेलन क रचेस ह ।
- १३ ओनका यहोवा क नाउँ क स्तुति करइ द्या ।
अकेल्ले ओकरे नाउँ ही ऊँच सम्मानित अहइ ।
धरती अउ अकास ओकर चमक-दमक स भरि जाइहीं ।
- १४ उ आपन लोगन क मजबूती क स्रोत क निर्माण किहस ।
उ आपन सबइ भगतन अरथ इस्राएलियन, अउ ओकरे समीप रहइवाले रास्ट्रन बरे, स्तुति क स्रोत क निर्माण किहस ।
यहोवा क बड़कई करा ।
- १ यहोवा बरे एक ठु नवा गीत,
१४९ ओन नई बातन क बारे मँ गावा जेनका यहोवा किहस ह ।
ओकरे भगतन क मण्डली मँ ओकर गुणगान करा ।
२ इस्राएलियन क आपन रचनाकर्ता मँ खुसी मनावइ द्या ।
सिय्योन क लोगन आपन राजा क संग आनन्द मनावइ द्या ।
३ उ सबन क ओकरे नाउँ क स्तुति नाच क संग करइ द्या
अउर उ पचन क तंबूरा अउ वीणन क ओकरे पराथना बरे बजावइ द्या ।
४ यहोवा आपन लोगन स खुस अहइ ।
उ पीड़ितन क बचावइ स उद्धार किहस ।
५ परमेस्वर क भगतन क विजय उत्सव मनावइ द्या ।
हिआँ तलक कि बिछोना पड़ जाए क पाछे, भी उ पचन क खुसी मनावइ द्या ।
६ ओनका परमेस्वर क विजय क जयजयकार करइ द्या ।
ओनका आपन मँ तेज तरवारन क धारण करइ द्या ।
७ तउ उ पचे दूसर रास्ट्रन स बदला लेइ सकइँ अउर ओन लोगन क सजा देइ सकइँ ।
८ परमेस्वर क लोग ओन राजा लोगन क बाँधेइँ, ओकर सज्जन लोगन क जंजीरे स बाँधेइँ ।
९ परमेस्वर क लोग ओनकर निआव परमेस्वर क आदेसन क अनुसार करिहीं ।
ओकरे सबहिं बिस्सासी भगतन क ओका सम्मान देइ क बिसेस अधिकार प्राप्त अहइ ।
यहोवा क स्तुति करा ।

१५० १ यहोवा क बड़कई करा ।
 परमेस्सर क मन्दिर में ओकर गुणगान
 करा ।
 आकासे में ओकर बड़कई करा जउन ओकर सक्ति
 दिखावत ह ।
 २ ओकर ओन बड़के कारजन बरे ओकर बड़कई
 करा ।
 ओकर सबहि महानता बरे ओकर स्तुति करा ।
 ३ तुरही फूँकत अउ नरसिंहा बजावत भए ओकर
 स्तुति करा ।
 ओकर गुणगान वीणा अउ सारंगी बजावत भए
 करा ।

४ तम्बूरन बजाइके अउ नाचिके ओकर स्तुति
 करा ।
 तारवाला यंत्रन अउर बाँसुरियन बजाइके ओकर
 गुण गावा ।
 ५ तू परमेस्सर क जस झंकारत भए झाँझन क
 बजावत गावा ।
 ओकर बड़कई करा ।
 ६ सबइ जिअत पराणियन यहोवा क स्तुति करई ।
 यहोवा क बड़कई करा !